

नायाधम्मकहाओ ।

NĀYĀDHAMMAKAHĀO

[*The Sixth Aṅga of the Śvetāmbara Jain Canon*]

critically edited

by

N. V. VAIDYA,

M. A.

Fergusson College, Poona

1940



POONA

नायाधम्मकहाओ ।

NĀYĀDHAMMAKAHĀO

[*The Sixth Āṅga of the Śvetāmbara Jain Canon*]

critically edited

by

N. V. VAIDYA,

M. A.

Fergusson College, Poona

1940

POONA

First Edition

[Price :-- Indian:: Rs. Five.
Foreign : Shillings 7/6; \$ 2.00]

Printed by Lakshman Narayan Chapekar at the Aryasanskriti Press,
198(17) Sadashiv, Tilak Road, Poona 2, and published by
Prof. N. V. Vaidya, M.A., Fergusson College, Poona 4.

PREFACE

The present edition was undertaken two years back. When I undertook it, I had no idea that the text alone would cover so many pages. Again, owing to the out-break of war, the cost of paper has gone very high, and I had, therefore, to give up the idea of adding notes, index and commentary for the present. The Commentary, however, will be printed soon, and issued separately.

The editor acknowledges his indebtedness to the University of Bombay, for the substantial financial help it has granted towards the cost of the publication of this book.

I must also acknowledge with gratitude the help that I received from Prin. R. D. Karmarkar, M. A. from time to time. His advice and help were very useful to me on more than one occasion.

I have also to thank my students Mr. S. L. Hirve, B. A. and Mr. S. S. Deshpande, B. A. for doing most of the copying work. To Mr. Chapekar and Mr. Vaze, of the Ārya Sanskriti Press, and to Mr. Barve of the Āryabhushan Press, my thanks are due for having done the work neatly and satisfactorily.

I only hope that the work would be of some use to those who are working in the field of Prakrits, and Jain Literature.

Fergusson College, }
Poona 4

N. V. VAIDYA.



INTRODUCTION

The present edition of Nāyādhammakahāo is based on the following five manuscripts from the Bhandarkar Oriental Research Institute :—

C. No. 124

32

1869 - 70

SIZE.—10" by 4 $\frac{3}{8}$ ". EXTENT.—155 Folios, 13 lines to a page (sometimes 15 lines) ; 40 to 45 letters to a line.

DESCRIPTION.—Country paper thick and greyish, Devanāgarī characters with गृधमात्राs; big, legible and good hand-writing; condition on the whole good; complete; extent 5500 ślokas. AGE.—Old.

BEGINS.—Fol. 1^b श्रीजिनाय नमः ॥ तेणं कालेणं तेणं समएणं चंपा नामं नयरी होत्था । वन्नओ । तीसे णं चंपाए नयरीए etc.

ENDS.—Fol. 155^b सव्वदुक्खाण (णं) अंत (तं) काहीति ॥ एवं खलु जंबू निक्खेवगो ॥ दसमस्स वग्गस्स दसमो वग्गो सम्मत्तो ॥ छ ॥ १० एवं खलु जंबू समणेणं भगवया महावीरेणं आयगरेणं (तित्थगरेणं) सय (यं) स (सं) बुद्धेणं पुरिसोत्तमेणं पुरिससीहेणं जाव संपत्तेणं धम्मकहाणं अयमट्ठे पन्नत्ते ॥ धम्मकहासूय (क्) खंधो समत्तो दसहिं वग्गेहि नायाधम्मकहाउ समत्ता ॥ छ ॥ इति श्रीज्ञाताधर्मकथा समाप्ता ॥ १५००

D. No. 126

193

1871 - 72

SIZE.—9 $\frac{7}{8}$ in. by 4 $\frac{3}{8}$ in. EXTENT.—103 + 1 = 104 folios; 15 lines to a page; 60 letters to a line.

DESCRIPTION.—Country paper rough, tough and greyish; Devanāgarī characters with occasional गृधमात्राs; small, legible and very fair hand-writing; complete; extent 5750 ślokas. AGE.—Samvat 1625.

BEGINS.—Fol. 1^b तेणं कालेणं तेणं समएणं चंपा etc.

ENDS.—Fol. 103^a सव्वदुक्खाण etc., upto धम्मकहाओ as in No. 124 followed by सम्मत्ताउ । छ । इति श्रीज्ञाताधर्मकथांगसूत्र समाप्तः ॥ छ etc. ग्रंथाग्रं श्लोकसंख्या ५७५० ॥ छ ॥ संवत् १६२५ वर्षे श्रावणमासे शुक्लपक्षे सप्तमीदिने शुक्रवासे ' सारंगपुर ' नगरे पटनार्थे पंडितश्रीश्रुतनिधानस्य ॥ छ etc.

A No. 127

192

1871-72

SIZE.—10 in. by $4\frac{3}{8}$ in. EXTENT.—221-1+2+2-2=222 folios; 11 lines to a page, 34 letters to a line.

DESCRIPTION.—Country paper thick, rough and greyish; Devanāgarī characters with occasional पृष्ठमात्रा; big, quite legible and elegant hand-writing. AGE.—Old.

BEGINS.—Fol. 3^a तं जहा । णाया [णिय] धम्मकहाउ । पढम [ण] स्स भंते सुय (क्) खंघस्स समणेण etc.

ENDS.—Fol. 221^a सव्वदुक्खाणं etc., upto नायाधम्मकहाओ as in No. 124 followed by सम्मत्ताउ । छ etc. श्रीज्ञाताधर्मकथांग छठ (ढ्) मंगं सम्मत्तं छ । ग्रंथाग्रं ५६२७ [७] (५६७७ ?) छ etc. Then we have in a different hand :—ग्या (ज्ञा) नाभ्यासी वरद्धमानं सएस कराणिपरीग्रह उपरथी मोषगरणकी ... वेचवाथी लेइ जई पाछी ते अरीहंत सिद्ध

B No. 128

790

1895-1902

SIZE.— $10\frac{1}{4}$ in. by $4\frac{3}{8}$ in. EXTENT.—193 folios; 11 lines to a page; 40 letters to a line.

DESCRIPTION.—Country paper rough and white; Devanāgarī characters with पृष्ठमात्रा; big, legible and good handwriting; AGE.—Samvat 1661.

BEGINS.—Fol. 1^b ओ नम (:) सर्वज्ञाय ।
तेणं कालेणं तेणं समएणं चंपा etc.

ENDS.—Fol 193^a सव्वदुक्खाणं, etc., up to छठमंगं सम्मत्तं as in No. 127 followed by छ ग्रंथाग्रं ५२५० ॥ छ । etc., भम्र etc., जलाद्रक्षे etc., संवत् १६६१ वर्षे भाद्रपदमासे कृष्णपक्षे द्वादशि तिथौ बृहत्प (स्प) तिवासरे शक्तिपुरस्थाने दुनी १८७ चंदलिखितं etc.

E. No. 129

430

1882-83

SIZE.—10 in. by $4\frac{1}{4}$ in. EXTENT.—147-3=144 folios; 11 lines to a page; 48 letters to a line.

DESCRIPTION.—Country paper thin and greyish; Devanāgarī characters with occasional पृष्ठमात्रा; bold, clear, and beautiful hand-writing; Extent 6000 Ślokas.

AGE.—Samvat 1686.

AUTHOR OF THE COMMENTARY.—Abhayadeva Sūri.

BEGINS.—(text) fol. 4^a ग्रं बुद्धिविनाशेण । तस्स सुमिणस्स अत्यागह
करेइ । २ ता धारिणि देवि ताहि जाय हियय etc.

—(Com.) fol. 4^a एवं खलु ति । एवंरूपादुक्तफलसाधनसमर्थात्त्वप्राहारकपुनर-
निव्यसति संबंधः etc.

ENDS.—(text) fol. 147^a सव्वदुक्खाणमंत.....एवं खलु जंबू etc.,
upto जाव ठाणं संपत्ताणं as in No. 124 followed by छ । धम्मकहासुय (कू)
खंधो सम्मत्तो । छ दसहि व (गे)हि नायधम्मकहाओ सम्मत्ताओ ॥ ग्रंथाग्रं ६००० ॥
शुभं भवतु ॥ संवत् १६८६ वर्षे भाद्रवा सुदि ५ दिने ॥ श्री 'विकानेर' मध्ये लिषत.

(Com.) fol. 141^b अत एव वरकवर्जितेति etc., up to सिद्धेयं, followed
by the lines :—प्रत्यक्षरं निरूप्यास्य ग्रंथमानं विनिश्चितं ।

अनुष्ठमां सहस्राणि त्रीणि सप्त शतानि च ॥ १२ (१३ ?).

[Vide :—The descriptive catalogue of MSS. at the B. O.
R. I. compiled by Prof. H. R. Kapadia, M. A. Part I. Pages :—
113 to 125.]

Out of these, MS. C is the best. It is written in a uniformly
beautiful hand and is very accurate. MSS. A and D were
collated only for five chapters, but it was found that they did
not give any independently good reading. MS. A is written
shabbily and MS. D is spoiled, as many folios have stuck to-
gether, and the ink has spread. So MSS. C, B. and E alone were
collated for the text.

A word of explanation is necessary for giving all the vari-
ants at the end. Practically all the variants are merely
orthographical. There are hardly any variants that change
the sense. That clearly shows that the traditional text has been
faithfully handed down. The 'त' श्रुति, which is a characteristic
of some MSS., is absent in MS. C.

N. B. Sūtras (41) and (42) on pages 50, and 51, should be
numbered as (42 A), and (42 B) respectively. As the error was
detected too late, it was thought advisable not to disturb
the order.

There are many imperfections in the present edition. An
index, for instance, is absolutely necessary for these texts.
But for various reasons I could not add it to the present
Volume. I intend, however, to get it published in some Journal.

॥ नायाधम्मकहाओ ॥

ॐ नमः सर्वज्ञाय ।

- (1) तेणं कालेणं तेणं समएणं चंपा नामं नयरी होत्था । वण्णओ ।
(2) तीसे णं चंपाए नयरीए बहिया उत्तरपुरत्थिमे दिसीभाए पुण्ण-
भदे नामं चेइए होत्था । वण्णओ ।
(3) तत्थ णं चंपाए नयरीए कोणिए नामं राया होत्था । वण्णओ ।
(4) तेणं कालेणं तेणं समएणं समणस्स भगवओ महावीरस्स अंते-
वासी अज्जसुहम्मे नामं थेरे जाइसंपन्ने कुलसंपन्ने बल्लरूवविणयनाण-
दंसणचारित्तालाघवसंपन्ने ओयंसी तेयंसी वच्चंसी जसंसी जियकोहे
जियमाणे जियमाए जियलोहे^३ जिइदिए जियनिहे जियपरीसहे
जीवियासामरणभयाविप्पमुक्के तवप्पहाणे गुणप्पहाणे एवं चरणकरण-
निग्गहनिच्छयअज्जवमद्वलाघवखंतिगुत्तिमुत्तिविज्जामंतबंभवयनयनि-
यमसच्चसोयनाणदंसणचारित्तर्पहाणे उराले घोरे घोरव्वए घोरतवस्सी
घोरबंभचेरवासी उच्छ्रद्धसरीरे संखित्तविउलतेउल्लेसे चोइसपुव्वी चउ-
नाणोवगए पंचहिं अणगारसएहिं सद्धिं संपरिवुडे पुव्वानुपुव्वि चर-
माणे गामाणुगामं दूइज्जमाणे सुहंसुहेणं विहरमाणे जेणेव चंपा नयरीं
जेणेव पुण्णभदे चेइए तेणामेव उवागच्छइ २ ता अहापडिरूवं उगगहं
ओगिण्हित्ता संजमेणं तवसा अप्पाणं भावेमाणे विहरइ ।

(5) तए णं चंपाए नयरीए परिसा निग्गया । कोणिओ निग्गओ । धम्मो
कहिओ । परिसा जामेव दिंशिं पाउब्भूया तामेव दिंशिं पडिगया । तेणं
कालेणं तेणं समएणं अज्जसुहम्मस्स अणगारस्स जेठे अंतेवासी अज्ज-
जंबू नामं अणगारे कासवगोत्तेणं सत्तुस्सेहे जाव अज्जसुहम्मस्स थेरस्स
अदूरसामंते उडुंजाणू अहोसिरे ज्ञाणकोट्टोवगए संजमेणं तवसा
अप्पाणं भावेमाणे विहरइ । तए णं से अज्जजंबूनामे जायसहे जाय-

संसए जायकोउहले संजायसङ्गे संजायसंसए संजायकोउहले उप्पन्नसङ्गे
उप्पन्नसंसए उप्पन्नकोउहले समुप्पन्नसङ्गे समुप्पन्नसंसए समुप्पन्नकोउ-
हले उट्ठाए उट्ठेइ २ जेणामेव अज्जसुहम्मे थेरे तेणामेव उवागच्छइ २
अज्जसुहम्मे थेरे तिव्वुत्तो आयाहिणं पयाहिणं करेइ वंदइ नमंसइ २
अज्जसुहम्मस्स थेरस्स नच्चासन्ने नाइदूरे सुस्सूसमाणे नमंसमाणे अभि-
सुहे पंजलिउडे विणएणं पज्जुवासमाणे एवं वयासी—जइ णं भंते ! सम-
णेणं भगवया महावीरेणं आइंगरेणं तित्थगरेणं सयंसंबुद्धेणं पुरिसुत्त-
मेणं पुरिससीहेणं पुरिसवग्घेणं पुरिसवरगंधहत्थिणा लोमुत्तमेणं लोगना-
हेणं लोगहिणं लोगपईवेणं लोगपज्जोयगरेणं अभयदएणं सरणदएणं
चक्खुदएणं मग्गदएणं बोहिदएणं धम्मदएणं धम्मदेसगेणं धम्मनायगेणं
धम्मसारहिणा धम्मवरचाउरंतचक्कवट्ठिणा अप्पडिहयवरनानंदसणधरेणं
विचट्ठउमेणं जिणेणं जाणएणं तिण्णेणं तारएणं बुद्धेणं बोहएणं मुत्तेणं
मोयगेणं सव्वण्णेणं सव्वदरसिणा सिवमयलमरुयमणंतमक्खयमत्वावा-
हमपुणरावत्तियं सासयं ठाणमुवगएणं पंचमस्स अंगस्स अयमट्ठे
पन्नत्ते, छट्ठस्स णं भंते ! नायाधम्मकहाणं के अट्ठे पन्नत्ते ? जंबू त्ति
अज्जसुहम्मे थेरे अज्जजंबूनामं अणगारं एवं वयासी—एवं खलु
जंबू समणेणं भगवया महावीरेणं जाव संपत्तेणं छट्ठस्स अंगस्स दो
सुयक्खंधा पन्नत्ता, तंजहा—नायाणि य धम्मकहाओ य । जइ णं भंते !
समणेणं भगवया महावीरेणं जाव संपत्तेणं छट्ठस्स अंगस्स दो सुय-
क्खंधा पन्नत्ता तंजहा — नायाणि य धम्मकहाओ य, पढमस्स णं भंते !
सुर्यक्खंधस्स समणेणं जाव संपत्तेणं नायाणं कइ अज्झयणा पन्नत्ता ?
एवं खलु जंबू ! समणेणं जाव संपत्तेणं नायाणं एगूणवीसं अज्झयणा
पन्नत्ता, तंजहा - उक्खित्तणाए संघाडे अडे कुम्मे यं सेलगे । तुंबे यं रोहिणी
मल्ली भार्यदी चंदिमा इ य ॥१॥ दावहवे उदगणाए मंडुंके तेयली वि
य । नंदीफले अवरकंका आइन्ने सुंसुंभा इ य ॥२॥ अवरे थं पुंडरीए
नायए एगूणवीसइमे ।

(6) जइ णं भंते ! समणेणं जाव संपत्तेणं नायाणं एगूणवसिं

अज्झयणा पन्नत्ता, तंजहा—उक्खित्तणाए जाव पुंढरीए त्तिं य, पढमस्स णं भंते ! अज्झयणस्स के अट्ठे पन्नत्ते ? एवं खलु जंबू ! तेणं कालेणं २ इहेव जंबुदीवे दीवे भारहे वासे दाहिणद्धभरहे रायगिहे^१ नामं नयरे होत्था । वण्णओ । गुणसिलए चेइए । वण्णओ । तत्थ णं रायगिहे नयरे सेणिए नामं राया होत्था । वण्णओ । तस्स णं सेणियस्स रन्नो नंदा नामं देवी होत्था सुकुमालंपाणिपाया । वण्णओ ।

(7) तस्स णं सेणियस्स पुत्ते नंदाए देवीए अत्तए अभए नामं कुमारे होत्था अहीण जाव सुरुवे सामदंडभेयउवप्पयाणनीइसुप्पउत्तनय-विद्धिन्नू ईहापोहमग्गणगवेसणअत्थसत्थमइविसारए उप्पत्तियाए वेण-इयाए कम्मियाए पारिणामियाए चंउन्विहाए बुद्धीए उववेए सेणियस्स रन्नो बहुसु कज्जेसु य कुंडुंबेसु य मंतेसु य गुज्जेसु य रहस्सेसु य निच्छएसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू मेढीभूए पमाणभूए आहारभूए आलंबणभूए चक्खुभूए सव्वकज्जेसु सव्वभूमियासु लद्धपच्चए विइण्णावियारे रज्जधुरचित्तए यावि होत्था । सेणियस्स रन्नो रज्जं च रट्ठं च कोसं च कोट्टागारं च बलं च वाहणं च पुरं च अंतेउरं च सयमेव समुपेक्खमाणे २ विहरइ ।

(8) तस्स णं सेणियस्स रन्नो धारिणी नामं देवी होत्था जाव सेणियस्स रन्नो इट्ठा जाव विहरइ ।

(9) तए णं सा धारिणी देवी अन्नया कयाइ तंसि तारिस-गंसि लक्कट्टगलट्टमट्टसंठियखंभुग्गयपवरवरसालभंजियउज्जलमणिक्कणगरयणथूभियविडंकजालद्धचंदनिज्जूहकंतरकणयालिचंदसालियावि^१भंत्ति-कलिए सरसच्छंछाऊवलवण्णरइए बाहिरओ दूमियघट्टमट्टे अविंभत-रओ पसत्तिसुविलिहियचित्तकम्मे नाणाविहपंचवण्णमणिरयणकोट्टिमतले पडमंलयाफुल्लवलिवरपुप्फजाइउल्लोयचित्तियतले चंदंणवरकणगकलस-सुणिम्मियपडिपुज्जियसरसपउमसोहंतदारभाए पयरगलंबंतमणिमुत्तदा-मसुविरइयदारसोहे सुगंधवरकुसुममउयपम्हलसयणोवयारमणहियय-निवुइयरे कप्पूरलवंगमलयचंदणकालागरुपवरकुंदुरुक्तुसुक्कधूवडज्जंत-

सुरभिमघमघंतगंधुद्धुयाभिरामे सुगंधवरगंधिए गंधवट्टिभूए मणि-
 किरणपणासियंधयारे । किंबहुणा ? जुइगुणेहिं सुरवरविमाणवेलंबवर-
 घरए तंसि तारिसगंसि सयणिज्जांसि सालिंगणवट्टिए उभओ बिब्बोयणे
 दुहुओ उन्नए मज्झे णयगंभीरे गंगापुलिणवालुयाउद्दालसालिसए
 उयचियखोमदुगुल्लपट्टपडिच्छायणे अत्थरयमलयनवतयकुसत्तलिंबसीह-
 केसरपच्चुत्थए सुविरइयरयत्ताणे रत्तंसुयसंवुए सुरम्मे आइणगरूय-
 बूरनवणीयतुल्लफासे पुव्वरत्तावरत्तकालसमयंसि सुत्तजागरा ओहीर-
 माणी २ एगं महं सत्तुस्सेहं रययकूडसंन्निहं नहयलंसि सोमं सोमा-
 गारं लीलायंतं जंभायमाणं मुहमइगयं गयं पासित्ता णं पडिबुद्धा ।
 तए णं सा धारिणी देवी अयमेयारूवं उरालं कल्लाणं सिवं धन्नं
 मंगलं सस्सिरीयं महासुमिणं पासित्ता णं पडिबुद्धा समाणी हट्टतुट्ठा
 चित्तमाणंदिया पीइमणा परमसोमणस्सिया हरिसवसविसप्पमाण-
 हियया धाराहयकलंबपुप्फगं पिव समूससियरोमकूवा तं सुमिणं ओ-
 गिण्हइ २ सयणिज्जाओ उट्ठेइ २ पायपीढाओ पच्चोरूहंइ २ त्ता अतुरिय-
 मचवलमसंभंताए अविलंबियाए रायहंससरिसीए गईए जेणामेव
 से सेणिए राया तेणामेव उवागच्छइ २ त्ता सेणियं रायं ताहिं इट्ठाहिं
 कंताहिं पियाहिं मणुन्नाहिं मणामाहिं उरालाहिं कल्लाणाहिं सिवाहिं
 धन्नाहिं मंगल्लाहिं सस्सिरीयाहिं हिययगमणिज्जाहिं हिययपल्हाय-
 णिज्जाहिं मियमहुररिभियगंभीरं^{१३}सस्सिरीयाहिं गिराहिं संलवमाणी २
 पडिबोहेइ २ त्ता सेणिएणं रन्ना अब्भणुन्नाया समाणी नाणामणिकणग-
 रयणभत्तिचित्तंसि भद्दासणंसि निसीयइ २ त्ता आसत्था वीसत्था सुहा-
 सणवरगया करयलपरिग्गाहियं सिरसावत्तं मत्थए अंजलिं कट्ठु सेणियं
 रायं एवं वयासी-एवं खलु अहं देवाणुप्पिया ! अज्ज तांसि तारिस-
 गंसि सयणिज्जांसि सालिंगणवट्टिए^{१४} जाव नियगवयणमइवयंतं गयं
 सुमिणे पासित्ता णं पडिबुद्धा । तं एयस्स णं देवाणुप्पिया ! उरालस्स
 जावं^{१५} सुमिणस्स के मन्ने कल्लाणे फलवित्तिविसेसे भविस्सइ ।

(10) तए णं से सेणिए राया धारिणीए देवीए अंतिए एयमट्ठं सोच्चा

निसम्म हट्ट जाव हियए धाराहयनीवसुराभिकुसुमचंचुमालइयतणुऊस-
वियरोमकूवे तं सुमिणं उग्गिण्हइ २ ता ईहं पविसंइ २ अप्पणो साभा-
विएणं मइपुव्वएणं बुद्धिविन्नाणेणं तस्स सुमिणस्स अत्थोग्गहं करेइ २ ता
धारिणिं देविं ताहिं जाव हिययपल्हायणिज्जाहिं मियंमहुररिभिय-
गंभीरसस्सिरीयाहिं वग्गूहिं अणुवूहेमाणे २ एवं वयासी-उराले णं
तुमे देवाणुप्पिए ! सुमिणे दिट्ठे । कल्लाणे णं तुमे देवाणुप्पिए सुमिणे
दिट्ठे । सिवे^१ धन्ने मंगले सस्सिरीए णं तुमे देवाणुप्पिए सुमिणे दिट्ठे ।
आरोग्गतुट्ठिदीहाउयकल्लाणमंगलकारए णं तुमे देवी^२ सुमिणे दिट्ठे ।
अत्थलाभो देवाणुप्पिए ! पुत्तलाभो देवाणुप्पिए । रज्जलाभो भोगं-
सोक्खलाभो ते देवाणुप्पिए ! एवं खलु तुमं देवाणुप्पिए नवण्हं मासाणं
बहुपडिपुण्णाणं अद्धट्टमाण य रीइंदियाणं वीइक्कंताणं अम्हं कुलकेउं
कुलदीवं कुलपव्वयं कुलवाडिसंयं कुलतिलकं कुलकित्तिकरं कुलवित्तिकरं
कुलनंदिकरं कुलजसकरं कुलाधारं कुलपायवं कुलविवद्धणकरं सुकुमाल-
पाणिपायं जाव दारयं पयाहिसि । से वि य णं दारए उम्मुक्कवालभावे
विन्नायंपरिणयमेत्ते जोव्वणगमणुप्पत्ते सूरे वीरे विक्कंते वित्थिण्णविपुल्ल-
बलवाहणे रज्जवई राया भविस्सइ । तं उराले णं तुमे देवी सुमिणे
दिट्ठे जाव आरोग्गतुट्ठिदीहाउकल्लाणकारए णं तुमे देवी ! सुमिणे दिट्ठे
त्ति कट्टु भुज्जो २ अणुवूहेइ ।

(11) तए णं सा धारिणी देवी सेणिएणं रत्ता एवं वुत्ता समाणी हट्ट-
तुट्टा जाव हियया करयलपरिग्गहियं जाव अंजलिं कट्टु एवं वयासी-
एवमेयं देवाणुप्पिया ! तंहमेयं अवितंहमेयं असंदिद्धमेयं इच्छियमेयं
पडिच्छियमेयं इच्छियपडिच्छियमेयं सच्चे णं एसमट्ठे जं तुब्भे
वयंहं त्ति कट्टु तं सुमिणं सम्मं पडिच्छइ २ ता सेणिएणं रत्ता
अब्भणुत्ताया समाणी नाणामणिकणगरयणभत्तिचित्ताओ भद्दासणाओ
अब्भुट्ठेइ २ ता जेणेव सए सयणिज्जे तेणेव उवागच्छइ २ ता सयंसि
सयणिज्जंसि निसीयइ २ ता एवं वयासी-मा मे से उत्तमे पहाणे
मंगले सुमिणे अन्नेहिं पावसुमिणेहिं पडिहम्मिहिं कट्टु देवयगुरुजण-

संबद्धाहिं पसत्थाहिं धम्मियाहिं कहाहिं सुमिणजागरियं पडिजागर-
माणी विहरइ ।

(12) तए णं से सेणिए राया पच्चूसकालसमयांसि कोढुंबियपुरिसे
सद्दावेइ २ त्ता एवं वयासी-खिप्पामेव भो देवाणुप्पिया ! बाहिरियं
उवट्ठाणसालं अज्ज सविसेसं परमरम्मं गंधोदगसित्तसुइयसंमज्जिओव-
लित्तं पंचवण्णसरससुरभिमुक्कपुप्फपुंजोवयारकालियं कालागरुपवरकुंडु-
रुक्कतुरुक्कधूवडज्झंतमघमघंतगंधुद्धुयाभिरामं सुगंधवरगंधियं गंधवट्ठिभूयं
करेइ कारवेइ य २ एयमाणत्तियं पच्चप्पिणह । तए णं ते कोढुंबिय-
पुरिसा सेणिएणं रत्ता एवं वुत्ता समाणा हट्ठतुट्ठा जाव पच्चप्पिणंति ।
तए णं से सेणिए राया कलं पाउप्पभायाए रयणीए फुल्लुप्पलकमलकोमलु-
म्मिलियंमि अहापंडुरे पभाए रत्तासोगप्पगासकिंसुयसुयमुहगुंजद्धबधु-
जीवगपारावयचलणनयणपरहुयसुरत्तलोयणजांसुमणकुसुमजलियजलण-
तवणिज्जकलसहिं गुलयनिगररूवाइरेगरेहन्तसस्सिरीए दिवायरे अह-
कमेण उदिए तस्स दिणकंरकरपरंपरावयारपारद्धंमि अंधयारे बालायव-
कुंकुमेण खईयव्व जीवलोए लोयणविसयाणुंयासविगसंतविसद-
दंसियंमि लोए कमलांगेरसंडबोहए उट्ठियंमि सूरे सहस्सरस्सिमि दिण-
यरे तेयसा जलंते सयणिज्जाओ उट्ठेइ २ त्ता जेणेव अट्ठणसाला तेणेव
उवागच्छइ अट्ठणसालं अणुपविसइ अणेगवायामजोगवग्गणवामहण-
मल्लजुद्धकरणेहिं संते परिस्संते सयपागसहस्सपागेहिं सुगंधवरतेल्ल-
माईएहिं पीणणिज्जेहिं दीवणिज्जेहिं दप्पणिज्जेहिं भयणिज्जेहिं विह-
णिज्जेहिं सव्विदियगायपल्हायणिज्जेहिं अब्भंगि^{११}एहिं अब्भंगि^{१२}एहिं समाणे
तेल्लचम्मंसि पडिपुण्णपाणिपायसुकुमालकोमलतलोहिं पुरिसेहिं छेएहिं
दक्खेहिं पट्ठेहिं कुसलेहिं मेहावीहिं निउणेहिं निउणसिप्पोवगएहिं
जियपरिस्समेहिं अब्भंगणपरिमहणुव्वलणकरणगुणनिम्मा^{१३}एहिं अट्ठि-
सुहाए मंससुहाए तयासुहाए रोमसुहाए चउव्विहाए संवाहणाए सं-
वाहिए समाणे अवगयपरिस्समे नरिंदे अट्ठण^{१४}सालाओ पडिनिक्खमइ २
जेणेव मज्जणघरे तेणेव उवागच्छइ २ त्ता मज्जणघरं अणुपविसइ

२ ता समत्तजालाभिरामे विचित्तमणिरयणकोट्टिमतले रमणिञ्जे
 ण्हाणमंडवसि नाणामणिरयणभत्तिचित्तंसि ण्हाणपीढंसि सुहणिसण्णे
 सुहोदगेहिं पुप्फोदण्हिं गंधोदण्हिं सुद्धोदण्हिं य पुणो पुणो कल्लाणग-
 पवरमज्जणविहीए मज्जिए तत्थ कोउयसएहिं बहुविहेहिं कल्लाणगपवर-
 मज्जणावसाणे पम्हलसुं कुमालगंधकासायलूहियंगे अहयसुमहग्घदूसरयण-
 सुसंवुए सरससुरभिगोसीसचंदणाणुलित्तगत्ते सुइमालावण्णगाविलेवणे
 आविद्धमणिसुवण्णे कप्पियहारद्धहारतिसरयपालंबपलंबमाणकडिसुत्तसु-
 कयसोहे पिणिद्धगेविज्जे अंगुलेज्जगल्लियंगयल्लियकयाभरणे नाना-
 मणिकडगतुडियथंभियभुए अहियरूवसरिसरीए कुंडलुज्जोइयाणणे मउड-
 दित्तसिरए हारोत्थयसुकयरइयवच्छे पालंबपलंबमाणसुकयपडउत्तरिज्जे
 मुद्धियापिंगलंगुलीए नाणामणिकणगरयणविर्मलमहरिहनिउणोवियमिसि-
 मिसंतविरइयसुसिलिद्धाविसिद्धलट्ठसंठियपसत्थआविद्धवीरवलए, किं
 बहुणा ? कप्परुक्खए चेव सुअलंकियविभूसिए नरिंदे सकोरटमल्ल-
 वामेणं छत्तेणं धरिज्जमाणेणं चैउचामरवालवीइयंगे मंगलजयसह-
 कयालोए अणेगगणनायगदंडनायगराईसरतलवरमाडंबियकोडुंबियंमंति-
 महामंतिगणगदोवारियअमच्चचेडपीढमहनगरनिगमसेट्टिसेणावइसत्थ-
 वाहदूयसंधिवालंसद्धिं संपरिवुडे धवलमहामेहनिगंगए विव्वं गहगण-
 दिप्पंतरिकखतारागणाण मज्झे ससि व्व पियदंसणे नरवई मज्जण-
 घराओ पडिनिक्खमइ २ ता जेणेव बाहिरिया उवट्ठाणसाला तेणेव
 उवागच्छइ २ ता सीहासणवरगए पुरत्थाभिमुहे सन्निसण्णे । तए णं
 से सेणिए राया अप्पणो अदूरसामंते उत्तरपुरत्थिमे दिसीभाएँ अट्ट
 महासणाइं सेयवत्थपच्चत्थुयाइं सिद्धत्थमंगलोवयारकयसंतिकम्माइं
 रयावेइ २ ता नाणामणिंरयणमांडियं अहियपेच्छणिज्जरूवं महग्घवर-
 पट्टणुगयं सण्हबहुभत्तिसयचित्तठाणं ईहामियउसभतुरयनरमगरविहग-
 वालगकिंनररुसरभचमरकुंजरवणलयपडमलयभत्तिचित्तं सुखचिय-
 वरकणगपवरपेरंतदेसभागं अर्द्धिभतरियं जवणियं अंछावेइ २ ता
 अत्थरगमैउअमसूरगउच्छइयं धवलवत्थपच्चत्थुयं विसिद्धं अंगसुह-

फासयं सुमउयं धारिणीए देवीए भद्दासणं रयावेइ २ ता कोडुंबिय-
पुरिसे सद्दावेइ २ ता एवं वयासी-खिप्पामेव भो देवाणुप्पिया ! अट्ठंग-
महानिमित्तसुत्तत्थपाढए विविहसत्थकुसले सुमिणपाढए सद्दावेइ २
ता एयमाणत्तियं खिप्पामेव पच्चप्पिणह । तए णं ते कोडुंबियपुरिसा
सेणिएणं रत्ता एवं वुत्ता समाणा हट्ठ जाव हियया करयलपरिग्गाहियं
दसनहं सिरसावत्तं मत्थए अंजलिं कट्ठु एवं देवो तह त्ति आणाए
विणएणं वयणं पडिसुणेंति सेणियस्स रत्तो अंतियाओ पडिनिक्खमंति
२ ता रायगिहस्स नगरस्स मज्झंमज्झेणं जेणेव सुमिणपाढगगिद्वाणि
तेणेव उवागच्छंति २ ता सुमिणपाढए सद्दावेंति । तए णं ते सुमिण-
पाढगा सेणियस्स रत्तो कोडुंबियपुरिसेहिं सद्दाविया समाणा हट्ठ जाव
हियया ण्हाया कयबलिकम्मा जाव पायच्छित्ता अप्पमहग्घाभरणाळं-
कियसरीरा हरियालियसिद्धत्थयकयमुद्धाणा सएहिं सएहिं गिहेहिंतो
पडिनिक्खमंति रायगिहस्स नगरस्स मज्झंमज्झेणं जेणेव सेणियस्स
भवणवडेंसगदुवारे तेणेव उवागच्छंति २ एगयओ मिळायंति २ सेणि-
यस्स रत्तो भवणवडेंसगदुवारेणं अणुप्पविसंति २ ता जेणेव बाहिरिया
उवट्ठणसाला जेणेव सेणिए राया तेणेव उवागच्छंति २ ता सेणियं
रायं जएणं विजएणं वट्ठावेंति, सेणिएणं रत्ता अच्चियवंदियपूइय-
माणियसक्कारियसम्माणिआ समाणा पत्तेयं २ पुव्वन्नत्थेसु भद्दासणेसु
निसीयंति । तए णं सेणिए राया जवणियंतरियं धारिणिं देवि ठवेइ
२ ता पुप्फफलपडिपुण्णहत्थे परेणं विणएणं ते सुमिणपाढए एवं
वयासी-एवं खलु देवाणुप्पिया ! धारिणी देवी अज्ज तंसि तारिसगंसि
सयणिज्जंसि जाव महासुमिणं पासित्ता णं पडिबुद्धा । तं एयस्स णं
देवाणुप्पिया ! उरालस्स जाव सस्सिरीयस्स महासुमिणस्स के मत्ते
कल्लाणे फलवित्तिविसेसे भविस्सइ । तए णं ते सुमिणपाढगा सेणियस्स
रत्तो अंतिए एयमट्ठं सोच्चा निसम्म हट्ठ जाव हियया तं सुमिणं सम्भं
ओगिण्हंति २ ईहं अणुप्पविसंति २ अन्नमत्तेण सद्धिं संचालेंति २ ता
तस्स सुमिणस्स लद्धट्ठा गहियट्ठा पुच्छियट्ठा विणिच्छियट्ठा

अभिगयट्ठा सेणियस्स रत्तो पुरओ सुमिणसत्थाइं उच्चारेमाणा
 एवं वयासी—एवं खलु अम्हं सामी ! सुमिणसत्थांसि बायालीसं
 सुमिणा तीसं महासुमिणा बावत्तरिं सव्वसुमिणा दिट्ठा । तत्थ णं सामी !
 अरहंतमायरो वा चक्कवट्ठिमायरो वा अरहंतंसि वा चक्कवट्ठिसि वा
 गब्भं वक्कममाणंसि एएसिं तीसाए महासुमिणाणं इमे चोइस महासुमिणे
 पासित्ता णं पडिबुज्झंति तं जहा—गयवंसहसीहअभिसेयदामससिदिणयरं
 झयं कुंभं । पउमसरसागरविमाणभवणरयणुच्चय सिहिं च ॥१॥ वासुदेव-
 मायरो वा वासुदेवंसि गब्भं वक्कममाणंसि एएसिं चोइसण्हं महासुमिणाणं
 अन्नयरे सत्तं महासुमिणे पासित्ता णं पडिबुज्झंति । बलदेवमायरो
 वा बलदेवंसि गब्भं वक्कममाणंसि एएसिं चोइसण्हं महासुमिणाणं
 अन्नयरे चत्तारि महासुमिणे पासित्ता णं पडिबुज्झंति । मंडलियमायरो वा
 मंडलियंसि गब्भं वक्कममाणंसि एएसिं चोइसण्हं महासुमिणाणं अन्नयरं
 महासुमिणं पासित्ता णं पडिबुज्झंति । इमे य सामी धारिणीए देवीए
 ण्णे महासुमिणे दिट्ठे । तं उराले णं सामी ! धारिणीए देवीए सुमिणे दिट्ठे
 जाव आरोग्गतुट्ठिदीहाउकल्लणमंगलकारेण णं सामी ! धारिणीए देवीए
 सुमिणे दिट्ठे । अत्थलाभो सामी ! सोक्खलाभो सामी ! भोगल्लभो सामी !
 पुत्तलाभो रज्जलाभो । एवं खलु सामी ! धारिणीदेवी नवण्हं मासाणं
 बहुपडिपुण्णाणं जाव दारणं पयाहिई । से वि य णं दारए उम्मुक्कवालभावे
 विन्नायपरिणयमिच्चे जोव्वणगमणुप्पत्ते सूरे वीरे विक्कते^{१०} वित्थिण्णविउल्लं-
 बलवाहणे रज्जवई राया भविस्सइ अणगारे वा भावियप्पा । तं उराले णं
 सामी ! धारिणीए देवीए सुमिणे दिट्ठे जाव आरोग्गतुट्ठि जाव दिट्ठे
 त्तिकट्ठु भुज्जो २ अणुवूहेति । तए णं सेणिए राया तेसिं सुमिणपाढ-
 गाणं अंतिए एयमट्ठं सोच्चा निसम्म हट्ठ जाव हियए करयल जाव एवं
 वयासी—एवमेयं देवाणुप्पिया ! जाव जं णं तुब्भे वयहं त्तिकट्ठु तं
 सुमिणं सम्मं संपडिच्छइ २ ते सुमिणपाढए विपुलेणं असणपाणखाइम-
 साइमेणं वत्थगंधमल्लालंकारेण य सक्कारेइ सम्माणेइ विपुलं जीवियारिहं
 पीइदाणं दलयइ पडिविसज्जेइ । तए णं से सेणिए राया सीहासणाओ

अब्भुट्ठेइ २ त्ता जेणेव धारिणी देवी तेणेव उवागच्छइ २ त्ता धारिणिं देविं एवं वयासी-एवं खलु देवाणुप्पिए सुमिणसत्थंसि बायालीसं सुमिणा जाव एगं महासुमिणं जाव भुज्जो २ अणुवूहेइ । तए णं सा धारिणीदेवी सेणियस्स रत्तो अंतिए एयमट्ठं सोच्चा निसम्म हट्ठ जाव हियया तं सुमिणं सम्मं पडिच्छइ २ जेणेव सए वासघरे तेणेव उवागच्छइ २ ण्हाया कयबलिकम्मा जाव विपुलाइं जाव विहरइ ।

(13) तए णं तीसे धारिणीए देवीए दोसु मासेसु वीइकंतसे तैइए मासे वट्टमाणे तस्स गम्भस्स दोहलकालसमयंसि अयमेयारूवे अकाल-मेहेसु ^१दोहले पाउवभवित्था - धन्नाओ णं ताओ अम्मयाओ सपुण्णाओ ताओ अम्मयाओ कयत्थाओ कयपुण्णाओ कयलक्खणाओ कयविहवाओ सुलद्धे णं तासिं माणुस्सए जम्मजीवियफले जाओ णं मेहेसु^२ अब्भुग्गाएसु अब्भुज्जएसु अब्भुन्नएसु अब्भुट्ठिएसु सगाज्जिएसु सविज्जुएसु सफुसिएसु सथणिएसु धंतधोयरूपपट्टअकंसखचंदकुंदसालि-पिट्ठरासिसमप्पभेसु चिकुरहरियालभेयचंपगसणकोरंटसरिसवपउमरय-समप्पभेसु लक्खारससरसरत्तकिंसु^३यजासुमणरत्तवंधुजीवगजाइहिगुल्य-सरसकुंकुमउरवभससरुहिरइंदगोवगसमप्पभेसु बरहिणनीलगुलिंथासुं^४गचा-सपिच्छभिगपत्तसासुं^५गनीलुप्पलनियरनवसिरीसकुसुमनवसदलसमप्पभेसु जच्चजणभिगभेयरिट्ठगभमरावलिगवलगुलियकज्जलसमप्पभेसु फुरंत-विज्जुयसगाज्जिएसु वायवसविपुलगणचवलपरिसां^६किरेसु निम्मलवरवारि-धारापयलियपयंडमारुयसमाहयसमोत्थरंतउर्वरिउवरितुरियवासं पवासि-एसु धारापहकरनिवायनिव्वाविं^७ मेइणितले हरियगगणकंचुए पल्लविय पायवगणेसु वैल्लिवियाणेसु पसरिएसु उन्नएसु सोहग्गमुवागएसु वेभार-गिरिप्पवायतडकडंगविमुक्केसु उज्झरेसु तुरियपहावियपल्लोट्टफेणाउलं सकलुसं जलं वहंतीसु गिरिनईसु सज्जज्जुणनी^८वैकुडयकंदलसिलिंध-कलिएसु उववणेसु मेहरसियहट्ठतुट्ठचिट्ठियहरिसवसपमुक्ककंठकेकारवं मुयंतेसु बरहिणेसु उववसमयजणियतरुणसहयरिपणाच्चिएसु नवसुरभि-सिलिंधकुडयं^९कंदलकलंबगंधद्वणिं मुयंतेसु उववणेसु परहुय^{१०}रुयारिभिय-

संकुलेसु उद्दाइंतरत्तइंदगोवयथोवयकारुणाविलविएसु उन्नयतणमंडिएसु
 दहुरपयंपिएसु संपिंडियदरियभमरमहुयरिपहकरपरिलित्तमत्तछप्पयकुसुमा-
 सवलोलमहुरगुंजतदेसभाएसु उववणेसु परिसामियचंदसूरगहगणपणट्ट-
 नक्खत्ततारंगपहे इंदाउहर्बद्धविंधपट्टमि अंबरतले उड्डीणबलागपंतिसोहंत-
 मेहवन्दे कारंडगचक्कवायकलहंसउस्सुयकरे संपत्ते पाउँसंमि काले ण्हायाओ
 कयवलिकम्माओ कयकोउयमंगलपायच्छित्ताओ किं^७ ते वरपायपत्तनेउर-
 मणिमेहलहारैरइयउवचियकडगखुड्डुयविचित्तवरवलयथंभियभुयाओ कुंड-
 लउज्जोवियाणणाओ रयणभूसियंगीओ नासानीसासवायवोज्झं चक्खु-
 हरं वण्णपरिससंजुत्तं हयलालापेलवाइरेयं धवलकणयखचियंतकम्मं
 आगासफलिहसरिसप्पभं अंसुयं पवरपरिहियाओ दुगुल्लसुकुमालउत्तरिज्जाओ
 सव्वोउयसुरभिकुसुमपवरमल्लसोहियासिराओ कालागीरूपवरधूवधूवियाओ
 सिरीसमाणवेसाओ सेयणयगंधहत्थिरयणं दुरूढाओ समानीओ सकोरंट-
 मल्लदामेणं छत्तेणं धरिज्जमाणेणं चंदप्पभंवयरवेरुलियविमलदंडसंखकुंद-
 दगरयअमयमहियफेणपुंजसन्निगासचउचामरवालवीजियंगीओ सेणिण्णं
 रत्ता सद्धिं हत्थिखंधवरगणं पिट्टओ २ समणुगच्छमाणीओ चाउरंगिणीए
 सेणाएँ महया ह्याणीणं गयाणिणं रहाणिणं पायत्ताणीणं सव्विड्डीए
 सव्वज्जुईए जाव निग्घोसनाइयरवेणं रायगिहं नयरं सिंघाडगतिगचउक्क-
 चच्चरचउंमुहमहापहपहेसु आसित्तसित्तसुइयसंमज्जिओवलित्तं जाव
 सुगंधवरगंधियं गंधवट्ठिभूयं अवलोएमाणीओ नागरजणेणं अभिनंदिज्ज-
 माणीओ गुच्छलयारुक्खगुम्मवल्लिगुच्छोच्छाइयं सुरम्मं वेभारगिरिकडग-
 पायमूलं सव्वओ समंता आहिंढेमाणीओ २ डोहलं विणयंति । तं जइ णं
 अहमवि मेहेसु अब्भुगएसु जाव दोहलं विणिज्जामि ।

(14) तए णं सा धारिणी देवी तंसि डोहलंसि अविणिज्जमाणंसि
 असंपत्तदोहला असंपुण्णदोहला असंमाणियदोहला सुक्का भुक्खा निम्मंसा
 ओलुग्गा ओलुगसरीरा पमइलदुब्बला किलंता ओमंथियवयणनयणकमला
 पंडुइयमुही करयलमलियव्व चंपगमाला नित्तेया दीणविवण्णवयणा जहो-
 चियपुप्फगंधमल्लालंकारहारं अणाभिलसमाणी कीडारमणकिरियं परिहावे-

माणी दीणा दुम्मणा निराणंदा भूमिगयदिट्ठीया ओह्यमणसंकप्पा जाव झियाइ । तए णं तीसे धारिणीए देवीए अंगपडियारियाओ अब्भितरियाओ दासचेडियाओ धारिणीं देवीं ओलुग्गं जाव झियायमाणं पासंति २ एवं वयासी—किन्नं तुमे देवाणुप्पिए ! ओलुग्गा ओलुग्गसरीरा जाव झियायसि ? तए णं सा धारिणी देवी ताहिं अंगपडियारियाहिं अब्भितरियाहिं दासचेडियाहिं य एवं वुत्ता समाणी ताओ चेडियाओ नो आढाइ नो परियाणाइ अणाढायमाणी अपरियाणमाणी तुसिणीया चिट्ठइ । तए णं ताओ अंगपडियारियाओ अब्भितरियाओ दासचेडीओ धारिणिं देविं दोच्चं पि तच्चं पि एवं वयासी—किन्नं तुमे देवाणुप्पिए ! ओलुग्गा ओलुग्गसरीरा जाव झियायसि ? तए णं सा धारिणी देवी ताहिं अंगपडियारियाहिं अब्भितरियाहिं य दासचेडीहिं दोच्चं पि तच्चं पि एवं वुत्ता समाणी नो आढाइ नो परियाणाइ अणाढायमाणी अपरियाणमाणी तुसिणीया संचिट्ठइ । तए णं ताओ अंगपडियारियाओ दासचेडियाओ य धारिणीए देवीए अणाढाइज्जमाणीओ अपरिजाणिज्जमाणीओ तहेव संभंताओ समाणीओ धारिणीए देवीए अंतियाओ पडिनिक्खमंति २ जेणेव सेणिए राया तेणेव उवागच्छंति २ करयलपरिग्गहियं जाव कट्ठु जएणं विजएणं वद्धावेंति २ एवं वयासी—एवं खलु सामी ! किंपि अज्ज धारिणी देवी ओलुग्गा ओलुग्गसरीरा जाव अट्टज्झाणोवगया झियायइ । तए णं से सेणिए राया तासिं अंगपडियारियाणं अंतिए एयमट्ठं सोच्चा निसम्म तहेव संभंते समाणे सिग्घं तुरियं^१ चवलं वेइयं जेणेव धारिणी देवी तेणेव उवागच्छइ २ धारिणिं देविं ओलुग्गं ओलुग्गसरीरं जाव अट्टज्झाणोवगयं झियायमाणं पासइ २ एवं वयासी—किन्नं तुमं देवाणुप्पिए ! ओलुग्गा ओलुग्गसरीरा जाव अट्टज्झाणोवगया झियायसि ? तए णं सा धारिणी देवी सेणिएणं रत्ता एवं वुत्ता समाणी नो आढाइ जाव तुसिणीया संचिट्ठइ । तए णं सेणिए राया धारिणिं देविं दोच्चं पि तच्चं पि एवं वयासी—किन्नं तुमं देवाणुप्पिए ! ओलुग्गा जाव झियायसि ? तए णं सा धारिणी देवी सेणिएणं रत्ता दोच्चं पि तच्चं पि एवं वुत्ता समाणी नो आढाइ नो परियाणाइ तुसिणीया संचिट्ठइ । तए

णं से सेणिए राया धारिणिं देविं सबहसावियं करेइ २ एवं वयासी —
 किं णं तुमं देवाणुप्पिए ! अहमेयस्स अट्टस्स अणरिहे सवणयाए तां णं
 तुमं ममं अयमेयारूवं मणोमाणसियं दुक्खं रहस्सीकरेसि । तए णं सा
 धारिणी देवी सेणिएणं रत्ता सबहसाविया समाणी सेणियं रायं एवं
 वयासी—एवं खलु सामी ! मम तस्स उरालस्स जाव महासुमिणस्स तिण्हं
 मासाणं बहुपाडिपुण्णाणं अयमेयारूवे अकालमेहेसु डोहले पाउब्भूए -
 घन्नाओ णं ताओ अम्मयाओ कयत्थाओ णं ताओ अम्मयाओ जाव
 वेभारगिरिपायमूलं आहिंढमाणीओ दोहलं विणेंति । तं जइ णं अहमवि
 बाव दोहलं विणेज्जामि । तए णं हं सामी ! अयमेयारूवंसि अकाल-
 दोहलंसि अविणिज्जमाणंसि ओलुग्गा जाव अट्टज्झाणोवगया श्रियायामि ।
 तए णं हं कारणेणं सामी ! ओलुग्गा जाव श्रियायामि । तए णं से सेणिए
 राया धारिणीए देवीए अंतिए एयमट्ठं सोच्चा निसम्म धारिणीं देवीं
 एवं वयासी—मा णं तुमं देवाणुप्पिए ! ओलुग्गा जाव श्रियाहि । अहं णं
 तहा करिस्सामि जहा णं तुब्भं अयमेयारूवस्स अकालदोहलस्स मणोरह-
 संपत्ती भविस्सइ त्तिकट्ठु धारिणीं देवीं इट्ठाहिं कंताहिं पियाहिं मणु-
 न्नाहिं मणामाहिं वग्गूहिं समासासेइ २ जेणेव बाहिरिया उवट्ठाणसाला
 तेणेव उवागच्छइ २ सीहासणवरगए पुरत्थाभिमुहे सन्निसण्णे धारिणीए
 देवीए एयं अकालडोहलं बहूहिं आएहि य उवाएहि य उप्पत्तियाहि य
 वेणइयाहि य कम्मियाहि य पारिणामियाहि य चउठ्ठिंवाहिं बुद्धीहिं^१
 अणुचित्तमाणे २ तस्स दोहलस्स आयं वा उवायं वा ठिइं वा उप्पत्तिं वा
 अविंदमाणे ओहयमणसंकप्पे जाव श्रियायइ ।

(15) तयाणंतंरं च णं अभए कुमारे ण्हाए कयवलिकम्मे जाव सव्वालं-
 कारविभूसिए पायवंदए पहारेत्थ गमणाए । तए णं से अभयकुमारे
 जेणेव सेणिए राया तेणेव उवागच्छइ सेणियं रायं ओहयमणसंकप्पं
 जाव श्रियायमाणं पासइ अयमेयारूवे अज्झत्थिए चित्तिए पत्थिए
 मणोगए संकप्पे समुप्पज्जित्था = अन्नया ममं सेणिए राया एज्ज-
 माणं पासित्ता आढाइ परियाणाइ सक्कारेइ सम्माणेइ आलवइ संलवइ

अद्धासणेणं उवनिमंतेइ मत्थयंसि अग्घाइ । इयाणिं ममं सेणिए राया
 नो आढाइ नो परियाणइ नो सक्कारेइ नो सम्माणेइ नो इट्ठाहिं कंताहिं
 पियाहिं मणुन्नाहिं ओराळाहिं वग्गूहिं आलवइ संलवइ नो अद्धासणेणं
 उवनिमंतेइ नो मत्थयंसि अग्घायइ किं पि ओहयमणसंकप्पे झियायइ ।
 तं भवियव्वं णं एत्थ कारणेणं । तं सेयं खलु ममं सेणियं रायं एय-
 मट्ठं पुच्छित्तए । एवं संपेहेइ २ जेणामेव सेणिए राया तेणामेव उवा-
 गच्छइ २ करयलपरिग्गहियं सिरसावत्तं मत्थए अंजलिं कट्टु जएणं
 विजएणं वद्धावेइ २ एवं वयासी — तुब्भे णं ताओ ! अन्नया ममं
 एज्जमाणं पासित्ता आढाइ परियाणइ जाव मत्थयंसि अग्घायइ
 आसणेणं उवनिमंतेइ । इयाणिं ताओ ! तुब्भे ममं नो आढाइ जाव नो
 आसणेणं उवनिमंतेइ किं पि ओहयमणसंकप्पा जाव झियायइ । तं
 भवियव्वं ताओ एत्थ कारणेणं । तओ तुब्भे ममं ताओ एयं कारणं
 अगूहेमाणा असंकमाणा अनिण्हवेमाणा अपच्छाएमाणा जहाभूयम-
 वितहमसंदिद्धं एयमट्ठं आइक्खइ । तए णं अहं तस्स कारणस्स अंत-
 गमणं गमिस्सामि । तए णं से सेणिए राया अभएणं कुमारेणं एवं
 वुत्ते समाणे अभयं कुमारं एवं वयासी — एवं खलु पुत्ता ! तव चुल्लाउ-
 याए धारिणीदेवीए तस्स गब्भस्स दोसु मासेसु अइक्कंतेसु तइयमासे
 वट्टमाणे दोहलकालसमयांसि अयमेयारूवे दोहले पाउब्भवित्था — धन्ना-
 ओ णं ताओ अम्मयाओ तहेव निरवसेसं भाणियव्वं जाव विणेंति ।
 तए णं अहं पुत्ता धारिणीए देवीए तस्स अकालदोहलस्स बहूहिं
 आएहि य उवाएहिं जाव उप्पत्तिं अविंदमाणे ओहयमणसंकप्पे जाव
 झियामि तुमं आगयं पि न याणामि । तं एएणं कारणेणं अहं पुत्ता !
 ओहय जाव झियामि । तए णं से अभए कुमारे सेणियंस्स रण्णो
 अंतिए एयमट्ठं सोच्चा निसम्म हट्ठ जाव हियए सेणियं रायं एवं
 वयासी — मा णं तुब्भे ताओ ओहय जाव झियायइ । अहं णं तहा
 करिस्सामि जहा णं मम चुल्लाउयाए धारिणीए देवीए अयमेयारूवस्स
 अकालडोहलस्स मणोरहसंपत्ती भविस्सइ त्तिकट्टु सेणियं रायं ताहिं

इट्ठाहिं कंताहिं जाव समासासेइ । तए णं सेणिए राया अभएणं कुमारेणं एवं वुत्ते समाणे हट्ठतुट्ठे जाव अभयं कुमारं सक्कारेइ संमाणेइ २ पडिविसज्जेइ ।

(16) तए णं से अभए कुमारे सक्कारिए सम्माणिए पडिविसज्जिए सम्माणे सेणियस्स रण्णो अंतियाओ पडिनिक्खमइ २ जेणामेव सए भवणे तेणामेव उवागच्छइ २ सीहासणे निसण्णे । तए णं तस्स अभय-कुमारस्स अयमेयारूवे अज्झत्थिए जाव समुप्पज्जित्था — नो खलु सक्का माणुस्सएणं उवाएणं मम चुल्लमाउयाए धारिणीए देवीए अकालडोहल-मणोरहसंपत्तिं करित्तए नन्नत्थ दिव्वेणं उवाएणं । अत्थि णं मज्झ सोहम्म-कप्पवासी पुव्वसंगइए देवे महिड्डीए जाव महासोक्खे । तं सेयं खलु मम पोसहसालाए पोसहियस्स बंभयारिस्स उम्मुक्कमणिसुवण्णस्स ववगय-मालावण्णगाविलेवणस्स निक्खित्तसत्थमुसलस्स एगस्स अबीयस्स दब्भसंथारोवगयस्स अट्टमभत्तं पगिण्हित्ता पुव्वसंगइयं देवं मणसीकरे-माणस्स विहरित्तए । तए णं पुव्वसंगइए देवे मम चुल्लमाउयाए धारिणीए देवीए अयमेयारूवं अकालमेहेसु डोहलं विणोहिइ । एवं संपेहेइ २ जेणेव पोसहसाला तेणामेव उवागच्छइ २ पोसहसालं पमज्जइ उच्चारपासवणभूमिं पडिलेहेइ २ दब्भसंथारगं दुरूहइ २ अट्टमभत्तं पगिण्हइ २ पोसहसालाए पोसहिए बंभयारी जाव पुव्वसंगइयं देवं मणसीकरेमाणे २ चिट्ठइ । तए णं तस्स अभयकुमारस्स अट्टमभत्ते परिणममाणे पुव्वसंगइयस्स देवस्स आसणं चलइ । तए णं पुव्वसंगइए सोहम्मकप्पवासी देवे आसणं चलयं पासइ २ ओहिं पउंजइ । तए णं तस्स पुव्वसंगइयस्स देवस्स अयमेयारूवे अज्झत्थिए जाव समुप्पज्जित्था — एवं खलु मम पुव्वसंगइए जंबुद्वीवे २ भारहे वासे दाहिणड्ढभरहे^४ रायणिहे नयरे पोसहसालाए पोसहिए अभए नामं कुमारे अट्टमभत्तं पगिण्हित्ता णं मम मणसीकरे-माणे २ चिट्ठइ । तं सेयं खलु मम अभयस्स कुमारस्स अंतिए पाउ-ब्भवित्तए । एवं संपेहेइ २ उत्तरपुरास्थिमं दिसीभागं अवक्कमइ २ वेउत्तियसमुग्धाएणं समोहणइ २ संखेज्जाइं जोयणाइं दंडं निसिरइ ।

तंजहा—रयणाणं वयरणां वेरुलियाणं लोहियक्खाणं मसारगल्लाणं हंस-
गन्भाणं पुलगाणं सोगंधियाणं जोईरसाणं अंकाणं अंजणाणं रयणाणं
जायरूवाणं अंजणपुलगाणं फलिहाणं रिट्ठाणं अहावायरे पोग्गले परि-
साडेइ अहासुहुमे पोग्गले परिगिण्हइ २ अभयकुमारमणुकंपमाणे देवे
पुव्वभवजणियनेहपीइबहुमाणजायसोगे तओ विमाणवरपुंडरीयाओ
रयणुत्तमाओ धरणियलगमणतुरियसंजणियगमणपयारे वाघुण्णियविमल-
कणगपयरगवडिंसगमउडउक्कडाडोवदंसणिज्जे अणेगमणिकणगरयण-
पहकरपरिमंडियभत्तिचित्तविणिउत्तगर्मणगजणियहरिसे^३ पेंखोलमाणवर-
ललियकुंडलुज्जलियवयणगुणजणियसोमरूवे उदिओ विव कोमुदीनिसाए
सणिच्छरंगारकुज्जलियमज्झाभागत्थे नयणाणंदे सरयचंदे दिव्वोसहिप-
ज्जलुज्जलियदंसणाभिरामे उउलच्छिसमत्तजायसोहे पइट्ठगंधुद्धयाभिरामे
मेरुविव नगवरे वेउव्वियविचित्तवेसे दीवसमुहाणं असंखपरिमाणनाम-
धेज्जाणं मज्झयारेणं वीइवयमाणे उज्जोयंतो^९ पभाए विमलाए जीवलोयं^{१०}
रायगिहं पुरंवरं च अभयस्सं पासं ओवयइ २ दिव्वरूवधारी ।

(17) तए णं से देवे अंतलिक्खपाडिवन्ने दसद्धवण्णाइं सखिखिणि-
याइं पवरत्थाइं परिहिए । एक्को ताव एसो गमो । अन्नो वि गमो —
ताए उक्किट्ठाए तुरियाए चवलाए चंडाए सीहाए उद्धयाए जयणाए
छेयाए दिव्वाए देवगईए जेणामेव जंबुदीवे २ भारहे वासे जेणामेव
दाहिणद्धभरहे रायगिहे नयरे पोसहसाला अभए कुमारे तेणामेव उवा-
गच्छइ २ अंतलिक्खपाडिवन्ने दसद्धवण्णाइं सखिखिणीयाइं पवरत्थाइं
परिहिए अभयं कुमारं एवं वयासी — अहं णं देवाणुप्पिया ! पुव्वसंगइए
सोहम्मकप्पवासी देवे महड्डीए जं णं तुमं पोसहसालाए अट्टमभत्तं
^{१३}पिगिण्हित्ता णं ममं मणसीकरेमाणे चिट्ठसि । तं एस णं देवाणुप्पिया ! अहं
इहं हव्वमागए । संदिसाहि णं देवाणुप्पिया ! किं करेमि किं दळामि
किं पयच्छामि किं वा ते हियंइच्छियं । तए णं से अभए कुमारे तं
पुव्वसंगइयं देवं अंतलिक्खपाडिवन्नं पासइ २ हट्ठुट्ठे पोसहं पारेइ २
करयल जाव अंजलिं कट्ठु एवं वयासी— एवं खलु देवाणुप्पिया ! मम

चुल्लाउयाए धारिणीए देवीए अयमेयारूवे अकालढोहले पाउब्भूए —
 धन्नाओ णं ताओ अम्मयाओ तहेव पुब्बगमेणं जाव विणेज्जामि । तं णं
 तुमं देवाणुप्पिया मम चुल्लाउयाए धारिणीए देवीए अयमेयारूवं
 अकालढोहलं विणेहि । तए णं से देवे अभएणं कुमारेणं एवं वुत्ते
 समाणे हट्ठतुट्ठे अभयं कुमारं एवं वयासी — तुमं णं देवाणुप्पिया !
 सुनिव्वुयवीसत्थे अच्छाहि । अहं णं तव चुल्लाउयाए धारिणीए
 देवीए अयमेयारूवं ढोहलं विणेमि त्तिकट्ठु अभयस्स कुमारस्स अंति-
 याओ पडिनिक्खमइ उत्तरपुरत्थिमे णं वेभारपव्वए वेउव्वियसमुग्घाएणं
 समोहणइ संखेज्जाइं जोयणाइं दंडं निस्सरइ जाव दोब्बपि वेउव्विय-
 समुग्घाएणं समोहणइ खिप्पामेव सगज्जइयं सविज्जुयं सफुसियं
 पंचवण्णमेहनिणाओवसोहियं दिव्वं पाउँससिरिं विउव्वइ २ जेणेव
 अभए कुमारे तेणेव उवागच्छइ २ अभयं कुमारं एवं वयासी —
 एवं खलु देवाणुप्पिया ! मए तव पियट्ठयाए सगज्जिया सफुसिया
 सविज्जुया दिव्वा पाउँससिरी विउव्विया । तं विणेउं णं देवाणुप्पिया
 तव चुल्लाउया धारिणीदेवी अयमेयारूवं अकालमेहढोहलं । तए णं से
 अभए कुमारे तस्स पुव्वसंगइयस्स सोहम्मकप्पवासिस्स देवस्स अंतिए
 एयमट्ठं सोच्चा निसम्म हट्ठतुट्ठे सयाओ भवणाओ पडिनिक्खमइ २
 जेणामेव सेणिए राया तेणामेव उवागच्छइ करयल जाव अंजलिं कट्ठु
 एवं वयासी — एवं खलु ताओ ! मम पुव्वसंगइएण सोहम्मकप्पवासिणा
 देवेणं खिप्पामेव सगज्जियसविज्जुयपंचवण्णमेहनिणाओवसोभिया
 दिव्वा पाउससिरी विउव्विया । तं विणेउं णं मम चुल्लाउया
 धारिणी देवी अकालढोहलं । तए णं से सेणिए राया अभयस्स
 कुमारस्स अंतिए एयमट्ठं सोच्चा निसम्म हट्ठतुट्ठ कोडुंबियपुरिसे
 सद्दावेइ २ एवं वयासी — खिप्पामेव भो देवाणुप्पिया ! रायगिहं
 नगरं सिंघाडगतिगचउक्कचच्चर आसित्तसित्त जाव सुगंधवरगंधियं
 गंधवट्ठिभूयं करेह य कारवेह य एयमाणत्तियं पच्चप्पिणह । तए
 णं ते कोडुंबियपुरिसा जाव पच्चप्पिणंति । तए णं से सेणिए राया

दोच्चंपि कोडुंबियपुरिसे सहावेइ २ एवं वयासी - खिप्पामेव भो देवाणुप्पिया ! हयगयरहजोहपवरकलियं चाउरंगिणिं सेणं सन्नाहेह सेयणयं च गंधहत्थिं परिकप्पेह । तेवि तहेव जाव पच्चप्पिणांति । तए णं से सेणिए राया जेणेव धारिणी देवी तेणेव उवागच्छइ २ धारिणिं देविं एवं वयासी - एवं खलु देवाणुप्पिए ! सगज्जिया जाव पाउससिरी पाउब्भूया । तं णं तुमं देवाणुप्पिए ! एयं अकालदोहलं विणेहि । तए णं सा धारिणी देवी सेणिएणं रत्ता एवं वुत्ता समाणी हट्ठतुट्ठा जेणामेव मज्जणघरे तेणेव उवागच्छइ २ मज्जणघरं अणुप्प- विसइ २ अंतो अंतेउरंसि ण्हाया कयबलिकम्मा कयकोउयमंगलपायच्छित्ता किं ते वरपायपत्तनेउर जाव आगासफालियसमप्पभं अंसुयं नियत्था सेयणयं गंधहत्थिं दुरुट्ठा समाणी अमयमहियफेणपुंजसन्निगासाहिं सेयचामरवालीयणीहिं वीइज्जमाणी २ संपत्थिंया । तए णं से सेणिए राया ण्हाए कयबलिकम्मे जाव सस्सिरीए हत्थिखंधवरगए सकोरेंट- मल्लदामेणं छत्तेणं धरिज्जमाणेणं चउचामराहिं वीइज्जमाणे धारिणीदेविं पिट्ठओ अणुगच्छइ । तए णं सा धारिणीदेवी सेणिएणं रत्ता हत्थिखंध- वरगएणं पिट्ठओ २ समणुगम्ममाणमग्गा हयगयरहजोहकलियाए चाउरंगिणीए सेणाए सद्धिं संपरिवुट्ठा महया भडचडगरवंदपरिक्खित्ता सव्विड्डीए सव्वज्जुईए जाव दुंदुभिनिग्घोसनाइयरवेणं रायगिहे नयरे सिंघाडगतिगचउक्कचचर जाव महापहेसु नागरजणेणं अभिनंदिज्जमाणी २ जेणामेव वेभारगिरिपव्वए तेणामेव उवागच्छइ वेभारगिरिकडग- तडपायमूले आरामेसु य उज्जाणेसु य काणणेसु य वणेसु य वणसंडेसु य रुक्खेसु य गुच्छेसु य गुम्मेसु य लयासु य वल्लीसु य कंदरासु य दरीसु य चुण्ढीसु य दहेसु य कच्छेसु य नदीसु य संगमेसु य विवरंणसु य अच्छमाणी य पेच्छमाणी य मज्जमाणी य पत्ताणि य पुप्फाणि य फलाणि य पल्लवाणि य गिण्हमाणी य माणेमाणी य अग्घायमाणी य परिभुंजमाणी य परिभांएमाणी य वेभारगिरिपायमूले दोहलं विणेमाणी सव्वओ समंता आहिंडइ । तए णं सा धारिणीदेवी तंसि अकाल-

दोहलंसि विणीयंसि संमाणियदोहला विणीयदोहला संपुण्णदोहला संपन्न-
दोहला जाया यावि होत्था । तए णं सा धारिणीदेवी सेयणयगंधहत्थि
दूरूढा समाणी सेणिएणं हत्थिखंधवरगएणं पिट्ठओ २ समणुगम्ममाण-
मग्गा ह्यगय जाव रवेणं जेणेव रायगिहे नयरे तेणेव उवागच्छइ राय-
गिहं नयरं मज्झमज्जेणं जेणामेव सए भवणे तेणामेव उवागच्छइ २
विउलाइं माणुस्सगाइं भोगभोगाइं जाव विहरइ ।

(18) तए णं से अभए कुमारे जेणामेव पोसहसाला तेणामेव उवा-
गच्छइ २ पुढवसंगइयं देवं सक्कारेइ सम्माणेइ २ पडिविसज्जेइ ।
तए णं से देवे सगाडिजयं पंचवण्णमेहोवसोहियं दिव्वं पाउससिरिं
पडिसाहरइ २ जामेव दिसि पाउब्भूए तामेव दिसिं पडिगए ।

(19) तए णं सा धारिणी देवी तंसि अकालदोहलंसि विणीयंसि
सम्माणियदोहला तस्स गब्भस्स अणुकंपणट्टाए जयं चिट्ठइ जयं आसइ
जयं सुवइ आहारं पि य णं आहारेमाणी नाइतित्तं नाइकडुयं नाइ-
कसायं नाइअंबिलं नाइमहुरं जं तस्स गब्भस्स हियं मियं पत्थयं देसे
य काले य आहारं आहारेमाणी नाइचित्तं नाइसोयं नाइमोहं नाइभयं
नाइपरित्तासं ववगयचित्तासोयमोहभयपरित्तासा उउभयमाणसुहेहिं
भोयणच्छायणगंधमल्लालंकारेहिं तं गब्भं सुहंसुहेणं परिवहइ ।

(20) तए णं सा धारिणी देवी नवण्हं मासाणं बहुपडिपुण्णाणं
अद्दुट्टमाण य राइंदियाणं वीइकंताणं अद्धरत्तकालसमयंसि सुकुमालपाणि-
पायं जाव सव्वंगसुंदरं दारगं पयाया । तए णं ताओ अंगपडियारियाओ
धारिणिं देविं नवण्हं मासाणं जाव दारगं पयायं पासंति २ सिग्घं तुरियं
चवलं वेइयं जेणेव सेणिए राया तेणेव उवागच्छंति सेणियं रायं जएणं
विजएणं वद्धावेंति करयलपरिग्गहियं सिरसावत्तं मत्थए अंजालिं कट्टु एवं
वयासी — एवं खलु देवाणुप्पिया ! धारिणीदेवी नवण्हं मासाणं जाव
दारगं पयाया ! तं णं अम्हे देवाणुप्पियाणं पियं निवेएमो पियं भे भवउ ।
तए णं से सेणिए सया तासिं अंगपडियारियाणं अंतिए एयमट्ठं सोच्चा
निसम्म इट्ठुट्ठे ताओ अंगपडियारियाओ महुरेहिं वयणेहिं विउळेण

य पुप्फगंधमल्लालंकारेणं सक्कारेइ सम्माणेइ २ मत्थयधोयाओ करेइ
 पुत्ताणुपुत्तियं वित्तिं कप्पेइ २ पडिविसज्जेइ । तए णं से सेणिए राया
 पच्चूसकालसमयंसि कोहुंबियपुरिसे सहावेइ २ एवं वयासी—खिप्पामेव
 भो देवाणुप्पिया ! रायगिहं नगरं आसिय जाव परिगीयं करेइ २ चारग-
 परिसोहणं करेइ २ माणुम्माणवद्धणं करेइ २ एयमाणत्तियं पच्चप्पिणह
 जाव पच्चप्पिणंति । तए णं से सेणिए राया अट्टारससेणिप्पसेणीओ
 सहावेइ २ एवं वयासी—गच्छह णं तुब्भे देवाणुप्पिया ! रायगिहे नगरे
 अट्ठिभतरवाहिरिए उस्सुक्कं उक्करं अभट्ठप्पवेसं अट्ठिमकुदंढिमं अधरिमं
 अधारणिज्जं अणुद्धयमुड्ढं अमिलीयमल्लदामं गणियावरनाडइज्जकलियं
 अणेगतालायरारुणचरियं पमुड्ढयपक्कीलियाभिरामं जहारिहं ठिइवडियं
 दसदिवसियं करेइ २ एयमाणत्तियं पच्चप्पिणह तेवि करेति तहेव
 पच्चप्पिणंति । तए णं से सेणिए राया बाहिरियाए उवट्ठाणसालाए
 सीहासणवरगए पुरस्थाभिमुहे सन्निसण्णे सयएहि य साहस्सिएहि य
 सयसाहस्सिएहि य जाएहि य दाएहि य भाएहि य दलयमाणे २ पडि-
 च्छेमाणे २ एवं च णं विहरइ । तए णं तस्स अम्मापियरो पढमे दिवसे
 जायकम्मं करेति २ विड्ढयदिवसे जागरियं करेति तइए दिवसे चंदसूर-
 दंसणियं करेति २ एवामेव निव्वत्ते असुइजायकम्मकरणे संपत्ते बारसाह-
 दिवसे विपुलं असणपाणखाइमसाइमं उवक्खडावेति २ मित्तनाइनियग-
 सयण संबंधिपरियणं बलं च बहवे गणनायग जाव आमंतंति तओ ण्हाया
 कयबलिकम्मा कयकोउय जाव सव्वालंकारविभूसिया महइमहालयंसि
 भोयणमंडवंसि तं विपुलं असणं पाणं खाइमं साइमं मित्तनाइगणनायग
 जाव सद्धिं आसाएमाणा विसाएमाणा परिभाएमाणा परिभुंजेमाणा एवं
 च णं विहरंति जिमियभुत्तुत्तरागयावि य णं समाणा आयंता चोक्खा
 परमसुइभूया तं मित्तनाइनियगसयणसंबंधिपरियणं बलं च बहवे गण-
 नायग जाव विपुलेणं पुप्फवत्थगंधमल्लालंकारेणं सक्कारेति सम्माणेति २
 एवं वयासी — जम्हा णं अम्हं इमस्स दारगस्स गम्भत्थस्स चेव समाणस्स
 अकालमेहेसु डोहले पाउब्भूए तं होऊ णं अम्हं दारए मेहे नामेणं मेहे ।

तस्स दारगस्स अम्मापियरो अयमेयारूवं गोणं गुणनिष्फणं नामधेज्जं करेति मेहे इ । तए णं से मेहे कुमारे पंचधाईपरिग्गाहिए तंजहा — खीर-
 धाईए मज्जणधाईए कीलावणधाईए मंडणधाईए अंकधाईए अन्नाहि य
 बहुहिं सुज्जाहिं चिलाइयाहिं वामणिबडभिवब्बरिवउसिजोणियपल्हवि-
 इसिणिधोरुणिगिणिगिलासियलउसियं दमिलिसिंहलिआरबिपुलिंदिपक्कणिबह-
 लिमुरंडिसबरिपारसीहिं नानादेसीहिं विदेसपरिमंडियाहिं इंगियचिंतिय-
 पत्थियवियाणियाहिं सदेसनेवत्थगाहियवेसाहिं निउणकुसलाहिं विणीयाहिं
 चेडियाचकवालवरिसधरकंचुइज्जमहयरगवंदपरिक्खत्ते हत्थाओ हत्थं
 साहैरिज्जमाणे अंकाओ अंकं परिभुज्जमाणे परिगिज्जमाणे उवलालिज्ज-
 माणे रम्मंसि मणिकोट्टिमतलंसि परिमिज्जमाणे २ निव्वायनिव्वाघायंसि
 गिरिकंदरमल्लीणेव चंपगपायवे सुहंसुहेणं वड्डइ । तए णं तस्स मेहस्स
 कुमारस्स अम्मापियरो अणुपुव्वेणं नामकरणं च पजेमणं च एवं चंक-
 मणं च चोलोवणं च महया २ इड्ढीसक्कारसमुदणं करेसु । तए णं तं
 मेहं कुमारं अम्मापियरो साइरेगट्टवासजायगं चेव गब्भट्टमे वासे सोह-
 णंसि तिहिकरणमुहुत्तंसि कलायरियस्स उवणेति । तए णं से कलायरिए
 मेहं कुमारं लेहाइयाओ गणियप्पहाणाओ सउणरुयपज्जवसाणाओ वाव-
 त्तरिकलाओ सुत्तओ य अत्थओ य करणओ य सेहावेइ सिक्खावेइ
 तंजहा — लेहं गणियं रूवं नट्टं गीयं वाइयं सरगयं पोक्खरगयं समतालं
 जूयं जणवायं पासयं अट्टावयं पोरेकच्चं दगमट्टियं अन्नविहिं पाणविहिं
 बत्थविहिं विलेवणविहिं सयणविहिं अज्जं पहेलियं मागहियं गाहं गीइयं
 सिलोणं हिरण्णजुत्तिं सुवण्णजुत्तिं चुण्णजुत्तिं आभरणविहिं तरुणीपडिकम्मं
 इत्थिलक्खणं पुरिसलक्खणं हयलक्खणं गयलक्खणं गोणलक्खणं कुकुड-
 लक्खणं छत्तलक्खणं दंडलक्खणं असिलक्खणं मणिलक्खणं कागिणि-
 लक्खणं वत्थुविज्जं खंधारमाणं नगरमाणं वूहं पडिवूहं चारं पडिचारं
 चक्कवूहं गरुलवूहं सगडवूहं जुद्धं निजुद्धं जुद्धाइजुद्धं अट्टिजुद्धं मुट्टिजुद्धं
 बाहुजुद्धं लयाजुद्धं ईसत्थं छरुप्पवायं घणुव्वेयं हिरण्णपागं सुवण्णपागं
 सुत्तखेडं वट्टखेडं नालियाखेडं पत्तच्छेज्जं कडंछेज्जं सज्जीवं निज्जीवं

सउणरुयं ति ।

(21) तए णं से कलायरिए मेहं कुमारं लेहाइयाओ गणियप्पहाणाओ सउणरुयं पज्जवसाणाओ बावत्तरिं कलाओ सुत्तओ य अत्थओ य करणओ य सेहावेइ २ अम्मापिऊणं उवणेइ । तए णं मेहस्स कुमारस्स अम्मापियरो तं कलायरियं महुरोहिं वयणेहिं विउलेणं वत्थंगंधमल्लालंकारेणं सक्कारेति सम्माणेति विउलं जीवियारिहं पीइदाणं दलयंति २ पडिविसज्जेति ।

(22) तए णं से मेहे कुमारे बावत्तरिकलापंडिए नवंगसुत्तपडिबोहिए अट्टारसविहिप्पगारदेसीभासाविसारए गीयरइयगंधव्वनट्टकुसले हयजोही गयजोही रहजोही बाहुजोही बाहुप्पमही अलंभोगसमत्थे साहसिए वियालचारी जाए यावि होत्था ।

(23) तए णं तस्स मेहकुमारस्स अम्मापियरो मेहं कुमारं बावत्तरिकलापंडियं जाव वियालचारीं जायं पासंति २ अट्ट पासायवडिंसए कारेति अब्भुग्गयमूसियपहसिए विव मणिकणगरयणभत्तिचित्ते वाउद्धयविजयवेजयंतोपडागाछत्ताइच्छत्तकलिए तुंगे गगणतलमभिलंघमाणसिहरे जालंतररयणपंजरुस्मिल्लिएव्व मणिकणगथूभियाए वियसियसयवत्तपुंडरीए तिलयरयणद्धचंदब्बिए नानामणिमयदामालंकिए अंतो बहिं च सण्हे तवणिज्जरुइलवाल्यापत्थरे सुहफासे सस्सिरीयरूवे पासाईए जाव पडिरूवे । एगं च णं महं भवणं कारेति अणेगखंभसयसन्निविट्ठं लीलट्टियसालभंजियागं अब्भुग्गयसुकयवइरवेइयातोरणवररइयसालभंजियासुसिलिट्ठविसिट्ठलट्ठसंठियपसत्थवेरुलियखंभनाणामणिकणगरयणखचियउज्जलं बहुसमसुविभत्तनिचियरमणिज्जभूमिभागं ईहामिय जाव भत्तिचित्तं खंभुग्गयवयंरवेइयापरिगयाभिरामं विज्जाहरजमलजुयलजंतजुत्तंपिव अच्चीसहस्समालणीयं रूवगसहस्सकलियं भिसमाणं भिन्धिसमाणं चक्खुल्लोयणलेसं सुहफासं सस्सिरीयरूवं कंचणमणिरयणथूभियागं नाणाविहंपंचवण्णघंटापडागपरिमंडियग्गसिहरं धवलमिरीचिकवयं विणिम्मुयंतं लाउल्लोइयमहियं जाव गंधवट्ठिभूयं पासाईयं दरिसणिज्जं अभिरूवं पडिरूवं ।

(24) तए णं तस्स मेहस्स कुमारस्स अम्मापियरो मेहं कुमारं सोह-

णंसि तिहिकरणनक्खत्तमुहुत्तांसि सरिसियाणं सरिन्वयाणं सरित्तयाणं
सरिसलावण्णरूवजोव्वणगुणोववेयाणं सरिसएहिंतो रायकुलेहिंतो
आणिल्लियाणं पसाहणट्ठंगअविहववहूओवयणमंगलसुजंपिएहिं अट्ठहिं
रायवरकन्नाहिं सद्धिं एगदिवसेणं पाणिं गिण्हाविंसु । तए णं तस्स
मेहस्स अम्मापियरो इमं एयारूवं पीइदाणं दलयंति - अट्ठ हिरण्ण-
कोडीओ अट्ठ सुवण्णकोडीओ गाहाणुसारेण भाणियव्वं जाव पेसण-
कारियाओ अन्नं च विपुलं धणकणगरयणमणिमोत्तियसंखसिलप्पवाल-
रत्तरयणसंतसारसावएज्जं अलाहि जाव आसत्तमाओ कुलवंसाओ पकामं
दाउं पकामं भोत्तुं पकामं परिभाँएउं । तए णं से मेहे कुमारे एगमेगाए
भारियाए एगमेगं हिरण्णकोडिं दलयइ एगमेगं सुवण्णकोडिं दलयइ
जाव एगमेगं पेसणकारिं दलयइ अन्नं च विउलं धणकणग जाव परि-
भाएउं दलयइ । तए णं से मेहे कुमारे उप्पिं पासायवरगए फुट्टमाणेहिं
मुइंगमत्थएहिं वरतरुणिसंपउत्तेहिं बत्तीसइबद्धएहिं नाडएहिं विहरइ ।

(25) तेणं कालेणं २ समणे भगवं महावीरे पुन्वाणुपुत्तिं चरमाणे
गामाणुगामं दूइज्जमाणे सुहंसुहेणं विहरमाणे जेणामेव रायगिहे नयरे
गुणसिलए चेइए जाव विहरइ । तए णं रायगिहे नयरे सिंघाडगतिग-
चउक्कचच्चे महया बहुजणसहे इ वा जाव बहवे उग्गा भोगा जाव राय-
गिहस्स नगरस्स मज्झमज्झेणं एगदिसिं एगाभिमुहा निग्गच्छंति । इमं च
णं मेहे कुमारे उप्पिं पासायवरगए फुट्टमाणेहिं मुयंगमत्थएहिं जाव
माणुस्तए कामभोगे भुंजमाणे रायमग्गं च आँलोएमाणे २ एवं च णं
विहरइ । तए णं मेहे कुमारे ते बहवे उग्गा भोगा जाव एगदिसाभिमुहे
निग्गच्छमाणे पासइ २ कंचुइज्जपुरिसं सहावेइ २ एवं वयासी -
किन्नं भो देवाणुप्पिया ! अज्ज रायगिहे नगरे इंदमहे इ वा खंदमहे इ वा
एवं रुहसिववेसमणनागजक्खभूयनईतलायरुक्खचेइयपन्वयउज्जाण-
गिरिजत्ताइ वा जओ णं बहवे उग्गा भोगा जाव एगदिसिं एगाभिमुहा
निग्गच्छंति । तए णं से कंचुइज्जपुरिसे समणस्स भगवओ महावीरस्स
गहियागमणपवित्तीए मेहं कुमारं एवं वयासी - नो खलु देवाणुप्पिया !

अज्ज रायगिहे नयरे इंदमहे इ वा जाव गिरिजित्ता इ वा ज णं एए उग्गा जाव एगदिसिं एगाभिमुहा निग्गच्छंति । एवं खलु देवाणुप्पिया ! समणे भगवं महावीरे आइगरे तित्थगरे इहमागए इह संपत्ते इह समोसठे^१ इह चेव रायगिहे नगरे गुणसिलए चेइए अहापडिरूवं जाव विहरइ ।

(26) तए णं से मेहे कुमारे कंचुइज्जपुरिसस्स अंतिए एयमट्ठं सोच्चा निसम्म हट्ठतुट्ठे कोडुंबियपुरिसे सहावेइ २ एवं वयासी — खिप्पामेव भो देवाणुप्पिया ! चाउघटं आसरहं जुत्तामेव उवट्ठवेह जाव उवणेंति । तए णं से मेहे ण्हाए जाव सव्वालंकारविभूसिए चाउघटं आसरहं दुरूठे समाणे सकोरंटमल्लदामेणं छत्तेणं धरिज्जमाणेणं महया भड-चडगरवंदपारियालसंपरिवुडे रायगिहस्स नयरस्स मज्झंमज्जेणं नि-ग्गच्छइ २ जेणामेव गुणसिलए चेइए तेणामेव उवागच्छइ २ समणस्स भगवओ महावीरस्स छत्ताइच्छत्तं पडागाइपडागं विज्जाहरचारणे जंभए य देवे ओवयमाणे पासइ २ चाउघटाओ आसरहाओ पच्चोरुहइ २ समणं भगवं महावीरं पंचविहेणं अभिगमेणं अभिगच्छइ तज्जहा — सचित्ताणं दव्वाणं विउसरणयाए, अचित्ताणं दव्वाणं अविउ-सरणयाए, एगसाडियं उत्तरासंगकरणेणं, चक्खुपासे अंजलिपग्गहेणं, मणसो एगत्तीकरणेणं । जेणामेव समणे भगवं महावीरे तेणामेव उवागच्छइ २ समणं भगवं तिक्खुत्तो आयाहिणपयाहिणं करेइ वंदइ नमंसइ २ समणस्स भगवओ नच्चासन्ने नाइदूरे सुस्तूसमाणे नमंसमाणे पंजलिउडे अभिमुहे विणएणं पज्जुवासइ । तए णं समणे भगवं महावीरे मेहस्स कुमारस्स तीसे य महइमहालियाए महच्चपरिसाए मज्झगए विचित्तं धम्ममाइक्खइ, जहा — जीवा वज्झंति मुच्चंति जहा य संकिलिस्संति । धम्मकहा भाणियव्वा जाव परिसा पडिगया ।

(27) तए णं से मेहे कुमारे समणस्स भगवओ महावीरस्स अंतिए धम्मं सोच्चा निसम्म हट्ठतुट्ठे समणं भगवं महावीरं तिक्खुत्तो आया-हिणपयाहिणं करेइ २ वंदइ नमंसइ २ एवं वयासी — सद्दहामि णं भंते ! निग्गंधं पावयणं एवं पत्तियामि णं रोएमि णं अब्भुट्ठेमि णं भंते !

निगगथं पावयणं । एवमेयं भंते ! तहमेयं अबितहमेयं इच्छियमेयं पडिच्छियमेयं भंते ! इच्छियपडिच्छियमेयं भंते ! से जहेव तं तुब्भे वयह जं नवरं देवाणुप्पिया ! अम्मापियरो आपुच्छामि तओ पच्छा मुंडे भवित्ताणं पव्वइस्सामि । अहासुहं देवाणुप्पिया मा पडिबंधं । तए णं से मेहे कुमारे समणं भगवं वंदइ नमंसइ २ जेणामेव चाउग्घंटे आसरहे तेणामेव उवागच्छइ २ चाउग्घंटं आसरहं दुरूहइ महया भडचडगर-पहकरेणं रायगिहस्स नगरस्स मज्झंमज्झेणं जेणामेव सए भवणे तेणामेव उवागच्छइ २ चाउग्घंटाओ पच्चोरुहइ २ जेणामेव अम्मापियरो तेणा-मेव उवागच्छइ २ अम्मापिऊणं पायवडणं करेइ २ एवं वयासी— एवं खलु अम्मयाओ ! मए समणस्स भगवओ महावीरस्स अंतिए धम्मे निसंते से वि य मे धम्मे इच्छिए पडिच्छिए अभिरुइए । तए णं तस्स मेहस्स अम्मापियरो एवं वयासी— धन्नेसि तुमं जाया ! संपुण्णे कयत्थे कय-लक्खणे सि तुमं जाया ! जन्नं तुमे समणस्स ३ अंतिए धम्मे निसंते । सेवि य ते धम्मे इच्छिए पडिच्छिए अभिरुइए । तए णं से मेहे कुमारे अम्मा-पियरो दोच्चं पि तच्चं पि एवं वयासी— एवं खलु अम्मयाओ ! मए समणस्स ३ अंतिए धम्मे निसंते । से वि य मे धम्मे इच्छिए पडिच्छिए अभि-रुइए । तं इच्छामि णं अम्मयाओ ! तुब्भेहिं अब्भणुन्नाए समाणे समणस्स ३ अंतिए मुंडे भवित्ताणं अगाराओ अणगारियं पव्वइत्तए । तए णं सा धारिणी देवी तं अणिट्ठं अकंतं अप्पियं अमणुन्नं अमणामं असुयपुव्वं फरुसगिरं सोच्चा निसम्म इमेणं एयारूवेणं मणोमाणासिएणं महया पुत्तदुक्खेणं अभिभूया समाणी सेयागयरोमकूव-पगलंतविलीणगाया सोयभरपवेवियंगी नित्तेया दीणविमणवयणा कर-यलमलियव्व कमलमाला तक्खणओलुग्गदुब्बलसरीरा लावणसुन्ननि-च्छायगयसिरीया पसिढिलभूसणपडंतखुम्मियसंचुण्णियधवलवलयपव्व-ट्टउत्तरिज्जा सूमालविकिण्णकेसहत्था मुच्छावसनट्टचेयंगरुई पैरसुनिय-त्तव्व चंपगलया निव्वत्तमेहे व इंदलट्ठी विमुक्कसंधिवंधणा कोट्टिमतलंसि सव्वंगेहिं धसत्ति पडिया । तए णं सा धारिणी देवी ससंभमोवत्तियाए

तुरियं कंचणभिगारमुहविणिगंयसीयलजलविमलधाराए परिसिंचमाणा
निव्वावियगायलट्ठी उक्खेवणतालविटवीयणगजणियवाएणं सफुसिएणं
अंतेउरपरियणेणं आसासिया समाणी मुत्तावलीसन्निगासपवडंतअंसुधाराहिं
सिंचमाणी पओहरे कलुणविमणदीणा रोयमाणी कंदमाणी तिप्पमाणी
सोयमाणी विलवमाणी मेहं कुमारं एवं वयासी । —

(28) तुमं सि णं जाया ! अम्हं एगे पुत्ते इट्ठे कंते पिए मणुन्ने मणामे
थेज्जे वेसासिए सम्मए बहुमए अणुमए भंडकरंडगसमाणे रयणे रयण-
भूए जीवियउस्सासए हिययाणंदजणणे उंबरपुप्फं पिव दुल्लहे सवणयाए
किमंग पुण पासणयाए । नो खलु जाया ! अम्हे इच्छामो खणमवि
विप्पओगं सहित्तए । तं भुंजाहि ताव जाया ! विपुले माणुस्सए
कामभोगे जाव ताव वयं जीवामो । तओ पच्छा अम्हेहिं काल-
गएहिं परिणयवए वड्डियकुलवंसतंतुकज्जंमि निरवएक्खे समणस्स ३
अंतिए मुंडे भवित्ता अगाराओ अणगारियं पव्वइस्ससि । तए
णं से मेहे कुमारे अम्मापिऊहिं एवं वुत्ते समाणे अम्मापियरो एवं
वयासी — तहेव णं तं अम्मो ! जहेव णं तुब्भे ममं एवं वयह — तुमं सि
णं जाया ! अम्हं एगे पुत्ते तं चेव जाव निरवएक्खे समणस्स जाव
पव्वइस्ससि । एवं खलु अम्मयाओ ! माणुस्सए भवे अधुवे अणियए
असासए वसणसउवइवाभिभूए विज्जुलयाचंचले अणिच्चे जलबुब्बुय-
समाणे कुसग्गजलबिंदुसन्निभे संझब्भरागसरिसे सुविणदंसणोवमे सडण-
पडणविद्धंसणधम्मो पच्छा पुरं च णं अवस्सविप्पजहाणिज्जे । से के णं
जाणइ अम्मयाओ ! के पुट्ठि गमणाए के पच्छा गमणाए ? तं इच्छामि
णं अम्मयाओ ! तुब्भेहिं अब्भणुन्नाए समाणे समणस्स ३ जाव
पव्वइत्तए । तए णं तं मेहं कुमारं अम्मापियरो एवं वयासी — इमाओ
ते जाया । सरिसियाओ सरित्तयाओ सरिँव्वयाओ सरिसल्लावण-
रूवजोव्वणगुणोववेयाओ सरिसेहिंतो रायकुलेहिंतो आणियल्लियाओ
भारियाओ । तं भुंजाहि णं जाया ! एयाहिं सद्धिं विउले माणुस्सए
कामभोगे । पच्छा भुत्तभोगे समणस्स जाव पव्वइस्ससि । तए णं से मेहे

कुमारे अम्मापियरं एवं वयासी - तहेव णं अम्मयाओ ! जं णं तुब्भे ममं एवं वयह - इमाओ ते जाया ! सरिसियाओ जाव पव्वइस्ससि । एवं खलु अम्मयाओ माणुस्सगा कामभोगा असुई असासया वंतासवा पित्तासवा खेलासवा सुक्कासवा सोणियासवा दुरुस्सासनीसासा दुरूवमुत्तपुरीसपूयबहुपडिपुण्णा उच्चारपासवणखेलसिंघाणगवंतपित्त-सुक्कसोणियसंभवा अधुवा आणियत्ता असासया सडणपडणविद्धंसण-धम्मा पच्छा पुरं च णं अवस्सविप्पजहणिज्जा । से^१ के णं अम्मयाओ ! जाव पव्वइत्तए । तए णं तं मेहं कुमारं अम्मापियरो एवं वयासी - इमे य ते जाया ! अज्जयपज्जयपिउपज्जयागए सुबहु हिरण्णे य सुवण्णे य कंसे य दूसे य मणिमोत्तियसंखसिलप्पवालरत्तरयणसंतसारसावएज्जे य अलाहि जाव आसत्तमाओ कुलवंसाओ पगामं दाउं पगामं भोत्तुं पकामं परिभाएउं । तं अणुहोहि ताव^२ जाया ! विपुलं माणुस्सगं इड्डिसक्कारसमुदयं । तओ पच्छा अणुभूयकल्लाणे समणस्स ३ जाव पव्वइस्ससि । तए णं से मेहे कुमारे अम्मापियरं एवं वयासी - तहेव णं अम्मयाओ ! जं णं तं^३ वयह - इमे ते जाया ! अज्जग-पज्जग जाव तओ पच्छा अणुभूयकल्लाणे पव्वइस्ससि । एवं खलु अम्मयाओ ! हिरण्णे य जाव सावएज्जे अग्गिसाहिए चोरसाहिए रायसाहिए दाइयसाहिए मच्चुसाहिए अग्गिसामन्ने जाव मच्चुसामन्ने सडणपडणविद्धंसणधम्मे पच्छा पुरं च णं अवस्सविप्पजहणिज्जे । से के णं जाणइ अम्मयाओ ! के पुठिं जाव गमणाए । तं इच्छामि णं जाव पव्वइत्तए । तए णं तस्स मेहस्स कुमारस्स अम्मापियरो जाहे नो संचाइति मेहं कुमारं बहूहिं विसयाणुलोमाहिं आघवणाहि य पन्नवणाहि य सन्नवणाहि य विन्नवणाहि य आघवित्तए वा पन्नवित्तए वा सन्नवि-त्तए वा विन्नवित्तए वा ताहे विसयपडिकूलाहिं संजमभउव्वेयकारि-याहिं पन्नवणाहिं पन्नवेमाणा एवं वयासी - एस णं जाया ! निग्गंथे पावयणे सच्चे अणुत्तरे केवलिए पडिपुण्णे नेयाउए संसुद्धे सल्लगतणे सिद्धिमग्गे मुत्तिमग्गे तिज्जाणमग्गे निव्वाणमग्गे सव्वदुक्खप्पहीणमग्गे

अहीव एगंतदिट्ठीए खुरो इव एगंतधाराए लोहमया ईव जवा चावेयव्वा
 बालुयाकवले इव निरस्साए मंगा इव महानई पडिसोयगमणाए
 महासमुदो इव भुयाहिं दुत्तरे तिव्खं चंक्रमियव्वं गरुअं लंबेयव्वं
 असिधारव्वयं चरियव्वं । नो खलु कप्पइ जाया ! समणणं निगंथाणं
 आहाकम्मिए वा उद्देसिए वा कीयगडे वा ठवियए वा रइयए वा
 दुब्भिकखभत्ते वा कंतारभत्ते वा वहलियाभत्ते वा गिलाणभत्ते वा मूल-
 भोयणे वा कंदभोयणे वा फलभोयणे वा बीयभोयणे वा हरियभोयणे
 वा भोत्तए वा पायए वा । तुमं च णं जाया ! सुहसमुचिए नो चेव
 णं दुहसमुचिए नालं सीयं नालं उण्हं नालं खुहं नालं पिवासं नालं
 वाइयपित्तियसिंभियसन्निवाइयविविहे रोगायंके उच्चावए गामकंटए
 बावीसं परीसहोवसग्गे उदिण्णे सम्मं अहियासित्तए । भुंजाहि ताव
 जाया ! माणुस्सए कामभोगे । तओ पच्छा भुत्तभोगी समणस्स जाव
 पव्वइस्ससि । तए णं से मेहे कुमारे अम्मापिऊहिं एवं वुत्ते समाणे
 अम्मापियरं एवं वयासी — तहेव णं अम्मयाओ ! जं णं तुब्भे ममं एवं
 वयह — एस णं जाया ! निगंथे पावयणे सच्चे अणुत्तरे पुणरवि तं
 चेव जाव तओ पच्छा भुत्तभोगी समणस्स जाव पव्वइस्ससि । एवं खलु
 अम्मयाओ ! निगंथे पावयणे कीवाणं कायराणं कापुरिसाणं इहल्लोग-
 पडिबद्धाणं परलोगनिप्पिवासाणं दुरणुचरे पाययजणस्स नो चेव णं धीरस्स
 निच्छियस्स ववसियस्स । एत्थ किं दुक्करं करणयाए ? तं इच्छामि णं
 अम्मयाओ ! तुब्भेहिं अब्भणुन्नाए समाणे समणस्स जाव पव्वइत्तए । .

(29) तए णं तं मेहं कुमारं अम्मापियरो जाहे नो संचाइंति बहूहिं
 विसयाणुलोमाहि य विसयपडिकूलाहि य आघवणाहि य पन्नवणाहि
 य सन्नवणाहि य विन्नवणाहि य आघवेत्तए वा पन्नवेत्तए वा सन्नवित्तए
 वा विन्नवित्तए वा ताहे अकामाई चेव मेहं कुमारं एवं वयासी — इच्छामो
 ताव जाया ! एगदिवसमवि ते रायसिरिं पासित्तए । तए णं से मेहे
 कुमारे अम्मापियरमणुवत्तमाणे तुसिणीए संचिट्ठइ । तए णं से सेणिए
 राया कोडुंबियपुरिसे सहावेइ २ एवं वयासी — खिप्पामेव भो देवा-

णुप्पिया ! मेहस्स कुमारस्स महत्थं महग्घं महरिहं विउलं रायाभिसेयं उवट्ठवेह । तए णं ते कोडुंबियपुरिसा जाव ते वि तहेव उवट्ठवेंति । तए णं से सेणिए राया बहूहिं गणनायगदंडनायगेहिं य जाव सपंरिवुडे मेहं कुमारं अट्ठसएणं सोवणियाणं कलसाणं एवं रूपमयाणं कलसाणं सुवण्णरूपमयाणं कलसाणं मणिमयाणं कलसाणं सुवण्णमणिमयाणं रूपमणिमयाणं सुवण्णरूपमणिमयाणं भोमेज्जाणं सव्वोदएहिं सव्व-मट्ठियाहिं सव्वपुप्फेहिं सव्वगंधेहिं सव्वमल्लेहिं सव्वोसहीहिं य सिद्धत्थ-एहिं य सव्विड्डीए सव्वज्जुईए सव्वबलेणं जाव दुंदुभिनिघोसणाइयरवेणं महया २ रायाभिसेएणं अभिसिंचइ २ करयल जाव कट्ठु एवं वयासी — जय २ नंदा ! जय २ भद्दा ! जय नंदा ० ! भदं ते अजियं जिणाहि ! जियं पालयाहि जियमज्झे वसाहि अजियं जिणेहि सत्तुपक्खं जियं च पालेहि मित्तपक्खं जाव भरहो इव मणुयाणं रायागिहस्स नगरस्स अन्नेसिं च बहूणं गामागरनगर जाव सन्निवेसाणं आहेवच्चं जाव विहराहि त्तिक्कट्ठु जय २ सहं पउजंति । तए णं से मेहे राया जाए महया जाव विहरइ । एण णं तस्स मेहस्स रत्तो अम्मापियरो एवं वयासी — भण जाया ! किं दल्यामो किं पयच्छामो किं वा ते हियइच्छिए सामत्थे ? तए णं से मेहे राया अम्मापियरो एवं वयासी — इच्छामि णं अम्मयाओ ! कुत्तियावणाओ रयहरणं पडिग्गहं च आणियं कासवयं च सदावेहं । तए णं से सेणिए राया कोडुंबियपुरिसे सदावेइ २ एवं वयासी — गच्छह णं तुब्भे देवाणु-प्पिया ! सिरिघराओ तिन्नि सयसहस्साइं गहाय दोहिं सयसहस्सेहिं कुत्ति-यावणाओ रयहरणं पडिग्गहं च उवणेह सहसहस्सेणं कासवयं सदावेह । तए णं ते कोडुंबियपुरिसा सेणिएणं रत्ता एवं वुत्ता समाणा हट्ठुट्ठा सिरिघराओ तिन्नि सयसहस्साइं गहाय कुत्तियावणाओ दोहिं सयसहस्सेहिं रयहरणं पडिग्गहं च उवणेंति सयसहस्सेणं कासवयं सदावेंति । तए णं से कासवए तेहिं कोडुंबियपुरिसेहिं सदाविए समाणे हट्ठ जाव हियए ण्हाए कयबलिकम्भे कयकोउयमंगलपायच्छित्ते सुद्धप्पावेसाइं वत्थाइं पवरपरिहिए अप्पमहग्घाभरणाळंकियसरीरे जेणेव सेणिए राया तेणेव

उवागच्छइ २ सेणियं रायं करयलमंजलिं कट्टु एवं वयासी — संदिसह णं देवाणुप्पिया ! जं मए करणिज्जं । तए णं से सेणिए राया कासवयं एवं वयासी — गच्छाहि णं तुमं देवाणुप्पिया ! सुरभिणा गंधोदएणं निक्खे हत्थपाए पक्खालेहि सेयाए चउप्फालाए पोत्तीए मुहं बंधित्ता मेहस्स कुमारस्स चउरंगुलवज्जे निक्खमणपाउग्गे अग्गकेसे कप्पेहि । तए णं से कासवए सेणिएणं रत्ता एवं वुत्ते समाणे हट्ठ जाव हियए जाव पडिसुणेइ सुरभिणा गंधोदएणं हत्थपाए पक्खालेइ २ सुद्धवत्थेणं मुहं बंधइ २ परेणं जत्तेणं मेहस्स कुमारस्स चउरंगुलवज्जे निक्खमणपाउग्गे अग्गकेसे कप्पइ । तए णं तस्स मेहस्स कुमारस्स माया महरिहेणं हंसलक्खणेणं पडसाडएणं अग्गकेसे पडिच्छइ २ सुरभिणा गंधोदएणं पक्खालेइ २ सरसेणं गोसीसचंदणेणं चच्चाओ दलयइ २ सेयाए पोत्तीए बंधइ २ रयणसमुग्गयंसि पक्खिवइ २ मंजूसाए पक्खिवइ २ हारवारिधार-सिंदुवारलिन्नमुत्तावल्लिप्पगासाइं अंसूइं विणिम्भुयमाणी २ रोयमाणी २ कंदमाणी २ विलवमाणी २ एवं वयासी — एस णं अम्हं मेहस्स कुमारस्स अब्भुदएसु य उरस्सवेसु य पसवेसु य तिहीसु य छणेसु य जन्नेसु य पव्वणीसु य अपच्छिमे दरिसणे भविस्सइ त्तिकट्टु उस्सीसामूले ठावेइ । तए णं तस्स मेहस्स कुमारस्स अम्मापियरो उत्तरावक्कमणं सीहासणं रयावेति मेहं कुमारं दोब्बं पि तच्चं पि सेयापीएहिं कलसेहिं ण्हावेति २ पम्हलसूमालाए गंधकासाइयाए गायाइं ल्हेंति २ सरसेणं गोसीस-चंदणेणं गायाइं अणुलिपंति २ नासानीसासवायवोज्जं जाव हंसलक्खणं पडुसाडगं नियंसेति २ हारं पिणद्धेंति २ अद्धहारं पिणद्धेंति २ एवं एगावलिं मत्तावालिं कणगावालिं २ रयणावालिं २ पालंवं २ पायपलंवं कडगाइं २ तुडिगाइं २ केऊराइं २ अंगयाइं २ दसमुद्धियाणंतयं कडिसुत्तयं २ कुंडलाइं चूडामणिं रयणुकूडं मंडडं पिणद्धेंति २ दिव्वं सुमणदामं पिणद्धेंति २ दद्वैरमलयसुगंधिए गंधे पिणद्धेंति । तए णं तं मेहं कुमारं गंठिमवेढिमपूरिमसंघाइमेण चउव्विहेणं महेणं कप्परुक्खगं पिव अलंकियविभूसियं करेति । तए णं से सेणिए राया कोडुंबियपुरिसे

सदावेइ २ एवं वयासी — खिप्पामेव भो देवाणुप्पिया ! अणेगखंभसय-
 सन्निविट्ठं लीलट्टियसांलभंजियागं ईहामियउसभतुरयनरमगरविहगवाल-
 किन्नररुहसरभचमरकुंजरवणलयपउमलयभत्तिचित्तं घंटावल्लिमहुरमण-
 हरसरं सुभकंतदरिसणिज्जं निउणोवियमिसिमिसेतमाणिरयणघंटियाजाल-
 परिक्खित्तं अब्भुगयवइरवेइयापरिगयाभिरामं विज्जाहरजमलजंतजुत्तं
 पिव अच्चीसहस्समालणीयं रूवगसहस्सकलियं भिसमाणं भिब्भिसमाणं
 चक्खुल्लोयणलेस्सं सुहफासं सस्सिरियरूवं सिग्घं तुरियं चवलं वेइयं
 पुरिससहस्सवाहिणीयं सीयं उवट्ठवेह । तए णं ते कोडुंबियपुरिसा
 हट्ठतुट्ठ जाव उवट्ठवेति । तए णं से मेहे कुमारे सीयं दुरुहइ २
 सीहासणवरगए पुरत्थाभिमुहे सन्निसण्णे । तए णं तस्स मेहस्स
 कुमारस्स माया ण्हाया कयबलिकम्मा जाव अप्पमहग्घाभरणांलंकियसरीरा
 सीयं दुरुहइ २ मेहस्स कुमारस्स दाहिणपासे भद्दासणंसि निसीयइ ।
 तए णं तस्स मेहस्स कुमारस्स अंबधार्इ रयहरणं च पडिगहगं च
 गहाय सीयंदुरुहइ २ मेहस्स कुमारस्स वामपासे भद्दासणंसि निसीयइ ।
 तए णं तस्स मेहस्स कुमारस्स पिट्ठओ एगा वरतरुणी सिंगारा-
 गारचारुवेसा संगयगयहसियभणियचेट्टियविलाससंलवुल्लावनिउणजुत्तो-
 वयारकुसला आमेलगजमलजुयलवट्टियअब्भुन्नयपीणरइयसंठियपओहरा
 हिमरययकुंदेदुपगासं सकोरेंटमल्लदामधवलं आयवत्तं गहाय सलीलं
 ओहारेमाणी २ चिट्ठइ । तए णं तस्स मेहस्स कुमारस्स दुवे वरतरुणीओ
 सिंगारागारचारुवेसाओ जाव कुसलाओ सीयं दुरुहंति २ मेहस्स कुमारस्स
 उभओ पांसं नानामणिकणगरयणमहरिहतवणिज्जउज्जलविचित्तदंडाओ
 चिल्लियाओ सुहुमवरदीहवालाओ संखकुंदगरयअमयमहियफेणपुंजस-
 न्निगासाओ चामराओ गहाय सलीलं ओहारेमाणीओ २ चिट्ठंति । तए णं
 तस्स मेहकुमारस्स एगा वरतरुणी सिंगारा जाव कुसला सीयं जाव दुरुहइ २
 मेहस्स कुमारस्स पुरओ पुरत्थिमेणं चंदप्पभवयरवेरुलियविमलदंडं
 तालियंतं गहाय चिट्ठइ । तए णं तस्स मेहस्स कुमारस्स एगा वरतरुणी
 जाव सुख्खा सीयं दुरुहइ २ मेहस्स कुमारस्स पुव्वदक्खिण्णेणं सेयं

रययामयं विमलसलिलपुणं मत्तगयमहामुहाकंसमाणं भिंगारं गहाय चिट्ठइ । तए णं तस्स मेहस्स कुमारस्स पिया कोडुंबियपुरिसे सदावेइ २ एवं वयासी—खिप्पामेव भो देवाणुपिया ! सरिसयाणं सरित्तयाणं सरिठ्वयाणं एगाभरणगहियनिज्जोयाणं कोडुंबियवरतरुणाणं सहस्सं सदावेह जाव सदावेति । तए णं ते कोडुंबियवरतरुणपुरिसा सेणियस्स रत्तो कोडुंबियपुरिसेहिं सदाविया समाणा हट्ठा ण्हाया जाव एगाभरणगहियणिज्जोया जेणामेव सेणिए राया तेणामेव उवा-गच्छंति २ सेणियं रायं एवं वयासी—संदिसह णं देवाणुपिया । जं णं अम्हेहिं करणिज्जं । तए णं से सेणिए राया तं कोडुंबियवरतरुणसहस्सं एवं वयासी—गच्छह णं तुब्भे देवाणुपिया ! मेहस्स कुमारस्स पुरिस-सहस्सवाहिणीं सीयं परिवहह । तए णं तं कोडुंबियवरतरुणसहस्सं सेणिएण रत्ता एवं वुत्तं सैतं हट्ठं मेहस्स कुमारस्स पुरिससहस्सवाहिणीं सीयं परिवहइ । तए णं तस्स मेहस्स कुमारस्स पुरिससहस्सवाहिणिं सीयं दुरुढस्स समाणस्स इमे अट्ठमंगलया तप्पढमयाए पुरओ अहा-णुपुव्वीए संपट्टिया, तंजहा—सोत्थिय सिरिवच्छ नंदियावत्त वद्धमाणग भद्दासण कलस मच्छ दप्पण जाव बहवे अत्थत्थिया जाव ताहिं इट्ठाहिं जाव अणवरयं अभिनंदंता य अभिशुणंता य एवं वयासी—जय २ नंदा ! जय २ भद्दा ! जय २ नंदा ! भद्दं ते आजियं जिणाहि इंदियाइं जियं च पालेहि समणधम्मं जियविग्घो वि य वसाहि तं देव ! सिद्धि-मज्जे निहणाहि रागदोसमल्ले तवेणं धिइधणियबद्धकच्छे महाहि य अट्ठ-कम्मसत्तू ज्ञाणेणं उत्तमेणं सुक्केणं अप्पमत्तो पावय वित्तिभिरमणुत्तरं केवलं नाणं गच्छ य मोक्खं परमं पयं सासयं च अयलं हंता परीसह-चमूणं अभीओ परीसहोवसग्गाणं धम्मे ते अविग्गं भवउं त्तिकट्ठु पुणो २ मंगलजयसहं पउंजंति । तए णं से मेहे कुमारे रायगिहस्स नगरस्स मज्झमज्झेणं निग्गच्छइ २ जेणेव गुणासिलए चेइए तेणेव उवागच्छइ २ पुरिससहस्सवाहिणीओ सीयाओ पच्चोरुइइ ।

(30) तए णं तस्स मेहस्स कुमारस्स अम्मापियरो मेहं कुमारं पुरओ

कट्टु जेणामेव समणे ३ तेणामेव उवागच्छंति २ समणं ३ तिक्खुत्तो
 आयाहिणपयाहिणं करेति २ वंदंति नमंसंति २ एवं वयासी — एस णं
 देवाणुप्पिया ! मेहे कुमारे अम्हं एगे पुत्ते इट्ठे कंते जाव जीवियउसासए
 हिययनंदिजणए उंबरपुप्फं पिव दुल्लहे सवणयाए किमंग पुण दरिसणयाएमं ?
 से जहानामए उप्पले इ वा पउमे इ वा कुमुदे इ वा पंके जाए जले संवड्डिए
 नोवलिप्पइ पंकरएणं नोवलिप्पइ जलरएणं एवामेव मेहे कुमारे कामेसु
 जाए भोगेसु संवुड्डे नोवलिप्पइ कामरएणं नोवलिप्पइ भोगरएणं । एस णं
 देवाणुप्पिया ! संसारभउव्विग्गे भीए जस्मणमरणाणं इच्छइ देवाणुप्पियाणं
 अंतिए मुंडे भवित्ता अगाराओ अणगारियं पव्वइत्तए । अम्हे णं देवाणु-
 प्पियाणं सिस्सभिक्ष्वं दल्लयामो । पडिच्छंतु णं देवाणुप्पिया ! सिस्स-
 भिक्ष्वं । तए णं से समणे ३ मेहस्स कुमारस्स अस्मापिऊहिं एवं वुत्ते
 समाणे एयमट्ठं सम्मं पडिसुणेइ । तए णं से मेहे कुमारे समणस्स ३
 अंतियाओ उत्तरपुरत्थिमं दिसीभागं अवक्कमइ सयमेव आभरणमल्ला-
 लंकारं ओमुयइ । तए णं तस्स मेहकुमारस्स माया हंसलक्खणेणं पडग-
 साहएणं आभरणमल्लालंकारं पडिच्छइ २ हारवारिधारसिंदुवारलिन्न-
 मुत्तावलिप्पगासाइं अंसूणि विणिम्मुयमाणी रोयमाणी कंदमाणी विलव-
 माणी २ एवं वयारी — जइयठ्वं जाया ! घडियठ्वं जाया ! परक्कमियठ्वं
 जाया ! अस्सि च णं अट्ठे नो पमाएयठ्वं । अम्हंपि णं एसेव मग्गे भवउ
 त्तिक्कट्टु मेहस्स कुमारस्स अस्मापियरो समणं ३ वंदंति नमंसंति २
 जामेव दिसं पाउळ्भूया तामेव दिसं पडिगया ।

(31) तए णं से मेहे कुमारे सयमेव पंचमुट्ठियं लोयं करेइ २
 जेणामेव समणे ३ तेणामेव उवागच्छइ २ समणं ३ तिक्खुत्तो आयाहिण-
 पयाहिणं करेइ २ वंदइ नमंसइ २ एवं वयासी — आलित्ते णं भंते ! लोए ।
 पलित्ते णं भंते ! लोए । आलित्तपलित्ते णं भंते ! लोए जराए मरणेण
 य । से जहानामए केइ गाहावई अगारांसि जिज्ञयायमाणंसि जे तत्थ भंडे
 भवइ अप्पमारे मोल्लगरुए तं गहाय आयाए एमंतं अवक्कमइ — एस मे
 नित्थारिए समाणे पच्छा पुरा लोए हियाए सुहाए खेमाए निस्सेसाए

आणुगामिबत्ताव भविस्सइ — एवामेव ममवि एगे आयामन्ने इहे कंते
पिए मणुन्ने मणामे । एस मे नित्थारिए समाणे संसारवोच्छेयकरे भवि-
स्सइ । तं इच्छामि णं देवाणुपिएहिं सयमेव पव्वावियं सयमेव मुंडा-
वियं सेहावियं सिक्खावियं सयमेव आचारगोयरविणयवेणइवचरण-
करणजायामायावत्तियं धम्ममाइक्खियं । तए णं समणे ३ मेहं कुमारे
सयमेव पव्वावेइ सयमेव आचार जाव धम्ममाइक्खइ — एवं देवा-
णुपिआ ! गंतव्वं चिट्ठियव्वं निसीयव्वं तुयट्ठियव्वं मुंजियव्वं भासियव्वं
एवं उट्ठाए उट्ठाव पाणेहिं भूएहिं जीवेहिं सत्तेहिं संजमेणं संजमियव्वं
अस्सि च णं अट्ठे नो पमाएयव्वं । तए णं से मेहे कुमारे समणस्स ३
अंतिए इमं एयारूवं धम्मियं उवएसं सम्मं पडिवज्जइ तमाणाए तह गच्छइ
तह चिट्ठइ जाव उट्ठाए उट्ठाव पाणेहिं भूएहिं जीवेहिं सत्तेहिं संजमइ ।

(३२) जं दिवसं च णं मेहे कुमारे मुंडे भवित्ता अगाराओ अणगारियं
पव्वइए तस्स णं दिवसस्स पच्चावरण्हकालसमयंसि समणाणं निगं-
थाणं अहाराण्णियाए सेज्जासंधारएसु विभज्जमाणेसु मेहकुमारस्स दारमूले
सेज्जासंधारए जाए यावि होत्था । तए णं समणा निगंथा पुव्वरत्ताव-
रत्तकालसमयंसि वायणाए पुच्छणाए परियट्ठणाए धम्माणुजोगच्चिताए
य उच्चारस्स य पासवणस्स य अइगच्छमाणा य निग्गच्छमाणा य अप्पे-
गइया मेहं कुमारं हत्थेहिं संघट्टेति एवं पाएहिं सीसे^९ पोटे^{१०} कायंसि अप्पे-
गइया ओलंडेति अप्पेगइया पोलंडेति अप्पेगइया पायरयरेणुगुंडियं करेति ।
एवं महालियं च रयणीं मेहे कुमारे नो संचाएइ खणमवि अच्छी निमी-
लित्तए । तए णं तस्स मेहस्स कुमारस्स अयमेयारूवे अज्झत्थिए ४
जाव समुप्पज्जित्था — एवं खलु अहं सेणियस्स रत्तो पुत्ते धारिणीए देवीए
अत्तए मेहे जाव समणयाए । तं जया णं अहं अगारमज्जे वसामि तथा
णं मम समणा निगंथा आढावन्ति परियाणन्ति सक्कारेति सम्माणेति
अट्ठाइं हेऊइं पसिणाइं कारणाइं वागरणाइं आइक्खन्ति इट्ठाहिं कंताहिं
वग्गूहिं आलवेंति संलवेंति । जप्पभिइं च णं अहं मुंडे भवित्ता अगा-
राओ अणगारियं पव्वइए तप्पभिइं च णं ममं समणा नो आढावन्ति

जाव नो संलवेंति । अदुत्तरं च णं ममं समणा निगंथां राओ पुठवरत्ता-
वरत्तकालसमयांसि वायणाए पुच्छणाए जाव महालियं च णं रत्ति नो
संचापमि अर्च्छि निमिल्लवेत्तए । तं सेयं खलु मज्झं कल्लं जाव जलंते
समणं ३ आपुच्छित्ता पुणरवि अगारमज्झे वसित्तए त्तिकट्टु एवं संपेहेइ २
अट्टुदुहट्टवसट्टमाणसगए निरयपडिक्खियं च णं रयणीं खवेइ २ कल्लं
पाउप्पभायाए सुविमलाए रयणीए जाव जलंते जेणामेव समणे ३ तेणा-
मेव उवागच्छइ २ तिकखुत्तो आयाहिणपयाहिणं करेइ २ वंदइ नमंसइ
जाव पञ्जुवास्तइ ।

(33) तए णं मेहा इ समणे भगवं महावीरे मेहं कुमारं एवं
वयासी — से नूणं तुमं मेहा ! राओ पुठवरत्तावरत्तकालसमयांसि
समणेहिं निगंथेहि वायणाए पुच्छणाए जाव महालियं च णं राइं
नो संचापमि मुहुत्तमवि अर्च्छि निमिल्लवेत्तए । तए णं तुव्मे मेहा !
इमेयारूवे अज्झत्थिए जाव समुप्पजित्था — जया णं अहं अगारमज्झे
वसामि तथा णं मम समणा निगंथा आढायंति । जप्पभिइं च णं मुंढे
भविता अगाराओ अणगारियं पव्वय्यामि तप्पभिइं च णं मम समणा नो
आढायंति जाव नो परियाणंति अदुत्तरं च णं मम समणा निगंथा राओ
अप्पेगइया वायणाए जाव पाचरयरेणुगुंडियं करेति । तं सेयं खलु
मम कल्लं पाउप्पभायाए समणं ३ आपुच्छित्ता पुणरवि अगारमज्झे
आवसित्तए त्तिकट्टु एवं संपेहेसि २ अट्टुदुहट्टवसट्टमाणसे जाव रयणीं
खवेसि २ जेणामेव अहं तेणामेव हव्वमागए । से नूणं मेहा ! एस अट्ठे
समट्ठे ? हंता अट्ठे समट्ठे । एवं खलु मेहा ! तुमं इओ तवे अईए भव-
ग्गइणे वेयड्ढगिरिपायमूले वणयरोहिं निव्वत्तियनामभेज्जे सेए संख-
उब्बलविमलानिम्मलदहिघणगोखीरफेणरयणियरप्पयासे ससुस्सेहे नवायए
दसपरिणाहे सत्तंगपइट्ठिए सोमे समिणं सुरूवे पुरओ सव्वगे समूसियसिरे
सुहासणे पिट्ठओ बराहे अइयाकुच्छी अच्छिदकुच्छी अलंबकुच्छी पलंब-
लंबोदराहरकरे धणुपट्ठागइविसिद्धपुट्ठे अल्लीणपमाणजुत्तवट्ठियपीवरगत्तां-
वरे अल्लीणपमाणजुत्तपुच्छे पडिपुण्णसुच्चारकुम्भचलणे पंडुरसुविसुद्धनिद्ध-

निरुवहयविसतिनहे छहंते सुमेरुप्पमे नामं हत्थिराया होत्था । तत्थ णं तुमं मेहा ! बहूहिं हत्थीहि य हत्थिणियाहि य लोद्वएहि य लोद्वियाहि य कलभ-
एहि य कलभियाहि य सद्धिं संपरिवुडे हत्थिसहस्सनायए देसए पागट्ठी
पट्ठवए जूहवई वंदपरियट्ठएँ अन्नोसिं च बहूणं एकल्लाणं हत्थिकलभाणं
आहेवच्चं जाव विहरासि । तए णं तुमं मेहा ! निब्बप्पमत्ते सइं पळलिए
कंदर्परई मोहणसीले अवितण्हकामभोगतिसिए बहूहिं हत्थीहि य जाव
संपरिवुडे वेयड्ढगिरिपायमूले गिरीसु य दरीसु य कुहरेसु य कंदरासु
य उज्झरेसु य निज्झरेसु य वियरेसु य गहासु य पल्लेसु य चिल्लेसु
य कडगेसु य कडयपल्लेसु य तडीसुं य वियडीसुं य टकेसु य कूडेसु
य सिहरेसु य पम्भारेसु य मंचेसु य मालेसु य काणणेसु य वणेसु य
वणसंडेसु य वणराईसु य नदीसु य नदीकच्छेसु य जूहेसु य संगमेसु
य वावीसु य पोक्खरिणीसु य दीहियासु य गुंजालियासु य सरेसु य
सरपंतियासु य सरसरपंतियासु य वणयरेहिं दिन्नवियारे बहूहिं हत्थीहि य
जाव सद्धिं संपरिवुडे बहुविहतरुपल्लवपउरपाणियतणे निब्भए निरुव्विग्गे
सुहंसुहेणं विहरासि । तए णं तुमं मेहा ! अन्नया कयाइ पाउसँवरिसा-
रत्तसरयहेमंतवसंतेसु कमेण पंचसु उऊसु समइकंतेसु गिम्हकालसमयंसि
जेट्ठामूलमासे पायवधंससमुट्ठिएणं सुक्कतणपत्तकयवरमारुयसंजोगदीविणं
महाभयंकरणं हुयवहेणं वणदवजालासंपलित्तेसु वणंतेसु धूमाउलासु
दिसासु महावायवेगेणं संघट्टिएसु छिन्नजालेसु आवयमाणेसु पोह-
रुक्खेसु अंतो २ श्रियायमाणेसु मयँकुहियविणट्ठकिमियकंइमनईवियरग-
ज्झीणपाणीयंतेसु वणंतेसु भिगारकदीणकंदियरवेसु खरफरुसअणिट्ठ-
रिट्ठवाहिंतिंविडुमग्गेसु दुमेसु तण्हावसमुक्कपक्खपँयडियजिब्भतालुय-
असंपुडियतुंडपक्खिवसंधेसु सँसंतेसु गिम्हउण्हवायखरफरुसचंडमारुयसुक्क-
तणपत्तकयवरवाउलिभमंतदिन्नसंभंतसावयाउलमिगतण्हाबद्धचिंधपट्टेसु
गिरिवरेसु संबट्टएँसु तत्थ मियपसयसरीसिवेसु अवदालियवयणविवर-
निल्लालियगजीहे महंततुंबइयपुण्णकण्णे संकुचियथोरपीवरकरे ऊसिय-
नंगूले पीणाइयविरसरडियसहेणं फोडयंतेव अंबरतलं पायदहरणं कंपयंते-

व मेइणितलं विणिम्मुयमाणे य सीयारं सन्वओ समंता वल्लिवियाणाइं
 छिंदमाणे रुक्खसहस्साइं तत्थ सुबहूणि नोळ्ळियंते विणट्टरेट्ठेव नरवरिंदे
 वायाइद्धेव पोए मंडलवाएव परिभमंते अभिक्खणं २ लिंडनियरं
 पमुंचमाणे २ बहुहिं हत्थीहिं य जाव सद्धिं दिसोदिसिं विप्पलाइत्था ।
 तत्थ णं तुमं मेहा । जुण्णे जराजज्जरियदेहे आउरे झंझिर्प पियासिए
 दुब्बले किलंते नट्टसुइए मूढादिसाए सयाओ जूहाओ विप्पहूणे वणदव-
 जालीपारद्धे उण्हेण य तण्हाए य लुहाए य परब्भाइए समाणे भीए तत्थे
 तसिए उव्विग्गे संजायभए सन्वओ समंता आधावमाणे परिधावमाणे
 एगं चै णं महं सरं अप्पोययं पंकबहुलं अतित्थिणं पाणियपाए ओइण्णे ।
 तत्थ णं तुमं मेहा । तीरमइगए पाणियं असंपत्ते अंतरा चेव सेयंसि
 बिसण्णे । तत्थ णं तुमं मेहा । पाणियं पाइस्सामि त्तिकट्टु इत्थं पसारोसि ।
 से वि य ते हत्थे उदगं न पावई । तए णं तुमं मेहा ! पुणरवि कायं
 पच्चुद्धरिस्सामि त्तिकट्टु बलियतरायं पंकांसि खुत्ते । तए णं तुमं मेहा !
 अन्नया कयाइ एगे चिरनिज्जूढए गयवरजुवाणए सगाओ जूहाओ कर-
 चरणदंतमुसलपहारेहिं विप्परद्धे समाणे तं चेव महइहं पाणीयपाए
 समोयरइ । तए णं से कलभए तुमं पासइ २ तं पुव्ववेरं सैमरइ २
 आसुरुत्ते रुट्ठे कुविए चंडिक्किए मिसिमिसेमाणे जेणेव तुमं तेणेव उवा-
 गच्छइ २ तुमं तिक्खेहिं दंतमुसलेहिं तिक्खुत्तो पिट्ठओ उच्छुभइ २
 पुव्ववेरं निज्जाएइ २ हट्ठतुट्ठे पाणीयं पियइ २ जामेव दिसं पाउब्भूए
 तामेव दिसं पडिगए । तए णं तव मेहा ! सरीरगंसि वेयणा पाउब्भ-
 वित्था उज्जलं विउला कक्खडा दुरहियासा पित्तज्जरपरिगय-
 सरीरे दाहवक्कंतीए यावि विहरित्थी । तए णं तुमं मेहा ! तं उज्जलं
 जाव दुरहियासं सत्तराइंदियं वेयणं वेदेसि सैवीसं वाससयं परमाउं
 पालइत्ता अट्ठवसट्ठदुहट्ठे कालमासे कालं किञ्चा इहेव जंबुदीवे २ भारहे
 वासे दाहिणडुंभरहे गंगाए महानईए दाहिणे कूले विंझगिरिपायमूले
 एगेणं मत्तवरगंधहत्थिणा एगाए गीयवरकरेणूए कुच्छिसि गयकल्लभए
 जणिण । तए णं सा गयकल्लभिया नवण्हं मासाणं वसंतमासांसि तुमं

पयाया । तए णं तुमं मेहा ! गम्भवासाओ विप्पमुळे समणे गयकलभए
यावि होत्था रत्तुप्पलरत्तसूमाळए जासुमंणारत्तपारिज सयलक्खारससरस-
कुंकुमसंझभरागवण्णे इहे नियगस्स जूहवइणो गणियारकणेरुकोत्थहत्थी
अणेगहत्थिसयसंपरिवुडे रम्मेसु गिरिकाणणेषु सुहंसुहेणं विहरसि । तए
णं तुमं मेहा उम्मुक्कवालभावे जोन्वणगमणुप्पत्ते जूहवइणा कालधम्मणा
संजुत्तेणं तं जूहं सयमेव पडिबल्लसि । तए णं तुमं मेहा ! बणयरोहिं निठ्व-
त्तियनामधेज्जे जाव चउदंते मेरुप्पभे हत्थिरयणे होत्था । तत्थ णं तुमं
मेहा । सत्तंगपइट्ठिए तहेव जाव पडिरुवे । तत्थ णं तुमं मेहा ! सत्तसइयस्स
जूहस्स आहेवच्चं जाव अभिरमेत्था । तए णं तुमं अज्झया कयाइ गिम्हकाल-
समयंसि जेट्टामूले वणदबजालापलित्तसु बणंतेसु धूमाउलासु दिसासु जाव
मंडलवाएण्व परिन्भमंते मीए तत्थे जाव संजायभए बहूहिं हत्थीहि य जाव
कलभियाहि य सद्धिं संपरिवुडे सव्वओ समंता दिसोदिसिं विप्पलाइत्था ।
तए णं तव मेहा ! तं बणदवं पासित्ता अयमेयारूवे अज्झत्थिए जाव समु-
प्पज्जित्था — कहिं णं मत्ते मए अयमेयारूवे अगिगसंभवे अणुभूयपुण्वे ?
तए णं तव मेहा ! लेस्साहिं विमुज्झमाणीहिं अज्झवसाणेणं सोहणेणं
सुभेणं परिणामेणं तयावरणिज्जाणं कम्माणं खओवसमेणं ईहापोहमगण-
गवेसणं करेमाणस्स सन्निपुण्वे जाईसरणे समुप्पज्जित्था । तए णं तुमं
मेहा ! एयमट्ठं सम्मं अभिसमेसि — एवं खलु मया अईए दोब्बे भवग्गहणे
इहेव जंबुदीवे २ भारहे वासे वेयडुगिरिपायमूले जाव तत्थ णं महया अय-
मेयारूवे अगिगसंभवे समणुभूए । तए णं तुमं मेहा ! तस्सेव दिवसस्स
पच्चावरण्हकालसमयंसि नियएणं जूहेणं सद्धिं समन्नागए यावि होत्था ।
तए णं तुमं मेहा ! सत्तुस्सेहे जाव सन्निजाईसरणे चउदंते मेरुप्पभे नामं
हत्थी होत्था । तए णं तुज्झं मेहा अयमेयारूवे अज्झत्थिए जाव समुप्प-
ज्जित्था — सेयं खलु मम इयारिणं गंगाए महानईए दादिणिहंसि कूळंसि
विंझगिरिपायमूले दव्वगिगसंजायकैरणट्टा सएणं जूहेणं महइमहालयं मंडलं
घाइत्तए तिकटटु एवं संपेहेसि २ सुहंसुहेणं विहरसि । तए णं तुमं मेहा !
अन्नया कयाइ पढमपाउसंसि महावुट्ठिकार्यांसि सन्निवइयांसि गंगाए महा-

नईए अदूरसामंते बहुहिं हत्थीहिं जाव कलभियाहिं य सत्तहिं य हत्थि-
 सएहिं संपरिवुडे एगं महं ओयणपरिमंडलं महइमंडलं घाएसि जं तत्थ
 तणं वा पत्तं वा कट्टं वा कंटए वा लया वा बल्ली वा स्नाणुं वा रुक्खे वा
 सुवं वा तं सठ्वं तिवस्सुत्तो आहुणिय २ पाएणं उद्धरोसि हत्थेणं
 गेण्हसि एगंते एहेसि । तए णं तुमं मेहा ! तस्सेव मंडलस्स अदूरसामंते
 गंगाए गहानईए दाहिणिले कूले विंझगिरिपायमूले गिरीसु य जाव विह-
 रसि । तए णं तुमं मेहा ! अन्नया कयाइ मज्झिमए वरिसारत्तंसि महावुट्ठि-
 कायंसि सन्निवइयंसि जेणेव से मंडले तेणेव उवागच्छसि २ दोच्चंपि मंडलं
 घाएसि २ एवं चरिमवासारत्तंसि महावुट्ठिकायंसि सन्निवयमाणंसि
 जेणेव से मंडले तेणेव उवागच्छसि २ तच्चंपि मंडलघायं करोसि जं तत्थ
 तणं वा जाव सुहंसुहेणं विहरसि । अह मेहा ! तुमं गइंदभावम्मि
 बट्टमाणे कमेणं नल्लिणिवणविहवणगरे हेमंते कुंदलेद्धउद्धैयतुसारपउरम्मि
 अइकंते अहिणवगिन्हसमयंसि पत्ते वियट्टमाणे वणेसु वणकरेणु-
 विविहदिन्नकयपसचैवाओ तुमं उउयकुसुमं चामरकण्णपूरपरिमंडियाभि-
 रामो मयवसविगसंतकडतडकिलिन्नगंधमदवारिणा सुरभिजाणियगंधो
 करेणुपरिवारिओ उउसमंतजणियसोहो काले दिणयरकरपयंडे परिसोसिय-
 तरुवरसिरिहूरमीमतरदंसणिज्जे भिंगाररवंतभेरवरवे नाणाविहपत्तकट्टतण-
 कयवरुद्धयपइमारुयाइद्धनइयलदुमगणे वाउलिदारुणतरे तण्हावसदोस-
 दूसियभमंतविबिहसावयसमाउले भीमदरिसणिज्जे वट्टंसे दारुणंमि गिन्हे
 मारुववसपसरपसरियवियंभिएणं अब्भहियभीमभेरवरवप्पगारेणं महुधारा-
 पडिक्कसित्तउद्धायमाणभगधगंतसहुद्धएणं दित्ततरसफुल्लिगेणं धूममालाउलेणं
 साववसयंतकरणेणं वणदवेणं जालालोवियनिरुद्धधूमंधकारभीओ आयवाँ-
 लोवमहंततुंबइयपुण्णकण्णो आकुंचियथोरपीवरकरो मयवसभयंतदित्तन-
 वणो वेगेणं महामेहोउव वायणोल्लियमहत्तरुवो जेण कओ तेण पुरा दवगि-
 भवभीयहियएणं अवगयतणप्पएसरुक्खो रुक्खोहेसो दवग्गिसंताणकारण-
 डा जेणेव मंडले तेणेव पहारेत्थ गमण्णए । एको ताव एस गमो । तए णं
 तुमं मेहा ! अन्नया कयाइ कमेण पंचसु उउसु समइकंतेसु गिन्हकालसम-

यंसि जेढामूले मासे पायवसंघंससमुट्टिएणं जाव संवट्टिएसु मियपसुपांखि-
 सरीसिवेसु दिसोदिसिं विप्पलायमाणेसु तेहिं बहूहिं हत्थीहि य सद्धिं जेणेव
 से मंडले तेणेव पहारेत्थ गमणाए । तत्थ णं अन्ने बहवे सीहा य वग्घा य
 विगा य दीविया अच्छा तरच्छा पारासरा सियाला विराला सुणह्म कोला
 ससा कोकंतिया चित्ता चिल्ला पुव्वपविट्ठा अग्गिभयभिद्धुया एगयओ बि-
 लधम्मेणं चिट्ठंति । तए णं तुमं मेहा ! जेणेव से मंडले तेणेव उवागच्छसि
 २ तेहिं बहूहिं सीहेहिं जाव चिल्लेहि य एगयओ बिलधम्मेणं चिट्ठसि ।
 तए णं तुमं मेहा ! पाएणं गत्तं कंडुइस्सामीतिकट्ठु पाए उँखित्ते ।
 तंसि च णं अंतरंसि अन्नेहिं बलवंतेहिं सत्तेहिं पणोल्लिज्जमाणे २ ससए
 अणुपपविट्ठे । तए णं तुमं मेहा ! गायं कंडुइत्ता पुणरवि पायं पडिनिक्खे-
 विस्सामि त्तिकट्ठु तं ससयं अणुपविट्ठं पाससि २ पाणाणुकंपयाए
 भूयाणुकंपयाए जीवाणुकंपयाए सत्ताणुकंपयाए से पाए अंतरा चेव
 संधारिणो नो चेव णं निखित्ते । तए णं तुमं मेहा ! ताए पाणाणुकंपयाए
 जाव सत्ताणुकंपयाए संसारे परित्तीकए माणुस्साउए निबद्धे । तए णं से
 वणदवे अड्ढाइज्जाइं र्हाइंदियाइं तं वणं ज्ञामेइ २ निट्टिए उवरए उवसंते
 विज्झाए यावि होत्था । तए णं ते बहवे सीहा य जाव चिल्ला य तं वण-
 दवं निट्टियं जाव विज्झायं पासंति २ अग्गिभयविप्पमुक्का तण्हाए य
 छुहाए य परब्भाहया समाणा मंडलाओ पडिनिक्खमंति २ सव्वओ समंता
 विप्पसरित्था । तए णं ते बहवे हत्थी जाव छुहाए य परब्भाहया समाणा
 तओ मंडलाओ पडिनिक्खमंति २ दिसोदिसिं विप्पसरित्था । तए णं
 तुमं मेहा ! जुण्णे जराजज्जरियदेहे सिढिलवलितयापिणिद्धगत्ते दुव्वले
 किलंते जुंजिएं पिवासिए अत्थामे अबले अपरक्कम्मे^० ठाणुकंडे वेगेण
 विप्पसरिस्सामि त्तिकट्ठु पाए पसारेमाणे विज्जुहए विव रेवंधगिरिपब्भारे
 धरणिगतलंसि सव्वंगोहिं सन्निवइए । तए णं तव मेहा ! सरीरगंसि वेयणा
 पाउब्भूया उज्जला जाव दाहवक्कंतिए यावि विहरसि । तए णं तुमं मेहा !
 तं उज्जलं जाव दुराहियासं तिन्नि राइंदियाइं वेयणं वेएमाणे विहरित्ता
 एगं वाससयं परमाउं पालइत्ता इहेव जंबुद्दीवे २ भारहे वासे रायगिहे

नयरे सोणियस्स रत्तो धारिणीए देवीए कुच्छिसि कुमारत्ताए पक्खायाए ।

(34) तए णं तुमं मेहा ! आणुपुण्वेणं गम्भवासाओ निक्खंते समाणे उम्मुक्कवालभावे जोव्वणगमणुप्पत्ते मम अंतिए मुंडे भवित्ता अगाराओ अणगारियं पव्वइए । तं जइ ताव तुमे मेहा ! तिरिक्खजो-
णियभावमुवगएणं अपडिलद्धसंमत्तरयणलंभेणं से पाए पाणाणुकंपयाए जाव अंतरा चेव संधारिए नो चेव णं निक्खित्ते किमंग पुण तुमं मेहा !
इयाणिं विपुलकुलसमुग्भवेणं निरुवहयसरीरपत्तलद्धपंचिदिएणं एवं उट्ठाण-
बलवीरियपुरिसगारपरक्कमसंजुत्तेणं मम अंतिए मुंडे भवित्ता अगाराओ
अणगारियं पव्वइए समाणे समणाणं निग्गंथाणं राओ पुव्वरत्तावरत्त-
कालसमयांसि वायणाए जाव धम्माणुओगच्चित्ताए य उच्चारस्स वा पास-
वणस्स वा अइगच्छमाणाण य निग्गच्छमाणाण य हत्थसंघट्टणाणि य जाव
रयरेणुगुंडणाणि य नो सम्मं सहसि खमसि तित्तिक्खसि अहियासेसि ?
तए णं तस्स मेहस्स अणगारस्स समणस्स ३ अंतिए एयमट्ठं सोच्चा
निसम्म सुभेहिं परिणामेहिं पसत्थेहिं अज्झवसाणेहिं लेसाहिं विसुज्झमा-
णीहिं तयावरणिज्जाणं कम्माणं खओवसमेणं ईहापोहमग्गणगेबसणं करे-
माणस्स सन्निपुण्वे जाईसरणे समुप्पन्ने एयमट्ठं सम्मं अभिसमेइ । तए
णं से मेहे कुमारे समणेणं ३ संभारियपुण्वजाईसरणे दुगुणाणीयसंवेगे
आणंदयंसुपुण्णमुहे हरिसवसधाराहयकयंबकं पिव समूससिचरोमकूबे
समणं ३ वंदइ नमंसइ २ एवं वयासी - अज्जप्पभिई णं भंते ! मम दो
अच्छीणि मोत्तूणं अवसेसे काए समणाणं निग्गंथाणं निसट्ठे त्तिक्कट्ठ
पुणरवि समणं ३ वंदइ नमंसइ २ एवं वयासी - इच्छामि णं भंते !
इयाणिं दोक्कंचि सयमेव पव्वावियं सयमेव मुंडावियं जाव सयमेव आया-
रणोयरं जायामायावत्तियं धम्ममाईक्खंतु । तए णं समणे ३ मेहं कुमारं
सयमेव पव्वावेइ जाव जायामायावत्तियं धम्ममाइक्खइ - एवं देवाणु-
प्पिया ! गंतव्वं एवं चिट्ठियव्वं एवं भुंजियव्वं एवं भासियव्वं उट्ठाय
२ पाणाणं भूयाणं जीवाणं सत्ताणं संजमेणं संजमियव्वं । तए णं से
मेहे समणस्स ३ अयमेयारूवं धम्मिन्नं उवएसं सम्मं पडिबज्जइ २ तह

गच्छइ जाव संजमइ । तए णं से मेहे अणगारे जाए इरियासमिए अणगारवण्णओ भाणियव्वो । तए णं से मेहे अणगारे समणस्स ३ अंतिए तहारूवाणं थेराणं सामाइयमाइयाणि एक्कारस अंगाई अहिज्जइ २ बहुहिं छट्ठमदसमदुवालसेहिं मासद्धमासखमणेहिं अप्पाणं भावेमाणे विहरइ । तए णं समणे ३ रायगिहाओ नयराओ गुणसिल्लयाओ चेइयाओ पडि- निक्खमइ २ बहिया जणवयविहारं विहरइ ।

(35) तए णं से मेहे अणगारे अन्नया कयाइ समणं ३ वंदइ नमंसइ २ एवं वयासी — इच्छामि णं भंते ! तुब्भेहिं अब्भणुन्नाए समाणे मासियं भिक्खुपडिमं उवसंपज्जित्ताणं विहरित्तए । अहासुहं देवाणु- प्पिया ! मा पडिबंधं । तए णं से मेहे अणगारे समणेणं ३ अब्भणुन्नाए समाणे मासियं भिक्खुपडिमं उवसंपज्जित्ताणं विहरइ । मासियं भिक्खु- पडिमं अहासुत्तं अहाकप्पं अहामगं सम्मं काएणं फासेइ पालेइ सोभेई तीरेइ किट्ठेइ सम्मं काएणं फासेत्ता पालित्ता सोभित्ता तीरेत्ता किट्ठेत्ता पुणरवि समणं ३ वंदइ नमंसइ २ एवं वयासी — इच्छामि णं भंते ! तुब्भेहिं अब्भणुन्नाए समाणे दोमासियं भिक्खुपडिमं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं । जहा पढमाए अभिलावो तहा दोच्चाए तच्चाए चउत्थाए पंचमाए छम्मासियाए सत्तमासियाए पढमसत्तरायंदियाए दोच्चं सत्तरायंदियाए तईयं सत्तरा- यंदियाए अहोरायंदियाए वि एगराइंदियाए वि । तए णं से मेहे अण- गारे बारस भिक्खुपडिमाओ सम्मं काएणं फासेत्ता पालेत्ता सोभेत्ता तीरेत्ता किट्ठित्ता पुणरवि वंदइ नमंसइ २ एवं वयासी — इच्छामि णं भंते ! तुब्भेहिं अब्भणुन्नाए समाणे गुणरयणसंवच्छरं तवोकम्मं उव- संपज्जित्ताणं विहरित्तए । अहासुहं देवाणुप्पिया ! मा पडिबंधं । तए णं से मेहे अणगारे पढमं मासं चउत्थंचउत्थेणं अणिविक्खत्तेणं तवोकम्मेणं दिया ठाणुकुडुए सूराभिमुहे आयावणभूमीए आयावेमाणे रत्तिं वीरा- सणेणं अवाउडेणं । दोच्चं मासं छट्ठंछट्ठेणं अणिविक्खत्तेणं तवोकम्मेणं दिया ठाणुकुडुए सूराभिमुहे आयावणभूमीए आयावेमाणे रत्तिं वीरासणेणं

अवाउडेणं । तच्च मासं अट्ठमंअट्ठमेणं अणिविखत्तेणं तवोकम्मेणं दिया
 ठाणुक्कुडुए सूराभिमुहे आयावणभूमीए आयावेमाणे रत्तिं वीरासणेणं
 अवाउडेणं । चउत्थं मासं दसमंदसमेणं अणिविखत्तेणं तवोकम्मेणं दिया
 ठाणुक्कुडुए सूराभिमुहे आयावणभूमीए आयावेमाणे रत्तिं वीरासणेणं
 अवाउडेणं । पंचमं मासं दुवालसमंदुवालसमेणं अणिविखत्तेणं तवो-
 कम्मेणं दिया ठाणुक्कुडुए सूराभिमुहे आयावणभूमीए आयावेमाणे रत्तिं
 वीरासणेणं अवाउडेणं । एवं खलु एएणं अभिलावेणं छट्ठे चोइसमं २
 सत्तमे सोलसमं २ अट्ठमे अट्ठारसमं २ नवमे वीसइमं २ दसमे
 बावीसइमं २ एक्कारसमे चउव्वीसइमं २ बारसमे छव्वीसइमं २ तेर-
 समे अट्ठावीसइमं २ चोइसमे तीसइमं २ पन्नरसमे बत्तीसइमं २
 सोलसमे चउत्तीसइमं २ अणिविखत्तेणं तवोकम्मेणं दिया ठाणुक्कुडुए
 सूराभिमुहे आयावणभूमीए आयावेमाणे रत्तिं वीरासणेणं य अवाउडएण
 य । तए णं से मेहे अणगारे गुणरयणसंवच्छरं तवोकम्मं अहासुत्तं जाव
 सम्मं काएणं फासेइ पालेइ साभेइ तीरेइ किट्ठेइ अहासुत्तं अहाकप्पं जाव
 किट्ठेत्ता समणं ३ वंदइ नमंसइ २ बहूहिं छट्ठमदसमदुवालसेहिं
 मासद्धमासखमणेहिं विचित्तेहिं तवोकम्मेहिं अप्पाणं भावेमाणे विहरइ ।

(36) तए णं से मेहे अणगारे तेणं उरालेणं विपुलेणं सत्तिरीएणं
 पयत्तेणं पग्गहिएणं कल्लाणेणं सिवेणं धन्नेणं संगहेणं उदग्गेणं उदारएणं
 उत्तमेणं महाणुभावेणं तवोकम्मेणं सुक्के लुक्खे निम्मंसे किडिकिडिय्हाभूए
 अट्ठिचम्मावणद्धे किसे धमणिसंतए जाए यावि होत्था जीवंजीवेणं
 गच्छइ जीवंजीवेणं चिट्ठइ भासं भासित्ता गिलाइ भासं भासमाणे
 गिलाइ भासं भासिस्सामि त्ति गिलाइ । से जहानामए इंगालसगडिया इ वा
 कट्टसगडिया इ वा पत्तसगडिया इ वा तिलसगडिया इ वा एरंडकट्टसगडि-
 या इ वा उण्हे दिन्ना सुक्का समाणी ससइं गच्छइ ससइं चिट्ठइ एवामेव
 मेहे अणगारे ससइं गच्छइ ससइं चिट्ठइ उवचिए तवेणं अवचिए
 मंससोणिएणं हुयासणे इव भासरसिपरिच्छन्ने तवेणं तेएणं तवतेयसिरीए
 अईव २ उवसोभेमाणे २ चिट्ठइ । तेणं कालेणं २ समणे ३ महावीरे

आइगरे तित्थगरे जाव पुव्वाणुपुत्तिं चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नयरे जेणामेव गुणसिलए चेइए तेणामेव उवागच्छइ २ अहापडिरूवं उग्गहं ओगिण्हित्ता संजमेणं तवसा अप्पाणं भावेमाणे विहरइ । तए णं तस्स मेहस्स अणगारस्स राओ पुव्वरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिए जाव समुप्पज्जित्था — एवं खलु अहं इमेणं उरालेणं तहेव जाव भासं भासिस्सामि त्ति गिलामि । तं अत्थि ता मे उट्ठाणे कम्मे बले वीरिए पुरिसक्कारपरक्कमे सद्धा धिइ संवेगे तं जाव ता मे अत्थि उट्ठाणे कम्मे बले वीरिए पुरिसक्कारपरक्कमे सद्धा धिइ संवेगे जाव य मे धम्मायरिए धम्मोवएसए समणे ३ जिणे सुहत्थी विहरइ ताव मे सेयं कल्लं पाउप्प-भायाए रयणीए जाव जलंते समणं ३ वंदित्ता नमंसित्ता समणेणं ३ अन्भणुन्नायस्स समाणस्स सयमेव पंच महव्वयाइं आरोहित्ता गोयमाइए समणे निग्गंथे निग्गंथीओ य खामेत्ता तहारूवेहिं कड्ढाईहिं थेरेहिं सद्धिं विउलं पव्वयं सणियं २ दुरूहित्ता सयमेव मेहघणसन्निगासं पुढविसिला-पट्टयं पडिलेहित्ता संलेह्णान्नसणाञ्जूसियस्स भत्तापाणपडियाइक्खियस्स पाओवगयस्स कालं अणवकंखमाणस्स विहरित्ताए । एवं संपेहेइ २ कल्लं जाव जलंते जेणेव समणे ३ तेणेव उवागच्छइ २ समणं ३ तिव्वुत्तो आयाहिणपयाहिणं करेइ वंदइ नमंसइ २ नच्चासन्ने नाइदूरे सुत्सूस-माणे नमंसमाणे अभिमुहे विणएणं पंजलिउडे पज्जुवासइ । मेहा इ समणे ३ मेहं अणगारं एवं वयासी — से नूणं तव मेहा ! राओ पुव्वरत्तावरत्त-कालसमयंसि धम्मजागरियं जागरमाणस्स अयमेयारूवे अज्झत्थिए जाव समुप्पज्जित्था — एवं खलु अहं इमेणं उरालेणं जाव जेणेव ईहं तेणेव हव्वमागए । से नूणं मेहा ! अट्ठे समट्ठे ? हंता अत्थि । अहासुहं देवाणु-प्पिया ! मा पडिबंध्यं । तए णं से मेहे अणगारे समणेणं ३ अन्भणुन्नाए समाणे हट्ठ जाव हियए उट्ठाए उट्ठेइ २ समणं ३ तिव्वुत्तो आयाहिण-पयाहिणं करेइ वंदइ नमंसइ २ सयमेव पंच महव्वयाइं आरोहेइ २ गोयमाइ समणे निग्गंथे निग्गंथीओ य खामेइ २ तहारूवेहिं कड्ढाईहिं

थेरेहिं सद्धिं विपुलं पव्वयं साणियं २ दुरूहइ सयमेव मेहघणसन्निगासं
 पुढविसिळापट्टयं पडिलेहेइ २ उच्चारपासवणभूमिं पडिलेहेइ २ दम्भसंथा-
 रगं संथरइ २ दम्भसथारगं दुरूहइ २ पुरत्थाभिमुहे संपलियंकनिसण्णे
 करयलपरिगाहियं सिरसावत्तं मत्थए अंजलिं कट्ठु एवं वयासी — नमोत्थु
 णं अरहंताणं जाव संपत्ताणं । नमोत्थु णं समणस्स जाव संपाविउकामस्स
 मम धम्मायरियस्स । वंदाभि णं भगवंतं तत्थगयं इहगए पासउ मे भगवं
 तत्थगए इहगयं तिकट्ठु वंदइ नमंसइ २ एवं वयासी — पुंविं पि णं
 मए समणस्स ३ अंतिए सव्वे पाणाइवाए पच्चक्खाए मुसावाए अदिन्ना-
 दाणे मेहुणे परिगहे कोहे माणे माया लोहे पेज्जे दोसे कलहे अब्भ-
 क्ख्वाणे पेसुन्ने परपरिवाए अरइइ मायामोसे मिच्छादंसणसल्ले पच्चक्खाए ।
 इयाणिं पि णं अहं तस्सेव अंतिए सव्वं पाणाइवायं पच्चक्खामि सव्वं
 असणपाणखाइमसाइमं चउव्विहंपि आहारं पच्चक्खामि जावज्जीवाए ।
 जंपि य इमं सरीरं इट्ठं कंतं पियं जाव विविहा रोगायंका परीसहोवसग्गा
 फुसंतीतिकट्ठु एयं पियं यं चरमेहिं ऊसासनीसासेहिं वोसिरामि तिकट्ठु
 संलेहणाझूसणाझूसिए भत्तपाणपडियाइक्खिए पाओवगए कालं अणव-
 कंखमाणे विहरइ । तए णं थेरा भगवंतो मेहस्स अणगारस्स अगिलाए वेया-
 वडियं करेति । तए णं से मेहे अणगारे समणस्स ३ तहारूवाणं थेराणं
 अंतिए सामाइयमाइयाइं एक्कारस अंगाइं अहिज्जित्ता बहुपडिपुण्णाइं दुवा-
 लसवरिसाइं सामण्णपरियागं पाउणित्ता मासियाए संलेहणाए अप्पाणं
 झोसेत्ता सट्ठिं भत्ताइं अणसणाए छेएत्ता आलोइयपइडिक्कंते उद्धियसल्ले
 समाहिपत्ते आणुपुव्वेणं कालगए । तए णं थेरा भगवंतो मेहं अणगारं
 आणुपुव्वेणं कालगयं पासंति २ परिनिव्वाणवत्तियं काउस्सगं करेति २
 मेहस्स आयारभंडगं गेण्हंति विउलाओ पव्वयाओ साणियं २ पच्चो-
 रुहंति २ जेणामेव गुणासिए चेइए जेणामेव समणे ३ तेणामेव उवा-
 गच्छंति २ समणं ३ वंदंति नमंसंति २ एवं वयासी — एवं खलु देवाणु-
 पियाणं अंतेवासी मेहे नामं अणगारे पमइभइए जाव विणीए । से णं
 देवाणुपियाहिं अब्भणुत्ताए समाणे गोयमाइए समणे निगंथे २ खामेत्ता

अम्हेहिं सद्धिं विपुलं पव्वयं सणियं २ दुरूहइ २ सयमेव भेघघणसन्नि-
गासं पुढविसिलं पडिलेहेइ २ भत्तपाणपडियाइक्खिए अणुपुव्वेणं कालगए ।
एसं णं देवाणुप्पिया ! मेहस्स अणगारस्स आयारभंडए ।

(37) भंते ! त्ति भगवं गोयमे समणं ३ वंदइ नमंसइ २ एवं
वयासी — एवं खलु देवाणुप्पियाणं अंतेवासी मेहे नामं अणगारे । से णं
भंते ! मेहे अणगारे कालमासे कालं किच्चा कहिं गए कहिं उववन्ने ? गोयमा
इ समणे ३ भगवं गोयमं एवं वयासी — एवं खलु गोयमा ! मम अंतेवासी
मेहे नामं अणगारे पगइभइए जाव विणीए । से णं तहारूवाणं थेराणं
अंतिए सामाइयमाइयाइं एक्कारस अंगाइं अहिज्जइ बारस भिक्खुपडि-
माओ गुणरयणसंवच्छरं तवोकम्मं काएणं फासेत्ता जाव किट्ठेत्ता मए
अब्भणुन्नाए समाणे गोयमाइ थेरे खामेइ तहारूवेहिं जाव विपुलं पव्वयं
दुरूहइ दब्भसंथारगं संथरइ २ दब्भसंथारोवगए सयमेव पंचमहव्वए
उच्चारेइ बारस वासाइं सामण्णपरियागं पाउणित्ता मासियाए संलेहणाए
अप्पाणं झूसित्ता सद्धिं भत्ताइं अणसणाए छेदेत्ता आलोइयपडिक्कंते
उद्धियसले समाहिपत्ते कालमासे कालं किच्चा उद्धं चंदिमसूरगहगण-
नक्खत्ततारारूवाणं बहूइं जोयणाइं बहूइं जोयणसयाइं बहूइं जोयण-
सहस्साइं बहूइं जोयणसयसहस्साइं बहूइं जोयणकोडीओ बहूइं जोयण-
कोडाकोडीओ उट्ठं दूरं उप्पइत्ता सोहम्मीसाणसणंकुमारमाहिंदवंभलंतगमहा-
सुकसहस्साराणयपाणंयारणच्चुए तिण्णि य अट्टारसुत्तरे गेवेज्जविमाण-
वाससए वीइवइत्ता विजए म्हाविमाणे देवत्ताए उववन्ने । तत्थ णं अत्थे-
गइयाणं देवाणं तेत्तीसं सागरोवमाइं ठिई पन्नत्ता । तत्थ णं मेहस्स वि
देवस्स तेत्तीसं सागरोवमाइं ठिई पन्नत्ता । एसं णं भंते ! मेहे देवे ताओ
देवलोयाओ आउक्खएणं ठिइक्खएणं भवक्खएणं अणंतरं चयं चइत्ता
कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्झिहिइ
बुज्झिहिइ मुच्चिहिइ परिनिव्वाहिइ सव्वदुक्खाणमंतं काहिइ ।

एवं खलु जंबू ! समणेणं जाव संपत्तेणं अप्पोपाळंभनिमित्तं
पढमस्स नायज्झयणस्स अयमट्ठे पन्नत्ते त्तिबेमि ।

॥ पढमं अज्झयणं समत्तं ॥

॥ बीयं अज्झयणं ॥

(38) जइ णं भंते ! समणेणं जाव संपत्तेणं पढमस्स नायज्झयणस्स अयमट्ठे पन्नत्ते बिइयस्स णं भंते ! नायज्झयणस्स के अट्ठे पन्नत्ते ? एवं खलु जंबू ! तेषं कालेणं २ रायगिहे^१ नामं नयरे होत्था वण्णओ । तत्थं णं रायगिहस्स नयरस्स बहिया उत्तरपुरत्थिमे दिसीभाए गुणसिलए नामं चेइए होत्था वण्णओ । तस्स णं गुणसिलयस्स चेइयस्स अदूरसामंते एत्थ णं महं एगं जिणुज्जाणे यावि होत्था विणट्ठदेवउले पॅरिसडियतोरणघरे नाणाविहगुच्छगुम्मलयावल्लिवच्छच्छाइए अणेगवालसयसंकणिज्जे यावि होत्था । तस्स णं जिणुज्जाणस्स बहुमज्झदेसभाए एत्थ णं महं एगे भग्गकूवए यावि होत्था । तस्स णं भग्गकूवस्स अदूरसामंते एत्थ णं महं एगे मालुयाकच्छए यावि होत्था किण्हे किण्होभासे जाव रम्मो महामेह-निउरंबभूए बहूहिं रुक्खेहि य गुच्छेहि य गुम्मेहि य लयाहि य वल्लीहि य कुसेहि य खाणुएहि य संचच्छन्ने पलिच्छन्ने अंतो झुसिरे बाहिं गंभीरे अणेगवालसयसंकणिज्जे यावि होत्था ।

(39) तत्थ णं रायगिहे नयरे धंणे नामं सत्थवाहे अट्ठे दित्ते जाव विउलभत्तपाणे । तस्स णं धणस्स सत्थवाहस्स भद्दा नामं भौरिया होत्था सुकुंमालपाणिपाया अहीणपडिपुण्णपंचिंदियसरीरा लक्खणवंजणगुणो-ववेया माणुम्माणप्पमाणपडिपुण्णसुजायसव्वंगसुंदरंगी ससिसोमागारा कंता पियदंसणा सुरूवा करयलपरिमियतिवल्लियमज्झा कुंडलुल्लिहियगंड-लेहा कोमुइयरयणियरपडिपुण्णसोमवयणा सिंगारागारचारुवेसा जाव पडिरूवा वंझा अविआउरी जाणुकोप्परमाया यावि होत्था ।

(40) तस्स णं धणस्स सत्थवाहस्स पंथए नामं दासचेडे होत्था सव्वंगसुंदरंगे मंसेवचिए बालकीलावणकुसले यावि होत्था । तए णं से धणे सत्थवाहे रायगिहे नयरे बहूणं नगरनिगमसेट्टिसत्थवाहाणं अट्टार-ससेणिप्पसेणीणं बहूसु कज्जेसु य कुडुंबेसु य जाव चक्खुभूए यावि होत्था नियगस्स वि य णं कुडुंबस्स बहूसु कज्जेसु जाव चक्खुभूए यावि होत्था ।

(41) तत्थ णं रायगिहे नयरे विजए नामं तक्क्रे होत्था पावे

चंडालरूवे भीमतरुहकम्मे आरूसियादित्तरत्तनयणे खरफरुसमहल्लविगय-
 बीभच्छदाढिए असंपुडियउट्टे उद्धुयपईणलंबंतमुद्धए भमरराहुवण्णे निर-
 णुक्कोसे निरणुतावे दारुणे पईभए निसंसइए निरणुकंपे अहीव एगंत-
 दिट्ठीए खुरेव एगंतधाराए गिद्धेव आमिसतल्लिच्छे अभिमिव सव्वभक्खी
 जलमिव सव्वंगगाही उक्कंचणवंचणमायानियडिकूडकवडसाइसंपओग-
 बहुले चिरनगरविणट्टदुट्ठीसीलायारचरित्ते जूयप्पसंगी मज्झप्पसंगी भोज्ज-
 प्पसंगी मंसप्पसंगी दारुणे हिययदारए साहसिए संधिच्छेयए उवहिर्ए
 विस्संभघाई आलीयगतित्थभेयलहुहत्थसंपउत्ते परस्स दव्वहरणंमि निच्चं
 अणुवद्धे तिच्चवेरे रायगिहस्स नगरस्स बहूणि अईगमणाणि य निग्ग-
 मणाणि य बाराणि य अवबाराणि य छिंडीओ य खंडीओ य नगर-
 निद्धमणाणि य संवट्टणाणि य निच्चट्टणाणि य जूर्यखलयाणि य पाणा-
 गाराणि य वेसागाराणि य तक्करट्टाणाणि य तक्करघराणि य सिंघाडगाणि
 य तिगाणि य चउक्काणि य चच्चराणि य नागघराणि य भूयघराणि य
 जक्खवेउलाणि य सभाणि य पवाणि य पणियसालाणि य सुन्नघराणि य
 आभोएमाणे मग्गमाणे गवेसमाणे बहुजणस्स छिद्देसु य विसमेसु य
 विहुरेसु य वसणेसु य अब्भुदएसु य उस्सवेसु य पसवेसु य तिहीसु य
 छणेसु य जन्नेसु य पव्वणीसु य मत्तपमत्तस्स य वक्खित्तस्स य
 वाउलस्स य सुहियस्स य दुहियस्स य विदेसत्थस्स य विप्पवसियस्स य
 मग्गं च छिइं च विरहं च अंतरं च मग्गमाणे गवेसमाणे एवं च णं
 विहरइ बहिया वि य णं रायगिहस्स नगरस्स आरामेसु य उज्जाणेसु य
 वाविपोक्खरणीदीहियागुंजालियांसैरपंतियसरसरपंतियासु य जिणुज्जा-
 णेसु य भग्गकूवएसु य मालुयाकच्छएसु य सुसाणेसु य गिरिकंदर-
 लेणउवट्टाणेसु य बहुजणस्स छिद्देसु य जाव एवं च णं विहरइ ।

(42) तए णं तीसे भद्दाए भारियाए अन्नया कयाइ पुव्वरत्तावरत्त-
 कालसमयंसि कुडुंबजागरियं जागरमाणीए अयमेयारूवे अज्झत्थिए जाव
 समुप्पज्जित्था — अहं धणेणं सत्थवाहेणं सद्धिं बहूणि घासाणि सद्धफरिस-
 सररूवाणि माणुस्सगाइं कामभोगाइं पच्चणुब्भबमाणी विहरामि नो चेव

णं अहं दारगं वा दारियं वा पेयामि । तं धन्नाओ णं ताओ अम्म-
याओ जाव सुलद्धे णं माणुस्सए जम्मजीवियफले तासिं अम्मयाणं जासिं
मन्ने नियगकुच्छिसंभूयाइं थणदुद्धलुद्धयाइं महुसमुल्लावगाइं मम्मण-
पयंपियाइं थणमूलां कक्खदेसभागं अभिसरमाणाइं मुद्धयाइं थणयं पियंति
तओ य कोमलकमलोवमेहिं हत्थेहिं गिण्हऊणं उच्छंगे निवेसियाइं देंति
समुल्लावए पिए सुमहुरे पुणो २ मंजुलप्पभणिए । अहं णं अधन्ना
अपुण्णा अकयलक्खणा एत्तो एगमवि न पत्ता । तं सेयं मम कल्लं जाव
जलंते धणं सत्थवाहं आपुच्छित्ता धणेणं सत्थवाहेणं अब्भणुन्नाया
समाणी सुबहुं विपुलं असणं ४ उवक्खडावेत्ता सुबहुं पुप्फगंधमल्लालंकारं
गहाय ब्रूहिं भित्तनाइनियगसयणसंबंधिपरियणमहिलाहिं सद्धिं संपरि-
वुडा जाइं इमाइं रायगिहस्सं नयरस्स बहिया नागाणि य भूयाणि य
जक्खाणि य इंदाणि य खंदाणि य रुद्धाणि य सिवाणि य वेसमणाणि य
तत्थ णं बहूणं नागपडिमाण य जाव वेसमणपडिमाण य महरिहं पुप्फ-
वणियं करेत्ता जन्तुपायपडियाए एवं वइत्तए — जइ णं अहं देवाणु-
प्पिया ! दारगं वा दारिगं वा पेयायामि तो णं अहं तुब्भं जायं च दायं च
भायं च अक्खयाणिहिं च अणुवट्ठेमि त्तिकट्ठु उँवाइयं उवाइत्तए । एवं संपे-
हेइ २ कल्लं जाव जलंते जेणामेव धणे सत्थवाहे तेणामेव उवागच्छइ २
एवं वयासी—एवं खलु अहं देवाणुप्पिया ! तुब्भेहिं सद्धिं बँहूइं वासाइं जाव
देँति समुल्लावए सुमहुरे पुणो २ मंजुलप्पभणिए ! तं णं अहं अहन्ना अपुण्णा
अकयलक्खणा एत्तो एगमवि न पत्ता । तं इच्छामि णं देवाणुप्पिया !
तुब्भेहिं अब्भणुन्नाया समाणी विपुलं असणं ४ जाव अणुवट्ठेमि उँवाइयं
करित्तए । तए णं धणे सत्थवाहे भहं भारियं एवं वयासी — ममं पि य णं
देवाणुप्पिए ! एस चेव मणोरहे — कहं णं तुमं दारगं वा दारियं वा
पयाएज्जासि भद्दाए सत्थवाहीए एयमट्ठं अणुजाणइ । तए णं सा भद्दा
सत्थवाही धणेणं सत्थवाहेणं अब्भणुन्नाया समाणी हट्ठ जाव हियया
विपुलं असणं ४ उवक्खडावेइ २ सुबहुं पुप्फगंधमल्लालंकारं गेणहइ २
सन्नाओ सिहाओ निगच्छइ २ रायगिहं नयरं मज्झिमवणोणं निगच्छइ २

जेणेव पोक्खरिणी तेणेव उवागच्छइ २ पुक्खरिणीए तीरे सुबहुं पुप्फ जाव मल्लालंकारं ठवेइ २ पुक्खरिणिं ओगाहेइ २ जलमज्जणं करेइ जल-किडुं करेइ २ ण्हाया कयबलिकम्मा उल्लपडंसाडिगा जाइं तत्थ उप्पलाइं जाव सहस्सपत्ताइं गिण्हइ २ पुक्खरिणीओ पच्चोरुहइ २ तं पुप्फवत्थ-गंधमल्लं गेण्हइ २ जेणामेव नागघरणे जाव वेसमणघरणे य तेणामेव उवागच्छइ २ तत्थ णं नागपडिमाणे य जाव वेसमणपडिमाणे य आलोए पणामं करेइ ईसिं^५ पच्चुन्नमइ २ लोमहत्थगं परामुसइ २ नागपडि-माओ य जाव वेसमणपडिमाओ य लोमहत्थेणं पमज्जइ उदगधाराए अब्भुक्खेइ २ पम्हलसूमालाए गंधकासाइए गायाइं लूहेइ २ मंहरिहं वत्थारुहणं च मल्लारुहणं च गंधारुहणं च चुण्णारुहणं च वण्णारुहणं च करेइ २ धूवं डहइ २ जन्नुपायपडिया पंजलिउडा एवं वयासी-जइ णं अहं दारगं वा दारियं वा पयामि तो णं अहं जायं च जाव अणुवड्ढेमि त्तिकट्ठु उवाइयं करेइ २ जेणेव पोक्खरिणी तेणेव उवा-गच्छइ २ विपुलं असणं ४ आसाएमाणी जाव विहरइ जिमिय जाव सुइभूया जेणेव सए गिहे तेणेव उवांगया । अदुत्तरं च णं भद्दा सत्थवाही चाउहसट्ठमुद्धिदुपुण्णमासिणीसु विपुलं असणं ४ उवक्खडेइ २ बहवे नागा य जाव वेसमणा य उवायमाणी नमंसमाणी जाव एवं च णं विहरइ ।

(41) तए णं सा भद्दा सत्थवाही अन्नया कयाइ केणइ कालंत-रेणं आवन्नसत्ता जाया यावि होत्था । तए णं तीसे भद्दाए सत्थवाहीए दोसु मासेसु वीइकंतेसु तईए मासे वट्टमाणे इमेयारूवे दोहले पाउब्भूए-धन्नाओ णं ताओ अम्मयाओ जाव कयलक्खणाओ ताओ अम्मयाओ जाओ णं विउलं असणं ४ सुबहुयं पुप्फगंधमल्लालंकारं गहाय मित्तनाइ-नियगसयणसंबंधिपरियणमहिलियाहि य सद्धिं संपरिवुडाओ रायगिहं नयरं मज्झमज्झेणं निगगच्छंति २ जेणेव पुक्खरिणी तेणेव उवागच्छंति २ पोक्ख-रिणीं ओगाहेति २ ण्हायाओ कयबलिकम्माओ सव्वालंकारविभूसियाओ विपुलं असणं ४ आसाएमाणीओ जाव पंडिभुंजेमाणीओ दोहलं विणेति । एवं सपेहेइ १ कल्लं जाव जलंते जेणेव धणे सत्थवाहे तेणेव उवागच्छइ २ धणं

सत्थवाहं एवं वयासी - एवं खलु देवाणुप्पिया ! मम तस्स गब्भस्स जाव विणेति^१ । तं इच्छामि णं देवाणुप्पिया ! तुब्भेहिं अब्भणुन्नाया समाणी जाव विहरित्तए । अहासुहं देवाणुप्पिया ! मा पडिबंधं । तए णं सा भद्दा धणेणं सत्थवाहेणं अब्भणुन्नाया समाणी हट्ठा जाव विपुलं असणं ४ जाव उल्लपडसाडगा जेणेव नागघरए जाव धूवं डहइ २ पणामं करेइ २ जेणेव पोक्खरिणी तेणेव उवागच्छइ । तए णं ताओ मित्तनाइ जाव नगरमहिलाओ भइं सत्थवाहिं सव्वालंकारविभूसियं करेति । तए णं सा भद्दा सत्थवाही ताहिं मित्तनाइनियगसयणसंबंधिपरियणनगरमहिलियाहिं साद्धिं तं विपुलं असणं ४ जाव परिमुंजेमाणी दोहलं विणेइ २ जामेव दिसं पाउब्भूया तामेव दिसं पडिगया । तए णं सा भद्दा सत्थवाही संपुण्णदोहला जाव तं गब्भं सुहंसुहेणं परिवहइ । तए णं सा भद्दा सत्थवाही नवण्हं मासाणं बहुपडिपुण्णाणं अद्धट्ठमाण य राइंदियाणं सुकुमालपाणिपायं जाव दारगं पयाया । तए णं तस्स दारगस्स अम्मापियरो पढमे दिवसे जायकम्मं करेति २ तहेव जाव विपुलं असणं ४ उवक्ख-डावेति २ तहेव मित्तनाइनियगं भोयावेत्ता अयमेयारूवं गोण्णं गुण-निप्फन्नं नामधेज्जं करेति - जम्हा णं अम्हं इमे दारए बहूणं नागपडिमाण य जाव वेसमणपडिमाण य उवाईयलद्धे तं होउं णं अम्हं इमे दारए देवदिन्ने नामेणं । तए णं तस्स दारगस्स अम्मापियरो नामधेज्जं करेति देवदिन्ने त्ति । तए णं तस्स दारगस्स अम्मापियरो जायं च दायं च भायं च अक्खयनिहिं च अणुवड्ढेति ।

(42) तए णं से पंथए दासचेडए देवदिन्नस्स दारगस्स बालग्गाही जाए । देवदिन्नं दारगं कडीए गेण्हइ २ बहूहिं डिंभएहि य डिंभियाहि य दारएहि य दारियाहि य कुमारएहि य कुमारियाहि य साद्धिं संपरिवुडे अभिरमइ । तए णं सा भद्दा सत्थवाही अन्नया कयाइं देवदिन्नं दारयं ण्हायं कयबलिकम्मं कयकोउयमंगलपायच्छित्तं सव्वालंकारविभूसियं करेइ २ पंथयस्स दासचेडगस्स हत्थगंसे दलयइ । तए णं से पंथए दासचेडए भद्दाए सत्थवाहीए हत्थाओ देवदिन्नं दारगं कडीए गेण्हइ २

सयाओ गिहाओ पडिनिक्खमइ बहूहिं डिंभएहि य जाव कुमारियाहि य सद्धिं संपरिवुडे जेणेव रायमग्गे तेणेव उवागच्छइ २ देवदिन्नं दारगं एगंते ठावेइ २ बहूहिं डिंभएहि य जाव कुमारियाहि य सद्धिं संपरिवुडे पमत्ते यावि विहरइ । इमं च णं विजए तक्करे रायगिहस्स नगरस्स बहूणि वाराणि य अववाराणि य तहेव जाव आभोएमाणे मग्गे-माणे गवेसमाणे जेणेव देवदिन्ने दारए तेणेव उवागच्छइ २ देवदिन्नं दारगं सव्वालंकारविभूसियं पाम्मइ २ देवदिन्नस्स दारगस्स आभरणा-लंकारेसुं मुच्छिए गढिए गिद्धे अज्झोववन्ने पंथगं दासचेडं पमत्तं पासइ २ दिसालोयं करेइ २ देवदिन्नं दारगं गेण्हइ २ कक्खंसि अल्लियावेइ २ उत्तरिज्जेणं पिहेइ २ सिग्घं तुरियं चवलं वेइयं रायगिहस्स नगरस्स अवदारेणं निग्गच्छइ २ जेणेव जिणुज्जाणे जेणेव भग्गकूवए तेणेव उवागच्छइ २ देवदिन्नं दारयं जीवियाओ ववरोवेइ २ आभरणालंकारं गेण्हइ २ देवदिन्नस्स दारगस्स सरीरं निप्पाणं निच्चेट्ठं जीवविप्पजडं भग्गकूवए पक्खिवइ २ जेणेव मालुयाकच्छए तेणेव उवागच्छइ २ मालुयाकच्छयं अणुप्पविसइ २ निच्चले निप्फंदे तुसिणीए दिवसं खवेमाणे चिट्ठइ ।

(43) तए णं से पंथए दासचेडे तौओ मुहुत्तंतरस्स जेणेव देवदिन्ने दारए ठाविए तेणेव उवागच्छइ २ देवदिन्नं दारगं तंसि ठाणंसि अपास-माणे रोयमाणे कंदमाणे देवदिन्नस्स दारगस्स सव्वओ समंता मग्गण-गवेसणं करेइ २ देवदिन्नस्स दारगस्स कत्थइ सुइं वा खुइं वा प्पञ्चत्तिं वा अलभमाणे जेणेव सए गिहे जेणेव धणे सत्थवाहे तेणेव उवागच्छइ २ धणं सत्थवाहं एवं वयासी — एवं खलु सामी ! भद्दा सत्थवाही देवदिन्नं दारयं ण्हायं जाव मम हत्थे दलयइ । तए णं अहं देवदिन्नं दारयं कडीए गिण्हामि जाव मग्गणगवेसणं करेमि । तं न नज्जइ णं सामी ! देवदिन्ने दारए केणइ नीए वा अवहिए वा अम्बिक्खत्ते वा पायवडिए धणस्स सत्थवाहस्स एयमट्ठं निवेदेइ । तए णं से धणे सत्थवाहे पंथयस्स दासचेड-गस्स एयमट्ठं सोच्चा निसम्म तेण य महया पुत्तसोएणाभिभूए समाने

फरसुणियत्ते व चंपगपायवे धसत्ति धरणीयलंसि सव्वंगेहिं सन्निवइए ।
 तए णं से धणे सत्थवाहे तओ मुहुत्तंतरस्स आसत्थे पञ्चागयपाणे देव-
 दिन्नस्स दारगस्स सव्वओ समंता मग्गणगवेसणं करेइ देवदिन्नस्स दार-
 गस्स कत्थइ सुइं वा सुइं वा पवत्ति वा अलभमाणे जेणेव सए गिहे
 तेणेव उवागच्छइ २ महत्थं पाहुडं गेण्हइ २ जेणेव नगरगुत्तिया तेणेव
 उवागच्छइ २ तं महत्थं पाहुडं उवणेइ २ एवं वयासी- एवं खलु देवाणु-
 पिया ! मम पुत्ते भद्दाए भारियाए अत्तए देवदिन्ने नामं दारए इट्ठे जाव
 उंबरपुप्फं पिव दुल्लहे सवणयाए किमंग पुण पासणयाए । तए णं सा भद्दा
 भारिया देवदिन्नं दारगं ण्हायं सव्वालंकारविभूसियं पंथगस्स हत्थे दलाइ
 जाव पायवडिए तं मम निवेदेइ । तं इच्छामि णं देवाणुपिया ! देवदिन्नस्स
 दारगस्स सव्वओ समंता मग्गणगवेसणं कयं । तए णं ते नगरगोत्तिया
 धणेणं सत्थवाहेणं एवं वुत्ता समाणा सन्नद्धवद्धकैवया उप्पीलियसरासण-
 पट्टिया जाव गहियाउहपहरणा धणेणं सत्थवाहेणं सद्धिं रायगिहस्स
 नगरस्स बहूणि अइगमणाणि य जाव पवासु य मग्गणगवेसणं करेमाणा
 रायगिहाओ नगराओ पडिनिक्खमंति २ जेणेव जिण्णुज्जाणे जेणेव
 भग्गकूवए तेणेव उवागच्छंति २ देवदिन्नस्स दारगस्स सरीरगं निप्पाणं
 निञ्चेट्ठं जीवविप्पजडं पासंति २ हा हा अहो अकज्जमित्तिकट्टु देव-
 दिन्नं दारगं भग्गकूवाओ उत्तारंति २ धणस्स सत्थवाहस्स हत्थे दलयंति ।

(44) तए णं ते नगरगुत्तिया विजयस्स तक्करस्स पयमंगमणु-
 गच्छमाणा २ जेणेव मालुयाकच्छए तेणेव उवागच्छंति २ मालुयाक-
 च्छगं अणुप्पविसंति २ विजयं तक्करं ससक्खं सहोढं सगेवेज्जं जीव-
 ग्गाहं गेण्हंति २ अट्ठिमुट्ठिजाणुकोप्परपहारसंभग्गमहियगत्तं करंति २
 अवओडगबंधणं करंति २ देवदिन्नस्स दारगस्स सव्वं आभरणं गेण्हंति २
 विजयस्स तक्करस्स गीवाए बंधंति २ मालुयाकच्छगाओ पडिनिक्ख-
 मंति २ जेणेव रायगिहे नयरे तेणेव उवागच्छंति २ रायगिहं नयरं
 अणुप्पविसंति २ रायगिहे नयरे सिंघडगतिगचउक्कचचवरमहापहपहेसु
 कसप्पहारे य लयापहारे य छिवापहारे य निर्वायमाणा २ छारं च

धूलिं च कयवरं च उवरिं पक्किरमाणा २ महया २ सहेणं उग्घोसेमाणा
 एवं वयंति — एस णं देवाणुप्पिया ! विजए नामं तक्करे जाव गिद्धे विव
 आमिसभक्खी बालघायए बालमारए । तं नो खलु देवाणुप्पिया !
 एयस्स केइ राया वा रायंमच्चे वा अवरज्झइ नन्नत्थ अप्पणो सयाइं
 कम्माइं अवरज्झंति त्तिकट्ठु जेणामेव चारगसाला तेणामेव उवागच्छंति
 २ हडिबंघणं करेति २ भत्तपाणनिरोहं करेति २ तिसंझं कसप्पहारे
 य जाव निव्वाएमाणा २ विहरंति । तए णं से धणे सत्थवाहे भित्तनाइनिर्य-
 गसंबंधिपरियणेणं साद्धिं रोयमाणे जाव विलवमाणे देवदिन्नस्स दार-
 गस्स सरीरस्स महया इड्डीसक्कारसमुदएणं नीहरणं करेति बहूइं लोइयाइं
 मयकिच्चाइं करेति २ केणइ कालंतरेणं अवगयसोए जाए यावि होत्था ।

(45) तए णं से धणे सत्थवाहे अन्नया कयाइं लहुसय्हांसि राया-
 वराहंसि संपलत्ते जाए यावि होत्था । तए णं ते नगरगुत्तिथा धणं सत्थ-
 वाहं गेण्हंति २ जेणेव चारए तेणेव उवागच्छंति २ चारगं अणुप-
 वेसंति २ विजएणं तक्करेणं साद्धिं एगयओ हडिबंघणं करेति । तए णं
 सा भद्दा भारिया कलं जाव जलते विपुलं असणं ४ उवक्खंडेइ २ भोयण-
 पिंडए करेइ २ भोर्यणाइं पक्खिवइ लंछियमुद्धियं करेइ २ एगं च सुरभि-
 वारिपडिपुण्णं दगवारयं करेइ २ पंथयं दासचेडं सदावेइ २ एवं
 वयासी — गच्छहं णं तुमं देवाणुप्पिया ! इमं विपुलं असणं ४ गहाय चारग-
 सालाए धणस्स सत्थवाहस्स उवणेहि । तए णं से पंथए भद्दाए सत्थ-
 वाहीए एवं वुत्ते समाणे हट्ठुट्ठे तं भोयणपिंडगं तं च सुरभिवरवारि-
 पडिपुण्णं वारयं गेण्हइ २ सयाओ गिहाओ पडिनिक्खमइ २ राय-
 गिहं नगरं मज्झंमज्झेणं जेणेव चारगसाला जेणेव धणे सत्थवाहे तेणेव
 उवागच्छइ २ भोर्यणपिडियं ठावेइ २ उल्लेखेइ २ भोर्यणं गेण्हइ २
 भायणाइं धोवेइ २ हत्थसोयं दलयइ २ धणं सत्थवाहं तेणं विपुलेणं
 असणेणं ४ परिवेसेइ । तए णं से विजए तक्करे धणं सत्थवाहं एवं वयासी—
 तुब्भे णं देवाणुप्पिया ! ममं एयाओ विपुलाओ असणाओ ४ संविभागं
 करेहि । तए णं से धणे सत्थवाहे विजयं तक्करं एवं वयासी — अविआइं

अहं विजया ! एयं विपुलं असणं ४ कागाणं वा सुणगाणं वा दलएज्जा
 उंफुरुडियाए वा णं छुडेज्जा नो चेव णं तव पुत्तघायगस्स पुत्तमारगस्स
 अरिस्स वेरियस्स पडिणीयस्स पञ्चामित्तस्स एत्तो विपुलाओ असणाओ ४
 संविभागं करेज्जामि । तए णं से धणे सत्थवाहे तं विपुलं असणं ४ आहा-
 रेइ २ तं पंथगं पडिविसज्जेइ । तए णं से पंथए दासचेडे तं भोयणपिडंगं
 गिण्हइ २ जामेव दिसिं पाउब्भूए तामेव दिसिं पडिगए । तए णं तस्स
 धणस्स सत्थवाहस्स तं विपुलं असणं ४ आहारियस्स समाणस्स उच्चार-
 पासवणे णं उव्वाहित्था । तए णं से धणे सत्थवाहे विजयं तक्करं एवं
 वयासी—एहि ताव विजया ! एगंतमवक्कमामो जेणं अहं उच्चारपासवणं
 परिट्ठवेमि । तए णं से विजए तक्करे धणं सत्थवाहं एवं वयासी—तुब्भं
 देवाणुप्पिया ! विपुलं असणं ४ आहारियस्स अत्थि उच्चारे वा पासवणे
 वा । ममं णं देवाणुप्पिया ! इमेहिं बहूहिं कसप्पहारेहि य जाव लया—
 पहारेहि य तण्हाए य छुहाए य परब्भवमाणस्स नत्थि केइ उच्चारे
 वा पासवणे वा । तं छंदेणं तुमं देवाणुप्पिया ! एगंते अवक्कमित्ता उच्चा-
 रपासवणं परिट्ठवेहि । तए णं से धणे सत्थवाहे विजएणं तक्करेणं एवं
 वुत्ते समाणे तुसिणीए संचिट्ठइ । तए णं से धणे सत्थवाहे मुहुत्तंतरस्स
 बलियतरागं उच्चारपासवणेणं उव्वाहिज्जमाणे विजयं तक्करं एवं वयासी—
 एहि ताव विजया ! जाव अवक्कमामो । तए णं से विजए धणं सत्थवाहं
 एवं वयासी—जइ णं तुमं देवाणुप्पिया ! ताओ विपुलाओ असणाओ ४
 संविभागं करेहि तओ हं तुब्भेहिं साद्धिं एगंतं अवक्कमामि । तए णं से धणे
 सत्थवाहे विजयं एवं वयासी—अहं णं तुब्भं ताओ विपुलाओ असणाओ
 ४ संविभागं करिस्सामि । तए णं से विजए धणस्स सत्थवाहस्स एय-
 मट्ठं पडिसुणेइ । तए णं से विजए धणेणं साद्धिं एगंते अवक्कमइ उच्चार-
 पासवणं परिट्ठवेइ आयंते चोक्खे परमसुइभूए तमेव ठाणं उवसंक्कमित्ताणं
 विहरइ । तए णं सा भइ कलं जाव जलंते विपुलं असणं जाव परिवे-
 सेइ । तए णं से धणे सत्थवाहे विजयस्स तक्करस्स ताओ विपुलाओ
 असणाओ ४ संविभागं करेइ । तए णं से धणे सत्थवाहे पंथगं दासचेडं

विसज्जेइ । तए णं से पंथए भोयणापिडयं गहाय चारगसालाओ पडि-
निक्खमइ २ रायगिहं नयरं मज्झमज्झेणं जेणेव सए गिहे जेणेव भद्दा
सत्थवाही तेणेव उवागच्छइ २ भद्दं सत्थवाहिणिं एवं वयासी-एवं खलु
देवाणुप्पिए ! धणे सत्थवाहे तव पुत्तघायगस्स जाव पञ्चामित्तस्स ताओ
विपुलाओ असणाओ ४ संविभागं करेइ ।

(46) तए णं सा भद्दा सत्थवाही पंथगस्स दासचेडगस्स अंतिए एय-
मट्ठं सोत्त्वा आसुरुत्ता रुट्ठा जाव भिसिमिसेमाणी धणस्स सत्थवाहस्स
पओसमावज्जइ । तए णं से धणे सत्थवाहे अन्नया कयाइं भित्तनाइ-
नियगसयणसंबंधिपरियणेणं सएण य अत्थसारेणं रायकज्जाओ अप्पाणं
मोयावेइ २ चारगसालाओ पडिनिक्खमइ २ जेणेव अलंकारियसभा
तेणेव उवागच्छइ २ अलंकारियकम्मं करवेइ २ जेणेव पोक्खरिणी तेणेव
उवागच्छइ २ अहं धोयमट्ठियं गेण्हइ पोक्खरिणीं ओगाहइ २ जल-
मज्जणं करेइ २ ण्हाए कयबलिकम्मे जाव रायगिहं नगरं अणुप्पविसइ २
रायगिहस्स नगरस्स मज्झमज्झेणं जेणेव सए गिहे तेणेव पहारेत्थ गम-
णाए । तए णं धणं सत्थवाहं एज्जमाणं पासित्ता रायगिहे नयरे बहवे
नियगसेट्ठिसत्थवाहपभिइओ आढंति परियाणंति सक्कारेति सम्माणेति
अब्भुट्ठेति सरीरकुसलौदंतं संपुच्छंति । तए णं से धणे सत्थवाहे जणेवे सए
गिहे तेणेव उवागच्छइ । जावि य से तत्थ बाहिरिया परिसा भवइ तंजहा -
दासा इ वा पेस्सा इ वा भिर्यगा इ वा भाइल्लंगा इ वा सा वि य णं धणं
सत्थवाहं एज्जमाणं पासइ २ पायवडिया खेमकुसलं पुच्छइ । जावि य से
तत्थ अब्भितरिया परिसा भवइ तंजहा -माया इ वा पिया इ वा भाया इ
वा भइणी इ वा सावि य णं धणं सत्थवाहं एज्जमाणं पासइ २
आसणाओ अब्भुट्ठेइ २ कंठाकंठियं अवयासिय ब्राह्मणमोक्खणं करेइ । तए
णं से धणे सत्थवाहे जेणेव भद्दा भारिया तेणेव उवागच्छइ । तए णं सा
भद्दा धणं सत्थवाहं एज्जमाणं पासइ २ नो आढाइ नो परिखाणाइ
अणाढायमाणी अपरियाणमाणी तुसिणीया परम्मुही संचिद्धइ । तए णं
से धणे सत्थवाहे भद्दं भारियं एवं वयासी-किं णं तुक्कं देवाणुप्पिए !

न तुट्ठी वा न हस्सिसे वा नाणदे वा जं मए सएणं अत्थसारेणं राय-
 कज्जाओ अप्पाणं विमोइए । तए णं सा भद्दा धणं सत्थवाहं एवं वयासी-
 क्हं णं देवाणुप्पिया ! मम तुट्ठी वा जाव आणदे वा भविस्सइ जेणं तुमं मम
 पुत्तघायगस्स जाव पच्चाभित्तस्स ताओ विपुलाओ असणाओ ४ संविभागं
 करेसि । तए णं से धणे भइं भारियं एवं वयासी- नो खलु देवाणुप्पिए !
 धम्मो त्ति वा तवो त्ति वा कयपडिकइया इ वा लोगजत्ता इ वा नायए इ वा
 संघाडिए इ वा सहाए इ वा सुहि त्ति वा ताओ विपुलाओ असणाओ ४
 संविभागे कए नन्नत्थ सरीरचित्ताए । तए णं सा भद्दा धणेणं सत्थवाहेणं
 एवं वुत्ता समाणी हट्ठा जाव आसणाओ अब्भुट्ठेइ २ कंठाकंठिं अवयासेइ
 खेमकुसलं पुच्छइ २ ण्हाया जाव पायच्छित्ता विपुलाइं भोगभोगाइं भुंज-
 माणी विहरइ । तए णं से विजए तक्करे चारगसालाए तेहिं बंधेहि वहेहिं
 कसप्पहारेहि य जाव तण्हाए य लुहाए य परब्भवमाणे कालमासे कालं
 किच्चा नरएसु नेरइयत्ताए उववन्ने । से णं तत्थ नेरइए जाए काले
 कालोभासे जाव वेयणं पच्चणुब्भवमाणे विहरइ । से णं तओ उव्वट्ठित्ता
 अणादीयं अणवद्दगं चाउरंतसंसारकंतरं अणुपरियट्ठिस्सइ । एवामेव
 जंबू ! जे णं अम्हं निमांथो वा २ आयरियउवज्झायाणं अंतिए मुंढे
 भवित्ता अगाराओ अणगारियं पव्वइए समाणे विपुलमणिमोत्तियधण-
 कणगरयणसारेणं लुब्भइ से वि एवं चेव ।

(47) तेणं कालेणं २ थेरां भगवंतो जाइसंपन्ना जाव पुठ्ठाणुपुठ्ठि-
 चरमाणा जाव जेणेव रायगिहे नयरे जेणेव गुणसिलए चेइए जाव अहा-
 पडिरूवं उगहं उग्गिणिहत्ता संजमेणं तवसा अप्पाणं आवेस्सणा विहरंति ।
 परिसा निग्गया धम्मो कहिओ । तए णं तस्स घणस्स सत्थवाहस्स बहु-
 जणस्स अंतिए एयमट्ठं सोच्चा निसस्स इमेयारूवे अज्झत्थिए जाव
 समुप्पज्जित्था — एवं खलु थेरा भगवंतो जाइसंपन्ना इहमागया इहसंपत्ता ।
 तं इच्छामि णं थेरे भगवंते वंदामि नमंसामि ण्हाए जाव सुद्धप्पावेसाइं
 मङ्गलाइं वत्थाइं पवरपरिहिए पायविहारचारेणं जेणेव गुणसिलए चेइए
 जेणेव थेरा भगवंतो तेणेव उवागच्छइ २ वंदइ नमंसइ । तए णं थेरा

धणस्स विचित्तं धम्ममाइक्खंति । तए णं से धणे सत्थवाहे धम्मं सोञ्चा
 एवं वयासी—सहहामि णं भंते ! निग्गंथे पावयणे जाव पव्वइए जाव
 बहूणि वासाणि सामण्णपरियागं पाउणित्ता भत्तं पञ्चक्खाइत्ता मासियाए
 संलेहणाए सट्ठिं भत्ताइं अणसणाए छेदित्ता कालमासे कालं किञ्चा
 सोहम्मं कप्पे देवत्ताए उववन्ने । तत्थ णं अत्थेगइयाणं देवाणं चत्तारि
 पलिओवमाइं ठिई पन्नत्ता । तत्थ णं धणस्स वि देवस्स चत्तारि पलिओव-
 माइं ठिई पन्नत्ता । से णं धणे देवे ताओ देवलोगाओ आउक्खएणं
 ठिइक्खएणं भवक्खएणं अणंतरं चयं चइत्ता महाविदेहे वासे सिज्झिहिइ
 जाव सव्वदुक्खाणमंतं करेहिइ ।

(48) जहा णं जंबू ! धणेणं सत्थवाहेणं नो धम्मो त्ति वा जाव
 विजयस्स तक्करस्स ताओ विपुलाओ असणाओ ४ संविभागे कए नन्नत्थ
 सरिरसारक्खणट्ठाए एवामेव जंबू ! जे णं अम्हं निग्गंथे वा जाव पव्व-
 इए समाणे ववगयण्हाणमइणपुप्फगंधमल्लालंकारविभूसे इमस्स ओरालिय-
 सरिरस्स नो वण्णहेउं वा रूवहेउं वा बैलविसयहेउं वा तं विपुलं असणं ४
 आहारमाहारेइ नन्नत्थ नाणदंसणचरित्ताणं वहणट्ठयाए से णं इहलोए चेव
 बहूणं समणार्णं बहूणं समणीणं बहूणं सावगाण य सावियाण य अञ्चणिज्जे
 जाव पज्जुवासणिज्जे भवइ । परलोए वि य णं नो आगच्छइ बहूणि हत्थ-
 च्छेयणाणि य कण्णच्छेयणाणि य नासाछेयणाणि य एवं हियउप्पायणाणि
 य वसणुप्पायणाणि य उल्लंबणाणि य पाविहिइ अणार्इयं च णं अणवदग्गं
 दीहमद्धं जाव वीईवइस्सइ जहा व से धणे सत्थवाहे ।

एवं खलु जंबू ! समणेणं जाव संपेत्तण दोषस्स नायज्झयणस्स
 अयमट्ठे पन्नत्ते त्तिबेमि ॥

॥ बीर्यं अज्झयणं समत्तं ॥

॥ तच्च अज्झयणं ॥

(49) जइ णं भंते ! समणेणं जाव संपत्तेणं दोवस्स अज्झयणस्स नायाधम्मकहाणं अयमट्ठे पन्नत्ते तइअस्स अज्झयणस्स के अट्ठे पन्नते ? एवं खलु जंबू ! तेणं कालेणं २ चंपा नामं नयरी होत्था वण्णओ । तीसे णं चंपाए नयरीए बहिया उत्तरपुरत्थिमे दिसीभाए सुभूमिभागे नामं उज्जाणे सेव्वउयपुप्फफलसमिद्धे सुरम्मे नंदणवणे इव सुहसुरभिसीयलच्छायाए समणुबद्धे । तस्स णं सुभूमिभागस्स उज्जाणस्स उत्तरपुरत्थिमे एगदेसंमि मालुयाकच्छए होत्था वण्णओ । तत्थ णं एगा वर्णमयूरी दो पुट्ठे परिचांगए पिट्ठुंडीपंडुरे निव्वणे निरुवहए भिन्नमुट्ठिप्पमाणे मयूरी अंडए पसवइ २ सएणं पक्खवाएणं सारक्खमाणी संगोवेमाणी संचिट्ठेमाणी विहरइ । तत्थ णं चंपाए नयरीए दुवे सत्थवाहदारगा परिवसंति तंजहा — जिणदत्तपुत्ते य सागरदत्तपुत्ते य सहजायया सहवड्ढियया सहपंसुकीलियया सहदारदरिसी अन्नमन्नमणुरत्ता अन्नमन्नमणुव्वया अन्नमन्नच्छंदाणुवत्तया अन्नमन्नहियइच्छियकारया अन्नमन्नेसु गिहेसु कम्मईं करणिज्जाइं पक्खणुव्वभवमाणा विहरंति ।

(50) तए णं तेसिं सत्थवाहदारगाणं अन्नया कयाइं एगयओ सहियाणं समुवागयाणं सन्निसण्णाणं सन्निविट्ठाणं इमेयारूवे मिहोकहासमुल्लावे समुप्पज्जित्था — जन्नं देवाणुप्पिया ! अम्हं सुहं वा दुहं वा पव्वज्जीं वा विदेसगमणं वा समुप्पज्जइ तं णं अम्हेहिं एगयओ समेच्चा नित्थरियव्वं तिकट्ठु अन्नमन्नमेयारूवं संगारं पडिसुणेंति सकम्मसंपउत्ता जाया यावि होत्था ।

(51) तत्थ णं चंपाए नयरीए देवदत्ता नामं गणिया परिवसइ अड्ढा जाव भत्तपाणा चंडसट्ठिकलापंडिया चंडसट्ठिगणियागुणोववेया अउणत्तीसविसेसे रममाणी एक्कवीसरइगुणप्पहाणा बत्तीसपुरिसोबयारकुसला नवंगसुत्तपडिबोहिया अट्टारसदेसीभासाविसारया सिंगारागारचारुवेसा संगयगयहसिय जाव ऊसियज्झया सहस्सलंभा विदिन्नलत्तचामरबालवीयणिया कण्णीरहप्पयाया वि होत्था बहूणं गणियासहस्साणं आह्वेच्चं जाव

विहरइ । तए णं तेसिं सत्थवाहदारगाणं अन्नया कयाइं पुव्वरत्ताव्वरत्तका-
लसमयंसि जिमियभुत्तुत्तरागयाणं समाणाणं आयन्ताणं चोक्खाणं परम-
सुइभूयाणं सुहासणवरगयाणं इमेयारूवे मिहोक्काहासमुल्लावे समुप्पज्जित्था-
सेयं खलु अम्हं देवाणुप्पिया ! कल्लं जाव जलंते विपुलं असणं ४ उव-
क्खडावेत्ता तं विपुलं असणं ४ धूवपुप्फगंधवत्थं गहाय देवदत्ताए गणियाए
साद्धिं सुभूमिभागस्स उज्जाणसिरिं पच्चणुब्भवमाणाणं विहरित्तए त्तिकट्ठु
अन्नमन्नस्स एयमट्ठं पडिसुणेंति २ कल्लं पाँउप्पभायाए कोडुंबियपुरिसे
सद्दवेंति २ एवं वयासी — गच्छह णं देवाणुप्पिया ! विपुलं असणं ४
उवक्खंडावेह २ तं विपुलं असणं ४ धूवपुप्फं गहाय जेणेव सुभूमिभागे
उज्जाणे जेणेव नंदापुक्खरिणी तेणामेव उवागच्छह २ नंदाए पोक्खरि-
णीए अदूरसामंते थूणामंडवं आहणह २ आसियसम्मज्जिओवलित्तं
सुगंधं जाव कलियं करेह २ अम्हं पडिवालेमाणा २ चिट्ठह जाव चिट्ठंति ।
तए णं ते सत्थवाहदारगा दोच्चंपि कोडुंबियपुरिसे सद्दवेंति २ एवं
वयासी — खिप्पामेव लहुकरणजुत्तजोइयं समखुरवालिहाणं समलिहिय-
त्तिकखग्गसिंगएहिं रययामयघंटसुत्तरज्जुपवरकंचणखचियनत्थपग्गहो-
वग्गहिणहिं नीलुप्पलकयामेलएहिं पवरगोणजुवाणएहिं नानामणिरयण-
कंचणघंटियाजालपरिक्खित्तं पवरलक्खणोववेयं जुत्तामेव पवहणं उवणेह ।
ते वि तहेव उवणेंति । तए णं ते^१ सत्थवाहदारगा ण्हाया जाव सरीरा
पवहणं दुरुहंति २ जेणेव देवदत्ताए गणियाए गिहे तेणेव उवागच्छंति २
पवहणाओ पच्चोरुहंति २ देवदत्ताए गणियाए गिहं अणुप्पविसंति । तए णं
सा देवदत्ता गणिया ते सत्थवाहदारए एज्जमाणे पासइ २ हट्ठतुट्ठा
आसणाओ अब्भुट्ठेइ २ सत्तट्ठ पयाइं अणुगच्छइ २ ते सत्थवाहदारए
एवं वयासी — संदिसंतुं णं देवाणुप्पिया ! किमिहागमणप्पओयणं ।
तए णं ते सत्थवाहदारगा देवदत्तं गणियं एवं वयासी — इच्छामो णं
देवाणुप्पिए ! तुब्भेहिं साद्धिं सुभूमिभागस्स उज्जाणसिरिं पच्चणुब्भव-
माणा विहरित्तए । तए णं सा देवदत्ता तेसिं सत्थवाहदारगाणं एयमट्ठं
पडिसुणेइ २ ण्हाया कयवलिकम्मा किं ते पवर जाव सिरिसमाणवेसा

जेणेव सत्थवाहदारगा तेणेव उवागया । तए णं ते सत्थवाहदारगा देव-
दत्ताए गणियाए सद्धिं जाणं दुरुहंति २ चंपाए नयरीए मज्झमज्जेणं
जेणेव सुभूमिभागे उज्जाणे जेणेव नंदापोक्खरिणी तेणेव उवागच्छंति
२ पवहणाओ पच्चोरुहंति २ नंदापोक्खरिणीं ओगाहंति २ जलमज्जणं
करेति जलकिङ्कं करेति ण्हायी देवदत्ताए सद्धिं पच्चुत्तरंति जेणेव थूणा-
मंडवे तेणेव उवागच्छंति २ अणुप्पविसंति २ सव्वालंकारभूसिया आसत्था
वीसत्था सुहासणवरगया देवदत्ताए सद्धिं तं विपुलं असणं ४ धूवपुप्फ-
गंधवत्थं आसाएमाणा विसाएमाणा परिभाएमाणा परिभुंजंति एवं च णं
विहरंति जिमियभुत्तत्तरागया वि य णं समाणा आयंता देवदत्ताए सद्धिं
विपुलाइं कामभोगाइं भुंजमाणा विहरंति ।

(52) तए णं ते सत्थवाहदारगा पुव्वावरण्हकालसमयांसि देव-
दत्ताए गणियाए सद्धिं थूणामंडवाओ पडिनिक्खमंति २ हत्थसंगेल्लीए
सुभूमिभागे बहूसु आलिघरएसु जाव कुसुमघरएसु य उज्जाणसिरिं पच्च-
णुब्भवमाणा विहरंति ।

(53) तए णं ते सत्थवाहदारगा जेणेव से मालुयाकच्छए तेणेव
पहारेत्थ गमणाए । तए णं सा वणमयूरी ते सत्थवाहदारए एज्जमाणे
पासइ २ भीया तत्था महया २ सद्देणं केकारखं विणिमुयमाणी २
मालुयाकच्छाओ पडिनिक्खमइ २ एगंसि रुक्खडालयंसि ठिच्चा ते सत्थ-
वाहदारए मालुयाकच्छं च अणिमिसाए दिट्ठीए पेहमाणी २ चिट्ठइ । तए णं
ते सत्थवाहदारगा अन्नमन्नं सदावेंति २ एवं वयासी — जहा णं देवाणु-
प्पिया ! एसा वणमयूरी अम्हे एज्जमाणे पासित्ता भीया तत्था तसिया
उब्बिग्गा पलाया महया २ सद्देणं जाव अम्हं मालुयाकच्छयं च पेच्छमाणी
२ चिट्ठइ तं भवियव्वमेत्थ कारणेणं तिकट्ठु मालुयाकच्छयं अंतो अणुप्प-
विसंति । तत्थ णं दो पुट्ठे परियागए जाव पासित्ता अन्नमन्नं सदावेंति २
एवं वयासी — सेयं खलु देवाणुप्पिया ! अम्हं इमे वणमयूरीअंडए
साणं जाइमताणं कुक्कुडियाणं अंडएसु पक्खिवावित्तए । तए णं ताओ
जाइमंताओ कुक्कुडियाओ एए अंडए सए य अंडए सएणं पंखवाएणं

सारक्खमाणीओ संगोवेमाणीओ विहरिस्संति । तए णं अम्हं एत्थ दो कीलावणगा मयूरपोयगा भविस्संति त्तिकट्टु अन्नमन्नस एयमट्ठं पडि-
सुणेंति २ सए सए दासचेडए सहावेंति २ एवं वयासी - गच्छहं णं तुब्भे देवाणुप्पिया ! इमे अंडए गहाय सगाणं कुक्कुडीणं अंडएसु पक्खि-
वह जाव ते पक्खिवेंति । तए णं ते सत्थवाहदारगा देवदत्ताए गणियाए साद्धिं सुभूमिभागस्स उज्जाणसिरिं पच्चणुब्भवमाणा विहरित्ता तमेव
जाणं दुरूढा समाणा जेणेव चंपा नयरी जेणेव देवदत्ताए गणियाए गिहे तेणेव उवागच्छंति २ देवदत्ताए गिहं अणुप्पविसंति २ देवदत्ताए
गणियाए विउलं जीवियारिहं पीइदाणं दलयंति २ सक्कारेंति सम्माणेंति २ देवदत्ताए गिहाओ पडिनिक्खमंति २ जेणेव सयाइं २ गिहाइं तेणेव
उवागच्छंति २ सकम्मसंपउत्ता जाया यावि होत्था ।

(54) तत्थ णं जे से सागरदत्तपुत्ते सत्थवाहदारए से णं कल्लं जाव जलंते जेणेव से वणमयूरीअंडए तेणेव उवागच्छइ २ तंसि मयूरी-
अंडयंसि संकिए कंखिए विइगिच्छसमावन्ने भेयसमावन्ने कलुससमावन्ने किंनं ममं एत्थ कीलावणए मयूरपोयए भविस्सइ उदाहु नो भविस्सइ
त्तिकट्टु तं मयूरीअंडयं अभिक्खणं २ उव्वंत्तेइ परियत्तेइ आसारेइ संसारेइ चालेइ फंदेइ घट्टेइ खोभेइ अभिक्खणं २ कण्णमूलंसि टिट्ठि-
यावेइ । तए णं से वणमयूरीअंडए अभिक्खणं २ उव्वत्तिज्जमाणे जाव टिट्ठियावेज्जमाणे पोच्चडे जाए यावि होत्था । तए णं से सागरदत्तपुत्ते
सत्थवाहदारए अन्नया कयाइं जेणेव से वणमयूरीअंडए तेणेव उवागच्छइ २ तं मयूरीअंडयं पोच्चडमेव पासइ २ अहो णं ममं एत्थ कीलावणए
मयूरपोयए न जाए त्तिकट्टु ओहयमण जाव झियायइ । एवामेव समणा-
उसो ! जो अम्हं निगंथो वा २ आयरियउवज्झायाणं अंतिए पव्वइए समाणे पंचमहव्वएसु जाव छज्जीवनिकाएसु निगंथे पावयणे संकिए
जाव कलुससमावन्ने से णं इहभवे चेव बहूणं समणाणं २ बहूणं सावगाणं सावियाणं हीलणिज्जे निंदणिज्जे खिसणिज्जे गरहणिज्जे परिभवणिज्जे
परलोए विय णं आगच्छइ बहूणि दंडणाणि य जाव ससारं अणुपरियट्टइ ।

(55) तए णं से जिणदत्तपुत्ते जेणेव से मयूरीअंडए तेणेव उवा-
गच्छइ २ तंसि मयूरीअंडयंसि निस्संकिए सुव्वत्तए णं मम एत्थ कीला-
वणए मयूरपोयए भविस्सइ त्तिक्कट्ठु तं मयूरीअंडयं अभिक्खणं २ नो
उव्वत्तेइ जाव नो टिट्ठियावेइ । तए णं से मयूरीअंडए अणुव्वत्तिज्ज-
माणे जाव अटिट्ठियाविज्जमाणे कालेणं समएणं उब्भिन्नमयूरपोयए एत्थ
जाए । तए णं से जिणदत्तपुत्ते मयूरपोययं पासइ २ हट्ठतुट्ठे मयूर-
पोसए सइवेइ २ एवं वयासी — तुब्भे णं देवाणुप्पिया ! इमं मयूरपोयगं
बहूहिं मयूरपोसणपाओगोहिं दव्वेहिं अणुपुव्वेणं सारक्खमाणा संगो-
वेमाणा संवट्ठेह नट्ठुल्लगं च सिक्खावेइ । तए णं ते मयूरपोसगा
जिणदत्तस्स पुत्तस्स एयमट्ठं पडिसुणेंति २ तं मयूरपोयगं गेण्हंति जेणेव
सए गिहे तेणेव उवागच्छंति २ तं मयूरपोयगं जाव नट्ठुल्लगं सिक्खा-
वेंति । तए णं से वणमयूरपोयए उम्मुक्कबालभावे विन्नाय जाव लक्खण-
वंजणगुणोवए माणुस्माणप्पमाणपडिपुण्णपक्खपेहुणकलावे विचित्तिपिच्छ-
सत्तचंदए नीलकंठए नच्चणसीलए एगाए चप्पुडियाए कयाए समाणीए
अणेगाइं नट्ठुल्लगसयाइं केकारवसयाणि य करेमाणे विहरइ । तए णं
ते^१ मयूरपोसगा तं मयूरपोयगं उम्मुक्क जाव करेमाणं पासित्ताणं तं मयूरपोयगं
गेण्हंति २ जिणदत्तपुत्तस्स उवणेंति । तए णं से जिणदत्तपुत्ते सत्थवाहदारए
मयूरपोयगं उम्मुक्क जाव करेमाणं पासित्ता हट्ठतुट्ठे तेसिं बिपुलं जीवियारिहं
पीइदाणं दलयइ २ पडिविसज्जेइ । तए णं से मयूरपोयगे जिणदत्तपुत्तेणं
एगाए चप्पुडियाए कयाए समाणीए नंगोलाभंगसिरोधरे सेयावगे
ओरालियपइण्णपक्खे उक्खित्तचंदकाइयकलावे केक्काइयसयाणि विमुंच-
माणे नच्चइ । तए णं से जिणदत्तपुत्ते तेणं मयूरपोयएणं चंपाए नयरीए
सिंघाडग जाव पहेसु सएहि य साहस्सिएहि य सयसाहस्सिएहि य पणि-
एहि य जयं करेमाणे विहरइ । एवामेव समणाउसो ! जो अम्हं निगंथो
वा २ पव्वइए समाणे पंचमहव्वएसु छज्जीवनिकाएसु निगंथे पावयणे
निस्संकिए निक्कंखिए निव्विइगिच्छे से णं इहभवे चेव बहूणं समणाणं

जाव वीइवइस्सइ ।

एवं खलु जंबू ! समणेणं जाव संपत्तेणं नायाणं तच्चस्स अज्झ-
यणस्स अयमट्ठे पन्नत्तेति वेमि ॥

॥ तस्मै अज्झयणं समत्तं ॥ ३ ॥

॥ चउत्थं अज्झयणं ॥

(56) जइ णं भंते ! समणेणं ३ नायाणं तच्चस्स नायज्झयणस्स अयमट्ठे पन्नत्ते चउत्थस्स णं नायाणं के अट्ठे पन्नत्ते ? एवं खलु जंबू ! तेणं कालेणं २ वाणारसी नामं नयरी होत्था वण्णओ । तीसे णं वाणारसीए नयरीए उत्तरपुरत्थिमे दिसीभाए गंगाए महानईए मयंगतीरइहे नामं दहे होत्था आणुपुव्वसुजायवप्पगंभीरसीयलज्जे अच्छविमलसलिल-पेलिच्छन्ने संछन्नयत्तपुप्फफलासे बहुउप्पलपउमकुमुयनलिणसुभगसोगंधियपुंडरीयमहापुंडरीयसयपत्तसहस्सपत्तकेसरपुप्फोवाचिए पासाईए ४ । तत्थ णं बहूणं मच्छाण य कच्छभाण य गाहाण य मगराण य सुंसु-माराण य सयाणि य सहस्साणि य सयसहस्साणि य जूहाइं निब्भयाइं निरुव्विग्गाइं सुहंसुहेणं अभिरममाणाइं २ विहरंति । तस्स णं मयंगतीर-इहस्स अदूरसामंते एत्थ णं महं मालुयाकच्छए होत्था वण्णओ । तत्थ णं दुवे पावसियालगा परिवसंति पावा चंडा रुह्वां तल्लिच्छा साहसिया लोहियपाणी आमिसत्थी आमिसाहारा आमिसप्पिया आमिसलोला आमिसं गवेसमाणा रत्तिं वियालचारिणो दिर्यां पच्छंन्नं वि चिट्ठंति । तए णं ताओ मयंगतीरइहाओ अन्नया कयाइं सूरियंसि चिरत्थमियंसि लुलि-याए संझाए पविरलमाणुसंसि निसंतपडिनिस्तंतंसि समाणंसि दुवे कुम्मगा आहारत्थी आहारं गवेसमाणा सणियं २ उत्तरंति तस्सेव मयंगतीर-इहस्स परिपेरंतेणं सव्वओ समंता परिघोलेमाणा २ वित्तिं कप्पेमाणा विहरंति । तयाणंतरं च णं ते पावसियालगा आहारत्थी जाव आहारं गवेसमाणा मालुयाकच्छगाओ पडिनिक्खमंति २ जेणेव मयंगतीरइहे तेणेव उवागच्छंति २ तस्सेव मयंगतीरइहस्स परिपेरंतेणं परिघोलेमाणा २ वित्तिं कप्पेमाणा विहरंति । तए णं ते पावसियाला ते कुम्मए पासंति २ जेणेव ते कुम्मए तेणेव पहारेत्थ गमणाए । तए णं ते कुम्मगा पावसियालए एज्जमाणे पासंति २ भीया तत्था तसिया उव्विग्गा संजाय-भया हत्थे य पाए य गीवाए य सएहिं २ काएहिं साहरंति २ निच्चला निष्फंदा तुसिणीया संचिट्ठंति । तए णं ते पावसियालगा जेणेव ते कुम्मगा

तेणेव उवागच्छंति २ ते कुम्मगा सव्वओ समंता उव्वत्तेति परियत्तेति आसारंति संसारंति चालेंति घट्टेंति फंदेंति खोभेंति नहेहिं आलुंपंति^१ दंतेहि य अक्खोडेंति नो चेव णं संचाएंति तेसिं कुम्मगाणं सरीरस्स आबाहं वा पबाहं वा बाबाहं वा उप्पाइत्तए छविच्छेयं वा करित्तए । तए णं ते पावसियालगा ते कुम्मए दोच्चंपि तच्चंपि सव्वओ समंता उव्वत्तेति^२ जाव नो चेव णं संचाएंति करित्तए ताहे संता तंता परितंता निव्विण्णा समाणा सणियं २ पच्चोसक्कंति एगंतमवक्कमंति २ निच्चला निप्फंदा तुसिणीया संचिट्ठंति । तत्थ णं एगे कुम्मए ते पावसियालए चिरगए दूरंगए जाणित्ता सणियं २ एंगं पायं निच्छुभइ । तए णं ते पावसियालगा तेणं कुम्मएणं सणियं २ एंगं पायं नीणियं पासंति २ सिग्घं तुरियं चवलं चंडं जईणं वेगियं जेणेव से कुम्मए तेणेव उवागच्छंति २ तस्स णं कुम्मगस्स तं पायं नखेहिं आलुंपंति दंतेहिं अक्खोडेंति तओ पच्छा मंसं च सोणियं च आहारंति २ तं कुम्मगं सव्वओ समंता उव्वत्तेति जाव नो चेव णं संचाएंति करेत्तए ताहे दोच्चंपि अवक्कमंति एवं चत्तारि वि पाया जाव साणियं २ गीवं नीणेइ । तए णं ते पावसियालगा तेणं कुम्मएणं गीवं नीणियं पासंति २ सिग्घं चवलं ४ नहेहिं दंतेहिं य कवालं विहाडेंति २ तं कुम्मगं जीवियाओ ववरोवेंति २ मंसं च सोणियं च आहारंति । एवामेव समणाउसो ! जो अम्हं निगंथो वा २ आयरियउवज्झायाणं अंतिए पव्वइए समाणे पंच य से इंदिया अगुत्ता भवंति से णं इहभवे चेव बहूणं समणाणं ४ हीलणिज्जे परलोए वि य णं आगच्छइ बहूणं दंडणाणं जाव ससारं अणुपरियट्ठइ जहा व से कुम्मए अगुत्तिंदिए । तए णं ते पावसियालगा जेणेव से दोच्चे कुम्मए तेणेव उवागच्छंति २ तं कुम्मगं सव्वओ समंता उव्वत्तेति जाव दंतेहिं अक्खुडेंति जाव करित्तए । तए णं ते पावसियालगा दोच्चंपि तच्चंपि जाव नो संचायंति तस्स कुम्मगस्स किंचि आबाहं वा विबाहं वा जाव छविच्छेयं वा करेत्तए ताहे संता तंता परितंता निव्विण्णा समाणा जामेव दिसं पाउब्भूया तामेव दिसं पडिगया । तए णं से कुम्मए ते

पावसियालए चिरगए दूरगए जाणित्ता सणियं २ गीबं नेणेइ २ दिसा-
बलोयं करेइ २ जमगसमगं चत्तारि वि पाए नीणेइ २ ताए उक्किट्ठाए
कुम्मगईए बीईवयमाणे २ जेणेव मयंगतीरइहे तेणेव उवागच्छइ २
मित्तनाईनियगसयणसंबंधिपरियणेणं सद्धिं अभिसमन्नागए यावि होत्था ।
एवामेव समणाउसो ! जो अम्हं समणो वा समणी वा पंच महव्वयाइं
इंदियाइं गुत्ताइं भवन्ति से^१ णं इहभवे चेव बहूणं समणाणं ४ नो हील-
णिज्जे नो निंदणिज्जे परलोए वि य णं सुग्गइं गच्छइ बहूणं नो दंडणाणं
नो मुंडणाणं जाव संसारं नो अणुपरियट्ठई जहा व से कुम्मए गुत्तिदिए ।

एवं खलु जंबू ! समणेणं भगवया महावीरेणं चउत्थस्स नायज्झ-
यणस्स अयमट्ठे पन्नत्तोत्ति बेमि ॥

॥ चउत्थं नायज्झयणं समत्तं ॥ ४ ॥

॥ पंचमं अज्झयणं ॥

(57) जइ णं भंते ! समणेणं ३ चउत्थस्स नायज्झयणस्स अयमट्ठे पन्नत्ते पंचमस्स नायज्झयणस्स के अट्ठे पन्नत्ते ? एवं खलु जंबू ! तेणं कालेणं २ बारवई नामं नयरी होत्था पाईणपंडीणायथा उदीण-
दाहिणवित्थिण्णा नवजोयणवित्थिण्णा दुवालसजोयणायामा धणवइमइ-
निम्माया चामीयरपवरपागारा नाणामणिपंचवण्णकविसीसगसोहिया अल-
यापुरिसंकासा पमुइयपक्कीलिया पच्चक्खं देवलोगभूया । तीसे णं बारव-
ईए नयरीए बहिया उत्तरपुरत्थिमे दिसीभाए रेवयगे नामं पव्वए होत्था
तुंगे गगणतलमणुलिहंतसिहरे नाणाविहगुच्छगुम्मलयावल्लीपरिगए हंस-
मियमयूरकौंचसारसचक्रवायमयणसालकोइलकुलोववेए अणेगतडकडग-
वियरउज्झरपवायपव्वभारसिहरपँउरे अच्छरगणदेवसंघचारणविज्जाहर-
मिहुणसंविचिण्णे निच्चच्छणए दसारवरवीरपुरिसतेलोकबलवगाणं
सोमे सुभगे पियदंसणे सुरूवे पासाईए ४ । तस्स णं रेवयगस्स अदूर-
सामंते एत्थ णं नंदणवणे नामं उज्जाणे होत्था सव्वउयपुप्फफलसमिद्धे
रम्मे नंदणवणप्पगासे पासाईए ४ । तस्स णं उज्जाणस्स बहुमज्झदेसभाए
सुरप्पिए नामं जक्खाययणे होत्था वण्णओ । तत्थ णं बारवईए नयरीए
कण्हे नामं वासुदेवे राया परिवसइ । से णं तत्थ समुद्विजयपामो-
क्खाणं दसण्हं दसाराणं बलदेवपामोक्खाणं पंचण्हं महावीराणं उगसेण-
पामोक्खाणं सोलसण्हं राईसहस्साणं पज्जुन्नपामोक्खाणं अद्धुट्ठाणं कुमार-
कोडीणं संबपामोक्खाणं सट्ठीए दुहंतसाहस्सीणं वीरसेणपामोक्खाणं
एक्कवीसाए वीरसाहस्सीणं महासेणपामोक्खाणं छप्पन्नाए बलवगसाह-
स्सीणं रुपिणिपामोक्खाणं वत्तीसाए महिलासाहस्सीणं अणंगसेणा-
पामोक्खाणं अणेगाणं गणियासाहस्सीणं अन्नेसि च बहूणं राईसरतल-
वर जाव सत्थवीहपभिईणं वेयड्ढगिरिसार्गरपेरंतस्स य दाहिणड्ढभरहस्स
य बारवईए नयरीए आहेवच्चं जाव पालेमाणे विहरइ ।

(58) तत्थ णं बारवईए थावच्चा नामं गाहावइणी परिवसइ अड्ढा
जाव अपरिभूया । तीसे णं थावच्चाए गाहावइणीए पुत्ते थावच्चापुत्ते

नामं सत्थवाहदारए होत्था सुकुमालपाणिपाए जाव सुरूवे । तए णं सा थावरूचा गाहावइणी तं दारगं साइरेगअट्ठवासजायं जाणित्ता सोहणंसि तिहिकरणनक्खत्तमुहुत्तांसि कलायरियस्स उवणेइ जाव भोगसमत्थं जाणित्ता बत्तीसाए इब्भकुलबालियाणं एगादिवसेणं पाणिं गेण्हावेइ बत्तीसओ दाओ जाव बत्तीसाए इब्भकुलबालियाहिं सद्धिं विपुले सद्द- फरिससरूववण्णगंधे जाव भुंजमाणे विहरइ । तेणं कालेणं २ अरहा अरिट्टनेमी सो चेव वण्णओ दसघणुस्सेहे नीलुप्पलगवलगुलियअयसि- कुसुमप्पगासे अट्ठारसहिं समणसाहस्सीहिं चत्तालीसाए अज्जियासाह- स्सीहिं सद्धिं संपरिवुडे पुव्वाणुपुर्व्वि चरमाणे जाव जेणेव बारवई नगरी जेणेव रेवयगपव्वए जेणेव नंदणवणे उज्जाणे जेणेव सुरापियस्स जक्खस्स जक्खाययणे जेणेव असोगवरपायवे तेणेव उवागच्छइ २ अहापाडिरूवं उग्गहं ओगिणिहत्ता संजमेणं तवसा अप्पाणं भावेमाणे विहरइ । परिसा निग्गया धम्मो कहिओ । तए णं से कण्हे वासुदेवे इमीसे कहाए लद्धे समणे कोडुंबियपुरिसे सद्दावेइ २ एवं वयासी — खिप्पामेव भो देवाणुप्पिया ! सभाए सुहम्माए मेघोघरसियं गंभीर- महुरसइं कोमुइयं भेरिं तालेह । तए णं ते कोडुंबियपुरिसा कण्हेणं वासुदेवेणं एवं वुत्ता समाणा हट्ठ जाव मत्थए अंजलिं कट्ठु एवं सीमी ! तह त्ति जाव पडिसुणेंति २ कण्हस्स वासुदेवस्स अंतियाओ पडिनिक्खमंति २ जेणेव सभा सुहम्मा जेणेव कोमुइया भेरी तेणेव उवागच्छंति २ तं मेघोघरसियगंभीरमहुरसइं कोमुइयं भेरिं तालेंति । तओ निद्धमहुरगंभीरपाडिसुएणं पिव सारइएणं बलाहएणं अणुरसियं भेरीए । तए णं तीसे कोमुइयाए भेरीए तालियाए समाणीए बारवईए नयरीए नवजोयणवित्थिण्णाए दुवालसजोयणायामाए सिंघाडगतिय- चउक्कचरुचरकंदरदरीविवरकुहरगिरिसिहरनगरगोपुरपासायदुवूरभवणदेउ- लपडिस्सुयासयसहस्ससंकूलं करेमाणे बारवईए नयरीए सद्धिंभतरवाहि- रियं सव्वओ समंता सद्दे विप्पसस्त्थि । तए णं बारवईए नयरीए नवजोयणवित्थिण्णाए बारसजोयणायामाए समुद्धिविजयपामोक्खा दस

इसारा जाव गणियासहस्साइं कोमुईयाए भेरीए सइं सोच्चा निसम्म हट्टतुट्ठा जाव ण्हाया आविद्धवग्घारियमल्लदामकलावा अहयवत्थचंदणो-
क्खिन्नगायसररीरा अप्पेगइया ह्यगया एवं गयगया रहसीयासंदमाणीगया
अप्पेगइया पायविहारचारेणं पुरिसवग्गुरापरिक्खित्ता कण्हस्स वासुदेवस्स
अंतिए पाउब्भवित्था । तए णं से कण्हे वासुदेवे समुद्विजयपामोक्खे
दस दसारे जाव अंतियं पाउब्भवमाणे पासित्ता हट्टतुट्ठे जाव कोडुंबिय-
पुरिसे सद्दवेइ २ एवं वयासी - खिप्पामेव भो देवाणुप्पिया ! चाउरं-
गिणिं सेणं सज्जेह विजयं च गंधहत्थि उवट्ठवेह । तेवि तहेव उवट्ठवेंति
जाव पज्जुवासंति ।

(59) थावच्चापुत्ते वि निग्गए जहा मेहे तहेव धम्मं सोच्चा
निसम्म जेणेव थावच्चा गाहावइणी तेणेव उवागच्छइ २ पायग्गहणं
करेइ जहा मेहस्स तहा चेव निवेयणा जाहे नो संचाएइ विसयाणुलोमाहि
य विसयपडिकूलाहि य बहूहिं आघवणाहि य पन्नवणाहि य सन्नवणाहि
य विन्नवणाहि य आघवित्तए वा ४ ताहे अकामिया चेव थावच्चापुत्तस्स
निक्खमणमणुमन्नित्था । तए णं सा थावच्चा आसणाओ अब्भुट्ठेइ २
महत्थं महग्घं महरिहं रायारिहं पाहुडं गेण्हइ २ मित्त जाव संपरिवुट्ठा
जेणेव कण्हस्स वासुदेवस्स भवणवरपडिदुवारदेसभाए तेणेव उवा-
गच्छइ २ पडिहारंदेसिएणं मग्गेणं जेणेव कण्हे वासुदेवे तेणेव उवा-
गच्छइ २ करयल जाव वद्धावेइ २ तं महत्थं ३ पाहुडं उवणेइ २ एवं
वयासी - एवं खलु देवाणुप्पिया । मम एगे पुत्ते थावच्चापुत्ते नामं
दारए इट्ठे जाव संसारभउव्विग्गे भीए इच्छइ अरहओ अरिट्ठनेमिस्स जाव
पव्वइत्तए । अहं णं निक्खमणसक्कारं करेमि । इच्छामि णं देवाणु-
प्पिया ! थावच्चापुत्तस्स निक्खममाणस्स छत्तमउडचामराओ य विदि-
न्नाओ । तए णं कण्हे वासुदेवे थावच्चागाहावइणिं एवं वयासी - अच्छाहि
णं तुमं देवाणुप्पिए ! सुनिव्वुयवीसत्था । अहं णं सयमेव थावच्चा-
पुत्तस्स दारगस्स निक्खमणसक्कारं करिस्सामि । तए णं से कण्हे
वासुदेवे चाउरंगिणीए सेणाए विजयं हत्थिरयणं दुरूढे समाणे जेणेव

थावच्चाए गाहावइणीए भवणे तेणेव उवागच्छइ २ थावच्चापुत्तं एवं वयासी — मा णं तुमं देवाणुप्पिया ! मुंडे भवित्ता पव्वयाहि । भुंजाहि णं देवाणुप्पिया ! विपुंले माणुस्सए कामभोगे मम बाहुच्छायापरिग्ग-
हिए । केवलं देवाणुप्पियस्स नो संचाएमि वाउकायं उवरिमेणं गच्छ-
माणं निवारित्तए । अन्ने णं देवाणुप्पियस्स जं किंचि आबाहं वा विबाहं
वा उप्पांएइ तं सव्वं निवारेमि । तए णं से थावच्चापुत्ते कण्हेणं
वासुदेवेणं एवं वुत्ते समाणे कण्हं वासुदेवं एवं वयासी — जइ णं देवाणु-
प्पिया ! मम जीवियंतकरणिज्जं मच्चुं एज्जमाणं निवारेसि जरं वा
सरीररूवविणासाणिं सरीरं अइवयमाणं निवारेसि तए णं अहं तव
बाहुच्छायापरिग्गहिए विउले माणुस्सए कामभोगे भुंजमाणे विहरामि ।
तए णं से कण्हे वासुदेवे थावच्चापुत्तेणं एवं वुत्ते समाणे थावच्चापुत्तं
एवं वयासी — एए णं देवाणुप्पिया दुरइक्कमणिज्जा । नो खलु
सक्का सुबल्लिएणावि देवेण वा दाणवेण वा निवारित्तए नन्नत्थ
अप्पणो कम्मक्खएणं । तए णं से थावच्चापुत्ते कण्हं वासुदेवं एवं
वयासी — जइ णं एए दुरइक्कमणिज्जा नो खलु सक्का सुबल्लिएणावि देवेण
वा दाणवेण वा निवारित्तए नन्नत्थ अप्पणो कम्मक्खएणं तं इच्छामि
णं देवाणुप्पिया ! अन्नाणमिच्छत्तअविरइकसायसंचियस्स अत्तणो कम्म-
क्खयं करित्तए । तए णं से कण्हे वासुदेवे थावच्चापुत्तेणं एवं वुत्ते
समाणे कोडुंबियपुरिसे सहावेइ २ एवं वयासी — गच्छह णं देवाणुप्पिया !
बारवईए नयरीए सिंघाडगतिग जाव पहेसु य हत्थिखंधवरगया महया २
सहेणं उग्घोसेमाणा २ उग्घोसणं करेह — एवं खलु देवाणुप्पिया !
थावच्चापुत्ते संसारभउव्विग्गे भीए जम्मणंमरणणं इच्छइ अरहओ
अरिद्वेनेमिस्स अंतिए मुंडे भवित्ता पव्वइत्तए । तं जो खलु देवाणुप्पिया !
राया वा जुवराया वा देवी वा कुमारे वा ईसरे वा तलवरे वा कोडुं-
बियमाडंबियइव्वभसोद्विसेणावइसत्थवाहे वा थावच्चापुत्तं पव्वयंतमणु-
पव्वयइ तस्स णं कण्हे वासुदेवे अणुजाणइ पच्छाउरस्स वि य से मित्त-
नाइनियगसंबंधिपरिजणस्स जोगक्खेमं वट्टमाणं पडिबहइ त्तिकट्टु घोसणं

घोसेह जाव घोसंति । तए णं थावच्चापुत्तस्स अणुराएणं पुरिससहस्सं
 निक्खमणाभिमुहं ण्हायं जाव सव्वालंकारविभूसियं पत्तेयं २ पुरिससहस्स-
 वाहिणीसु सिवियासु दुरूढं समीणं भित्तनाइपरिवुडं थावच्चापुत्तस्स
 अंतियं पाउब्भूयं । तए णं से कण्हे वासुदेवे पुरिससहस्सं अंतियं पाउ-
 ब्भवमाणं पासइ २ कोडुंबियपुरिसे सद्दावेइ २ एवं वयासी — जहा मेहस्स
 निक्खमणाभिसेओ तदेव सेयापीएहिं कलसेहिं ण्हावेइ जाव अरहओ अरिदु-
 नेभिस्स छत्ताइच्छत्तं पढागाइपढागं पासइ २ विज्जाहरचारणे जाव पासित्ता
 सीयाओ पच्चोरुहइ । तए णं से कण्हे वासुदेवे थावच्चापुत्तं पुरओ
 काउं जेणेव अरहा अरिदुनेमी सव्वं तं चेव जाव आभरणं ओमुयइ । तए
 णं सा थावच्चा गाहावईणी हंसलक्खणेणं पढगसाडएणं आभरणमक्का-
 लंकारं पडिच्छइ हारवारिधाराछिन्नमुत्तावलिप्पगासाइं अंसूणि विणिमुंच-
 माणी २ एवं वयासी — जइयव्वं जाया ! घडियव्वं जाया ! परक्क-
 मियव्वं जाया ! अस्सि च णं अट्ठे नो पमाएयव्वं । जामेव दिसिं पाउ-
 ब्भूया तामेव दिसिं पडिगया । तए णं से थावच्चापुत्ते पुरिससहस्सेणं
 सद्धिं सयमेव पंचमुट्ठियं लोयं करेइ जाव पव्वइए । तए णं से थावच्चा-
 पुत्ते अणगारे जाए इरियासमिए भासासमिए जाव विहरइ । तए णं से
 थावच्चापुत्ते अरहओ अरिदुनेभिस्स तहारूवाणं थेराणं अंतिए सामा-
 इयमाइयाइं इक्कारस अंगाइं चोदसपुव्वाइं अहिज्जइ २ बहूहिं जाव चउत्थेणं
 विहरइ । तए णं अरहा अरिदुनेमी थावच्चापुत्तस्स अणगारस्स तं इब्भाइयं
 अणगारसहस्सं सीसत्ताए दलयइ । तए णं से थावच्चापुत्ते अन्नया
 कयाइं अरहं अरिदुनेमिं वंदइ नमंसइ २ एवं वयासी — इच्छामि णं
 भंते ! तुब्भेहिं अब्भणुन्नाए समाणे अणगारसहस्सेणं सद्धिं बहिया
 जणवयविहारं विहरित्तए । अहासुहं देवाणुप्पिया । तए णं से थावच्चापुत्ते
 अणगारसहस्सेणं सद्धिं तेणं उरालेणं उग्गेणं पयत्तेणं पग्गहिएणं बहिया
 जणवयविहारं विहरइ ।

(60) तेणं कालेणं २ सेलगपुरे नामं नगरे होत्था । सुभूमि-
 भागे उज्जाणे । सेलए राया पउर्मावईं देवीं मंडुए कुमारे जुवराया ।

तस्स णं सेल्लगस्स पंथगपामोक्खा णं पंच मंतिसया होत्था उप्पत्तियाए
 ४ उव्वेया रज्जधुरं चित्तयंति । थावच्चापुत्ते सेल्लगपुरे समोसंढे ।
 राया निग्गए धम्मकहा । धम्मं सोच्चा जहा णं देवाणुप्पियाणं अंतिए
 बह्वे उग्गा भोगा जाव चइत्ता हिरणं जाव पव्वइया तहा णं अहं नो
 संचाएमि पव्वइत्तए । अहं णं देवाणुप्पियाणं अंतिए पंचाणुव्वइयं
 जाव समणोवासए जाए अहिगयजीवाजीवे जाव अप्पाणं भावेमाणे
 विहरइ । पंथगपामोक्खा पंच मंतिसया य समणोवासया जाया ।
 थावच्चापुत्ते बहिया जणवयविहारं विहरइ । तेणं कालेणं २ सोगं-
 धियां नामं नयरी होत्था वण्णओ । नीलासोए उज्जाणे वण्णओ । तत्थ णं
 सोगंधियाए नयरीए सुदंसणे नामं नयरसेट्ठी परिवसइ अड्डे जाव अपरि-
 भूए । तेणं कालेणं २ सुए नामं परिव्वायए होत्था रिउव्वेयजउव्वेय-
 सामवेयअथव्वणवेयसट्ठितंतकुसले संखसमए लद्धट्ठे पंचर्जामपंच-
 नियमजुत्तं सोयमूलं दसप्पयारं परिव्वायगधम्मं दाणधम्मं च सोय-
 धम्मं च तित्थाभिसेयं च आघवेमाणे पन्नवेमाणे परूवेमाणे धाउरत्त-
 पवरवत्थपरिहिए तिदंडकुंडियलत्तल्लिअलयअंकुसपवित्तयकेसरिइत्थगए
 परिव्वायगसहस्सेणं सद्धिं संपरिवुडे जेणेव सोगंधिया नयरी जेणेव परि-
 व्वायगावसहे तेणेव उवागच्छइ २ परिव्वायगावसहंसि भंडगनिक्खेवं
 करेइ २ संखसमएणं अप्पाणं भावेमाणे विहरइ । तए णं सोगंधियाए
 नगरीए सिंघाडग जाव बहुजणो अन्नमन्नस्स एवमाइक्खइ — एवं खलु
 सुए परिव्वायए इहमागए जाव विहरइ । परिसा निग्गया । सुदंसणो वि
 निग्गए । तए णं से सुए परिव्वायए तीसे परिसाए सुदंसणस्स अन्नोसिं
 च बहूणं संखाणं धम्मं परिकहेइ — एवं खलु सुंदसणा ! अम्हं सोय-
 मूलए धम्मे पन्नत्ते । से वि य सोए धम्मे दुविहे पन्नत्ते तंजहा —
 दव्वसोए य भावसोए य । दव्वसोए य उदएणं मट्ठियाए य । भावसोए
 दव्वमेहि य मंतेहि य । जणं अम्हं देवाणुप्पिया ! किंचि असुई भवइ
 तं सव्वं सज्जपुढवीए आलिंपइ तओ पच्छा सुद्धेण वारिणा पक्खा-
 लिज्जइ तओ तं असुई सुई भवइ । एवं खलु जीवा जल्लभिसेव-

पूयप्पाणो अविग्घेणं सगं गच्छंति । तए णं से सुदंसणे सुयस्स अंतिए धम्मं सोच्चा हट्ठे सुयस्स अंतियं सोयमूलयं धम्मं गेण्हइ २ परिव्वायए विडलेणं असणेणं ४ पडिळाभेमाणे जाव विहरइ । तए णं से सुए परिव्वायगवसहाओ सोगंधियाओ नयरीओ निग्गच्छइ २ बहिया जणवयविहारं विहरइ । तेणं कालेणं २ थावच्चापुत्तस समोसरणं । परिसा निग्गया । सुदंसणो वि निग्गओ थावच्चापुत्तं वंदइ नमंसइ २ एवं वयासी - तुम्हाणं किंमूलए धम्मे पन्नत्ते ? तए णं से थावच्चापुत्ते सुदंसणेणं एवं वुत्ते समाणे सुदंसणं एवं वयासी - सुदंसणा ! विणयमूले धम्मे पन्नत्ते । से विय विणए दुविहे पन्नत्ते तंजहाअगारविणए अणगारविणए य । तत्थ णं जे से अगारविणए से णं पंच अणुव्वयाइं सत्त सिक्खावयाइं एक्कारस उवासगपडिमाओ । तत्थ णं जे से अणगारविणए से णं पंच महव्वयाइं तंजहा - सव्वाओ पाणाइवायाओ वेरमणं सव्वाओ मुसावायाओ वेरमणं सव्वाओ अदिन्नादाणाओ वेरमणं सव्वाओ मेहुणाओ वेरमणं सव्वाओ परिग्गहाओ वेरमणं सव्वाओ राइभोयणाओ वेरमणं जाव मिच्छादंसणसल्लाओ दसविहे पक्कक्खाणे बारस भिक्खुपडिमाओ इच्चेएणं दुविहेणं विणयमूलएणं धम्मेणं आणुपुव्वेणं अट्ठकम्मपंगडीओ खवेत्ता लोयगपईट्ठाणा भवंति । तए णं थावच्चापुत्ते सुदंसणं एवं वयासी - तुब्भं णं सुदंसणा ! किंमूलए धम्मे पन्नत्ते ? अम्हाणं देवाणुप्पिया ! सोयमूलए धम्मे पन्नत्ते जाव सगं गच्छंति । तए णं थावच्चापुत्ते सुदंसणं एवं वयासी - सुदंसणा ! से जहानामए केइ पुरिसे एगं महं रुहिरकयं वत्थं रुहिरेण चेव धोवेज्जा तए णं सुदंसणा ! तस्स रुहिरकयस्स वत्थस्स रुहिरेण पक्खालिज्जमाणस्स अत्थि काइ सोही ? नो इणट्ठे समट्ठे । एवामेव सुदंसणा ! तुब्भंपि पाणाइवाएणं जाव मिच्छादंसणसल्लेणं नत्थि सोही जहा तस्स रुहिरकयस्स वत्थस्स रुहिरेणं चेव पक्खालिज्जमाणस्स नत्थि सोही । सुदंसणा ! से जहानामए केइ पुरिसे एगं महं रुहिरकयं वत्थं सज्जियांखारेणं अणुलिंपइ २ पर्यणं आरोहेइ २ उण्हं गाहेइ तओ पच्छा सुद्धेण वारिणा

धोवेज्जा से नूनं सुदंसणा ! तस्स रुहिरकयस्स वत्थस्स सज्जियास्सारेणं
 अणुलित्तस्स पयणं आरोहियस्स उण्हं गाहियस्स सुद्धेणं वारिणा पक्खा-
 लिज्जमाणस्स सोही' भवइ ? हंता भवइ । एवामेव सुदंसणा ! अम्हं
 पि पाणाइवायवेरमणेणं जाव मिच्छादंसणसल्लवेरमणेणं अत्थि सोही
 जहा बाँ तस्स रुहिरकयस्स वत्थस्स जाव सुद्धेण वारिणा पक्खालिज्ज-
 माणस्स अत्थि सोही । तत्थ णं सुदंसणे संबुद्धे थावञ्चापुत्तं वंदइ नमंसइ
 २ एवं वयासी - इच्छाभि णं भंते ! धम्मं सोच्चा जाणित्तए जाव
 समणोवासए जाए अभिगयजीवाजीवे जाव पडिलाभेमाणे विहरइ । तए
 णं तस्स सुयस्स परिव्वायगस्स इमीसे कहाए लद्धट्ठस्स समाणस्स अय-
 मेयारूवे जाव समुप्पज्जित्था - एवं खलु सुदंसणेणं सोयधम्मं विप्पज-
 हाय विणयमूले धम्मं पडिवन्ने । तं सेयं खलु मम सुदंसणस्स दिट्ठिं
 वामेत्तए पुणरवि सोयमूलए धम्मं आचवित्तए त्तिकट्ठु एवं संपेहेइ २
 परिव्वायगसहस्सेणं सद्धिं जेणेव सोगंधिया नयरी जेणेव परिव्वायगा-
 वसहे तेणेव उवागच्छइ २ परिव्वायगावसहांसि भंडानिक्खेवं करेइ २
 धाउरत्तवत्थपवरपरिहिए पविरलपरिव्वायगेणं सद्धिं संपरिवुद्धे परिव्वा-
 यगावसहाओ पडिनिक्खमइ २ सोगंधियाए नयरीए मज्झमज्जेणं जेणेव
 सुदंसणस्स गिहे जेणेव सुदंसणे तेणेव उवागच्छइ । तए णं से सुदंसणे
 तं सुयं एज्जमाणं पासइ २ नो अब्भुट्ठेइ नो पच्चुर्गच्छइ नो आढाइ
 नो वंदइ तुसणीए संचिट्ठइ । तए णं से सुए परिव्वायए सुदंसणं
 अणुब्भुट्ठियं पासित्ता एवं वयासी - तुब्भे णं सुदंसणा ! अन्नया ममं
 एज्जमाणं पासित्ता अब्भुट्ठेसि जाव वंदसि । इयाणिं सुदंसणा ! तुमं
 ममं एज्जमाणं पासित्ता जाव नो वंदसि । तं कस्स णं तुमे सुदंसणा !
 इमेयारूवे विणयमूले धम्मं पडिवन्ने ? तए णं से सुदंसणे सुएणं परि-
 व्वायगेणं एवं वुत्ते समाणे आसणाओ अब्भुट्ठेइ २ करयल जाव सुयं
 परिव्वायगं एवं वयासी - एवं खलु देवाणुपिया ! अरहओ अरिट्ठ-
 नेमिस्स अंतेवासी थावञ्चापुत्ते नामं अणगारे जाव इहमागए इह चेव
 नीलासोए उज्जाणे विहरइ । तस्स णं अंतिए विणयमूले धम्मं पडिवन्ने ।

तए णं से सुए सुदंसणं एवं वयासी — तं गच्छामो णं सुदंसणा ! तव धम्मायरियस्स थावच्चापुत्तस्स अंतियं पाउब्भवामो इमाइं च णं एया-
रूवाइं अट्ठाइं हेऊइं पसिणाइं कारणाइं वागरणाइं पुच्छामो । तं जइ मे से इमाइं अट्ठाइं जाव वागरइ तओ णं वंदामि नमंसामि । अह मे से इमाइं अट्ठाइं जाव नो से वागरेइ तओ णं अहं एएहिं चेव अट्ठेहिं हेऊहिं निप्पट्ठपसिणवागरणं करिस्सामि । तए णं से सुए परिव्वायग-
सहस्सेण सुदंसणेण य सेट्ठिणा साद्धिं जेणेव नीलासोए उज्जाणे जेणेव थावच्चापुत्ते अणगारे तेणेव उवागच्छइ २ थावच्चापुत्तं एवं वयासी — जत्ता ते भंते ! जवणिज्जं ते अवावाहं फासुयविहारं ? तए णं से थावच्चापुत्ते सुएणं एवं वुत्ते समाणे सुयं परिव्वायगं एवं वयासी — सुया ! जत्तावि मे जवणिज्जं पि मे अवावाहं पि मे फासुविहारं पि मे । तए णं सुए थावच्चापुत्तं एवं वयासी — किं भंते ! जत्ता ? सुया ! जं णं मम नाणदंसणचरित्ततवसंसजममाइएहिं जोएहिं जोयणा से तं जत्ता । से किं तं भंते ! जवणिज्जं ? सुया ! जवणिज्जे दुविहे पन्नत्ते तंजहा — इंदियजवणिज्जे य नोइंदियजवणिज्जे य । से किं तं इंदिय-
जवणिज्जं ? सुया ! जं णं मम सोयंदियचारिखदियघाणिंदियजिब्भ-
दियफासिंदियाइं निरुवहयाइं वसे वट्ठंति से तं इंदियजवणिज्जे । से किं तं नोइंदियजवणिज्जे ? सुया ! जं णं कोहमाणमायालोभा स्त्रीणा उवसंता नो उदयंति से तं नोइंदियजवणिज्जे । से किं तं भंते ! अवा-
वाहं ? सुया ! जं णं मम वाइयपित्तियसिंभियसन्निवाइयविविहरोगायंका नो उदीरंति से तं अवावाहं । से किं तं भंते ! फासुविहारं ? सुया ! जं णं आरामेसु उज्जाणेसु देउलेसु सभासु पवासु इत्थीपसुपंडगविवज्जियासु बसहीसु पाडिहारियं पीढफलगसेज्जासंथारयं ओगिण्हित्ताणं विहरामि से तं फासुविहारं । सरिसवया भंते ! किं भक्खेया अभक्खेया ? सुया ! सरिसवया भक्खेया वि अभक्खेया वि । से केणट्ठेणं भंते ! एवं वुच्चइ सरिसवया भक्खेया वि अभक्खेया वि ? सुया ! सरिसवया दुविहा पन्नत्ता तंजहा — मित्तसरिसवया य धन्नसरिसवया य । तत्थ णं जे ते

भित्तसरिसवया ते तिविहा पन्नत्ता तंजहा - सहजायया सहवड्डियया
 सहपंसुकीलिया य । ते णं समणाणं निग्गथाणं अभक्खेया । तत्थ णं जे
 ते धम्मसरिसवया ते दुविहा पन्नत्ता तंजहा - सत्थपरिणया य असत्थ-
 परिणया य । तत्थ णं जे ते असत्थपरिणया ते समणाणं निग्गंथाणं
 अभक्खेया । तत्थ णं जे ते सत्थपरिणया ते दुविहा पन्नत्ता तंजहा -
 फासुया य अफासुया य । अफासुया णं सुया ! नो भक्खेया । तत्थ
 णं जे ते फासुया ते दुविहा पन्नत्ता तंजहा - जाइया य अजाइया य ।
 तत्थ णं जे ते अजाइया ते अभक्खेया । तत्थ णं जे ते जाइया ते
 दुविहा पन्नत्ता तंजहा - एसणिज्जा य अणेसणिज्जा य । तत्थ णं जे
 ते अणेसणिज्जा ते अभक्खेया । तत्थ णं जे ते एसणिज्जा ते दुविहा
 पन्नत्ता तंजहा - लद्धा य अलद्धा य । तत्थ णं जे ते अलद्धा ते
 अभक्खेया । तत्थ णं जे ते लद्धा ते निग्गंथाणं भक्खेया । एएणं
 अट्ठेणं सुया ! एवं उच्चइ सरिसवया भक्खेया वि अभक्खेया वि ।
 एवं कुलत्था वि भाणियन्वा नवरं इमं नाणत्तं - इत्थिकुलत्था य
 धम्मकुलत्था य । इत्थिकुलत्था तिविहा पन्नत्ता तंजहा - कुलवड्डूया य
 कुलमाउया इ य कुलधूया इ य । धम्मकुलत्था तहेव । एवं मासा वि
 नवरं इमं नाणत्तं - मासा तिविहा पन्नत्ता तंजहा - कालमासा य अत्थ-
 मासा य धम्ममासा य । तत्थ णं जे ते कालमासा ते णं दुवालसविहा
 पन्नत्ता तंजहा - सावणे जाव आसाढे । ते णं सममाणं २ अभक्खेया ।
 अत्थमासा दुविहा - रूपमासा य सुवण्णमासा य । ते णं अभक्खेया ।
 धम्ममासा तहेव । एगे भवं दुवे भवं अणेगे भवं अक्खए भवं अठ्वए
 भवं अवट्ठिए भवं अणेगभूयभावभविए वि भवं ? सुया ! एगे वि
 अहं जाव अणेगभूयभावभविए वि अहं । से केणट्ठेणं भंते ! एगेवि अहं
 जाव सुया ! दव्वट्ठयाए एगे वि अहं नाणदंसणट्ठयाए दुवे वि अहं पएस-
 ट्ठयाए अक्खए वि अहं अठ्वए वि अहं अवट्ठिए वि अहं उवओग-
 ट्ठयाए अणेगभूयभावभविए वि अहं । एत्थ णं से सुए संबुद्धे थावच्चा-
 पुत्तं वंदइ नमंसइ २ एवं बयासी - इच्छामि णं भंते ! तुब्भं अंतिए

केवलपन्नत्तं धम्मं निसामित्तए । धम्मकहा भाणियम्वा । तए णं से सुए परिठ्वायए थावच्चापुत्तस्स अंतिए धम्मं सोच्चा निसम्म एवं वयासी — इच्छामि णं भंते ! परिठ्वायगसहस्सेणं सद्धिं संपरिवुडे देवाणुप्पियाणं अंतिए मुंडे भवित्ता पव्वइत्तए । अहासुहं देवाणुप्पिया जाव उत्तरपुरत्थिमे दिसीभाए तिवंडयं जाव धाउरत्ताओ य एगंते एडेइ २ सयमेव सिहं उप्पाडेइ २ जेणेव थावच्चापुत्ते २ तेणेव उवागच्छइ जाव मुंडे भवित्ता जाव पव्वइए सामाइयमाइयाइं इक्कारस अंगाइं चोइसपुव्वाइं अहिज्जइ । तए णं थावच्चापुत्ते सुयस्स अणगारस्स सहस्सं सीसत्ताए वियरंइ । तए णं थावच्चापुत्ते सोगंधियाओ नीलासोयाओ पडिनिक्खमइ २ बहिया जणव-यविहारं विहरइ । तए णं से थावच्चापुत्ते अणगारसहस्सेणं सद्धिं संपरिवुडे जेणेव पुंडरीयपव्वए तेणेव उवागच्छइ २ पुंडरीयं पव्वयं सणियं २ दुरुहइ २ मेघघणसन्निगासं देवसन्निवायं पुढविसिलापट्टयं जाव पाओवगमणं कैए । तए णं से थावच्चापुत्ते बहूणि वासाणि सामण्ण-परियागं पाउणित्ता मासियाए संलेहणाए सद्धिं भत्ताइं अणसणाए छेएइ जाव केवलवरनाणदंसणं समुप्पाडेत्ता तओ पच्छा सिद्धे जाव प्पहीणे ।

(61) तए णं से सुए अन्नया कथाइ जेणेव सेलगपुरे नगरे जेणेव सुभूमिभागे उज्जाणे समोसरणं परिसा निग्गया सेलओ निग्गच्छइ धम्मं सोच्चा जं नवरं देवाणुप्पिया ! पंथगपामोक्खाइं पंच मंतिसयाइं आपु-च्छामि मंडुयं च कुमारं रज्जे ठावेमि तओ पच्छा देवाणुप्पियाणं अन्तिए मुंडे भवित्ता अगाराओ अणगारियं पव्वयामि । अहासुहं । तए णं से सेलए राया सेलगपुरं नगरं अणुप्पविसइ २ जेणेव सए गिहे जेणेव बाहिरिया उबट्ठाणसाला तेणेव उवागच्छइ २ सीहासणे निसण्णे । तए णं से सेलए राया पंथगपामोक्खा पंच मंतिसया सहावेइ २ एवं वयासी — एवं खलु देवाणुप्पिया ! मए सुयस्स अंतिए धम्मो निसंते । से वि य मे धम्मो इच्छिए पडिच्छिए अभिरुइए । अहं णं देवाणुप्पिया ! संसार-भउव्विग्गे जाव पव्वयामि । तुम्हे णं देवाणुप्पिया किं करेह किं ववसह किं वा भे द्वियइच्छिए समत्थे ति ? तए णं ते पंथगपामोक्खा सेलगं

रायं एवं वयासी— जइ णं तुब्भे देवाणुप्पिया ! संसार जाव पव्वयह
 अम्हाणं देवाणुप्पिया ! को अन्ने आधारे वा आलंवे वा ? अम्हे वि य णं
 देवाणुप्पिया ! संसारभउठ्विग्गा जाव पव्वयामो । जहा णं देवाणुप्पिया !
 अम्हं बहुसु कज्जेसु य जाव तहा णं पव्वइयाण वि समाण्णं बहुसु जाव
 चक्खुभूए । तए णं से सेलगे पंथगपामोक्खे पंच मंतिसए एवं वयासी—
 जइ णं तुब्भे देवाणुप्पिया ! संसार जाव पव्वयह तं गच्छह णं देवाणुप्पिया !
 सएसु २ कुडुंबेसु जेट्टपुत्ते कुडुंबमज्जे ठावेत्ता पुरिससहस्सवाहिणीयाओ
 सीयाओ दुरुढा समाणा मम अंतियं पाउब्भबह । तेवि तहेव पाउब्भ-
 वंति । तए णं से सेलए राया पंच मंतिसयाइं पाउब्भवमाणाइं पासइ
 हट्टतुट्टे कोडुंबियपुरिसे सहावेइ २ एवं वयासी — खिप्पामेव भो देवाणु-
 प्पिया ! मंडुयस्स कुमारस्स महत्थं जाव रायाभिसेयं उवट्टवेह जाव अभि-
 सिंचइ जाव राया जाए विहरइ । तए णं से सेलए मंडुयं रायं आपुच्छइ ।
 तए णं मंडुए राया कोडुंबियपुरिसे सहावेइ २ एवं वयासी — खिप्पामेव
 सेल्लगपुरं नयरं आसिय जाव गंधवट्ठिभूयं करेह कारवेह य २ एवमाणत्तियं
 पळ्चप्पिणह । तए णं से मंडुए दोच्चंपि कोडुंबियपुरिसे सहावेइ २
 एवं वयासी — खिप्पामेव सेल्लगस्स रत्तो महत्थं जाव निक्खमणा-
 भिसेयं जहेव मेहस्स तहेव नवरं पडर्मावईदेवी अगमकेसे पडिच्छइ सव्वेवि
 पडिग्गहं गहाय सीयं दुरुहंति अवसेत्तं तहेव जाव समाइयमाइयाइं एक्का-
 रस अंगाइं अहिज्जइ २ बहूहिं चउत्थ जाव विहरइ । तए णं से सुए
 सेल्लगस्स अणगारस्स ताइं पंथगपामोक्खाइं पंच अणगारसयाइं सीस-
 त्तए वियरइ । तए णं से सुए अन्नया कयाइ सेल्लगपुराओ सुभूमि-
 भाणाओ उज्जाणाओ पाडिनिक्खमइ २ बहिया जणकयविहारं विहरइ ।
 तए णं से सुए अणगारे अन्नया कयाइ तेणं अणगारसहस्सेणं सद्धिं संपरि-
 बुडे पुठ्ठाणुपुठ्ठि चरमाणे गामाणुगामं विहरमाणे जेणैव पुंडरीयपठ्ठए
 तेणैव उवागच्छइ जाव सिद्धे ।

(६२) तए णं तरस्स सेल्लगस्स रायसिस्स तेहिं^५ अंतेहि य पंसेहि
 य तुच्छेहि य लूहेहि य अरसेहि य विरसेहि य सीएहि य उणेहि य

कालाङ्कतेहि य पमाणाङ्कतेहि य निच्चं पाणभोयणेहि य पयइसु-
कुमालस्स य सुहोचियस्स सरीरगंसि वेयणा पाउब्भूया उज्जला जाव
दुरहियासा कंडुदाहपित्तज्जरपरिगयसरीरे यावि विहरइ । तए णं से
सेलए तेणं रोयायंकेणं सुक्खे जाए यावि होत्था । तए णं से सेलए
अन्नया कयाइं पुव्वाणुपुर्वि चरमाणे जाव जेणेव सुभूमिभागे जाव
विहरइ । परिसा निग्गया मंडुओ वि निग्गओ सेलगं अणगारं वंदइ
जाव पज्जुवासइ । तए णं से मंडुए राया सेलगस्स अणगारस्स सरी-
रगं सुक्कं जाव सव्वाबाहं सरोगं पासइ २ एवं वयासी — अहं णं भंते !
तुब्भं अहापवत्तेहिं तिगिच्छिएहिं अहापवत्तेणं ओसहभेसज्जभत्त-
पाणेणं तिगिच्छं आउंटावेमि । तुब्भे णं भंते ! मम जाणसालासु समो-
सरइ फासुएसणिज्जं पीढफलगसेज्जासंधारणं ओगिणिहत्ताणं विहरइ ।
तए णं से सेलए अणगारे मंडुयस्स रत्तो एयमट्ठं तहत्ति पडिसुणेइ ।
तए णं से मंडुए सेलगं वंदइ नमंसइ २ जामेव दिसिं पाउब्भूए तामेव
दिसिं पडिगए । तए णं से सेलए कल्लं जाव जलंते सभंडमत्तोवगरण-
मायाए पंथगपामोक्खेहिं पंचहिं अणगारसएहिं साद्धिं सेलगपुरमणप्प-
विसइ जेणेव मंडुयस्स जाणसाला तेणेव उवागच्छइ २ फासुयं पीढ
जाव विहरइ । तए णं से मंडुए तिगिच्छिए सदावेइ २ एवं वयासी-
तुब्भे णं देवाणुप्पिया ! सेलगस्स फासुएसणिज्जेणं जाव तिगिच्छं
आउंटेह । तए णं तिगिच्छया मंडुएणं रत्ता एवं वुत्ता हट्टतुट्ठा सेलगस्स
अहापवत्तेहिं ओसहभेसज्जभत्तपाणेहिं तिगिच्छं आउंटेति मज्जपाणगं च
से उवदिसंति । तए णं तस्स सेलगस्स अहापवत्तेहिं जाव मज्जपाणएणं
से रोगायंके उवसंते जाए यावि होत्था हट्ठे बल्लियंसरीरे जाए ववगय-
रोगायंके । तए णं से सेलए तंसि रोयातंकंसि उवसंतंसि समानंसि तंसि
विपुलंसि असणंसि ४ मज्जपाणए य मुच्छिए गढिए गिद्धे अज्जोववन्ने
ओसन्ने ओसन्नविहारी एवं पासत्थे २ कुसीले २ पमत्ते २ संसत्ते २ उँउबद्ध-
पीढफलगसेज्जासंधारए पमत्ते यावि विहरइ नो संचाएइ फासुएसणिज्जं
पीढं पच्चप्पिणित्ता मंडुयं च रायं आपुच्छित्ता बहिया जाव विहरित्तए ।

(63) तए णं तेसिं पंथगवज्जाणं पंचण्हं अणगारसयाणं अन्नया कयाइ एगयओ सहियाणं जाव पुव्वरत्तावरत्तकालसमयंसि धम्मजागरियं जागरमाणाणं अयमेयारूवे अज्झत्थिए जाव समुप्पज्जित्था - एवं खलु सेलए रायरिसी चइत्ता रज्जं च ४ जाव पव्वइए विउले असणे ४ मज्जपाणए मुच्छिए ४ नो संचाएइ चइउं जाव विहरित्तए । नो खलु कप्पइ देवाणुप्पिया ! समणाणं जाव पमत्ताणं विहरित्तए । तं सेयं खलु देवाणुप्पिया अम्हं कल्लं सेलगं रायरिसिं आपुच्छित्ता पाडिहारियं पीढफलगसेज्जासंथारयं पच्चप्पिणित्ता सेलगस्स अणगारस्स पंथयं अणगारं वेयावच्चकरं ठावेत्ता बहिया अब्भुज्जएणं जाव विहरित्तए । एवं संपेहेति २ कल्लं जेणेव सेलगरायरिसी आपुच्छित्ता पाडिहारियं पीढफलग जाव पच्चप्पिणंति २ पंथयं अणगारं वेयावच्चकरं ठावेति २ बहिया जाव विहरंति ।

(64) तए णं से पंथए सेलगस्स सेज्जासंथारउच्चारपासवणखेह्लं सिंघाणमलाओ ओसहभेसज्जभत्तपाणएणं अगिलाए विणएणं वेयावडियं करेइ । तए णं से सेलए अन्नया कयाइ कत्तियचाउम्मासियंसि विउलं असणं ४ आहारमाहारिए सुबहुं च मज्जपाणयं पीए पुव्वावरण्हकालसमयंसि सुहप्पसुत्ते । तए णं से पंथए कत्तियचाउम्मासियंसि कयकाउरसगो देवसियं पडिक्कमणं पडिक्कंते चाउम्मासियं पडिक्कामिउकामे सेलगं रायरिसिं खामणट्ठयाए सीसेणं पाएसु संघट्टेइ । तए णं से सेलए पंथएणं सीसेणं पाएसु संघट्टिए समाणे आसुरुत्ते जाव मिसिमिसेमाणे उट्टेइ २ एवं वयासी - से केस णं भो एस अपत्थियपत्थिए जाव वज्जिए जे णं ममं सुहपसुत्तं पाएसु संघट्टेइ ? तए णं से पंथए सेलएणं एवं वुत्ते समाणे भीए तत्थे तसिए करयल जाव कट्ठु एवं वयासी - अहं णं भंते ! पंथए कयकाउरसगो देवसियं पडिक्कमणं पडिक्कंते चाउम्मासियं खामेमाणे देवाणुप्पियं वंदमाणे सीसेणं पाएसु संघट्टेमि । तं खामेमि णं तुब्भे देवाणुप्पिया ! खमन्तु मे अवरहं तुमं णं देवाणुप्पिया ! नाइभुज्जो एवं करणयाए त्तिकट्ठु सेलयं अणगारं एयमहं सम्मं विणएणं भुज्जो २ खामेइ । तए णं तस्स सेलगस्स रायरिसिस्स पंथएणं एवं वुत्तस्स अयमे-

यारूवे जाव समुप्पज्जित्था—एवं खलु अहं रज्जं च जाव ओसन्नो जाव उउबद्धपीढं विहरामि । तं नो खलु कप्पइ समणाणं २ पासत्थाणं जाव विहरित्तए । तं सेयं खलु मे कल्लं मंडुयं रायं आपुच्छित्ता पाडिहारियं पीढफलगसेज्जासंथारणं पञ्चप्पिणित्ता पंथएणं अणगारेणं साद्धिं बहिया अब्भुज्जएणं जाव जणवयविहारेणं विहरित्तए । एवं संपेहेइ २ कल्लं जाव विहरइ ।

(65) एवामेव समणाउसो ! जाव निगंथो वा २ ओसन्ने जाव संथारए पमत्ते विहरइ से णं इहलोए चेव बहूणं समणाणं ४ हीलगिज्जे संसारो भाणियव्वो । तए णं ते पंथगवज्जा पंच अणगारसया इमीसे कहाए लद्धट्ठा समाणा अन्नमन्नं सहावेति २ एवं वयासी — एवं खलु सेलए रायरिसी पंथएणं बहिया जाव विहरइ । तं सेयं खलु देवाणुप्पिया ! अम्हं सेलगं रायरिसिं उवसंपज्जित्ताणं विहरित्तए । एवं संपेहेति २ सेलगं रायरिसिं उवसंपज्जित्ताणं विहरंति ।

(66) तए णं से सेलए रायरिसी पंथगपामोक्खा पंच अणगारसया बहूणि वासाणि सामण्णपरियागं पाउणित्ता जेणेव पुंडरीयपव्वए तेणेव उवागच्छंति २ जहेव यावच्चापुत्ते तहेव सिद्धा ४ । एवामेव समणाउसो ! जो निगंथो वा २ जाव विहरिस्सइ ।

एवं खलु जंबू ! समणेणं भगवया महावीरेणं जाव संपत्तेणं पंचमस्स नायज्झयणस्स अयमट्ठे पन्नत्ते त्तिबेमि ॥

॥ पंचमं नायज्झयणं समत्तं ॥

॥ छट्ठं अज्झयणं ॥

(67) जइ णं भंते ! समणेणं जाव संपत्तेणं पंचमस्स नायज्झयणस्स अयमट्ठे पन्नत्ते छट्ठस्स णं भंते ! नायज्झयणस्स समणेणं जाव संपत्तेणं के अट्ठे पन्नत्ते ? एवं खलु जंबू ! तेणं कालेणं २ रायंगिहे समोसरणं परिसा निग्गया । तेणं कालेणं २ समणस्स जेट्ठे

इंदभूई नामं अणगारे अदूरसामंते जाव सुक्कज्झाणोवगए विहरइ । तए णं से इंदभूई जायसद्धे जाव एवं वयासी — कहं णं भंते ! जीवा गरु-
यत्तं वा लहुयत्तं वा हव्वमागच्छंति ? गोयमा ! से जहानामए केइ
पुरिसे एगं महं सुक्कतुवं निच्छिइं निरुवहयं दब्भेहि य कुसेहि य वेढेई
२ मट्टियालेवेणं लिपइ २ उण्हे दलयइ २ सुक्कं समाणं दोच्चंपि दब्भेहि
य कुसेहि य वेढेइ २ मट्टियालेवेणं लिपइ २ उण्हे दलयइ २ सुक्के
समाणे तच्चपि दब्भेहि य कुसेहि य वेढेइ मट्टियालेवेणं लिपइ । एवं
खलु एएणं उवाएणं सत्तंरत्तं वेढेमाणे अंतरा लिप्पमाणे अंतरा सुक्का-
वेमाणे जाव अट्ठहिं मट्टियालेवेहिं आलिपइ २ अत्थाहमतारमपोरिसियंसि
उदगंसि पक्खिवेज्जा । से नूणं गोयमा ! से तुंवे तेसिं अट्ठण्हं मट्टिया-
लेवेणं गरुययाए भारियाए उप्पिं सलिलमइवइत्ता अहे धरणियलपइट्ठाणे
भवइ । एवामेव गोयमा ! जीवावि पाणाइवाएणं जाव मिच्छादंसणसल्लेणं
अणुपुब्बेणं अट्ठकम्मपगडीओ समज्जिणित्ता तासिं गरुययाए भारिययाए
एवामेव कालमासे कालं किंवा धरणियलमइवइत्ता अहे नरगतलपइट्ठाणा
भवन्ति ! एवं खलु गोयमा ! जीवा गरुयत्तं हव्वमागच्छंति । अहे णं
गोयमा ! से तुंवे तंसिं पढामिळुंगांसि मट्टियालेवंसि तिन्नंसि कुहियंसि
परिसडियंसि ईसिं धरणियलाओ उप्पइत्ताणं चिट्ठइ । तयाणंतरं दोच्चंपि
मट्टियालेवे जाव उप्पइत्ताणं चिट्ठइ । एवं खलु एएणं उवाएणं तेसु अट्ठसु
मट्टियालेवेसु तिनेसु जाव विमुक्कबंधणे अहेधरणीयलमइवइत्ता उप्पिं
सलिलंतलपइट्ठाणे भवइ । एवामेव गोयमा ! जीवा पाणाइवायवेरमणेणं
जाव मिच्छादंसणसल्लवेरमणेणं अणुपुब्बेणं अट्ठकम्मपगडीओ खवेत्ता
गगणतलमुप्पइत्ता उप्पिं लोयग्गपइट्ठाणा भवन्ति । एवं खलु गोयमा !
जीवा लहुयत्तं हव्वमागच्छंति ।

एवं खलु जंबू ! समणेणं जाव संपत्तेणं छट्ठस्स नायज्झयणस्स
अयमट्ठे पन्नत्ते तिबेमि ॥

॥ सत्तमं अज्झयणं ॥

(68) जइ णं भंते ! समणेणं जाव संपत्तेणं छट्ठस्स नायज्झयणस्स अयमट्ठे पन्नत्ते सत्तमस्स णं भंते ! नायज्झयणस्स के अट्ठे पन्नत्ते ? एवं खलु जंबू ! तेणं कालेणं २ रायगिहे नामं नयरे होत्था । सुभूमिभागे उज्जाणे । तत्थ णं रायगिहे नयरे धेणे नामं सत्थवाहे परिवसइ अट्ठे जाव अपरिभूए । भद्दा भारिया अहीणपांविंदियसरीरा जाव सुरुवा । तस्स णं धणस सत्थवाहस्स पुत्ता भद्दाए भारियाए अत्तया चत्तारि सत्थवाहदारगा होत्था तंजहा — धणपाले धणदेवे धणगोवे धणरक्खिए । तस्स णं धणस्स सत्थवाहस्स चउण्हं पुत्ताणं भारियाओ चत्तारि सुण्हाओ होत्था तंजहा — उज्झिया भोगवइया रक्खइया रोहिणिया । तए णं तस्स धणस्स सत्थवाहस्स अन्नया कयाइं पुठ्वरत्तावरत्तकालसमयंसि इमेयारूवे अज्झत्थिए ४ जाव समुप्पज्जित्था — एवं खलु अहं रायगिहे नयरे बहूणं राईसरतलवर जाव पभिईणं सयस्स य कुडुंबस्स बहूसु कज्जेसु य कारणेसु य कोडुंबेसु य मंतणेसु य गुज्झेसु रहस्सेसु निच्छएसु ववहारेसु य आपुच्छणिज्जे पडिपुच्छणिज्जे मेढी पमाणं आहारे आलंबणे चक्खू मेढी पमाणभूए सव्वकज्जवड्ढावए । तं न नज्जइ णं मए गयंसि वा चुयंसि वा मयंसि वा भग्गंसि वा लुग्गंसि वा सडियंसि वा पडियंसि वा विदेसगयंसि वा बिप्पवसियंसि वा इमस्स कुडुंबस्स के मन्ने आहारे वा आलंबे वा पडिबंधे वा भविस्सइ । तं सेयं खलु मम कल्लं जाव जलंते विपुलं असणं ४ उवक्खडावेत्ता मित्तनाइ० चउण्हं य सुण्हाणं कुलघरवग्गं आमंतेत्ता तं मित्तनाइनियगसयण० चउण्हं य सुण्हाणं कुलघरवग्गं विपुलेणं असणेणं ४ धूवपुप्फवत्थगंधं जाव सक्कोरेत्ता संमाणेत्ता तस्सेव मित्तनाइ जाव चउण्हं सुण्हाणं कुलघरवग्गस्स य पुरओ चउण्हं सुण्हाणं परिक्खणट्ठयाए पंच २ सालिअक्खए दलइत्ता जाणामि ताव का किह वा सारक्खेइ वा संगोवेइ वा संवट्ठेइ वा । एवं संपेहेइ २ कल्लं जाव मित्तनाइ० चउण्हं सुण्हाणं कुलघरं आमंतेइ २ विपुलं असणं ४ उवक्खडावेइ तओ पच्छा ण्हाए भोगणमंडवंसि

सुहासणवरगणे तं मित्तनाइ० चउण्हं सुण्हाणं कुलघरवग्गेणं सद्धिं तं विपुलं असणं ४ जाव सक्कोरेइ २ तस्सेव मित्तनाइ० चउण्हं य सुण्हाणं कुलघरवग्गस्स य पुरओ पंच सालिअक्खए गेण्हइ २ जेट्ठं सुण्हं उज्झियं सद्दावेइ २ एवं वयासी — तुमं णं पुत्ता ! मम हत्थाओ इमे पंच सालिअक्खए गेण्हाहि २ अणुपुण्वेणं सारक्खमाणी संगोवेमाणी विहराहि । जया णं अहं पुत्ता ! तुमं इमे पंच सालिअक्खए जाएज्जा तथा णं तुमं मम इमे पंच सालिअक्खए पडिनिज्जाएज्जासि त्तिकट्ठु सुण्हाए हत्थे दलयइ २ पडिविसज्जेइ । तए णं सा उज्झिया धणस्स तह त्ति एयमट्ठं पडिसुणेइ २ धणस्स सत्थवाहस्स हत्थाओ ते पंच सालिअक्खए गेण्हइ २ एगंतमवक्कमइ एगंतमवक्कमियाए इमेयारूवे अज्झात्थिए ४ जाव समुप्पज्जित्था — एवं खलु तायाणं कोट्ठागारंसि बहवे पल्ला सालीणं पडिपुण्णा चिट्ठंति । तं जया णं मम ताओ इमे पंच सालिअक्खए जाएसइ तथा णं अहं पल्लंतरीओ अन्ने पंच सालिअक्खए गहाय दाहामि त्तिकट्ठु एवं संपेहेइ २ ते पंच सालिअक्खए एगंते एडेइ सकम्मसंजुत्ता जाया यावि होत्था । एवं भोगवइयाए वि नवरं सा छोल्लइ २ अणुगिल्लइ २ सकम्मसंजुत्ता जाया यावि होत्था । एवं रक्खिया वि नवरं गेण्हइ २ इमेयारूवे अज्झात्थिए ४ — एवं खलु ममं ताओ इमस्स मित्तनाइ० चउण्हं य सुण्हाणं कुलघरवग्गस्स य पुरओ सद्दावेत्ता एवं वयासी — तुमं णं पुत्ता ! मम हत्थाओ जाव पडिनिज्जाएज्जासि त्तिकट्ठु मम हत्थांसि पंच सालिअक्खए दलयइ । तं भवियव्वं एत्थ कारणेणं त्तिकट्ठु एवं संपेहेइ २ ते पंच सालिअक्खए सुद्धे वत्थे बंधइ २ रयणकरंडियाए पक्खिवइ २ उसीसामूले ठावेइ २ तिसंझं पडिजागरमाणी २ विहरइ । तए णं से धणे सत्थवाहे तहेव मित्त जाव चउत्थि रोहिणीयं सुण्हं सद्दावेइ २ जाव तं भवियव्वं एत्थ कारणेणं त्तिकट्ठु सेयं खलु मम एए पंच सालिअक्खए सारक्खमाणीए संगोवेमाणीए संबुद्धेमाणीए त्तिकट्ठु एवं संपेहेइ २ कुलघरपुरिसे सद्दावेइ २ एवं वयासी — तुम्हे णं देवाणुप्पिया ! एए पंच सालिअक्खए गेण्हइ २ पढम-

पाउसंसि महावुट्टिकायंसि निवइयंसि समाणंसि खुड्ढागं केयारं सुपरि-
 कम्मियं करेह २ इमे पंच सालिअक्खए वावेह २ दोच्चंपि तच्चंपि
 उक्खयनिहए करेह २ वाडिपक्खेवं करेह २ सारक्खमाणा संगोवेमाणा
 आणुपुव्वेणं संबुहेह । तए णं ते कोडुंबिया रोहिणीए एयमट्ठं पडिसुणेंति
 ते पंच सालिअक्खए गेण्हंति २ अणुपुव्वेणं सारक्खंति संगोबित्ति । तए
 णं ते कोडुंबिया पढमपाउसंसि महावुट्टिकायंसि निवइयंसि समाणंसि
 खुड्ढागं केयारं सुपरिकम्मियं करेंति २ ते पंच सालिअक्खए ववंति
 दोच्चंपि तच्चंपि उक्खयनिहए करेंति २ वाडिपरिक्खेवं करेंति अणुपु-
 व्वेणं सारक्खेमाणा संगोवेमाणा संबुहेमाणा विहरंति । तए णं ते साली
 अणुपुव्वेणं सारक्खिज्जमाणा संगोविज्जमाणा संबुद्धिज्जमाणा साली जाया
 किण्हा किण्होभासा जाव निउरंबभूया पासाईया ४ । तए णं ते साली
 पत्तिया वत्तिया गब्भिया पसूइया आगयगंधा खीराइया बद्धफला पक्का परि-
 यागया सल्लईया पत्तईया हरियपव्वकंडा जाया यावि होत्था । तए णं
 ते कोडुंबिया ते साली पत्तिए जाव सल्लइयपत्तइए जाणित्ता तिक्खेहिं नव-
 पज्जणएहिं असिण्हिं लुणंति २ करयलमलिए करेंति २ पुंणंति । तत्थ णं
 चोक्खाणं सूईयाणं अखंडाणं अफुडियाणं छडछडापूर्याणं सालीणं माग-
 हए पत्थए जाए । तए णं ते कोडुंबिया ते साली नवएसु घडएसु
 पक्खिवंति उल्लिंपंति २ लंछियमुहिए करेंति २ कोट्टागारस्स एगदेसंसि
 ठावेंति २ सारक्खमाणा संगोवेमाणा विहरंति । तए णं ते कोडुंबिया
 दोच्चंसि वासारत्तंसि पढमपाउसंसि महावुट्टिकायंसि निवइयंसि
 खुड्ढागं केयारं सुपरिकम्मियं करेंति ते साली ववंति दोच्चंपि उक्खाय-
 णिहए जाव लुणंति जाव चलणतल्लमलिए करेंति २ पुंणंति । तत्थ णं
 सालीणं बहवे कुंडवा जाव एगदेसंसि ठावेंति २ सारक्खेमाणा संगोवे-
 माणा विहरंति । तए णं ते कोडुंबिया तच्चंसि वासारत्तंसि महावुट्टि-
 कायंसि निवइयंसि बहवे केयारे सुपरिकम्मिए जाव लुणंति २ संबहंति २
 खलयं करेंति २ मल्लेंति जाव बहवे कुंभा जाया । तए णं ते कोडुंबिया
 साली कोट्टागारंसि पल्लेवंति जाव विहरंति । चउत्थे वासारत्ते बहवे

कुंभसया जाया । तए णं तस्स धणस्स पंचमयंसि संवच्छरसि परि-
णममणंसि पुठवरत्तावरत्तकालसमयंसि इमेयारूवे अज्झत्थिए ४ जाव
समुप्पज्जित्था — एवं खलु मए इओ अईए पंचमे संवच्छरे चउण्हं
सुण्हाणं परिक्खणट्ठयाए ते पंच २ सालिअक्खया हत्थे दिन्ना । तं सेयं
खलु मम कल्लं जाव जलंते पंच सालिअक्खए परिजाइत्तए जाव जाणामि
काए किह सारक्खिया वा संगोविया वा संवड्डिया वा । एवं सपेहेइ २
कल्लं जाव जलंते विपुलं असणं ४ मित्तनाइनियग० चउण्ह य सुण्हाणं
कुलघरवग्गं जाव सम्माणित्ता तस्सेव मित्त जाव चउण्ह य सुण्हाणं कुल-
घरवग्गस्स पुरओ जेट्ठं उज्झिययं सहावेइ २ एवं वयासी — एवं खलु
अहं पुत्ता ! इओ अईए पंचमंसि संवच्छरंसि इमस्स मित्त जाव चउण्ह
य सुण्हाणं कुलघरस्स य पुरओ तव हत्थंसि पंच सालिअक्खए दलयामि
जया णं अहं पुत्ता ! एए पंच सालिअक्खए जाएज्जा तया णं तुमं
मम इमे पंच सालिअक्खए पडिनिज्जाएसि त्तिकट्ठु । से नूनं पुत्ता !
अट्ठे समट्ठे ? हंता अत्थि । तं णं तुमं पुत्ता ! मम ते सालिअक्खए
पडिनिज्जाएसि । तए णं सा उज्झिया एयमट्ठं धणस्स पडिसुणेइ जेणेव
कोट्ठागारं तेणेव उवागच्छइ २ पल्लाओ पंच सालिअक्खए गेण्हइ २
जेणेव धणे सत्थवाहे तेणेव उवागच्छइ २ एवं वयासी — एए णं
ते पंच सालिअक्खए त्तिकट्ठु धणस्स हत्थंसि ते पंच सालिअक्खए
दलयइ । तए णं धणे उज्झियं सवहसावियं करेइ २ एवं वयासी — किं
णं पुत्ता ! ते चेव पंच सालिअक्खए उदाहु अन्ने ? तए णं उज्झिया धणं
सत्थवाहं एवं वयासी — एवं खलु तुब्भे ताओ ! इओ अईए पंचमे संव-
च्छरे इमस्स मित्तनाइ० चउण्ह य जाव विहराहि । तए णं अहं तुब्भं
एयमट्ठं पडिसुणेमि ते पंच सालिअक्खए गेण्हामि एगंतमवक्कमामि । तए
णं मम इमेयारूवे अज्झत्थिए ४ जाव समुप्पज्जित्था — एवं खलु तायाणं
कोट्ठागारंसि जाव सकम्मसंजुत्ता । तं नो खलु ताया ! ते चेव पंच सालि-
अक्खए एए णं अन्ने । तए णं से धणे उज्झियाए अंतिए एयमट्ठं सोच्चा
निसम्म आसुरुत्ते जाव मिसिमिसेमाणे उज्झियं तस्स मित्तनाइ० चउण्हं

सुण्हाणं कुलघरवग्गस्स य पुरओ तस्स कुलघरस्स छारुज्झियं च छाणु-
 ज्झियं च कयवरुज्झियं च संपुच्छियं च सम्मज्झिअं च पाउवदाइयं च
 ण्हाणोवदाइयं च बाहिरपेसणकारियं च ठावेइ । एवामेव समणाउसो !
 जो अम्हं निगंथो वा २ जाव पठ्वइए पंच य से महव्वयाइं उज्झियाइं
 भवति से णं इहभवे चेव बहूणं समणाणं ४ हीलणिज्जे जाव अणुपरि-
 यट्ठस्सइ जहा सा उज्झिया । एवं भोगवइया वि नवरं तस्स कुलघरस्स
 कांडितियं च कोट्टंतियं च पीसंतियं च एवं रुच्चंतियं रंधंतियं परिवेसं-
 तियं च परिभायंतियं च अब्भितरियं च पेसणकारिं महाणसिणिं ठावेइ ।
 एवामेव समणाउसो ! जो अम्हं समणो वा पंच य से महव्वयाइं
 फोडियाइं भवति से णं इहभवे चेव बहूणं समणाणं ४ जाव हीलणिज्जे
 ४ जहाव सा भोगवइया । एवं रक्खिइयावि नवरं जेणेव वासघरे
 तेणेव उवागच्छइ २ मंजूसं विहाडेइ २ रयणकरंडगाओ ते पंच सालि-
 अक्खए गेण्हइ २ जेणेव धणे सत्थवाहे तेणेव उवागच्छइ २ पंच
 सालिअक्खए धणस्स हत्थे दलयइ । तए णं से धणे रक्खिइयं एवं
 वयासी — किं णं पुत्ता ! ते चेव एए पंच सालिअक्खए उदाहु अन्ने ?
 तए णं रक्खिइया धणं एवं वयासी — ते चेव ताया ! एए पंच
 सालिअक्खया नो अन्ने । कहं णं पुत्ता ? एवं खलु ताओ ! तुब्भे
 इओ पंचमंमि जाव भवियव्वं एत्थ कारणेणं तिकट्ठु ते पंच सालि-
 अक्खए सुद्धे वत्थे जाव तिसंझं पडिजागरमाणी यावि विहरामि ।
 तओ एएणं कारणेणं ताओ ! ते चेव पंच सालिअक्खए नो अन्ने ।
 तए णं से धणे रक्खिइयाए अंतियं एयमट्ठं सोच्चा हट्ठुट्ठे तस्स
 कुलघरस्स हिरण्णस्स य कंसदूसविपुलधण जाव सावएज्जस्स य भंडा-
 गारिणिं ठावेइ । एवामेव समणाउसो ! जाव पंच य से महव्वयाइं
 रक्खियाइं भवति से णं इहभवे चेव बहूणं समणाणं ४ अच्चणिज्जे जाव
 जहा सा रक्खिइया । रोहिणीया वि एवं चेव नवरं तुब्भे ताओ मम
 सुवहुयं सगडीसागडं दलाह जाणं अहं तुब्भे ते पंच सालिअक्खए
 पडिनिज्जाएमि । तए णं से धणे रोहिणिं एवं वयासी — कहं णं तुमं

मम पुत्ता ! ते पंच सालिअक्खए सगडसागडेणं निज्जाएस्ससि ? तए णं सा रोहिणी धणं एवं वयासी - एवं खलु ताओ ! इओ तुब्भे पंचमे संवच्छरे इमस्स मित्त जाव बहवे कुंभसया जाया तेणेव कमेण । एवं खलु ताओ ! तुब्भे ते पंच सालिअक्खए सगडीसागडेणं निज्जा-एमि । तए णं से धणे सत्थवाहे रोहिणीयाए सुबहुयं सगडीसागडं दलर्यइ । तए णं रोहिणी सुबहुं सगडीसागडं गहाय जेणेव सए कुलघरे तेणेव उवागच्छइ कोट्टागारं विहाडेइ २ पल्ले उब्भिदइ २ सगडी-सागडं भरेइ २ रायगिहं नगरं मज्झमज्झेणं जेणेव सए गिहे जेणेव धणे सत्थवाहे तेणेव उवागच्छइ । तए णं रायगिहे नयरे सिंघाडग जाव बहुजणो अन्नमन्नं एवमाइक्खइ ४ - धन्ने णं देवाणुप्पिया ! धणे सत्थवाहे जस्स णं रोहिणीया सुण्हा पंच सालिअक्खए सगडसागडि-एणं निज्जाएइ । तए णं से धणे सत्थवाहे ते पंच सालिअक्खए सगड-सागडेणं निज्जाइए पासइ २ हट्ठ जाव पडिच्छइ २ तस्सेव मित्तनाइ० चउण्ह य सुण्हाणं कुलघरपुरओ रोहिणीयं सुण्हं तस्स कुलघरस्स बहूसु कज्जेसु य जाव रहस्सेसु य आपुच्छणिज्जं जाव वट्ठावियं पमाणभूयं ठावेइ । एवामेव समणाउसो ! जाव पंच से महठवयाइं संवड्डियाइं भवंति से णं इहभवे चेव बहूणं समणाणं जाव वीईवइस्सइ जहा व सा रोहिणीया ।

एवं खलु जंबू ! समणेणं भगवया महावीरेणं जाव संपत्तेणं सत्तमस्स नायज्झयणस्स अयमट्ठे पन्नत्ते त्तिबेमि ॥

॥ सत्तमं अज्झयणं समत्तं ॥ ७ ॥

॥ अट्टमं अज्झयणं ॥

(69) जइ णं भंते ! समणेणं जाव संपत्तेणं सत्तमस्स नायज्झ-
यणस्स अयमट्ठे पन्नत्ते अट्टमस्स णं भंते ! के अट्ठे पन्नत्ते ? एवं खलु
जंबू ! तेणं कालेणं २ इहेव जंबूहीवे २ महाविदेहे वासे मंदरस्स पव्व-
यस्स पच्चत्थिमेणं निसट्ठस्स वासहरपव्वयस्स उत्तरेणं सीओयाए महा-
नदीए दाहिणेणं सुहावहस्स बक्खारपव्वयस्स पच्चत्थिमेणं पच्चत्थिम-
लवणसमुद्दस्स पुरत्थिमेणं एत्थ णं सलिलावई नामं विजए पन्नत्ते ।
तत्थ णं सलिलावईविजए वीयसोगा नामं रायहाणी पन्नत्ता नवजोयण-
वित्थिण्णा जाव पच्चक्खं देवलोगभूया । तीसे णं वीयसोगाए रायहाणीए
उत्तरपुरत्थिमे दिसीभाए इंदकुंभे नामं उज्जाणे । तत्थ णं वीयसोगाए
रायहाणीए बले नामं राया । तस्स धारिणीपामोक्खं देवीसहस्सं ओरोहे
होत्था । तए णं सा धारिणी देवी अन्नया कयाइ सीहं सुमिणे पासि-
त्ताणं पडिबुद्धा जाव महब्बले दारए जाए उम्मुक्क जाव भोगसमत्थे । तए
णं तं महब्बलं अम्मापियरो सरिसियाणं कमलसिरिपामोक्खाणं पंचण्हं
रायवरकन्नासयाणं एगदिवसेणं पाणिं गेण्हावेंति । पंच पासायसया
पंचसओ दाओ जाव विहरइ । थेरागमैणं इंदकुंभे उज्जाणे समोसठे परिसा
निग्गया बलो वि निग्गओ धम्मं सोच्चा निसम्म जं नवरं महब्बलं
कुमारं रज्जे ठावेई जाव एकारसंगवी बहूणि वासाणि सामण्णपरियागं
पाउणित्ता जेणेव चारुपव्वए मासिएणं भत्तेणं सिद्धे । तए णं सा कमल-
सिरी अन्नया कयाइ सीहं सुमिणे जाव बलभदो कुमारो जाओ जुवराया
यावि होत्था । तस्स णं महब्बलस्स रत्तो इमे छप्पियबालवयंसगा
रायाणो होत्था तंजहा-अयले धरणे पूरणे वसू बेसमणे अभिचंदे सहजा-
यया जाव संहिच्चाए नित्थरियव्वे त्तिकट्ठु अन्नमन्नस्स एयमट्ठं पडि-
सुणेंति । तेणं कोलणं २ इंदकुंभे उज्जाणे थेरा समोसठा । परिसा
निग्गया । महब्बले णं धम्मं सोच्चा जं नवरं छप्पियबालवयंसए आपु-
च्छामि बलभदं च कुमारं रज्जे ठावेमि जाव छप्पियबालवयंसए आपु-
च्छइ । तए णं ते छप्पिय० महब्बलं रायं एवं वयासी - जइ णं देवाणु-

पिया ! तुम्हे पन्वयह अम्हं के अन्ने आहारे जाव पन्वयामो । तए णं से महब्बले राया ते छपिय० एवं वयासी - जइ णं तुम्हे मए साङ्गिं जाव पन्वयह तो णं गच्छह जेट्ठे पुत्ते सएहिं २ रज्जेहिं ठावेह पुरिस-सहस्सवाहिणीओ सीयाओ दुरूढा जाव पाउब्भवंति । तए णं से महब्बले राया छपियबालवयंसए पाउब्भूए पासइ २ हट्ठ जाव कोटुंबियपुरिसे सद्दावेइ २ बलभद्दस्स रायाभिसेओ जाव आपुच्छइ । तए णं से महब्बले जाव महया इड्डीए पँवइए एकारसअंगवी बहूहिं चउत्थ जाव भावेमाणे विहरइ । तए णं तेसिं महब्बलपामोक्खाणं सत्तण्हं अणगाराणं अन्नया कयाइ एगयओ सहियाणं इमेयारूवे मिहोकहासमुल्लावे समुप्पज्जित्था - जं णं अम्हं देवाणुपिया एगे तवोकम्मं उवसंपज्जित्ताणं विहरइ तं णं अम्हेहिं सव्वेहिं तवोकम्मं उवसंपज्जित्ताणं विहरित्तए त्तिकट्ठु अन्न-मन्नस्स एयमट्ठं पडिसुणेंति २ बहूहिं चउत्थ जाव विहरंति । तए णं से महब्बले अणगारे इमेणं कारणेणं इत्थिनामगोयं कम्मं निव्वत्तिसु - जइ णं ते^१ महब्बलवज्जा छ अणगारा चउत्थं उवसंपज्जित्ताणं विहरंति तओ से महब्बले अणगारे छट्ठं उवसंपज्जित्ताणं विहरइ । जइ णं ते^२ महब्बलवज्जा छ अणगारा छट्ठं उवसंपज्जित्ताणं विहरंति तओ से महब्बले अणगारे अट्ठमं उवसंपज्जित्ताणं विहरइ । एवं अह अट्ठमं तो दसमं अह दसमं तो दुवालसमं । इमेहि य णं वीसाएहि य कारणेहिं आसेवियबहुलीकएहिं तित्थयरनामगोयं कम्मं निव्वत्तेसु तंजहा - अरहंतसिद्धपवयणगुरुथेरबहुस्सुए तवस्सीसुं । वच्छल्लया य तेसिं अभिक्ख नाणोवओगा य ॥१॥ दंसणविणए आवस्सए य सीलव्वए निरइयारो । खणलवत्तवर्चियाए वेयावच्चे समाही य ॥२॥ अपुव्व-नाणगहणे सुयभत्ती पवयणे पर्हावणया । एएहिं कारणेहिं तित्थयरत्तं लहइ सो^३ उ ॥३॥ तए णं ते महब्बलपामोक्खा सत्त अणगारा मासियं भिक्खुपडिमं उवसंपज्जित्ताणं विहरंति जाव एगराईयं । तए णं ते मह-ब्बलपामोक्खा सत्त अणगारा खुड्ढागं सीहनिक्कीलियं तवोकम्मं उवसंप-ज्जित्ताणं विहरंति तंजहा - चउत्थं करेंति २ सव्वकामगुणियं पारेंति २

छट्ठं करेति २ चउत्थं करेति २ अट्ठमं करेति २ छट्ठं करेति २ दसमं करेति २ अट्ठमं करेति २ दुवालसमं करेति २ दसमं करेति २ चोइसमं करेति २ दुवालसमं करेति २ सोलसमं करेति २ चोइसमं करेति २ अट्ठारसमं करेति २ सोलसमं करेति २ वीसइमं करेति २ अट्ठारसमं करेति २ वीसइमं करेति २ सोलसमं करेति २ अट्ठारसमं करेति २ चोइसमं करेति २ सोलसमं करेति २ दुवालसमं करेति २ चोइसमं करेति २ दसमं करेति २ दुवालसमं करेति २ अट्ठमं करेति २ दसमं करेति २ छट्ठं करेति २ अट्ठमं करेति २ चउत्थं करेति २ छट्ठं करेति २ चउत्थं करेति सव्वत्थं सव्वकामगुणिणं पारंति । एवं खलु एसा खुड्ढागसीहनिक्कीलियस्स तवोकम्मस्स पढमा परिवाडी छहिं मासेहिं सत्तहिं य अहोरत्तेहिं य अहासुत्तं जाव आराहिया भवइ । तयाणंतं दोच्चाए परिवाडीए चउत्थं करेति नवरं विगय्यवज्जं पारंति । एवं तच्चाएवि परिवाडीए नवरं पारणए अलेवाडं पारंति । एवं चउत्थावि परिवाडी नवरं पारणए आयंविणेण पारंति । तए णं ते महब्बलपामोक्खा सत्त अणगारा खुड्ढागं सीहनिक्कीलियं तवोकम्मं दोहिं संवच्छरेहिं अट्ठावीसाए अहोरत्तेहिं अहासुत्तं जाव आणाए आराहेत्ता जेणेव थेरे भगवंते तेणेव उवागच्छंति २ थेरे भगवंते वंदंति नमंसंति २ एवं वयासी—इच्छामो णं भंते ! महालयं सीहनिक्कीलियं तहेव जहा खुड्ढागं नवरं चोत्तीसइमाओ नियत्तंइ एगाए परिवाडीए कालो एगेणं संवच्छरेणं छहिं मासेहिं अट्ठारसहिं य अहोरत्तेहिं समप्पेइ । सव्वंपि सीहनिक्कीलियं छहिं वासेहिं दोहिं मासेहिं बारसहिं य अहोरत्तेहिं समप्पेइ । तए णं ते महब्बलपामोक्खा सत्त अणगारा महालयं सीहनिक्कीलियं अहासुत्तं जाव आराहित्ता जेणेव थेरे भगवंते तेणेव उवागच्छंति २ थेरे भगवंते वंदंति नमंसंति २ बहूणि चउत्थं जाव विहरंति । तए णं ते महब्बलपामोक्खा सत्त अणगारा तेणं उरालेणं सुक्का भुक्खा जहा खंदओ नवरं थेरे आपुच्छित्ता चारुपव्वयं साणियं दुरुहंति जाव दोमासियाए संलेहणाए सवीसं भत्तसयं चतुरासीइं वाससयसहस्साइं सामण्णपरियागं पाउणंति २ चुलसीइं पुव्वसयसहस्साइं

सव्वाउयं पालइत्ता जयंते विमाणे देवत्ताए उववन्ना ।

(70) तत्थ णं अत्थेगइयाणं देवाणं बत्तीसं सागरोवमाइं ठिई पन्नत्ता । तत्थ णं महब्बलवज्जाणं छण्हं देवाणं देसूणाइं बत्तीसं सागरोवमाइं ठिई । महब्बलस्स देवस्स पडिपुण्णाइं बत्तीसं सागरोवमाइं ठिई । तए णं ते महब्बलवज्जा छप्पि देवा ताओ देवलोगाओ आउक्खएणं जाव अणंतरं चयं चइत्ता इहेव जंबुद्दीवे २ भारहे वासे विसुद्धपिइमाइवंसेसु रायकुलेसु पत्तेयं २ कुमारत्ताए पच्चायाया तंजहा — पडिबुद्धी इक्खागराया, चंदच्छाए अंगराया, संखे कासिराया, रूपी कुणालाहिर्वई, अदीणसत्त कुरुराया, जियसत्त पंचालाहिर्वई । तए णं से महब्बले देवे तिहिं नाणेहिं समग्गे उच्चट्ठाणणएसु गहेसु सोमासु दिसासु वितिमिरासु विसुद्धासु जइएसु सउणेसु पयाहिणाणुकूलंसि भूमिसप्पिसि मारुयंसि पवायंसि निप्फन्नसस्समेइणीयंसि कालंसि पमुइयपक्कीलिएसु जणवएसु अद्धरत्तकालसमयंसि आस्सिणीनक्खत्तेणं जोगमुवागएणं जे से गिम्ह्णीणं पढमे मासे दोच्चे पक्खे चेतसुद्धे तस्स णं चेतसुद्धस्स चउत्थिपक्खेणं जयंताओ विमाणाओ बत्तीसं सागरोवमट्ठिइयाओ अणंतरं चयं चइत्ता इहेव जंबुद्दीवे २ भारहे वासे मिहिलाए रायहाणीए कुंभगस्स रत्तो पभावईए देवीए कुच्छिसि आहारवक्कंतीए भववक्कंतीए सरीरवक्कंतीए गम्भत्ताए वक्कंते । तं रयणिं च णं चोइस महासुमिणा वण्णओ । भत्तारकहणं सुमिणपाढगपुच्छा जाव विहरइ । तए णं तीसे पभावईए देवीए तिण्हं मासाणं बहुपडिपुण्णाणं इमेयारूवे डोहले पाउब्भूए — धन्नाओ णं ताओ अम्मयाओ जाओ णं जलथलयभासुरप्पभूएणं दसद्धवण्णेणं मल्लेणं अत्थुयपच्चत्थुयंसि सयणिज्जंसि सन्निसण्णाओ संनिवन्नाओ य विहरंति एगं च महं सिरिदामगंडं पाढलमल्लियचंपगअसोगपुन्नागनागमरुयगदमणगअणोज्जकोज्जयपउरपरमसुहदरिसणिज्जं महया गंधर्वाणि मुयंतं अग्घायमाणीओ डोहलं विणेंति । तए णं तीए पभावईए इमं स्यारूवं डोहलं पाउब्भूयं पासित्ता अहासन्निहिया वाणमंतरा देवा खिप्पामेव जलथलय जाव दसद्धवण्ण-

महं कुंभगसो य भारगसो य कुंभगस्स रन्नो भवणंसि साहरंति एगं
च णं महं सिरिदामगंडं जाव मुयंतं उवणेंति । तए णं सा पभावई
देवी जलथलय जाव मल्लेणं दोहलं विणेइ । तए णं सा पभावई
देवी पसत्थदोहला जाव विहरइ । तए णं सा पभावई देवी
नवण्हं मासाणं अद्धट्टमाणं य रायंदियाणं जे से हेमंताणं पढमे मासे
दोच्चे पक्खे मग्गसिरसुद्धे तस्स णं एक्कारसीए पुव्वरत्तावरत्तकाल-
समयंसि अरिसणीनक्खत्तेणं उरुचट्टाणं जाव पमुइयपक्कीलिएसु जणवएसु
आरोगारोगं एगूणवीसइमं तिथयरं पयाया ।

(71) तेण कोलणं २ अहेलोगवत्थव्वाओ अट्ट दिसाकुमारी-
मयहरियाओ जहा जुबुदीवपन्नत्तीए जम्मणं सव्वं नवरं मिहिलाए कुंभगस्स
पभावईए अभिलावो संजोएयव्वो जाव नंदीसरवरदीवे माहिमा । तथा
णं कुंभए राया बहूहिं भवणवईहिं ४ तिथयरजायकम्मं जाव नामकरणं
—जम्हा णं अम्हं इमीए दारियाए माऊए मल्लसयणीयंसि डोहले विणीए
तं होउ णं नामेणं मल्ली जहा महव्वले जाव परिवट्ठिया — सा वड्डई
भगवई दियलोयचुया अणोवमासिरीया । दासीदासपरिवुडा परिकिण्णा
पीढमदेहि ॥१॥ असियसिरया सुनयणा विंबोटी धवलदंतपंतीया ।
वरकमलकोमलंगी फुल्लुप्पलगंधनीसासा ॥२॥

(72) तए णं सा मल्ली विदेहरायवरकन्ना उम्मुक्कवालभावा जाव रूवेण
य जोव्वणेण य लावण्णेण य अईव २ उक्किट्ठा उक्किट्टसरीरा जायावि होत्था ।
तए णं सा मल्ली देसूणवाससयजाया ते छप्पि रायाणो विउलेणं ओहिणा
आभोएमाणी २ विहरइ तंजहा — पडिबुद्धिं जाव जियसत्तुं पंचालाहि-
वइ । तए णं सा मल्ली कोडुंबियपुरिसे सहावेइ २ एवं वयासी — गच्छह
णं तुब्भे देवाणुप्पिया ! असोगवणियाए एगं महं मोहणघरं करेह अणेग-
खंभसयसन्निविट्ठं । तस्स णं मोहणघरस्स बहुमज्झदेसभाए छ गब्भ-
घरए करेह । तेसि णं गब्भघरगाणं बहुमज्झदेसभाए जालघरयं
करेह । तस्स णं जालघरयस्स बहुमज्झदेसभाए मणिपेठियं करेह जाव
पच्चप्पिणंति । तए णं सा मल्ली मणिपेठियाए उवरिं अप्पणो सरिसियं

सरित्थं सरिठ्वयं सरिसलावणजोव्वणगुणोववेयं कण्णमयं मत्थय-
च्छिङ्गं पउमप्यलपिहाणं पडिमं करेइ २ जं विउलं असणं ४ आहारेइ
तओ मणुआओ असणाओ ४ कल्लाकल्लि एगमेगं पिंडं गहाय तीसे कणगा-
मईए मत्थयच्छिङ्गाए जाव पडिमाए मत्थयंसि पक्खिस्वमाणी २ विहरइ ।
तए णं तीसे कण्णमईए जाव मत्थयच्छिङ्गाए पडिमाए एगमेगंसि पिंडे
पक्खिस्वप्पमाणे २ तओ गंधे पाउब्भवइ से जहानामए अहिमडे इ वा
जाव एत्तो अणिट्ठतराए अमणामतराए चेव ।

(73) तेणं कालेणं २ कोसला नामं जणवए । तत्थ णं सागेए
नामं नयरे । तस्स णं उत्तरपुरत्थिमे दिस्सीभाए एत्थ णं महेगे नाग-
घरए होत्था दिव्वे सच्चवे सच्चोवाए संनिहिियपाडिहेरे ! तत्थ णं
सागेए नयरे पडिबुद्धी नामं इक्खागराया परिवसइ पउमावई देवी सुबुद्धी
अमच्चवे सौमदंड० । तए णं पउमावईए देवीए अन्नया कयाइ नाग-
जन्नए यावि होत्था । तए णं सा पउमावई नागजन्नमुवट्ठियं जाणित्ता
जेणेव पडिबुद्धी करयल जाव एवं वयासी - एवं खलु सामी ! मम
कल्लं नागजन्नए भविस्सइ । तं इच्छामि णं सामी ! तुब्भेहिं अब्भणु-
आया समाणी नागजन्नयं गमित्तए । तुब्भेवि णं सामी ! मम नागजन्न-
यंसि समोसरह । तए णं पडिबुद्धी पउमावईए एयमट्ठं पडिसुणेइ ।
तए णं पउमावई पडिबुद्धिणा रत्ता अब्भणुआया समाणी हट्ठा जाव कोडुं-
बियपुरिसे सहावेइ २ एवं वयासी - एवं खलु देवाणुप्पिया ! मम कल्लं
नागजन्नं भविस्सइ । तं तुब्भे मालागारे सहावेह २ एवं वयाह - एवं
खलु पउमावईए देवीए कल्लं नागजन्नए भविस्सइ । तं तुब्भे णं देवा-
णुप्पिया ! जलथल्लयदसद्धवण्णं मल्लं नागघरयंसि साहरह एगं च णं
महं सिरिदामगंडं उवणेह । तए णं जलथल्लयदसद्धवण्णेणं मल्लेणं
नाणाविहभत्तिसुविरइयं हंसमियमयूरकोंचसारसचक्कवायमयणसाल-
कोइलकुलोववेयं ईहामिय जाव भत्तिचित्तं महग्घं महरिहं विउलं पुप्फ-
मंडवं विरएह । तस्स णं बहुमज्झदेसभाए एगं महं सिरिदामगंडं जाव
गंघर्द्धणिं मुयंतं उल्लोयंसि आलंबेह २ पउमावइं देविं पडिवालेमाणा २

चिट्ठह । तए णं ते कोडुंबिया जाव चिट्ठंति । तए णं सा पउमावई देवी कल्लं कोडुंबिए एवं वयासी - खिप्पामेव भो देवाणुप्पिया ! सागेयं नयरं सद्धिभतरवाहिरियं आसियसम्मज्जिओवलित्तं जाव पच्चप्पिणंति । तए णं सा पउमावई दोच्चंपि कोडुंबिय जाव खिप्पामेव लहुकरणजुत्तं जाव जुत्तामेव उवट्ठवेंति । तए णं सा पउमावई अंतो अंतउरंसि ण्हाया जाव धम्मियं जाणं दुरुढा । तए णं सा पउमावई नियगपरियालसंपरिवुडा सागेयं नयरं मज्झमज्जेणं निज्जाइ २ जेणेव पुक्खरणी तेणेव उवागच्छइ २ पोक्खरणी ओगाहेइ २ जलमज्जणं जाव परमसुइभूया उल्लपडसाडया जाइं तत्थ उप्पलाइं जाव गेण्हइ २ जेणेव नागघरणे तेणेव प्हारेत्थ गमणाए । तए णं पउमावईए दासचेडीओ बहूओ पुप्फपडलगत्यगयाओ धूवकडंछुयहत्यगयाओ पिट्ठओ समणुगच्छंति । तए णं पउमावई सत्थिवड्डीए जेणेव नागघरणे तेणेव उवागच्छइ २ नागघरं अणुपविसइ २ लोमहत्यगं जाव धूवं डहइ २ पडिबुद्धिं पडिबालेमाणी २ चिट्ठइ । तए णं पडिबुद्धी ण्हाए हत्थिखंधवरगाए सकोरंट जाव सेयवरचामराहि य ह्यगयरहमहयाभडचडगरपहकरेहिं सागेयं नगरं मज्झमज्जेणं निग्गच्छइ २ जेणेव नागघरणे तेणेव उवागच्छइ २ हत्थिखंधाओ पच्चोरुहइ २ आलोए पणामं करेइ २ पुप्फमंडवं अणुपविसइ २ पासइ तं एगं महं सिरिदामगंडं । तए णं पडिबुद्धी तं सिरिदामगंडं सुचिरं कालं निरिक्खइ २ तंसि सिरिदामगंडंसि जायविम्हए सुबुद्धिं अमच्चं एवं वयासी - तुमं देवाणुप्पिया ! मम दोच्चेणं बहूणि गामागर जाव सन्निवेसाइं आहिंडसि बहूण य राईसर जाव गिहाइं अणुपविससि । तं अत्थि णं तुमे कहिंचि एरिसए सिरिदामगंडे दिट्ठपुण्वे जारिसए णं इमे पउमावईदेवीए सिरिदामगंडे ? तए णं सुबुद्धी पीडबुद्धिं रायं एवं वयासी - एवं खलु सामी ! अहं अन्नया कयाइं तुब्भं दोच्चेणं मिहिलं रायहाणिं गए । तत्थ णं मए कुंभगस्स रत्तो धूयाए पभावईए देवीए अत्तयाए मल्लीए संवच्छरपडिलेहणगंसि दिण्वे सिरिदामगंडे दिट्ठपुण्वे । तस्स णं सिरिदामगंडस्स इमे

पउमावईए देवीए सिरिदामगंडे सयसहस्सइमंपि कलं न अग्घइ । तए णं पडिबुद्धी सुबुद्धिं अमच्चं एवं वयासी - केरिसिया णं देवानुप्पिया ! मल्ली २ जस्स णं संवच्छरपडिलेहणयंसि सिरिदामगंडस्स पउमावईए देवीए सिरिदामगंडे सयसहस्सइमंपि कलं न अग्घइ ? तए णं सुबुद्धी पडिबुद्धिं इक्खागरायं एवं वयासी - मल्ली विदेहरायवरकन्नगा सुपइट्ठिय-कुम्मुन्नयचारुचरणा वण्णओ । तए णं पडिबुद्धी सुबुद्धिस्स अमच्चस्स अंतिए एयमट्ठं सोच्चा निसम्म सिरिदामगंडजणियहासे दूयं सहावेइ २ एवं वयासी - गच्छाहि णं तुमं देवानुप्पिया ! मिहिंलं रायहाणिं । तत्थ णं कुंभगस्स रन्नो धूयं पभांवईए अत्तियं मल्लिं २ मम भारियत्ताए वरेहि जइ वि य णं सा सयं रज्जसुंका । तए णं से दूए पडिबुद्धिणा रत्ता एवं वुत्ते समाणे हट्ठ जाव पडिसुणेइ २ जेणेव सए गिहे जेणेव चाउग्घटे आसरहे तेणेव उवागच्छइ २ चाउग्घटं आसरहं पडिक्कप्पावेइ २ दुरूढे जाव हयगयमहयाभडचडगरेणं साएयाओ निग्गच्छइ २ जेणेव विदेह-जणवए जेणेव मिहिला रायहाणी तेणेव प्हारेत्थ गमणाए (१) ।

(74) तेणं कालेणं २ अंगा नाम जणवए होत्था । तत्थ णं चंपा नामं नयरी होत्था । तत्थ णं चंपाए नयरीए चंदच्छाए अंगराया होत्था । तत्थ णं चंपाए नयरीए अरहन्नगपामोक्खा बहवे संजत्तानावावाणियगा परिवसंति अट्ठा जाव अपरिभूया । तए णं से अरहन्नगे समणोवासए यावि होत्था अहिगयजीवाजीवे वण्णओ । तए णं तेसिं अरहन्नगपामोक्खाणं संजत्तानावावाणियगाणं अन्नया कयाइ एगयओ सहियाणं इमेयारूवे मिहोकहाँसमुल्लावे समुप्पज्जित्था - सेयं खलु अम्हं गणिमं धरिमं च मेज्जं च परिच्छेज्जं च भंडगं गहाय लवणसमुहं पोयवहणेणं ओगाहित्ताए त्तिक्कट्ठु अन्नमन्नस्स एयमट्ठं पडिसुणेति २ गणिमं च ४ गेण्हंति २ सगढीसागडयं सज्जेति २ गणिमस्स ४ भंडगस्स सगडसागडियं भरेति २ सोहणंसि तिहिकरणनक्खत्तमुहुत्तंसि विउलं असणं ४ उवक्खडावेति भित्तानाइ भोयणवेलाए भुंजावेति जाव आपुच्छंति २ सगढीसागडियं जोयंति २ चंपाए नयरीए मज्झमज्झेणं निग्गच्छंति २ जेणेव गंभीरए

पोयपट्टणे तेणेव उवागच्छंति २ सगडीसागडियं मोयंति २ पोयवहणं सज्जेति २ गणिमस्स जाव चउविहंभंडगस्स भरेति तंदुलाण य समि-
यस्स य तेहस्स य घयस्स य गुलस्स य गोरसस्स य उदगस्स य उदय-
भायणाण य ओसहाण य भेसज्जाण य तणस्स य कट्टस्स य आवरणाण य
पहरणाण य अन्नेसिं च बहूणं पोयवहणपाउग्गाणं दव्वाणं पोयवहणं भरेति
सोहणंसि तिहिकरणनक्खत्तमुहुत्तंसि विउलं असणं ४ उवक्खडावेति २
मित्तनाइ० आपुच्छंति २ जेणेव पोयट्ठाणे तेणेव उवागच्छंति । तए णं
तेसिं अरहन्नग जाव वाणियगाणं परियणो जाव ताहिं इट्ठाहिं जाव वग्गूहिं
अभिनंदंता य अभिसंथुणमाणा य एवं वयासी—अज्ज! ताय! भाय! माउल!
भाइणेज्ज! भगवथा समुदेणं अभिरक्खिज्जमाणा २ चिरं जीवह भइं च
भे पुणरवि लद्धे कयकज्जे अणहसमग्गे नियगं घरं हव्वमागए पासामो
त्तिकट्ट ताहिं सोमाहिं निद्धाहिं दाहाहिं सप्पिवासाहिं पप्पुयाहिं दिट्ठीहिं
निरिक्खमाणा मुहुत्तमेत्तं संचिट्ठंति । तओ समीणिएसु पुप्फबलिकम्मेसु
दिन्नेसु सरसरत्तचंदणदहरपंचंगुलितलेसु अणुक्खित्तंसि धूवंसि पूइएसु समु-
इवाएसु संसारियासु बलयबाहासु ऊसिएसु सिएसु झयग्गेसु पडुप्पवाइएसु
तूरेसु जइएसु सव्वसउणेसु गहिएसु रायवरसासणेसु महया उक्किट्टसीह-
नाय जाव रवेणं पक्खुभियमहासमुहरवभूयंपिव मेइणिं करेमाणा एगादिसिं
जाव वाणियगा नावाए दुरूढा । तओ पुस्समाणवो वक्कमुदीहु—हं भो !
सव्वेसिमंवि अत्थसिद्धी उवट्ठियाइं कल्लाणाइं पडिहयाइं सव्वपावाइं
जुत्तो पूसो विजओ मुहुत्तो अयं देसकालो । तओ पुस्समाणएणं वक्क-
मुदाहरिए हट्टुट्ठे कुच्छिधारकण्णधारगग्भिज्जसंजत्तानावावाणियगा
वावारिंसुं तं नावं पुणुंछंगं पुण्णमुहिं बंधणेहिंतो मुंचंति । तए णं सा नावा
विमुक्कबंधणा पवणबलसमाहया ऊसियसिया विततपंखा इव गरुल-
जुवई गंगासलिलतिक्खसोयवेगेहिं संखुब्भमाणी २ उम्मीतरंगमाला-
सहस्साइं समइच्छमाणी २ कइवएहिं अहोरत्तेहिं लवणसमुदं अणेगाइं
जोयणसयाइं ओगाढा । तए णं तेसिं अरहन्नगपामोक्खाणं संजत्तानावा-
वाणियगाणं लवणसमुदं अणेगाइं जोयणसयाइं ओगाढाणं समीणाणं

बहुइं उप्पाइयसयाइं पाउळभूयाइं तंजहा — अकाले गज्जिए अकाले विज्जुए
 अकाले थणियसहे अभिक्खणं २ आगासे देवयाओ नच्चंति एगं च णं
 महं पिसायरूवं पासंति तालजंघं दिवंगयाहिं बाहाहिं मसिमूसगमहिस-
 कालंगं भरियमेहवण्णं लंबोद्वं निग्गयग्गदंतं निह्वालियजमलजुयलजीहं
 आऊंसियवयणगंडदेसं चीणचिमिढं नासियं विगयभुग्गभग्गभूमयं खज्जोय-
 गदिस्सचक्खुरागं उत्तासणगं विसालवच्छं विसालकुच्छिं पलंबकुच्छिं
 पहसियपयलियपयडियगत्तं पणच्चमाणं अप्पोडंतं अभिर्वयंतं अभि-
 गज्जंतं बहुसो २ अट्टट्टहासे विणिम्मुयंतं नीलुप्पलगवल्लुगुलियअयसि-
 कुसुमप्पगासं खुरधारं असिं गहाय अभिमुहर्मावयमाणं पासंति । तए
 णं ते अरहन्नगवज्जा संजत्तानावावाणियगा एगं च ण महं तालपिसायं
 पासित्ता तालजंघं दिवंगयाहिं बाहाहिं फुट्टसिरं भमरनिगरवरमासरासि-
 माहिसकालंगं भारियमेहवण्णं सुप्पणहं फालसरिसजीहं लंबोद्वं धवल-
 वट्टासिलिद्धितक्खथिरपीणकुडिलदाढोवगूढवयणं विकोसियधारासि-
 जुयलसमसरिसतणुयच्चंचलगलंतरसलोलचव्वलफुरुफुरेतनिह्वालियग्गजीहं
 अवयंछियमहल्लविगयबीभच्छलीलपगलंतरत्ततालुयं हिंगुलयसगम्भ-
 कंदरबिलं व अंजणगिरिस्स अग्गिजालुग्गिलंतवयणं आऊंसियअक्ख-
 चम्मंडइट्टगंडदेसं चीणचिमिढं वक्कभग्गनासं रोस/गयधमधमेंतमारुय-
 निट्ठुरखरफरुसञ्जुसिरं ओभुग्गनासियपुडं घडंउम्भडरइयभीसणमुहं
 उद्धमुहकण्णसक्कुलियमहंतविगयलोमसंखालगलंबंतचलियकण्णं पिंगल-
 दिप्पंतलोर्थेणं भिउडितडिनिडीलं नरसरिमालपरिणद्धं चिंधं विचित्तगोणस-
 सुबद्धपरिकरं अवहोलंतपुप्फयायंतसप्पविच्छुयगोधुंदरनउलसरडविरइय-
 विचित्तवेयच्छमालियागं भोगकूरकण्हसप्पधमधमेंतलंबंतकण्णपूरं मज्जार-
 सियाललइयखंधं दित्तधूयंतधूयकयकुंतलसिरं घंटारवेण भीमं भयंकरं
 कायरजणहिययफोडणं दित्तमट्टट्टहासं विणिम्मुयंतं वसारुहिरपूयमंस-
 मलमलिणपोच्चडतणुं उत्तासणयं विसालवच्छं पेच्छंताभिन्ननहंमुह-
 नयणकण्णवरवग्गचित्तकत्तीणियंसंणं सरसरुहिरगयचम्मवियर्थंरुसविय-
 बाहुजुयलं ताहि य खरफरुसअसिणिद्धंअणिट्टदित्तअसुभअप्पिय-

अकंतवग्गूहि य तज्जयंतं पासंति तं तालपिसायरूवं एज्जमाणं पासंति २
 भीया संजायभया अन्नमन्नस्स कार्यं समतुरंगेमाणा २ बहूणं इंदाण
 य खंदाण य रुइसिववेसमणनागाणं भूयाण य जक्खाण य अज्जकोइ-
 किरियाणं य बहूणि उवाइयसयाणि ओवाइयमाणा २ चिट्ठंति । तए
 णं से अरहन्नए समणोवासए तं दिव्वं पिसायरूवं एज्जमाणं पासइ २
 अभीए अतत्थे अचलिए असंभंते अणाउले अणुत्विग्गे अभिन्नमुह-
 रागनयणवण्णे अदीणविमणमाणसे पोयवहणस्स एगदेसंसि वत्थंतेणं
 भूमिं पमज्जइ २ ठाणं ठाइ २ करयल जाव एवं वयासी - नमोत्थु णं
 अरहंताणं जाव संपत्ताणं । जइ णं अहं एत्तो उवसग्गाओ मुंचामि तो मे
 कप्पइ पारित्तए । अहं णं एत्तो उवसग्गाओ न मुंचामि तो मे तहा
 पच्चक्खाएयव्वे तिकट्ठु सागारं भत्तं पच्चक्खाइ । तए णं से पिसाय-
 रूवे जेणेव अरहन्नगे समणोवासए तेणेव उवागच्छइ २ अरहन्नगं
 एवं वयासी - हं भो ! अरहन्नगा अपत्थियपत्थिया जाव परिवज्जिया !
 नो खलु कप्पइ तव सीलव्वयगुणवेरमणपच्चक्खाणपोसहोववासाइं
 चालित्तए वा एवं खोभित्तए वा खंडित्तए वा भंजित्तए वा उज्झित्तए
 वा परिच्चइत्तए वा । तं जइ णं तुमं सीलव्वयं जाव न परिच्चयसि
 तो ते अहं एयं पोयवहणं दोहिं अंगुलियाहिं गेण्हामि २ सत्तट्ठतळ-
 प्पमाणमेत्ताइं उडुं वेह्मासं उव्विहामि अंतोजलंसि निच्छोलेमि जाणं
 तुमं अट्टदुहट्टवसट्ठे असमाहिपत्ते अकाले चेव जीवियाओ ववरोविज्जसि ।
 तए णं से अरहन्नगे समणोवासए तं देवं मणसा चेव एवं वयासी -
 अहं णं देवाणुप्पिया ! अरहन्नए नामं समणोवासए अहिगयजीवाजीवे ।
 नो खलु अहं सक्का केणइ देवेण वा जाव निग्गंथाओ पावयणाओ चालि-
 त्तए वा खोभित्तए वा विपरिणामित्तए वा । तुमं णं जा सद्धा तं करेहि
 त्तिकट्ठु अभीए जाव अभिन्नमुहरागनयणवण्णे अदीणविमणमाणसे
 निच्चले निप्फंदे तुसिणीए धम्मज्झाणोवगए विहरइ । तए णं से दिव्वे
 पिसायरूवे अरहन्नगं समणोवासगं दोच्चंपि तच्चंपि एवं वयासी - हं
 भो अरहन्नगा ! जाव धम्मज्झाणोवगए विहरइ । तए णं से दिव्वे

पिसायरूवे अरहन्नगं धम्मज्झाणोवगयं पासइ २ बलियतरागं आसुरुत्ते तं पोयवहणं दोहिं अंगुलियाहिं गिण्हइ २ सत्तट्ठतलाइं जाव अरहन्नगं एवं वयासी — हं भो अरहन्नगा ! अपत्थियपत्थिया ! नो खलु कप्पइ तव सीलव्वय तहेव जाव धम्मज्झाणोवगए विहरइ । तए णं से पिसायरूवे अरहन्नगं जाहे नो संचाएइ निगंथाओ चालित्तए वा तहेवं संते जाव निव्विण्णे तं पोयवहणं सणियं २ उवरिं जलस्स ठवेइ २ तं दिव्वं पिसायरूवं पडिसाहरेइ २ दिव्वं देवरूवं विउव्वइ २ अंतलिक्खपडिवन्ने सखिखिणीयाइं जाव परिहिए अरहन्नगं समणोवासगं एवं वयासी — हं भो अरहन्नगा ! धन्नोसि णं तुमं देवाणुप्पिया ! जाव जीवियफले जस्स णं तव निगंथे पावयणे इमेयारूवा पडिवत्ती लद्धा पत्ता अभिसमन्नागया । एवं खलु देवाणुप्पिया ! सक्के देविंदे देवराया सोहम्मए कप्पे सोहम्मवडिंसए विमाणे सभाए सुहम्माए बहूणं देवाणं मज्झगए महया २ सहेणं एवं आइक्खइ ४— एवं खलु जंबुदीवे २ भारहे वासे चंपाए नयरीए अरहन्नए समणोवासए अभिगयजीवाजीवे नो खलु सक्का केणइ देवेण वा ६ निगंथाओ पावयणाओ चालित्तए जाव विपरिणामित्तए वा । तए णं अहं देवाणुप्पिया ! सक्कस्स नो एयमट्ठं सद्धामि । तए णं मम इमेयारूवे अज्झत्थिए — गच्छामि णं अहं अरहन्नगस्स अंतियं पाउब्भवामि जाणामि ताव अहं अरहन्नगं किं पियधम्मे नो पियधम्मे, दढधम्मे नो दढधम्मे, सीलव्वयगुणे किं चालेइ जाव परिच्चयइ नो परिच्चयइ त्तिकट्ठु एवं संपेहेमि २ ओहिं पउंजामि २ देवाणुप्पियं ओहिणा आभोएमि २ उत्तरपुरत्थिमं २ उत्तरवेउव्वियं० ताए ङक्किट्ठाए जेणेव लवणसमुदे जेणेव देवाणुप्पिया तेणेव उवागच्छामि २ देवाणुप्पियं उवसगं करेमि नो चेव णं देवाणुप्पिया भीया वा । तं जं णं सक्के ३ एवं वयइ सच्चे णं एसमट्ठे । तं दिट्ठे^१ णं देवाणुप्पियाणं इट्ठी जाव परक्कमे लद्धे पत्ते अभिसमन्नागए । तं खामेमि णं देवाणुप्पिया ! खमंतु मरंहंतु णं देवाणुप्पिया ! नाइभुज्जो एंवकरणयाए त्तिकट्ठु पंजलिउडे पायवडिए एयमट्ठं विणएणं भुज्जो २ खामेइ अरहन्नगस्स य

दुवे कुंडलजुयले दलयइ २ जामेव दिसिं पाउब्भूए तामेव पाडिगए ।

(75) तए णं से अरहन्नए निरुवसग्गामितिकट्टु पडिमं पारेइ ।
 तए णं ते अरहन्नगपामोक्खा जाव वाणियगा दक्खिणाणुकूलेणं वाएणं
 जेणेव गंभीरए पोयट्ठाणे तेणेव उवागच्छंति २ पोयं लंबेंति २ सगडि-
 सागडं सज्जेति तं गणिमं च ४ सगडिं० संकामेंति २ सगडी०
 जोवंति २ जेणेव मिहिला तेणेव उवागच्छंति २ मिहिलाए रायहाणीए
 बहिया अग्गुज्जाणंसि सगडीसागडं मोएंति २ महत्थं विलउं रायारिहं
 पाहुडं कुंडलजुयलं च गेण्हंति २ अणुप्पविसंति २ जेणेव कुंभए तेणेव
 उवागच्छंति २ करयल जाव महत्थं दिव्वं कुंडलजुयलं उवणेंति । तए णं
 कुंभए तेसिं संजैत्तगाणं जाव पडिच्छइ २ माळिं २ सहावेइ २ तं दिव्वं
 कुंडलजुयलं मल्लीए २ पिण्ढेइ २ पडिविसज्जेइ । तए णं से कुंभए राया
 ते अरहन्नगपामोक्खे जाव वाणियगे विपुलेणं वत्थगंधमल्लालंकारेणं जाव
 उस्सुकं वियरइ २ रायमग्गमोगाढे य आवासे वियरइ २ पडिविसज्जेइ ।
 तए णं अरहन्नगसंजत्तगा जेणेव रायमग्गमोगाढे आवासे तेणेव उवा-
 गच्छंति २ भंडववहरणं करेंति पडिभंडे गेण्हंति २ सगडी० भरेंति जेणेव
 गंभीरए पोयपट्ठेणे तेणेव उवागच्छंति २ पोयवहणं सज्जेति २ भंडं संका-
 मेंति दक्खिणाणुकूले जेणेव चंपां पोयट्ठाणे तेणेव पोयं लंबेंति २ सगडी०
 सज्जेति २ तं गणिमं ४ सगडी० संकामेंति जाव महत्थं महग्घं पाहुडं दिव्वं
 च कुंडलजुयलं गेण्हंति २ जेणेव चंदच्छाए अंगराया तेणेव उवागच्छंति २
 तं महत्थं जाव उवणेंति । तए णं चंदच्छाए अंगराया तं दिव्वं महत्थं
 कुंडलजुयलं पडिच्छइ २ ते अरहन्नगपामोक्खे एवं वयासी—तुम्भे णं
 देवाणुप्पिया ! बहूणि गामागर जाव आहिंडह लवणसमुदं च अभिक्खणं
 २ पोयवहणेहिं ओगाहेह । तं अत्थियाइं भे केइ कहिंचि अच्छेरए दिट्ठ-
 पुव्वे ? तए णं ते अरहन्नगपामोक्खा चंदच्छायं अंगरायं एवं वयासी—
 एवं खलु सामी ! अम्हे इहेव चंपाए नयरीए अरहन्नगपामोक्खा बह्वे
 संजत्तगानावावाणियगा परिवसामो । तए णं अम्हे अन्नया कयाइ गणिमं
 च ४ तहेव अहीणअइरित्तं जाव कुंभगस्स रत्तो उवणेमो । तए णं से

कुंभए मल्लीए २ तं दिव्वं कुंडलजुयलं पिणद्धेइ २ पडिबिसज्जेइ । तं एस णं सामी ! अम्हेहिं कुंभगरायभवणांसि मल्ली २ अच्छेए दिट्ठे^१ । तं नो खलु अन्ना काबि तारिसिया देवकन्ना वा जाव जारिसिया णं मल्ली २ । तए णं चंदच्छाए अरहन्नगपामोक्खे सक्कारेइ सम्माणेइ २ उस्सुंके बियरइ पडिबिसज्जेइ । तए णं चंदच्छाए वाणियगजणियहासे दूयं सद्दावेइ जाव जइ वि य णं सा सयं रज्जसुक्का । तए णं से दूए हट्ठ जाव पहारेत्थ गमणाए (२) ।

(76) तेणं कालेणं २ कुणाला नामं जणवए होत्था । तत्थ णं सावत्थी नामं नयरी होत्था । तत्थ णं रूप्पी कुणालाहिवई नामं राया होत्था । तस्स णं रुपिस्स धूया धारिणीए देवीए अत्तया सुबाहु नामं दारिया होत्था सुकुमाल जाव रूवेण य जोव्वणेण य लावण्णेण य उक्किट्ठा उक्किट्ठसरीरा जाया यावि होत्था । तीसे णं सुबाहुए दारियाए अन्नया चाउम्मासियमज्जणए जाए यावि होत्था । तए णं से रूप्पी कुणालाहिवई सुबाहुए दारियाए चाउम्मासियमज्जणयं उवाट्ठियं जाणइ २ कोटुंबिय-पुरिसे सद्दावेइ २ एवं वयासी — एवं खलु देवाणुपिया ! सुबाहुदारियाए कल्लं चाउम्मासियमज्जणए भविस्सइ । तं तुब्भे णं रायमग्गमोगाढंसि मंडवंसि जलथलयदसद्ववण्णमल्लं साहरह जाव सिरिदामगंडं ओल्लंइति । तए णं से रूप्पी कुणालाहिवई सुवण्णगारसोणिं सद्दावेइ २ एवं वयासी — खिप्पामेव भो देवाणुपिया ! रायमग्गमोगाढंसि पुप्फमंडवंसि नाणाविह-पंचवण्णेहिं तंदुलेहिं नयरं आलिहइ तस्स बहुमज्झदेसभाए पट्ठयं रएह जाव पच्चपिणंति । तए णं से रूप्पी कुणालाहिवई हत्थिखंधवरगए चाउरंगिणीए सेणाए महया भडचडगर जाव अंतेउरपरियालसंपरिवुडे सुबाहुं दारियं पुरओ कट्ठु जेणेव रायमग्गे जेणेव पुप्फमंडवे तेणेव उवागच्छइ २ हत्थिखंधाओ पच्चोरुहइ २ पुप्फमंडवे अणुप्पविसइ २ सीहासणवरगए पुरत्थाभिमुहे सन्निसण्णे । तए णं ताओ अंतेउरियाओ सुबाहुं दारियं पट्ठयंसि दुरूहंति २ सेय्थीपीयएहिं कलसोहिं ण्हाणेंति २ सव्वाळंकारविभूसियं करेंति २ पिउणो पायवंदियं उवणेंति । तए णं सुबाहु

दारिया जेणेव रूपी राया तेणेव उवागच्छइ २ पायगहणं करेइ । तए णं से रूपी राया सुबाहुं दारियं अंके निवेसेइ २ सुबाहुदारियाए रूवेण य जोव्वणेण य लावणेणं य जायविम्हए वरिसधरं सहावेइ २ एवं वयासी — तुमं णं देवाणुप्पिया ! मम दोच्चेणं बहूणि गामागरनगर-गिहाणि अणुप्पविससि । तं अत्थियाइं ते कस्सइ रत्तो वा ईसरस्स वा कर्हिचि एयारिस्सए मज्जणए दिट्ठपुव्वे जारिस्सए णं इमीसे सुबाहुदारियाए मज्जणए ? तए णं से वरिसधरे रूपि करयल जाव वद्धावेत्ता एवं वयासी — एवं खलु सामी ! अहं अन्नया तुब्भं दोब्बेणं मिहिलं गए । तत्थ णं मए कुंभगस्स रत्तो धूयाए पभावईए देवीए अत्तयाए मल्लीए २ मज्जणए दिट्ठे । तस्स णं मज्जणगस्स इमीए सुबाहुदारियाए मज्जणए सयसहस्स-इमंपि कलं न अगघइ । तए णं से रूपी राया वरिसधरस्स अंतियं एयमट्ठं सोच्चा निसम्म मज्जणगजणियहासे दूयं सहावेइ जाव जेणेव मिहिला नयरी तेणेव पहारेत्थ गमणाए (३) ।

(77) तेणं कालेणं २ कासी नामं जणवए होत्था । तत्थ णं वाणा-रसी नामं नयरी होत्था । तत्थ णं संखे नामं कासीराया होत्था । तए णं तीसे मल्लीए २ अन्नया कयाइ तस्स दिव्वस्स कुंडलजुयलस्स संधी विसंघडिए यावि होत्था । तए णं से कुंभए राया सुवण्णगार-सेणी सहावेइ २ एवं वयासी — तुब्भे णं देवाणुप्पिया ! इमस्स दिव्वस्स कुंडलजुयलस्स संधिं संघाडेइ । तए णं सां सुवण्णगार-सेणी एयमट्ठं तहत्ति पडिसुणेइ २ तं दिव्वं कुंडलजुयलं गेण्हइ २ जेणेव सुवण्णगारभिसियाओ तेणेव उवागच्छइ २ सुवण्णगारभिसि-यासु निवेसेइ २ बहूहिं आएहि य जाव परिणामेमाणा इच्छंति तस्स दिव्वस्स कुंडलजुयलस्स संधिं घडित्तए नो चेव णं संचाएइ घडित्तए । तए णं सां सुवण्णगारसेणी जेणेव कुंभए तेणेव उवागच्छइ २ करयल जाव वद्धावेत्ता एवं वयासी — एवं खलु सामी ! अज्ज तुम्हे अम्हे सहावेइ जाव संधिं संघाडेत्ता एवमार्णत्तियं पच्चप्पिणह । तए णं अम्हे तं दिव्वं कुंडलजुयलं गेण्हामो जेणेव सुवण्णगारभिसियाओ जाव नो

संचाएमो संचाडित्तए । तए णं अम्हे सामी ! एयस्स दिव्वस्स कुंडलस्स अन्नं सरिसयं कुंडलजुयलं घडेमो । तए णं से कुंभए राया तीसे सुवण्णगारसेणीए अंतिए एयमट्ठं सोच्चा निसम्म आसुरुत्ते ४ तिवलियं भिउडिं निडाले साहट्ठु एवं वयासी — केस णं तुब्भे कलायाणं भवह जे णं तुब्भे इमस्स दिव्वस्स कुंडल-जुयलस्स नो संचाएह संधिं संचाडित्तए ? ते सुवण्णगारे निव्विसए आणवेइ । तए णं ते सुवण्णगारा कुंभगेणं रत्ता निव्विसया आणत्ता समाणा जेणेव साँइं २ गिहाइं तेणेव उवागच्छंति २ सभंडमत्तोव-गरणमायाए मिहिलाए रायहाणीए मज्झंमज्झेणं निक्खमंति २ विदेहस्स जणवयस्स मज्झंमज्झेणं जेणेव कासी जणवए जेणेव वाणारसी नयरी तेणेव उवागच्छंति २ अग्गुज्जाणंसि सगडीसागडं मोएंति २ महत्थं जाव पाहुडं गेण्हंति २ वाणारसीए नयरीए मज्झंमज्झेणं जेणेव संखे कासीराया तेणेव उवागच्छंति २ करयल जाव वद्धावेंति एवं वयासी — अम्हे णं सामी ! मिहिलाओ कुंभएणं रत्ता निव्विसया आणत्ता समाणा इह हव्वमागया । तं इच्छामो णं सामी ! तुब्भं बाहुच्छाया-परिगहिया निब्भया निरुव्विग्गा सुहंसुहेणं परिवसिउं । तए णं संखे कासीराया ते सुवण्णगारे एवं वयासी — किं णं तुब्भे देवाणुप्पिया ! कुंभएणं रत्ता निव्विसया आणत्ता ? तए णं ते सुवण्णगारा संखं एवं वयासी — एवं खलु सामी ! कुंभगस्स रत्तो धूयाए पभावईए देवीए अत्तयाए मल्लीए कुंडलजुयलस्स संधी विसंघडिए । तए णं से कुंभए सुवण्णगारसेणिं सहावेइ जाव निव्विसया आणत्ता । तं एएणं कारणेणं सामी ! अम्हे कुंभएणं निव्विसया आणत्ता । तए णं से संखे सुवण्णगारे एवं वयासी — केरिसिया णं देवाणुप्पिया ! कुंभस्स रत्तो धूया पभावई-देवीए अत्तया मल्ली विदेहरायवरकत्ता ? तए णं ते सुवण्णगारा संखं रायं एवं वयासी — नो खलु सामी ! अत्ता कावि तारिसिया देवकत्ता वा गंधव्वकत्ता वा जाव जारिसिया णं मल्ली २ । तए णं से संखे कुंडल-जणियहासे दूयं सहावेइ जाव तहेव पहारेत्थ गमणाए ४ ।

(78) तेणं कालेणं २ कुरुजणवए होत्था । हत्थिणाउरे नयरे । अदीणसत्तू नामं राया होत्था जाव विहरइ । तत्थ णं मिहिलाए तस्स णं कुंभगस्स पुत्ते पभावईए अत्तए मल्लीए अणुसग्गजायए मल्लदिन्ने नामं कुमारे जाव जुवराया यावि होत्था । तए णं मल्लदिन्ने कुमारे अन्नया कोडुंबियपुरिसे सहावेइ २ एवं वयासी — गच्छह णं तुब्भे मम पमंद-वणंसि एगं महं चित्तसभं करेह २ अणेग जाव पच्चप्पिणंति । तए णं से मल्लदिन्ने चित्तगरसेणिं सहावेइ २ एवं वयासी — तुब्भे णं देवाणु-प्पिया ! चित्तसभं हावभावविलासबिब्बोयकल्लिएहिं रूवेहिं चित्तेह जाव पच्चप्पिणह । तए णं सा चित्तगरसेणी तहत्ति पडिसुणेइ २ जेणेव सयाइं गिहाइं तेणेव उवागच्छइ २ तूलियाओ वण्णए य गेण्हई २ जेणेव चित्तसभा तेणेव अणुप्पविसइ २ भूमिभागे विरयइ २ भूमिं सज्जेइ २ चित्तसभं हावभाव जाव चित्तेउं पयत्ता यावि होत्था । तए णं एगस्स चित्तगरस्स इमेयारूवा चित्तगरलद्धी लद्धा पत्ता अभिसमन्नागया — जस्स णं दुपयस्स वा चउप्पयस्स वा अपयस्स वा एगदेसमवि पासइ तस्स णं देसाणुसारेणं तयाणुरूवं रूवं निवत्तेइ । तए णं से चित्तर्गए मल्लीए जवणियंतरियाए जालंतरेण पायंगुट्ठं पासइ । तए णं तस्स चित्तगरस्स इमेयारूवे अज्झात्थिए जाव समुप्पज्जित्था — सेयं खलु ममं मल्लीए २ पायंगुट्ठाणुसारेणं सरिसगं जाव गुणोववेयं रूवं निवत्तित्तए । एवं संपेहेइ २ भूमिभागं सज्जेइ मल्लीए २ पायंगुट्ठाणुसारेणं जाव निव्वत्तेइ । तए णं सा चित्तगरसेणी चित्तसभं जाव हावभावं चित्तेइ २ जेणेव मल्लदिन्ने कुमारे तेणेव उवा-गच्छइ जाव एवमाणात्तियं पच्चप्पिणंइ । तए णं मल्लदिन्ने चित्तगरसेणिं सक्कारेइ २ विपुलं जीवियारिहं पीइदाणं दलयइ २ पडिविसज्जेइ । तए णं मल्लदिन्ने अन्नया ण्हाए अंतउरपरियालसंपरिवुडे अम्मधाईए साद्धिं जेणेव चित्तसभा तेणेव उवागच्छइ २ चित्तसभं अणुप्पविसइ २ हाव-भावविलासबिब्बोयकल्लियाइं रूवाइं पासमाणे जेणेव मल्लीए २ तयाणु-रूवं निव्वत्तिए तेणेव पहारेत्थ गमणाए । तए णं से मल्लदिन्ने मल्लीए २

तयाणुरूवं निव्वत्तिं पासइ २ इमेयारूवे अज्झत्थिए जाव समुप्प-
ज्जित्था - एस णं मल्ली २ तिकट्ठु लज्जिए वीडिए विड्डे^१ सणियं २
पच्चोसक्कइ । तए णं तं मल्लदिन्नं अम्मधाई सणियं २ पच्चोसक्कंतं
पासित्ता एवं वयासी - किन्नं तुमं पुत्ता ! लज्जिए वीडिए विड्डे^२
सणियं २ पच्चोसक्कसि ? तए णं से मल्लदिन्ने अम्मधाई एवं वयासी -
जुत्तं णं अम्मो ! मम जेट्ठाए भगिणीए गुरुदेवयभूयाए लज्जणिज्जाए
मम चित्तगरणिव्वत्तिं सभं अणुपविसित्तए ? तए णं अम्मधाई
मल्लदिन्नं कुमारं एवं वयासी - नो खलु पुत्ता ! एस मल्ली । एस णं
मल्लीए २ चित्तगरणं तयाणुरूवे निव्वत्तिए । तए णं से मल्लदिन्ने
अम्मधाईए एयमट्ठं सोच्चा निसम्म आसुरुत्ते ४ एवं वयासी - केस णं
भो से चित्तगरए अपत्थियपत्थिए जाव परिवज्जिए जे णं मम
जेट्ठाए भगिणीए गुरुदेवयभूयाए जाव निव्वत्तिए तिकट्ठु तं चित्तगरं
वज्झं आणवेइ । तए णं सा चित्तगरसेणी इमीसे कहाए लद्धट्ठा समाणा
जेणेव मल्लदिन्ने कुमारे तेणेव उवागच्छइ २ करयलपरिग्गहियं जाव वद्धा-
वेत्ता एवं वयासी - एवं खलु सामी ! तस्स चित्तगरस्स इमेयारूवा
चित्तगरलद्धी लद्धा पत्ता अभिसमन्नागया - जस्स णं दुपयस्स वा जाव
निवत्तेइ । तं मा णं सामी ! तुब्भे तं चित्तगरं वज्झं आणवेइ । तं तुब्भे
णं सामी ! तस्स चित्तगरस्स अन्नं तयाणुरूवं दंडं निव्वत्तेइ । तए णं
से मल्लदिन्ने तस्स चित्तगरस्स संडासगं छिंदीवेइ २ निव्विसयं आण-
वेइ । तए णं से चित्तगरए मल्लदिन्नेणं निव्विसए आणत्ते सभंडमत्तो-
वगरणमायाए मिहिलाओ नयरीओ निक्खमइ २ विदेहं जणवयं मज्झं-
मज्झेणं जेणेव कुरुजणवए जेणेव हत्थिणाउरे नयरे तेणेव उवागच्छइ २
भंडनिक्खेवं करेइ २ चित्तफलं सज्जेइ २ मल्लीए २ पायंगुट्ठाणुसारेण
रूवं निव्वत्तेइ २ कक्खंतरंसि लुब्भइ २ महत्थं जाव पाहुडं गेणहइ २
हत्थिणाउरं नयरं मज्झंमज्झेणं जेणेव अदीणसत्तू राया तेणेव उवागच्छइ
२ तं करयल जाव वद्धावेइ २ पाहुडं उवणेइ २ एवं वयासी - एवं खलु
अहं सामी ! मिहिलाओ रायहाणीओ कुंभगस्स रत्तो पुत्तेणं पभावईए

देवीए अत्तएणं मल्लदिन्नेणं कुमारेणं निव्विसए आणत्ते समाणे इहं हव्व-
मागए । तं इच्छामि णं सामी ! तुब्भं बाहुच्छायापरिग्गहिए जाव परि-
वसित्तए । तए णं से अदीणसत्तू राया तं चित्तगरदारयं एवं वयासी -
किन्नं तुमं देवाणुप्पिया ! मल्लदिन्नेणं निव्विसए आणत्ते ? तए णं से
चित्तगरदारए अदीणसत्तुं रायं एवं वयासी - एवं खलु सामी ! मल्लदिन्ने
कुमारे अन्नया कयाइ चित्तगरसेणिं सहावेइ २ एवं वयासी - तुब्भे णं
देवाणुप्पिया ! मम चित्तसभं तं चेव सव्वं भाणियव्वं जाव मम संडासगं
ल्लिंदीवेइ २ निव्विसयं आणवेइ । तं एवं खलु अहं सामी ! मल्लदिन्नेणं
कुमारेणं निव्विसए आणत्ते । तए णं अदीणसत्तू राया तं चित्तगरं एवं
वयासी - से केरिसए णं देवाणुप्पिया ! तुमे मल्लीए तहाणुरूवे^४ निव्व-
त्तिए ? तए णं से चित्तगरे कक्खंतराओ चित्तफलगं नीणेइ २ अदीण-
सत्तुस्स उवणेइ २ एवं वयासी - एस णं सामी ! मल्लीए २ तयाणु-
रूवस्स रूवस्स केइ आगारभावपडोय्यारे निव्वत्तिए । नो खलु सक्का
केणइ देवेण वा जाव मल्लीए २ तयाणुरूवे रूवे निव्वत्तित्तए । तए णं से
अदीणसत्तू पडिरूवजणियहासे दूयं सहावेइ २ एवं वयासी तहेव जाव
पहारेत्थ गमणाए (५) ।

(79) तेणं कालेणं २ पंचाले जणवए कं पिळपुरे नयरे । जिय-
सत्तू नामं राया पंचालाहिवई । तस्स णं जियसत्तुस्स धारिणीपामोक्खं
देवीसहस्सं ओरोहे होत्था । तत्थ णं मिहिलाए चोक्खा नामं परि-
व्वाइया रिउव्वेय जाव सुपरिणिट्ठिया यावि होत्था । तए णं सा चोक्खा
परिव्वाइया मिहिलाए बहूणं राईसर जाव सत्थवाहपभिईणं पुरओ दाण-
धम्मं च सोयधम्मं च तित्थाभिसेयं च आघवेमाणी पन्नवेमाणी परूवे-
माणी उव्वंदसेमाणी विहरइ । तए णं सा चोक्खा अन्नया कयाइ तिदंडं
च कुंडियं च जाव धाउरत्ताओ ४ गेण्हइ २ परिव्वाइगावर्सहाओ पडि-
निक्खमइ २ पविरलपरिव्वाइयासद्धिं संपरिवुडा मिहिलं रायहाणिं
मज्झंमज्झेणं जेणेव कुंभगस्स रत्तो भवणे जेणेव कंन्रंतेउरे जेणेव मल्ली २
तेणेव उवागच्छइ २ उदयपरिफोसिंथाए दब्भोवरि पच्चथुयाए

भिसियाए निसीयइ २ मल्लीए २ पुरओ दाणधम्मं च जाव विहरइ । तए णं मल्ली २ चोक्खं परिवाइयं एवं वयासी - तुब्भे णं चोक्खे ! किंमूलए धम्मे पन्नत्ते ? तए णं सा चोक्खा परिवाइया मल्लिं २ एवं वयासी - अम्हं णं देवाणुपिए ! सोयमूलए धम्मे पन्नत्ते । जं णं अम्हं किंचि असुई भवइ तं णं उदएण य मट्टियाए जाव अविग्घेणं सगं गच्छामो । तए णं मल्ली २ चोक्खं परिवाइयं एवं वयासी - चोक्खा ! से जहानामए केइ पुरिसे रुहरिकयं वत्थं रुहारेणं चेव धोव्वेज्जा अत्थि णं चोक्खा ! तस्स रुहरिकयस्स वत्थस्स रुहारेणं धोव्वमाणस्स काइ सोही ? नो इण्णंठे समट्ठे । एवामेव चोक्खा ! तुब्भे णं पाणाइवाएणं जाव मिच्छादंसणसल्लेणं नत्थि काइ सोही जहा वा तस्स रुहरिकयस्स वत्थस्स रुहारेणं चेव धोव्वमाणस्स । तए णं सा चोक्खा परिवाइया मल्लीए २ एवं वुत्ता समाणी संकिया कंखिया विइगिच्छिया भेयसमावन्ना जाया वि होत्था मल्लीए नो संचाएइ किंचिवि पामोक्खमाइक्खित्तए तुसिणीया संचिट्ठइ । तए णं तं चोक्खं मल्लीए २ बहूओ दासचेडीओ हीलेंति निंदंति खिसंति गरिहंति अप्पेगइयाओ हेरुयालेंति अप्पेगइया मुहमक्कडियाओ करेंति अप्पेगइया वग्घाडीओ करेंति अप्पेगइया तज्जेमाणीओ तालेमाणीओ निच्छुहंति । तए णं सा चोक्खा मल्लीए २ दासचेडियाहिं हीलिज्जमाणी जाव गरहिज्जमाणी आसुरुत्ता जाव मिसिमिसेमाणी मल्लीए २ पओसमावज्जइ २ भिसियं गेण्हइ २ कंनंतेउराओ पडिनिक्खमइ २ मिहिलाओ निग्गच्छइ २ परिवाइयासंपरिवुडा जेणेव पंचालजणवए जेणेव कंपिल्लपुरे तेणेव उवागच्छइ २ बहूणं राईसर जाव परूवेमाणी विहरइ । तए णं से जियसत्तू अन्नया कयाइ अंतेउरपरियालसद्धिं संपरिवुडे एवं जाव विहरइ । तए णं सा चोक्खा परिवाइयासंपरिवुडा जेणेव जियसत्तुस्स रन्नो भवणे जेणेव जियसत्तू तेणेव अणुपविसइ २ जियसत्तुं जएणं विजएणं वद्धावेइ । तए णं से जियसत्तू चोक्खं परिवाइयं एज्जमाणं पासइ २ सीहासणाओ अब्भुट्ठेइ २ चोक्खं सक्कारेइ २ आसणेणं उवनिमंतेइ । तए णं सा चोक्खा उदगपरिफोसियाए जाव भिसियाए निविसइ

जियसत्तुं रायं रज्जे य जाव अंतेउरे य कुसलोदंतं पुच्छइ । तए णं सा चोक्खा जियसत्तुस्स रत्तो दाणधम्मं च जाव विहरइ । तए णं से जियसत्तू अप्पणो ओरोहंसि जायविम्हए चोक्खं एव वयासी - तुमं णं देवाणुप्पिया ! बहूणि गामागर जाव आहिंडंसि बहूण य राईसरगिहाइं अणुप्पविसंहि । तं अत्थियाइं ते कस्सइ रत्तो वा जाव एरिसए ओरोहे दिट्ठपुण्वे जारिसए णं इमे ममं ओरोहे ? तए णं सा चोक्खा परिग्वाइया जियसत्तुं एवं ईसिं अवहसियं करेइ २ एवं वयासी - सरिसए णं तुमं देवाणुप्पिया ! तस्स अगडदहुरस्स । केसं णं देवाणुप्पिए ! से अगडदहुरे ? जियसत्तू ! से जहानामए अगडदहुरे सिया । से णं तत्थ जाए तत्थेव बुद्धिं अन्नं अगडं वा तलीगं वा दहं वा सरं वा सागरं वा अर्पासमाणे मन्नइ-अयं चेव अगडे वा जाव सागरे वा । तए णं तं कूवं अन्ने सामुहए दहुरे हव्वमागए । तए णं से कूवदहुरे तं समुहदहुरं एवं वयासी - से केस णं तुमं देवाणुप्पिया ! कत्तो वा इह हव्वमागए ? तए णं से सामुहए दहुरे तं कूवदहुरं एवं वयासी - एवं खलु देवाणुप्पिया ! अहं सामुहए दहुरे । तए णं से कूवदहुरे तं सामुहयं दहुरं एवं वयासी - केमहालए णं देवाणुप्पिया ! से समुहे ? तए णं से सामुहए दहुरे तं कूवदहुरं एवं वयासी - महालए णं देवाणुप्पिया ! समुहे । तए णं से कूवदहुरे पाएणं लीहं कड्डेइ २ एवं वयासी - एमहालए णं देवाणुप्पिया ! से समुहे ? नो इणट्ठे समट्ठे । महालए णं से समुहे । तए णं से कूवदहुरे पुरत्थिमिल्लाओ तीराओ उप्पिडित्ताणं पच्चत्थिमिल्लं तीरं गच्छइ २ एवं वयासी - एमहालए णं देवाणुप्पिया ! से समुहे ? नो इणट्ठे तहेव । एवामेव तुमंपि जियसत्तू अन्नेसिं बहूणं राईसर जाव सत्थवाहप्पभिईणं भज्जं वा भगिणिं वा धूयं वा सुण्हं वा अपासमाणे जाणसि जारिसए मम चेव णं ओरोहे तारिसए नो अन्नस्स । तं एवं खलु जियसत्तू ! मिहिलाए नयरीए कुंभगस्स धूया पभावईए अत्तिया मलीनामं २ रूवेण य जाव नो खलु अन्ना काइ देवकन्ना वा जारिसिया मली । विदेहवररायकन्नाए छिन्नस्स वि पायंगुट्ठगस्स इमे तव ओरोहे

सयसहरसइमं पि कलं न अग्घइ त्तिकट्टु जामेव दिसं पाउब्भूया तामेव दिसं पडिगया । तए णं से जियसत्तू परिब्बाइयाजाणियहासे दूयं सद्दावेइ जाव पहारेत्थ गमणाए ६ ।

(80) तए णं तेसिं जियसत्तूपामोक्खाणं छण्हं राईणं दूया जेणेव मिहिला तेणेव पहारेत्थ गमणाए । तए णं छप्पि दूयगा जेणेव मिहिला तेणेव उवागच्छंति २ मिहिलाए अग्गुज्जाणंसि पत्तेयं २ खंधावार-निवेसं करेति २ मिहिलं रायहाणि अणुप्पविसंति २ जेणेव कुंभए तेणेव उवागच्छंति २ पत्तेयं करयल जाव साणं २ राईणं वयणाइं निवेदंति । तए णं से कुंभए तेसिं दूयाणं एयमट्ठं सोच्चा आसुरुत्ते जाव तिवालियं भिउडि एवं वयासी - न देमि णं अहं तुब्भं मल्लिं २ । त्तिकट्टु ते छप्पि दूए असक्कारिय असम्माणिय अवदारेणं निच्छुभावेइ । तए णं जियसत्तु-पामोक्खाणं छण्हं राईणं दूया कुंभएणं रत्ता असक्कारिया असम्माणिया अवदारेणं निच्छुभाविआ समाणा जेणेव सगा २ जणवया जेणेव सयाइं २ नगराइं जेणेव सया २ रायाणो तेणेव उवागच्छंति २ करयल जाव एवं वयासी - एवं खलु सामी ! अम्हे जियसत्तुपामोक्खाणं छण्हं रायाणं दूया जमगसमगं चेव जेणेव मिहिला जाव अवदारेणं निच्छु-भावेइ । तं न देइ णं सामी ! कुंभए मल्लिं २ । साणं २ राईणं एयमट्ठं निवेदंति । तए णं ते जियसत्तुपामोक्खा छप्पि रायाणो तेसिं दूयाणं अंतिए एयमट्ठं सोच्चा आसुरुत्ता अन्नमन्नस्स दूयसंपेसणं करेति एवं वयासी - एवं खलु देवाणुप्पिया ! अम्हं छण्हं राईणं दूया जमगसमगं चेव जाव निच्छूढा । तं सेयं खलु देवाणुप्पिया ! कुंभगस्स जत्तं गेण्हि-त्तए त्तिकट्टु अन्नमन्नस्स एयमट्ठं पडिसुणेंति २ ण्हाया सन्नद्धा हत्थिखंध-वरगया सकोरिंटमल्लदामा जाव सेयवरचामराहिं महयाहयगयरहपवर-जोहकलियाए चाउरंगिणीए सेणाए साद्धिं संपरिवुडा सत्तिवड्डीए जाव रवेणं सएहिंतो २ नगरोहिंतो जाव निग्गच्छंति २ एगयओ मिलायंति जेणेव मिहिला तेणेव पहारेत्थ गमणाए । तए णं कुंभए राया इमीसे कहाए लद्धे सैमाणे बलवाउयं सद्दावेइ २ एवं वयासी

- खिप्पामेव हय जाव सेन्नं सन्नाहेह जाव पच्चप्पिणंति । तए णं कुंभए ण्हाए सन्नद्धे हत्थिखंधवरगए जाव सेयवरचामरणे महया मिहिलं मज्झमज्झेणं निज्जाइ २ विदेहजणवयं मज्झमज्झेणं जेणेव देसंअंते तेणेव खंधावारनिवेसं करेइ २ जियसत्तूपामोक्खा छप्पि य रायाणो पडिवाले-माणे जुज्झसज्जे पडिचिट्ठइ । तए णं ते जियसत्तूपामोक्खा छप्पि रायाणो जेणेव कुंभए तेणेव उवागच्छंति २ कुंभएणं रत्ता सद्धिं संपलगा यावि होत्था । तए णं जियसत्तूपामोक्खा छप्पि रायाणो कुंभयं रायं हय-महियपवरवीरघाइयविबडियच्चिंधयछत्तपडागं किच्छप्पाणोवगयं दिसो-दिसं पडिसेहंति । तए णं से कुंभए जियसत्तूपामोक्खेहिं छहिं राईहिं हयमहिय जाव पडिसेहिए समाने अत्थामे अबले अवीरिए जाव अधार-णिज्जमित्तिकट्टु सिग्धं तुरियं जाव वेइयं जेणेव मिहिला तेणेव उवा-गच्छइ २ मिहिलं^४ अणुपविसइ २ मिहिलाए दुवाराइं पिहेइ २ रोहसज्जे चिट्ठइ । तए णं ते जियसत्तूपामोक्खा छप्पि रायाणो जेणेव मिहिला तेणेव उवागच्छंति २ मिहिलं रायहाणिं निस्संचारं निरुच्चारं सव्वओ समंता ओरुंभित्ताणं चिट्ठंति । तए णं से कुंभए मिहिलं रायहाणिं रूद्धं जाणित्ता अब्भितरियाए उवट्ठाणसालाए सीहासणवरगए तेसिं जियसत्तूपामोक्खाणं छण्हं राईणं छिहाणि यं विवराणि य मम्मणि य अलभमाणे बहूहिं आएहि य उवाएहि य उप्पत्तियाहि य ४ बुद्धीहिं परिणामेमाणे २ किंचि आयं वा उवायं वा अलभमाणे ओहयमणसंकप्पे जाव श्रियायइ । इमं च णं मल्ली २ ण्हाया जाव बहूहिं खुज्जाहिं परिबुडा जेणेव कुंभए तेणेव उवागच्छइ २ कुंभगस्स पायग्गहणं करेइ ! तए णं कुंभए मल्लिं २ नो आढाइ नो परियाणाइ तुसिणीए संचिट्ठइ । तए णं मल्ली २ कुंभगं एवं वयासी - तुब्भे णं ताओ ! अन्नया ममं एज्जमाणं जाव निवेसेह । किन्नं तुब्भं अज्ज ओहय जाव श्रियायह ? तए णं कुंभए मल्लिं २ एवं वयासी - एवं खलु पुत्ता ! तव कज्जे जियसत्तूपामोक्खेहिं छहिं राईहिं दूया संपे-सिया । ते णं मए असक्कारिया जाव निच्छूढा । तए णं जियसत्तूपामोक्खा तेसिं दूयाणं अंतिए एयमट्ठं सोच्चा परिकुविया समाना मिहिलं

रायहाणि निस्संचारं जाव चिट्ठंति । तए णं अहं पुत्ता तोसिं जियसत्तु-
 पामोक्खाणं छण्हं राईणं अंतराणि अलभमाणे जाव झियामि । तए णं सा
 मल्ली २ कुंभगं रायं एवं वयासी — मा णं तुब्भे ताओ ! ओहयमणसंकप्पा
 जाव झियायह । तुब्भे णं ताओ ! तोसिं जियसत्तुपामोक्खाणं छण्हं राईणं
 पत्तेयं २ रहसिए दूयसंपेसे करेह एगमेगं एवं वयह — तव देमि
 मल्लिं २ तिकट्टु संज्ञाकालसमयंसि पविरलमणुस्सांसि निस्संतपडिनिस्स-
 तंसि पत्तेयं २ मिहिलं रायहाणि अणुप्पविसेह २ गब्भघरणसु अणुप्प-
 विसेह मिहिलाए रायहाणीए दुवाराइं पिहेह २ रोहसंज्जे चिट्ठह । तए
 णं कुंभए एवं तं चेव जाव पवेसेइ रोहसंज्जे चिट्ठइ । तए णं ते जिय-
 सत्तुपामोक्खा छप्पि रायाणो कल्लं जाव जलंते जालंतरोहिं कणगमयं
 मत्थयछिड्डं पडमुप्पलपिहाणं पडिमं पासंति एस णं मल्ली २ तिकट्टु
 मल्लीए २ रूवे य जोव्वणे य लाव्वणे य मुच्छिया गिद्धा जाव अज्झो-
 ववन्ना अणिमिसाए दिट्ठीए पेहमाणा २ चिट्ठंति । तए णं सा मल्ली २
 णहाया जाव पायच्छित्ता सव्वालंकारविभूसिया बहूहिं खुज्जाहिं जाव
 परिक्खित्ता जेणेव जालघरणे जेणेव कणगपडिमा तेणेव उवागच्छइ २
 तीसे कणगपडिमाए मत्थयाओ तं पडमं अवणेइ । तए णं गंधे निद्धा-
 बेई से जहानामए अहिमडे इ वा जाव असुभतराए चेव । तए णं ते
 जियसत्तुपामोक्खा तेणं असुभेणं गंधेणं अभिभूया समाणा सएहिं २
 उत्तरिज्जेहिं आसाइं पिहेति २ परम्मुहा चिट्ठंति । तए णं सा मल्ली २
 ते जियसत्तुपामोक्खे एवं वयासी — किं णं तुब्भे देवाणुप्पिया ! सएहिं २
 उत्तरिज्जेहिं जाव परम्मुहा चिट्ठह ? तए णं ते जियसत्तुपामोक्खा
 मल्लिं २ एवं वयंति — एवं खलु देवाणुप्पिए ! अम्हे इमेणं असुभेणं
 गंधेणं अभिभूया समाणा सएहिं २ जाव चिट्ठामो । तए णं मल्ली २
 ते जियसत्तुपामोक्खे एवं वयासी — जई तावँ देवाणुप्पिया ! इमीसे
 कणग जाव पडिमाए कल्लाकल्लिं ताओ मणुन्नाओ असणाओ ४ एगमेगे
 पिंडे पक्खिप्पमाणे २ इमेयारूवे असुभे पोग्गले परिणामे इमस्स पुण
 ओराणियसरीरस्स खेलासवस्स वंतासवस्स पित्तासवस्स सुक्कासवस्स

सोणियपूयासवस्स दुरूयऊसासनीसासस्स दुरूयमुत्तपूइयपुरीसपुण्णस्स सडण जाव धम्मस्स केरिसए य परिणामे भविस्सइ ? तं मा णं तुब्भे देवाणु-
 प्पिया ! माणुस्सएसु कामभोगेसु सज्जह रज्जह गिज्झह मुज्झह अज्झो-
 ववज्जह । एवं खलु देवाणुप्पिया ! अम्हे ईमे तच्चे भवग्गहणे अवर-
 विदेहवासे सलिलावईविजए वीयसोगाए रायहाणीए महब्बलपामोक्खा
 सत्तं पियबालवयंसया रायाणो होत्था सहजाया जाव पव्वइया । तए णं
 अहं देवाणुप्पिया ! इमेणं कारणेणं इत्थीनामगोयं कम्मं निर्व्वत्तेमि —
 जइ णं तुब्भे चउत्थं उवसंपज्जित्ताणं विहरह तौओ णं अहं छट्ठं उव-
 संपज्जित्ताणं विहरामि सेसं तहेव सव्वं । तए णं तुब्भे देवाणुप्पिया ! काल-
 मासे कालं किच्चा जयंते विमाणे उववन्ना । तत्थ णं तुब्भं देसूणाइं
 बत्तीसाइं सागरोवमाइं ठिई । तए णं तुब्भे ताओ देवलोगाओ अणंतं
 चयं चइत्ता इहेव जंबुद्दीवे २ सौइं २ रज्जाइं उवसंपज्जित्ताणं विहरह ।
 तए णं अहं ताओ देवलोगाओ आउक्खएणं जाव दारियत्ताए पक्कैयाया ।
 किं च तयं पम्हुट्ठं जं थं तया भो जयंतपवरंमि । वुत्था समयनिबद्धं
 देवा तं संभरह जाइं ॥१॥ तए णं तेसिं जियसत्तुपामोक्खाणं छण्हं
 राईणं मल्लीए २ अंतिए एयमट्ठं सोच्चा २ सुभेणं परिणामेणं पसत्थेणं
 अज्झवसाणेणं लेसाहिं विसुज्झमाणीहिं तयावरणिज्जाणं कम्माणं
 खओवसमेणं ईहापूह जाव सन्निजाईसरणे समुप्पन्ने एयमट्ठं सम्मं अभि-
 समागच्छंति । तए णं मल्ली अरहा जियसत्तुपामोक्खे छप्पि रायाणो
 समुप्पन्नजाईसरणे जाणित्ता गम्भघराणं दाराइं विहीडेइ । तए णं जिय-
 सत्तुपामोक्खा जेणेव मल्ली अरहा तेणेव उवागच्छंति । तए णं महब्बल-
 पामोक्खा सत्तं पियबालवयंसा एगयओ अभिसमन्नागया वि होत्था ।
 तए णं मल्ली अरहा ते जियसत्तुपामोक्खे छप्पि रायाणो एवं वयासी—
 एवं खलु अहं देवाणुप्पिया ! संसारभउन्विग्गा जाव पव्वयामि ।
 तं तुब्भे णं किं करेह किं ववसह किं भे हियसामत्थे ? तए णं
 जियसत्तुपामोक्खा मल्लिं अरहं एवं वयासी — जइ णं तुब्भे
 देवाणुप्पिया ! संसार जाव पव्वयह अम्हाणं देवाणुप्पिया ! के अन्ने

आलंबणे वा आहारे वा पडिबंधे वा ? जह चेव णं देवाणुप्पिया ! तुब्भे अम्हं इओ तच्चे भवग्गहणे बहूसु कज्जेसु य मेढी पमाणं जाव धम्मधुरा होत्था तह चेव णं देवाणुप्पिया ! इण्हिण्णि जाव भविस्सह । अम्हे वि णं देवाणुप्पिया ! संसारभउव्विग्गा जाव भीया जम्मणमरणाणं देवाणुप्पियासद्धिं मुंडा भवित्ता जाव पव्वयामो । तए णं मल्ली अरहा ते जियसत्तुपामोक्खे एवं वयासी — जइ णं तुब्भे संसार जाव मए सद्धिं पव्वयह तं गच्छह णं तुब्भे देवाणुप्पिया ! सएहिं २ रज्जेहिं जेद्वपुत्ते रज्जे ठावेह २ पुरिससहस्सवाहिणीओ सीयाओ दुरूहह २ मम अंतियं पाउब्भवह । तए णं ते जियसत्तुपामोक्खा मल्लिस्स अरहओ एयमट्ठं पडिसुणेंति । तए णं मल्ली अरहा ते जियसत्तुपामोक्खा गहाय जेणेव कुंभए तेणेव उवागच्छइ २ कुंभगस्स पाएसु पाडेइ । तए णं कुंभए ते जियसत्तुपामोक्खा विउलेणं असणेणं ४ पुप्फवत्थगंधमल्लालं-कारेणं सक्कारेइ जाव पडिविसज्जेइ । तए णं ते जियसत्तुपामोक्खा कुंभएणं रत्ता विसज्जिया समाणा जेणेव साइं २ रज्जाइं जेणेव नगराइं तेणेव उवागच्छंति २ सगाइं २ रज्जाइं उवसंपज्जित्ताणं विहरंति । तए णं मल्ली अरहा संवच्छरावसाणे निक्खमिस्सामि त्ति मणं पहारेइ ।

(81) तेणं कालेणं २ सक्कस्स आसणं चलइ । तए णं सक्के देविंदे देवराया आसणं चलयं पासइ २ ओहिं पउंजइ २ मल्लिं अरहं ओहिणा आभोएइ २ इमेयारूवे अज्झत्थिए जाव समुप्पज्जित्था — एवं खलु जंबुदीवे २ भारहे वासे मिहिलाए कुंभगस्स रत्तो मल्ली अरहा निक्खमिस्सामि त्ति मणं पहारेइ । तं जीर्थमेयं तीयपच्चुप्पन्नमणागयाणं सक्काणं अरहंताणं भगवंताणं निक्खममाणाणं इमेयारूवं अत्थसंपयाणं दलइत्तए तंजहा — तिण्णेव य कोडिसया अट्ठासीइं च हुंति कोडीओ । अंसिइं च सय-सहस्सा इंदा दलयंति अरहाणं ॥१॥ एवं संपेहेइ २ वेसमणं देवं सदावेइ २ एवं वयासी — एवं खलु देवाणुप्पिया ! जंबुदीवे २ भारहे वासे जाव अंसिइं च सयसहस्साइं दलइत्तए । तं गच्छह णं देवाणुप्पिया ! जंबु-दीवे भारहे वासे मिहिलाए कुंभगभवणंसि इमेयारूवं अत्थसंपयाणं साह-

राहि २ खिप्पामेव मम एयमाणत्तियं पच्चप्पिणाहि । तए णं से वेसमणे देवे सक्केणं देविंदेणं एवं वुत्ते द्दुत्ते करयल जाव पडिसुणेइ २ जंभए देवे सद्दावेइ २ एवं वयासी — गच्छह णं तुब्भे देवाणुप्पिया ! जंबुद्दीवं २ भारंहं वासं मिहिलं रायहाणिं कुंभगस्स रत्तो भवणंसि तिन्नेव य कोडिसया अट्ठासीयं च कोडीओ असीयं च सयसहस्साइं अयमेयारूवं अत्थसंपयाणं साहरह २ मम एयमाणत्तियं पच्चप्पिणह । तए णं ते जंभगा देवा वेसमणेणं जाव सुणेत्ता उत्तरपुरत्थिमं दिसीभागं अवक्कमंति जाव उत्तरवेउत्थियाइं रूवाइं विउव्वंति २ ताए उक्किट्ठाए जाव वीइवयमाणा जेणेव जंबुद्दीवे २ भारहे वासे जेणेव मिहिला रायहाणी जेणेव कुंभगस्स रत्तो भवणे तेणेव उवागच्छंति २ कुंभगस्स रत्तो भवणंसि तिन्नि कोडिसया जाव साहरंति २ जेणेव वेसमणे देवे तेणेव उवागच्छंति २ करयल जाव पच्चप्पिणंति । तए णं से वेसमणे देवे जेणेव सक्के ३ तेणेव उवागच्छइ २ करयल जाव पच्चप्पिणइ । तए णं मल्ली अरहा कल्लाकल्लिं जाव मागहओ पायरासो त्ति बहूणं सणाहाण य अणाहाण य पहियाण य पंथियाण य कैरोडियाण य कप्पडियाण य एगमेगं हिरण्णकोडिं अट्ठ य अणूणाइं सयसहस्साइं इमेयारूवं अत्थसंपयाणं दलयइ । तए णं कुंभए मिहिलाए रायहाणीए तत्थ २ तहिं २ देसे २ बहूओ महाणससालाओ करेइ । तत्थ णं बहवे मणुया दिन्नभइभत्तवेयणा विउलं असणं ४ उवक्खडेंति जे जहा आगच्छंति तंजहा — पंथिया वा पहिया वा करोडिया वा कप्पडिया वा पासंडत्था वा गिहत्था वा तस्स य तहा आसत्थस्स वीसत्थस्स सुहासणवरगयस्स तं विउलं असणं ४ परिभाएमाणा परिवेसेमाणा विहरंति । तए णं मिहिलाए सिंघाडग जाव बहुजणो अन्नमन्नस्स एवमाइक्खइ — एवं खलु देवाणुप्पिया ! कुंभगस्स रत्तो भवणंसि सव्वकामगुणियं किमिच्छियं विपुलं असणं ४ बहूणं समणाण य जाव परिवेसिज्जइ । वरवरिया घोसिज्जइ किमिच्छियं दिज्जए बहुविहीयं । सुरअसुरदेवदाणवनरिंदमहियाण निक्खमणे ॥१॥ तए णं मल्ली अरहा संवच्छरेणं तिन्नि कोडिसया अट्ठासीयं च होति कोडीओ असीयं च सयसहस्साइं

इमेयारूवं अत्थसंपयाणं दलइत्ता निक्खमामिप्ति मणं पहारेइ ।

(82) तेणं कालेणं २ लोगंतिया देवा बंभलोए कप्पे रिट्ठे विमाण-
पत्थडे सएहिं २ विमाणेहिं सएहिं २ पासायवडिंसएहिं पत्तेयं २ चउहिं
सामाणियसाहस्सीहिं तिहिं परिसाहिं सत्ताहिं अणिएहिं सत्ताहिं अणि-
याहिवईहिं सोलसहिं आयरक्खदेवसाहस्सीहिं अन्नेहि य बहूहिं लोगंति-
एहिं देवेहिं सद्धिं संपरिवुडा महयाहयनट्टगीयवाइय जाव रवेणं भुंज-
माणा विहरंति तंजहा— सारस्सयमाइच्चा वण्णी वरुणा य गइतोया य ।
तुसिया अन्वाबाहा अग्गिच्चा चेव रिट्ठा य ॥१॥ तए णं तेसिं लोगंति-
याणं देवाणं पत्तेयं २ आसणाइं चलंति तहेव जाव अरहंताणं निक्खम-
माणणं संबोहणं करित्तए त्ति तं गच्छामो णं अम्हे वि मल्लिस्स अरहओ
संबोहणं करेमो त्तिकट्ठु एवं संपेहेति २ उत्तरपुरत्थिमं दिसीभागं
वेउत्विस्समुग्घाएणं समोहणांति संखेज्जाइं जोयणाइं एवं जहा जंभगा जाव
जेणेव मिहिला रायहाणी जेणेव कुंभगस्स रन्नो भवणे जेणेव मल्ली अरहा
तेणेव उवागच्छंति २ अंतलिक्खपडिवन्ना सखिखिणियाइं जाव
वत्थाइं पवरपरिहिया करयल जाव ताहिं इट्ठाहिं एवं वयासी —
बुज्झाहि भगवं लोगनाहा ! पवत्तेहि धम्मतित्थं जीवाणं हियसुह-
निस्सेयसकंरं भविस्सइ त्तिकट्ठु दोच्चंपि तच्चंपि एवं वयंति मल्लिं अरहं
वंदंति नमंसंति २ जामेव दिसिं पाउब्भूया तामेव दिसिं पडिगया ।
तए णं मल्ली अरहा तेहिं लोगंतिएहिं देवेहिं संबोहिए समाणे जेणेव
अम्मापियरो तेणेव उवागच्छइ २ करयल जाव एवं वयासी — इच्छामि
णं अम्मयाओ ! तुब्भेहिं अब्भणुन्नाए मुंडे भवित्ता जाव पव्वइत्तए ।
अहासुहं देवाणुप्पिया ! मा पडिबधं करेहं । तए णं कुंभए राया कोडुं-
वियपुरिस्से सद्दावेइ २ एवं वयासी — खिप्पामेव अट्टसहस्सं सोवणिण-
याणं कलसाणं जाव भोमेज्जाणं अन्नं च महत्थं जाव तित्थयराभिसेयं
उवट्ठवेह जाव उवट्ठवेंति । तेणं कालेणं २ चमरे असुरिंदे जाव अच्चुय-
पज्जवसाणा आगया । तए णं सक्के आमिओगिए देवे सद्दावेइ २ एवं
वयासी — खिप्पामेव अट्टसहस्सं सोवणिणयाणं जाव अन्नं च तं विपुलं

उवट्टवेह जाव उवट्टवेति । तेवि कलसा ते चेव कलसे अणुपविट्ठा । तए णं से सक्के देविंदे देवराया कुंभए य राया मल्लि अरहं सीहासणंसि पुरत्थाभिमुहं निवेसेइ अट्टसहस्सेणं सोवण्णिगयाणं जाव अभिसिंचन्ति । तए णं मल्लिस्स भगवओ अभिसेए वट्टमाणे अप्पेगइया देवा मिहिलं च सत्थिंतरवाहिरं जाव सव्वओ समंता संपरिधावन्ति । तए णं कुंभए राया दोच्चंपि उत्तरावक्कमणं जाव सव्वालंकारविभूसियं करेइ २ कोडुं-वियपुरिसे सदावेइ २ एवं वयासी — खिप्पामेव मणोरमं सीयं उवट्टवेह ते उवट्टवेति । तए णं सक्के आभिओगिए देवे वयासी — खिप्पामेव अणेगखंभ जाव सीयं उवट्टवेह जाव सावि सीया तं चेव सीयं अणुप्पविट्ठा । तए णं मल्ली अरहा सीहासणाओ अब्भुट्ठेइ २ जेणेव मणोरमा सीया तेणेव उवागच्छइ २ मणोरमं सीयं अणुपयाहिणीकरेमाणा मणोरणं सीयं दुरूहइ २ सीहासणवरगए पुरत्थाभिमुहे सन्निसण्णे । तए णं कुंभए अट्टारस सेणिप्पसेणीओ सदावेइ २ एवं वयासी — तुब्भे णं देवाणुप्पिया ! ण्हाया जाव सव्वालंकारविभूसिया मल्लिस्स सीयं परिवहह जाव परिवहन्ति । तए णं सक्के ३ मणोरमाए सीयाए दक्खिणिल्लं उवरिल्लं बाहं गेण्हइ । ईसाणे उत्तरिल्लं उवरिल्लं बाहं गेण्हइ । चमरे दाहिणिल्लं हेट्ठिल्लं बली उत्तरिल्लं हेट्ठिल्लं अवसेसा देवा जहारिहं मणोरमं सीयं परिवहन्ति — पुण्वि उक्खित्ता माणु-सेहिं सौ हट्ठरोमकूवेहिं । पच्छा वहन्ति सीयं असुरिंदसुरिंदनागिंदा ॥१॥ चलचवलकुंडलधरा सच्छंदविउन्वियाभरणधारी । देविंददाणविंदा वहन्ति सीयं जिणिंदस्स ॥२॥ तए णं मल्लिस्स अरहओ मणोरमं सीयं दुरूढस्स इमे अट्टमंगलगा पुरओ अहाणुपुण्वेणं एवं निग्गमो जहा जमालिस्स । तए णं मल्लिस्स अरहओ निक्खममाणस्स अप्पेगइया देवा मिहिलं आसिय जाव सत्थिंतरवासविहिगाहा जाव परिधावन्ति । तए णं मल्ली अरहा जेणेव सहस्संबवणे उज्जाणे जेणेव असोगवरपायवे तेणेव उवागच्छइ २ सीयाओ पच्चोरुहइ २ आभरणालंकारं पभावई पडिच्छइ । तए णं मल्ली अरहा सयमेव पंचमुट्ठियं लोयं करेइ । तए णं सक्के ३

मल्लिस्स केसे पडिच्छइ खीरोदगसमुदे साहरइ । तए णं मल्ली अरहा नमोत्थु णं सिद्धाणं तिकट्ठु सामाइयचारित्तं पडिवज्जइ । जं समयं च णं मल्ली अरहा चारित्तं पडिवज्जइ तं समयं च णं देवाणं य माणुसाणं य निग्घोसे तुडियणीए गीयवाइयनिग्घोसे य सक्कवयण-संदेसेणं निलुक्के यावि होत्था । जं समयं च णं मल्ली अरहा सामाइयचारित्तं पडिवज्जे तं समयं च णं मल्लिस्स अरहओ माणुस-धम्माओ उत्तरिए मणपज्जवनाने समुप्पन्ने । मल्ली णं अरहा जे से हेमंताणं दोब्बे मासे चउत्थे पक्खे पोससुद्धे तस्स णं पोससुद्धस्स एक्का-रसीपक्खेणं पुव्वण्हकालसमयांसि अट्टमेणं भत्तेणं अपाणएणं अस्सिणीहिं नक्खत्तेणं जोगमुवागएणं तिहिं इत्थीसएहिं अहिंभतरियाए परिसाए तिहिं पुरिससएहिं बाहिरियाए परिसाए सद्धिं मुंडे भवित्ता पव्वइए । मल्लिं अरहं इमे अट्ट नायकुमारा अणुपव्वइंसु तंजहा — नंदे य नंदिमित्ते सुमित्त-बलमित्तभाणुमित्ते य । अमरवइ अमरसेणे महसेणे चेव अट्टमए ॥१॥ तए णं ते भवणवई ४ मल्लिस्स अरहओ निक्खमणमहिंमं करेति २ जेणेव नंदीसरे अट्टाहियं करेति जाव पडिगया । तए णं मल्ली अरहा जं चेव दिवसं पव्वइए तस्सेव दिवसस्स पुव्वीवरण्हकालसमयांसि असोग-वरपायवस्स अहे पुढाविसिलापट्टयांसि सुहासणवरगयस्स सुहेणं परिणा-मेणं पसत्थाहिं लेसाहिं तयावरणकम्मरयविकरणकरं अपुव्वकरणं अणु-पविट्ठस्स अणंते जाव केवलवरनाणदंसणे समुप्पन्ने ।

(83) तेणं कालेणं २ सव्वदेवाणं आसणाइं चलेंति समोसढा सुणेति अट्टाहियं महानंदीसरं जाव जामेव दिसिं पाउब्भूया तामेव पडि-गया । कुंभए वि निग्गच्छइ । तए णं ते जियसत्तुपामोक्खा छप्पि य रायाणो जेट्टपुत्ते रज्जे ठावेत्ता पुरिससहस्सवाहिणीयाओ दुरूढा सव्विड्डीए जेणेव मल्ली अरहा जाव पज्जुवांसंति । तए णं मल्ली अरहा तीसे महइमहा-लियाए कुंभगस्स तेसिं च जियसत्तुपामोक्खाणं धम्मं परिकहेइ । परिसा जामेव दिसिं पाउब्भूया तामेव दिसिं पडिगया । कुंभए समणोवासए जाए पडिगए पभावई पि । तए णं जियसत्तुपामोक्खा छप्पि रायाणो

धम्मं सोच्चा आलित्तए णं भंते ! जाव पव्वइया जाव चोइसपुव्विणो
 अणंते केवली सिद्धा । तए णं मल्ली अरहा सहसंबवणाओ पडिनिक्खमइ
 २ बहिया जणवयविहारं विहरइ । मल्लिस्स णं भिसं गपामोक्खा अट्ठावीसं
 गणा अट्ठावीसं गणहरा होत्था । मल्लिस्स णं अरहओ अट्ठचत्ताल्लीसं
 समणसाहस्सीओ उक्कोसिया समणसंपया होत्था । बंधुमइपामोक्खाओ
 पणपन्नं अज्जियासाहस्सीओ उक्कोसेणं । सुव्वयपामोक्खाओ साव-
 याणं एगा सयसाहस्सी चुलसीइं सहस्सा सुणंदापामोक्खाओ सावि-
 याणं तिण्णि सयसाहस्सीओ पण्णाट्ठिं च सहस्सा छच्चसंया चोइस-
 पुव्वीणं संपया । वीसं सया ओहिनाणीणं बत्तीसं सया केवलनाणीणं
 पण्णीतीसं सया वेउव्वियाणं अट्ठसया मणपज्जवनाणीणं चोइससया
 वाईणं वीसं सया अणुत्तरोववाइयाणं । मल्लिस्स णं अरहओ दुविहा
 अंतगंडभूमी होत्था तंजहा — जुगंतकैरभूमी परियायंतकरंभूमी य
 जाव वीसइमाओ पुरिसजुगाओ जुगंतकैरभूमी दुव्वीलसपरियाए अंत-
 मकासी । मल्ली णं अरहा पणवीसं धणू उड्डं उच्चत्तेणं वण्णेणं
 पियंगुसामे समचउरंससंठाणे वज्जरिसहनारायसंधयणे मज्झदेसे सुहं-
 सुहेणं विहरित्ता जेणेव सम्मेए पव्वए तेणेव उवागच्छइ २ संभेयसेल-
 सिहरे पाओवगमणुववन्ने । मल्ली णं अरहा एणं वाससयं अगारवास-
 मज्झे पणपन्नं वाससहस्साइं वाससयऊणाइं केवल्लिपरियागं पाउणित्ता
 पणपन्नं वाससहस्साइं सव्वाउयं पालइत्ता जे से गिम्हाणं पढमे मासे
 दोच्चे पक्खे चेतसुद्धे तस्स णं चेतसुद्धस्स चउत्थीए भरणीए नक्खत्तेणं
 अद्धरत्तकालसमयंसि पंचहिं अज्जियासएहिं अहिंभतरियाए परिसाए
 पंचहिं अणगारसएहिं बाहिरियाए परिसाए मासिएणं भत्तेणं अपाणएणं
 वग्घारियपाणी खीणे वेयणिज्जे आउए नामगोए सिद्धे¹⁷ । एवं परिनिब्बा-
 नमहिमा भाणियव्वा जहा जुवुदीवण्णत्तीए नंदीसरे अट्ठाहियाओ पडिगयाओ ।

एवं खलु जंबू ! समणेणं ३ अट्ठमस्स नायज्झयणस्स अयमट्ठे
 पन्नत्ते त्तिवेमि ॥८॥

॥ नवमं अज्झयणं ॥

(84) जइ णं भंते । समणेणं भगवया महावीरेणं जाव संपत्तेणं
 अट्टमस्स नायज्झयणस्स अयमट्ठे पन्नत्ते नवमस्स णं भंते ! नायज्झयणस्स
 समण्णेणं जाव संपत्तेणं के अट्ठे पन्नत्ते ? एवं खलु जंबू ! तेणं कालेणं
 तेणं समएणं चंपा नामं नयरी होत्था । पुण्णभदे चेइए । तत्थ णं माकंदी
 नामं सत्थवाहे परिवसइ अट्ठे जाव अपरिभूए । तस्सं णं भद्दा नामं
 भारिया होत्था । तीसे णं भद्दाए अत्तया दुवे सत्थवाहदारया होत्था
 तंजहा — जिणपालिई य जिणरक्खिए य । तए णं तेसिं मागंदियदारगाणं
 अन्नया कयाइ एगयओ इमेयारूवे मिहोकहासमुल्लावे समुप्पज्जित्था —
 एवं खलु अम्हे लवणसमुदं पोयवहणेणं एक्कारस वारा ओगाढा सव्वत्थ
 वि य णं लद्धट्ठा कयकज्जा अणहसमग्गा पुणरवि नियगघरं हव्वमागया ।
 तं सेयं खलु अम्हं देवाणुप्पिया ! दुवालसमंपि लवणसमुदं पोयवहणेणं
 ओगाहित्तए त्तिकट्ठु अन्नमन्नस्स एयमट्ठं पडिसुणेंति २ जेणेव अम्मा-
 पियरो तेणेव उवागच्छंति २ एवं वयासी — एवं खलु अम्हे अम्मयाओ !
 एक्कारस वारा तं चेव जाव नियगघरं हव्वमागया । तं इच्छामो णं अम्म-
 याओ तुब्भेहिं अब्भणुन्नाया समाणा दुवालसलवणसमुदं पोयवहणेणं
 ओगाहित्तए । तए णं ते मागंदियदारए अम्मापियरो एवं वयासी^४ —
 इमे मे^५ जाया ! अज्जग जाव परिभाएत्तए । तं अणुहोह ताव जाया !
 विपुले माणुस्सए इड्डीसक्कारसमुदए । किं मे^६ सपच्चवाएणं निरालंबणेणं
 लवणसमुदोत्तारेणं ? एवं खलु पुत्ता ! दुवालसमी जत्ता सोवसग्गा
 यावि भवइ । तं मा णं तुब्भे दुवे पुत्ता ! दुवालसमंपि लवण जाव
 ओगाहेह । मा हु तुब्भं सरीरस्स वावत्ती भविस्सइ । तए णं ते माकंदिय-
 दारगा अम्मापियरो दोच्चंपि तच्चंपि एवं वयासी — एवं खलु अम्हे
 अम्मयाओ ! एक्कारस वारा लवण जाव ओगाहित्तए । तए णं ते
 माकंदियदारए अम्मापियरो जाहे नो संचाएंति बहूहिं आघवणाहिं य
 पण्णवणाहिं य ताहे अक्कामा चेव एयमट्ठं अणुमन्नित्था । तए णं
 ते माकंदियदारगा अम्मापिउहिं अब्भणुन्नाया समाणा गणिमं च

धरिमं च मेज्जं च पारिच्छेज्जं च जहा अरहन्नगस्स जाव लवणसमुद्दं
बहूद्दं जोयणसयाद्दं ओगाढा ।

(85) तए णं तेसिं माकंदियदारगाणं अणेगाद्दं जोयणसयाद्दं ओगा-
ढाणं समाणाणं अणेगाद्दं उप्पाइयसयाद्दं पाउब्भूयाद्दं तंजहा — अकाले
गज्जियं जाव थणियसद्दे कालियवाए तत्थ समुट्ठिएं । तए णं सा नावा तेणं
कालियवाएणं आहुणिज्जमाणी २ संचालिज्जमाणी २ संखोभिज्जमाणी
२ सलिलतिक्खवेगेहिं अइवट्ठिज्जमाणी २ कोट्टिमंसि करतलाहए
विव तिंदूसए तत्थेव २ ओवयमाणी य उप्पयमाणी य उप्पयमाणी विव
धरणीयलाओ सिद्धविज्जा विज्जाहरकन्नगा ओवयमाणी विव गगण-
तलाओ भट्ठविज्जा विज्जाहरकन्नगा विपलायमाणी विव महारुलवेग-
वित्तासिया भुयगवरकन्नगा धावमाणी विव महाजैणरसियसद्दवित्तत्था
ठाणभट्ठा आसकिसोरी निगुंजमाणी विव गुरुजणदिट्ठावरहा सुजणकुल-
कन्नगा घुम्ममाणी विव वीचिपहारसयतालिया गलिर्यलंबणा विव गगण-
तलाओ रोयमाणी विव सलिलभिन्नगंठिविप्पइरमाणं थोरंसुवाएहिं नवबहू
उवरयभत्तुया विलवमाणी विव परचक्करायाभिरोहिया परममहब्भयाभिहुया
महापुरवरी झायमाणी विव कवडच्छोर्मणपओगजुत्ता जोगपरिन्वाइया
नीससमाणी विव महाकंतरविणिग्गयपरिस्संता परिणयवया अम्मया
सोयमाणी विव तवचरणखीणपरिभोगा चवणकाले देववरवहू संचुणिय-
कट्टकूवरा भग्गमेढिमोडियसहस्समाला सूलाइयवंकपरिमासा फलहंतर-
तडतडेंतफुट्टंतसंधिवियलंतलोहखीलिया सव्वंगवियंभिया परिसडियरज्जु-
विसरंतसव्वगत्ता आमगमल्लगभूया अकयपुण्णजणमणोरहो विव चिंति-
ज्जमाणगुरुद्दं हाहाकयकणधारनो^१वियवाणियगज्जणकम्मकर^२विलविया
नाणाविहरयणपणियसंपुण्णा बहूहिं पुरिससएहिं रोयमाणेहिं कंदमाणेहिं
सोयमाणेहिं तिप्पमाणेहिं विलवमाणेहिं एगं महं अंतोजलगयं गिरिसिहर-
मासाइत्ता संभग्गकूवतोरणा मोडियज्झयदंडा वलयसयखंडिया कडकडैस्स
तत्थेव विद्दवं उवगया । तए णं तीए नावाए भिज्जमाणीए ते बहवे
पुरिसा विपुलपणियंभंडमायाए अंतोजलंभि निर्मज्जावि यावि होत्था ।

(86) तए णं ते माकंदियदारगा छेया दक्खा पत्तट्ठा कुसला मेहावी निउणसिप्पोवगया बहुसु पोयवहणसंपराएसु कयकरणा लद्धविजया अमूढा अमूढहत्था एगं महं फलगखंडं आसादेति । जंसि च णं पए-संसि से पोयवहणे विवन्ने तंसि च णं पएसंसि एगे महं रयणदीवे नामं दीवे होत्था अणेगाइं जोयणाइं आयामविकखंभेणं अणेगाइं जोयणाइं परिकखेवेणं नाणादुमसंडमंडिउहेसे सस्सिरीए पासाईए दरिसणिज्जे अभिरूवे पडिरूवे । तस्स णं बहुमज्झदेसभाए एत्थ णं महं एगे पासायवडेंसए होत्था अब्भुगयमूसिए जाव सस्सिरीयरूवे पासाईए ४ । तत्थ णं पासायवडेंसए रयणदीवदेवया नामं देवया परिवसइ पावा चंडा रुद्धा खुद्धा साहसिया । तस्स णं पासायवडेंसयस्स चउदिंसि चत्तारि वणसंडा पन्नत्ता किण्हा किण्होभासा । तए णं ते माकंदियदारगा तेणं फलयखंडेणं उवुज्झमाणा २ रयणदीवतेणं संवुढां यावि होत्था । तए णं ते माकंदियदारगा थाहं लभंति २ मुहुत्ततरं आसांसंति २ फलगखंडं विसज्जेति २ रयणदीवं उत्तरंति २ फलाणं मग्गणगवेसणं करेंति २ फलाइं आहारंति २ नालियराणं मग्गणगवेसणं करेंति २ नालियराइं फोडेंति २ नालियरतेहेणं अन्नमन्नस्स गार्थाइं अडिंभगेति २ पोक्खरणीओ ओगाहंति २ जलमज्जणं करेंति २ जाव पच्चुत्तरंति २ पुढाविसिलापट्ठयांसि निसीयंति २ आसत्था वीसत्था सुहासणवरगया चंपं नयरिं अम्मापिउआपुच्छणं च लवणसमु-होत्तारणं च कालियवायसंमुच्छणं च पोयवहणविवत्तिं च फलयखंडयस्स आसायणं च रयणदीवोत्तारं च अणुचितेमाणा २ ओहयमणसंकप्पा जाव क्षियायंति । तए णं सा रयणदीवदेवया ते माकंदियदारए ओहिणा आभोएइ २ असिफलगवग्गहत्था सत्तअट्ठतलप्पमाणं उडुं वेहासं उप्पयइ २ ताए उक्किट्ठाए जाव देवगईए वीईवयमाणी २ जेणेव माकंदियदारए तेणेव उवागच्छइ २ आसुरुत्ता ते माकंदियदारए खरफरुसनिट्ठुरवयणेहिं एवं वयासी-हं भो माकंदियदारया । जइ णं तुब्भे मए सद्धिं विउलाइं भोगभोगाइं भुंजमाणा विहरह तो भे अत्थि जीवियं । अहं णं तुब्भे मए सद्धिं विउलाइं नो विहरह तो भे इमेणं नीलुप्पलगावलगुलिय जाव खुर-

धारेणं असिणा रत्तंगडमंसुयाइं माउआहिं उवसोहियाइं तालफलाणिव सीसाइं एगंते एँडेमि । तए णं ते माकंदियदारगा रयणदीवदेवयाए अंतिए एयमट्ठं सोच्चा निसम्म भीया करयल जाव वद्धावेत्ता एवं वयासी— जन्नं देवाणुप्पिया वइस्सइ तस्स आणाउववायवयणनिदेसे चिट्ठिस्सामो । तए णं सा रयणदीवदेवया ते माकंदियदारए गेण्हइ २ जेणेव पासाय-वडेंसए तेणेव उवागच्छइ २ असुभपोग्गलावहारं करेइ २ सुभपोग्गल-पक्खेवं करेइ २ तओ पच्छा तेहिं सद्धिं विउलाइं भोगभोगाइं भुंजमाणी विहरइ कल्लकल्लिं च अमयफलाइं उवणेइ ।

(87) तए णं सा रयणदीवदेवया सक्कवयणसंदेसेणं सुट्ठिएणं लवणा-हिबइणा लवणसमुद्दे तिसत्तखुत्तो अणुपरियट्ठेयव्वे त्ति जं किंचि तत्थ तणं वा पत्तं वा कट्ठं वा कयवरं वा असुइ पूयं दुरभिगंधमचोक्खं तं सव्वं आहुणिय २ तिसत्तखुत्तो एगंते एँडेयव्वं तिकट्ठु निउत्ता । तए णं सा रयणदीवदेवया ते माकंदियदारए एवं वयासी — एवं खलु अहं देवाणुप्पिया ! सक्कवयणसंदेसेणं सुट्ठिएण लवणाहिबइणा तं चेव जाव निउत्ता । तं जाव ताव अहं देवाणुप्पिया ! लवणसमुद्दे जाव एडेमि ताव तुब्भे इहेव पासायवडेंसए सुहंसुहेणं अभिरममाणा चिट्ठह । जइ णं तुब्भे एयंसि अंतरंसि उब्बिग्गा वा उस्सुया वा उप्पुया वा भवेज्जाह तो णं तुब्भे पुरत्थिमिल्लं वणसंडं गच्छेज्जाह । तत्थ णं दो उऊँ सया साहीणा तंजहा—पाउसे य वासारत्ते यः—तत्थ उ कंदलसिल्लिंधदंतो निउरवरपुप्फ-पीवरकरो । कुडयज्जुणनीवसुरभिदाँणो पाउसउऊ गयवरो साहीणो ॥१॥ तत्थ यः— सुरगोवमणिविचित्तो देँहुरकुलरसियउज्झैररवो । बरहिण-वंदंपरिणद्धसिहरो वासारत्तउऊपव्वओ साहीणो ॥२॥ तत्थ णं तुब्भे देवाणुप्पिया ! बहुसु वावीसु य जाव सरसरपंतियासु य बहुसु आली-घरएसु य मालीघरएसु य जाव कुसुमघरएसु य सुहंसुहेणं अभिरम-माणा २ विहरिज्जाह । जइ णं तुब्भे तत्थ वि उब्बिग्गा वा उस्सुया वा उप्पुया वा भवेज्जाह तो णं तुब्भे उत्तरिल्लं वणसंडं गच्छेज्जाह । तत्थ णं दो उऊँ सया साहीणा तंजहाः— सरदो य हेमंतो य । तत्थ उ

सणसत्तिवण्णकउहो नीलुप्पलपउमनल्लिणसिंगो । सारसच्चक्कायरवियघोसो
 सरयउऊ गोवई साहीणो ॥१॥ तत्थ य सियकुंदधवलजोण्हो कुसुमिय-
 लोद्धवणसंडमंडलतलो । तुसारदगधारपीवरकरो हेमंतउऊससी सया
 साहीणो ॥२॥ तत्थ णं तुब्भे देवाणुप्पिया ! वावीसु य जाव विहरे-
 ज्जाह । जइ णं तुब्भे तत्थ वि उव्विग्गा वा जाव उस्सुया वा भवेज्जाह
 तो णं तुब्भे अवरिल्लं वणसंडं गच्छेज्जाह । तत्थ णं दो उऊ सया
 साहीणा तंजहाः— वसंते य गिम्हे य । तत्थ उ सहकारचारुहारो
 किंसुयकण्णियारासोगमउडो । ऊसियतिलगबकुलायवत्तो वसंतउऊ नरवई
 साहीणो ॥१॥ तत्थ य पाडलसिरीससलिलो मल्लियावासंतियधवलवेलो^१
 सीयलसुरभिअनिलमगररचरिओ गिम्हउऊसागरो साहीणो ॥२॥ तत्थ णं
 बहूसु जाव विहरेज्जाह । जइ णं तुब्भे देवाणुप्पिया ! तत्थ वि उव्विग्गा
 वा उस्सुया वा उप्पुया वा भवेज्जाह तओ तुब्भे जेणेव पासायवडेंसए
 तेणेव उवागच्छेज्जाह ममं पडिवालेमाणा २ चिट्ठेज्जाह । मा णं तुब्भे
 दक्खिणिल्लं वणसंडं गच्छेज्जाह । तत्थ णं महं एगे उग्गाविसे चंडविसे
 घोराविसे महाविसे अइकाए महाकाए जहा तेयनिसग्गे मसिमहिस-
 मूसाकालए नयणविसरोसपुण्णे अंजणपुंजनियरप्पगासे रत्तच्छे जमल-
 जुयलचंचलचलंतजीहे धराणितलवेणिभूए उक्कडफुडकुडिलजडिलकक्खड-
 वियडफडाडोवकरणदच्छे लोहागरधम्ममाणधमधमेंतघोसे अणागालिय-
 चंडतिव्वरोसे सँमुहं तुरियचवलं धमधमेंतदिट्ठीविसे सप्पे परिवसइ ।
 मा णं तुब्भं सरीरस्स वावत्ती भविस्सइ । ते माकंदियदारए दोच्चंपि
 तच्चंपि एवं वयँइ २ वेउव्वियसमुग्घाएणं समोहण्णइ २ ताए उक्किट्ठाए
 लवणसमुहं तिसत्तखुत्तो अणुपरियट्ठेउं पयत्ता यावि होत्था ।

(88) तए णं ते माकंदियदारया तओ मुहुत्तंतरस्स पासायवडेंसए
 सँइ वा रँइ वा धिँ^{१०} वा अलभमाणा अन्नमन्नं एवं वयासी—एवं खलु
 देवाणुप्पिया ! रयणदीवदेवया अम्हे एवं वयासी—एवं खलु अहं सक्क-
 वयणसंदेसेणं सुट्ठिएणं लवणाहिवइणा ज्ञाव वावत्ती भविस्सइ । तं सेयं
 खलु अम्हं देवाणुप्पिया ! पुरत्थिमिल्लं वणसंडं गमित्तए । अन्नमन्नस्स

पडिसुणेंति २ जेणेव पुरस्थिमिल्ले वणसंडे तेणेव उवागच्छंति २ तत्थ णं वावीसु य जाव आलीघरएसु य जाव विहरंति । तए णं ते माकंदियदारगा तत्थ वि सइं वा जाव अलभमाणा जेणेव उत्तरिल्ले वणसंडे तेणेव उवागच्छंति । तत्थ णं वावीसु य जाव आलीघरएसु य विहरंति । तए णं ते माकंदियदारगा तत्थ वि सइं वा जाव अलभमाणा जेणेव पच्च-
 त्थिमिल्ले वणसंडे तेणेव उवागच्छंति २ जाव विहरंति । तए णं ते माकं-
 दियदारगा तत्थवि सइं वा जाव अलभमाणा अन्नमन्नं एवं वयासी - एवं खलु देवाणुप्पिया ! अम्हे रयणदीवदेवया एवं वयासी - एवं खलु अहं देवाणुप्पिया ! सक्कवयणसंदेसेणं सुट्टिणं लवणाहिवइणा जाव मा णं तुब्भं सरीरस्स वावत्ती भविस्सइ । तं भवियब्भं एत्थ कारणेणं । तं सेयं खलु अम्हं दक्खिणिहं वणसंडं गमित्तए त्तिकट्टु अन्नमन्नस्स एयमट्ठं पडिसुणेंति २ जेणेव दक्खिणिहले वणसंडे तेणेव पहारेत्थ गमणाए । तओ णं गंधे निद्धाइ से जहानामए अहिमडे इ वा जाव अणि-
 ट्ठतराए । तए णं ते माकंदियदारगा तेणं असुभेणं गंधेणं अभिभूया समाणा सएहिं २ उत्तरिज्जेहिं आसाइं पिहेंति २ जेणेव दक्खिणिहले वणसंडे तेणेव उवागया । तत्थ णं महं एगं आघयणं पासंति अट्ठिय-
 रासिसयसंकुलं भीमदरिसणिज्जं एगं च तत्थ सूलाइयं पुरिसं कलुणाइं कट्ठाइं विस्सराइं कुव्वमाणं पासंति भीया जाव संजायभया जेणेव से सूलाइए पुरिसे तेणेव उवागच्छंति २ तं सूलाइयं पुरिसं एवं वयासी-
 एस णं देवाणुप्पिया ! कस्सं आघयणे तुमं च णं के कओ वा इहं हव्व-
 मागए केण वा इमेयारूवं आंवयं पाविए ? तए णं से^१ सूलाइए पुरिसे ते माकंदियदारगे एवं वयासी - एस णं देवाणुप्पिया ! रयणदीवदेवयाए आघयणे । अहं णं देवाणुप्पिया ! जंबुदीवाओ दीवाओ भारहाओ वासाओ काकंदिए आसवाणियए विपुलं पणियभंडमायाए पोयवहणेणं लवणसमुहं ओयाए । तए णं अहं पोयवहणाविवत्तीए निब्बुड्ढभंडसारे एगं फलगखंडं आसाएमि । तए णं अहं उवुज्झमाणे २ रयणदीवतेणं संवूढे । तए णं सा रयणदीवदेवया ममं पासइ २ ममं गेण्हइ २ मए

साद्धिं बिउळाइं भोगभोगाइं मुंजमाणी बिहरइ। तए णं सा रयण-
 दीवदेवया अन्नया कयाइ अहाळहुंसगंसि अबराहंसि परिकुविया
 समाणी ममं एयारूवं आवयं पावेइ। तं न नज्जइ णं देवाणुप्पिया !
 तुब्भं पि इमेसिं सरीरगाणं का मन्ने आवई भविस्सइ। तए णं ते
 माकंदियदारगा तस्स सूलाइयस्स अंतिए एयमट्ठं सोच्चा निसम्म बलिय-
 तरं भीया जाव संजायभया सूलाइयं पुरिसं एवं वयासी — कइं णं देवाणु-
 प्पिया ! अम्हे रयणदीवदेवयाए हत्थाओ साहात्थि नित्थरिज्जामो ? तए
 णं से सूलाइए पुरिसे ते माकंदियदारगे एवं वयासी — एस णं देवाणु-
 प्पिया ! पुरत्थिमिल्ले वणसंडे सेलगस्स जक्खस्स जक्खायणे सेलए नामं
 आसरूवधारी जक्खे परिवसइ। तए णं से सेलए जक्खे चाउइसट्ठ-
 मुदिट्ठपुण्णमासिणीसु आगयसमए पत्तसमए महया २ सहेणं एवं वदई-
 कं तारयामि ? कं पालयामि ? तं गच्छह णं तुब्भे देवाणुप्पिया ! पुरत्थिमिल्लं
 वणसंडं सेलगस्स जक्खस्स महारिहं पुप्फच्चाणियं करेह २ जन्नुपाय-
 वडिया पंजलिउडा विणएणं षज्जुवासमाणा बिहरह। जाहे णं से सेलए
 जक्खे आगयसमए पत्तसमए एवं वएज्जा—कं तारयामि ? कं पालयामि ?
 ताहे तुब्भे एवं वयह — अम्हे तारयाहि अम्हे पालयाहि। सेलए भो
 जक्खे परं रयणदीवदेवयाए हत्थाओ साहात्थि नित्थारेज्जा। अन्नहा भो
 न याणामि इमेसिं सरीरगाणं का मन्ने आवई भविस्सइ।

(89) तए णं ते माकंदियदारगा तस्स सूलाइयस्स अंतिए एयमट्ठं
 सोच्चा निसम्म सिग्घं चंडं चवलं तुरियं वेईयं जेणेव पुरत्थिमिल्ले वण-
 संडे जेणेव पोक्खरिणी तेणेव उवागच्छंति २ पोक्खरिणि ओगाहंति २
 जलमज्जणं करंति २ जाइं तत्थ उप्पळाइं जाव गेण्हंति २ जेणेव
 सेलगस्स जक्खस्स जक्खायणे तेणेव उवागच्छंति २ आलोए पणामं
 करंति २ महारिहं पुप्फच्चाणियं करंति २ जन्नुपायवडिया सुस्सू-
 समाणा नमंसमाणा षज्जुवासंति। तए णं से सेलए जक्खे आगय-
 समए पत्तसमए एवं वयासी — कं तारयामि ? कं पालयामि ? तए
 णं ते माकंदियदारगा उट्ठाए उट्ठेति करयल जाव वट्ठावेत्ता एवं

वयासी — अम्हे तारयाहि अम्हे पालयाहि । तए णं से सेलए जक्खे ते माकंदियदारए एवं वयासी — एवं खलु देवाणुप्पिया ! तुब्भं मए सद्धिं लवणसमुदं मज्झमज्झेणं वीईवयमाणाणं सा रयणदीवदेवया पावा चंडा रुद्धा खुद्धा साहसिया बहूहि खरणहि य मउएहि य अणु-लोमेहि य पडिलोमेहि य सिंगारेहि य कलुणेहि य उवसग्गेहि य उव-सग्गं करेहिइ । तं जइ णं तुब्भे देवाणुप्पिया ! रयणदीवदेवयाए एयमट्ठं आढाह वा परियाणह वा अवयक्खह वा तो भे अहं पिट्ठाओ विहू-णाभि । अह णं तुब्भे रयणदीवदेवयाए एयमट्ठं नो आढाह नो परिया-णह नो अवयक्खह तो भे रयणदीवदेवयाए हत्थाओ साहत्थिं नित्थारेमि । तए णं ते माकंदियदारगा सेलगं जक्खं एवं वयासी — जं णं देवाणु-प्पिया वईस्संति तस्स णं उववायवयणनिदेसे चिट्ठिस्सामो । तए णं से सेलए जक्खे उत्तरपुरत्थिमं दिसीभागं अवक्कमइ २ वेउव्वियसमु-ग्घाएणं समोहणइ २ संखेज्जाइं जोयणाइं दंडं निस्सरइ दोर्च्चं पि वेउव्वियसमुग्घाएणं समोहणइ २ एगं महं आसरूवं वेउव्वइ २ ते माकंदियदारए एवं वयासी — हं भो माकंदियदारया ! आरुह णं देवा-णुप्पिया ! मम पिट्ठं^१ । तए णं ते माकंदियदारया हट्ठा सेलगस्स जक्खस्स पणामं करेति २ सेलगस्स पिट्ठं^२ दुरूढा । तए णं से सेलए ते माकंदियदारए दुरूढे जाणित्ता सैत्तअट्ठताल्लिप्पमाणमेत्ताइं उड्डं वेहासं उप्पयइ २ ताए उक्किट्ठाए तुरियाए चवलाए चंडाए दिव्वाए देवयाए देवगईए लवणसमुदं मज्झमज्झेणं जेणेव जंबुदीवे दीवे जेणेव भारहे वासे जेणेव चंपा नयरी तेणेव प्हारेत्थ गमणाए ।

(90) तए णं सा रयणदीवदेवया लवणसमुदं तिसत्तसुत्तो अणुपरि-यट्ठइ जं तत्थ तणं वा जाव एडेइ जेणेव पासायवडेंसए तेणेव उवागच्छई २ ते माकंदियदारया पासायवडेंसए अपासमाणी जेणेव पुरत्थिमिल्ले वणसंडे जाव सठ्वओ समंता मग्गणगवेसणं करेइ २ तेसिं माकंदियदारगाणं कत्थइ सुंइ वा ३ अलभमाणी जेणेव उत्तरिल्ले एवं चेव पच्चत्थिमिल्ले वि जाव अपासमाणी ओहिं पउंजइ ते माकंदियदारए सेलएणं सद्धिं

लवणसमुहं मज्झमज्झेणं वीईवयमाणे २ पासइ २ आसुरुत्ता अस्सिखेडंगं
गेणइ २ सत्तइ जाव उप्पयइ २ ताए उक्किट्ठाए जेणेव माकंदियदारया
तेणेव उवागच्छइ २ एवं वयासी—हं भो माकंदियदारगा अपत्थियपत्थिया !
किण्णं तुम्भे जाणह ममं विप्पजहाय सेलएणं जक्खेणं सद्धिं लवण-
समुहं मज्झमज्झेणं वीईवयमाणा ? तं एवमवि गाए जइ णं तुम्भे ममं
अवयक्खह तो भे अत्थि जीवियं । अह णं नावयक्खह तो भे इमेणं
नीलुप्पलगबल जाव एडेमि । तए णं ते माकंदियदारगा रयणदीवदेवयाए
अंतिए एयमट्ठं सोरुत्ता निसम्म अभीया अतत्था अणुत्विग्गा अक्खुभिया
असंभंता रयणदीवदेवयाए एयमट्ठं नो आढंति नो परियाणंति नाव-
यक्खंति अणाढीयमाणा अपरियाणमाणा अणवयक्खमाणा य सेलएणं
जक्खेणं सद्धिं लवणसमुहं मज्झमज्झेणं वीईवयंति । तए णं सा रयण-
दीवदेवया ते माकंदियदारया जाहे नो संचाएइ बहूहिं पंडिलोमेहि य
उवसग्गेहि य चालित्तए वा खोभित्तए वा त्रिपरिणामित्तए वा ताहे
महुरेहिं य सिंगारेहि य कलुणेहि य उवसग्गेहि य उवसग्गेउं पयत्ता
यावि होत्था— हं भो माकंदियदारगा ! जइ णं तुम्भेहिं देवानु-
प्पिया ! मए सद्धिं हसियाणि य रमियाणि य ललियाणि य
कीलियाणि य हिंडियाणि य मोहियाणि य ताहे णं तुम्भे सव्वाइं
अगणेमाणा ममं विप्पजहाय सेलएणं सद्धिं लवणसमुहं मज्झमज्झेणं
वीईवयह । तए णं सा रयणदीवदेवया जिणरक्खियस्स मणं ओहिणा
आभोएइ २ एवं वयासी— निच्चंपि य णं अहं जिणपालियस्स
अणिट्ठा ५ । निच्चं मम जिणपालिए अणिट्ठे ५ । निच्चंपि य णं अहं
जिणरक्खियस्स इट्ठा ५ । निच्चंपि य णं ममं जिणरक्खिए इट्ठे ५ । जइ
णं ममं जिणपालिए रोयमाणं कंदमाणं सोयमाणं तिप्पमाणं विलव-
माणं नावयक्खइ किण्णं तुमंपि जिणरक्खिया ! ममं रोयमाणं जाव
नावयक्खासि ? तए णं :—सा पवररयणदीवस्सं देवया ओहिणां जिणर-
क्खियस्स मणं । नाऊणं वंधनिमित्तं उबरिं माकंदियदारगाणं दोण्हंपि ॥१॥
दोसकलिया सलिलयं नाणाविहचुण्णवासमीसियं दिव्वं । घाणमण-

निव्वुइकरं सव्वोउयसुरभिकुसुमवुट्ठिं पमुंचमाणी ॥२॥ नाणामणि-
 कणगरयणघंटियखिंखिणिनेउरमेहलभूसणरवेणं । दिसाओ विदिसाओ
 पूरयंती वयणमिणं वेइ सा कलुंसा ॥३॥ होल वसुल गोल नाह दइय
 पिय रमण कंत सामिय निग्घिण नित्थंक्क । थिण्ण निक्किवं अकयन्नय
 सिद्धिलभाव निल्लज्ज लुक्ख अकलुण जिणरक्खिय मज्झं हिययरक्खग ॥४॥
 न हु जुज्जसि एक्कियं अणाहं अबंधवं तुज्झ चलणओवायकारियं
 उज्झिउमर्धन्नं । गुणसंकर हं तुमे^१ विहूणा न समत्था जीविउं खणंपि ॥५॥
 इमस्स उं अणेगंझसमगरविविधंसावयसयाकुलंघरस्स । रयणागरस्स
 मज्झे अप्पाणं वहेमि तुज्झ पुरओ एहि नियत्ताहि जइ सि कुविओ
 खमाहि एकावैराहं मे ॥६॥ तुज्झ य विगयघणविर्मलससिमंडलागारं-
 सस्सिरीयं सारयनवकमलकुमुदकुवलयविमलदलनिकरसरिं^२निभनयणं ।
 वयणं पिवासागयाए सद्धां मे पेच्छिउं जे अवलोएहि ता इओ
 ममं नाह जां ते पेच्छामि वयणकमलं ॥७॥ एवं सप्पणयसरलमहुरीं
 पुणो २ कलुणाइं वयणाइं जंपमाणी सा पावा मग्गओ समण्णेइ पाव-
 हियया ॥८॥ तए णं से जिणरक्खिए चलमणे तेणेव भूसणरवेणं कण-
 सुहमणोहरेणं तेहि य सप्पणयसरलमहुरभणिएहिं संजायविउणअणुराए
 रयणदीवस्स देवयाए तीसे सुंदरथणजहणवयणकरचरणनयणलावणरूव-
 जोवणसिरिं च दिव्वं सरभसउवगूहियाइं बिब्बोयविलसियीणि य
 विहसियसकडक्खदिट्ठिनिस्ससियमलियउवललियथियगमणपणयखिज्जि-
 यपसाइयाणि य सरमाणे रागमोहियमई अवसे कम्मवसगए अवयक्खइ
 मग्गओ सविलियं । तए णं जिणरक्खियं समुप्पन्नकलुणभावं मच्चुगल-
 त्थं^३ल्लोहियमइं अवयक्खंतं तहेव जक्खे उ सेलए जाणिऊण सणियं २
 उव्विहइ नियगपिट्ठाहिं विगयसं^४द्धे । तए णं सा रयणदीवदेवया निस्संसा
 कलुणं जिणरक्खियं सकलुसा सेलगपिट्ठाहिं ओवयंतं—दास ! मओसि त्ति
 जंपमाणी अप्तं सागरसलिलं गेण्हिय बाहाहिं आरं^५संतं उडुं उव्विहइ
 अंबरतले ओवयमाणं च मंडलग्गेण पडिच्छित्ता नीलुप्पलगवलअयसि-
 प्पगासेणं असिबरेणं खंडाखांडिं करेइ २ तत्थ विलवमाणं तस्स य

सरसवेहियस्स घेत्तूण अंगमंगाइं सरुहिराइं उक्खित्तबलिं चउद्दिस्सिं करेइं सा पंजली पहट्ठा ।

(91) एवमेव समणाउसो ! जो अम्हं निगंथाण वा निगंथीण वा अंतिए पव्वइए समाणे पुणरवि माणुस्सए कामभोगे आसायइ पत्थयइ पीहेइ अभिलसइ से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाणं जाव संसारं अणुपरियट्ठिस्सइ जहा व से जिणरक्खिए । छलिओ अवयक्खंतो निरावयक्खो गओ अविगघेणं । तम्हा पव्वयणसारे निरावयक्खेण भवियव्वं ॥१॥ भोगे अवयक्खंतो पडंति संसारसागरे घोरे । भोगेहिं य निरवयक्खा तरंति संसारकंतारं ॥२॥

(92) तए णं सा रयणदीवदेवया जेणेव जिणपालिए तेणेव उवा-गच्छइ बहूहिं अणुलोमेहि य पडिलोमेहि य खरमउयसिंगारेहि य कलुणेहि य उवसगेहि य जाहे नो संचाएइ चालित्तए वा खोभित्तए वा विपरिणा-मित्तए वा ताहे संता तंता परितंता निव्विण्णा समाणी जामेव दिसिं पाउब्भूया तामेव दिसिं पडिगया । तए णं से सेलए जक्खे जिणपालि-एण सद्धिं लवणसमुदं मज्झमज्जेणं वीईवयइ २ जेणेव चंपा नयरी तेणेव उवागच्छइ २ चंपाए नयरीए अग्गुज्जाणंसि जिणपालियं पट्ठाओ ओया-रेइ २ एवं वयासी - एस णं देवाणुप्पिया ! चंपा नयरी दीसइ त्तिकट्टु जिणपालियं आपुच्छइ २ जामेव दिसिं पाउब्भूए तामेव दिसिं पडिगए ।

(93) तए णं जिणपालिए चंपं अणुपविसइ २ जेणेव सए गिहे जेणेव अम्मापियरो तेणेव उवागच्छइ २ अम्मापिऊणं रोयमाणे जाव विलवमाणे जिणरक्खियवावत्तिं निवेदेइ । तए णं जिणपालिए अम्मापियरो मित्तनाइ जाव परियणेणं सद्धिं रोयमाणाइं बहूइं लोइयाइं मयकिच्चाइं करेति २ कालेणं विगयसाया जाया । तए णं जिणपालियं अन्नया कयाइं सुहासणवरगयं अम्मापियरो एवं वयासी - कहणं पुत्ता ! जिणरक्खिए कालगए ? तए णं से जिणपालिए अम्मापिऊणं लवणसमुदोत्तारणं च कालियवायसमुच्छेणं च पोयवहणविवत्तिं च फलहखंडआसायणं च रयणदीवुत्तारं च रयणदिवदेवयागेहिं च भोगेविभूइं च रयणदीवदेवमा-

अप्पाहणं च सूलाइयपुरिसदरिसणं च सेलगजक्खआरुहणं च रक्खणीव-
देवयाउवसगं च जिणरक्खियविवत्तिं च लवणसमुदुत्तरणं च चंपागमणं
च सेलगजक्खआपुच्छणं च जहाभूयमवितहमसंदिद्धं परिकहेइ । तए
णं जिणपाळिए जाव अप्पसोगे जाव विपुलाइ भोगभोगाईं भुंजमाणे
विहरइ ।

(94) तेणं कालेणं तेणं समएणं समणे भगवं महावीरे समोसढे
जाव धम्मं सोच्चा पव्वइए एगारसंगंभी मासिएणं भत्तेणं जाव अत्ताणं
झूसेत्ता सोहम्मे कप्पे दो सागरोवमाईं ठिई पन्नत्ता । ताँओ आउक्ख-
एणं ठिइक्खएणं भवक्खएणं अणंतरं चयं चइत्ता जेणेव महाविदेहे
बासे सिज्झिहिइ जाव अंतं काहिइ । एवामेव समणाउसो ! जाव माणुस्सए
कामभोगे नो पुणरावि आसाइ से षं जाव वीईवइस्सइ जहा व से
जिणपाळिए ।

एवं खलु जंबू ! समणेणं भगवया महावीरेणं जाव संपत्तेणं
नवमस्स नायज्झयणस्स अयमट्ठे पन्नत्ते त्तिबोमि ॥

॥ नवमं नायज्झयणं समत्तं ॥९॥

॥ दसमं अङ्गयणं ॥

(९५) जइ णं भंते ! समणेणं नबमस्स नायङ्गयणस्स अयमट्ठे पन्नत्ते दसमस्स के अट्ठे पन्नत्ते ? एवं खलु जंबू ! तेणं काळेणं २ रायगिहे नयेरे सामी समोसडे गोयमो एवं वयासी — कहण्णं भंते ! जीवा वडुंति वा हायंति वा ? गोयमा ! से जहानामए बहुलपक्खस्स पाडिबयाचंदे पुण्णिमाचंदं पणिहाय हीणे वण्णेणं हीणे सोमयाए हीणे निद्धयाए हीणे कंतीए एवं दित्तीए जुत्तीए छायाए पभाए ओयाए लेसाए मंडलेणं । तयाणंतरं च णं बीयाचंदे पडिबयाचंदं पणिहाय हीणतराए वण्णेणं जाव मंडलेणं । तयाणंतरं च णं तइयाचंदे बीयाचंदं पणिहाय हीणतराए वण्णेणं जाव मंडलेणं । एवं खलु एएणं कमेणं पैरिहायमाणे २ जाव अमावसाचंदे चाउइसिचंदं पणिहाय नट्ठे वण्णेणं जाव नट्ठे मंडलेणं । एवामेव समणाउसो ! जो अम्हं निग्गंथो वा निग्गंथी वा जाव पठ्वइए समाणे हीणे खंतीए एवं मुत्तीए गुत्तीए अज्जवेणं मइवेणं लाघवेणं सच्चवेणं तवेणं चिंथाए अकिंचणयाए बंभचेरवासेणं । तयाणंतरं च णं हीणे हीणतराए खंतीए जाव हीणतराए बंभचेरवासेणं । एवं खलु एएणं कमेणं परिहायमाणे २ नट्ठे खंताए जाव नट्ठे बंभचेरवासेणं । से जहा वा सुक्कपक्खस्स पडिबयाचंदे अमावसाचंदं पणिहाय अहिए वण्णेणं जाव अहिए मंडलेणं । तयाणंतरं च णं बीयाचंदे पडिबयाचंदं पणिहाय अहियराए वण्णेणं जाव अहियराए मंडलेणं । एवं खलु एएणं कमेणं परिवड्ढेमाणे २ जाव पुण्णिमाचंदे चाउइसिं चंदं पणिहाय पडिपुण्णवण्णेणं जाव पडिपुण्णे मंडलेणं । एवामेव समणाउसो ! जाव पठ्वइए समाणे अहिए खंतीए जाव बंभचेरवासेणं । तयाणंतरं च णं अहियराए खंतीए जाव बंभचेरवासेणं । एवं खलु एएणं कमेणं परिवड्ढेमाणे २ जाव पडिपुण्णे बंभचेरवासेणं । एवं खलु जीवा वडुंति वा हायंति वा ।

एवं खलु जंबू ! समणेणं भगवया महावीरेणं दसमस्स नायङ्गयणस्स अयमट्ठे पन्नत्ते त्ति वेमि ॥

॥ एक्कारसमं अज्झयणं ॥

(96) जइ णं भंते ! समणेणं दसमस्स नायज्झयणस्स अयमट्ठे पन्नत्ते एक्कारसमस्स के अट्ठे पन्नत्ते ? एवं खलु जंबू ! तेणं कालेणं २ रायगिहे जाव गोयमे एवं वयासी — केहं णं भंते ! जीवा आराहगा वा विराहगा वा भवंति ? गोयमा ! से जहानामए एगांसि समुहकूलंसि दावद्वा नामं रुक्खा पन्नत्ता किण्हा जाव निउरंबभूया पत्तिया पुप्फिया फलिया हरियगरेरिज्जमाणा सिरीए अईव उवसोभेमाणा २ चिट्ठंति । जया णं दीविच्चगा ईसिं पुरेवाया पच्छावाया मंदावाया महावाया वायंति तथा णं बहवे दावद्वा रुक्खा पत्तिया जाव चिट्ठंति । अप्पेगइया दावद्वा रुक्खा जुण्णा श्लोडा परिसडियपंडुपत्तपुप्फफला सुक्करुक्खओ विव मिलायमाणा २ चिट्ठंति । एवामेव समणाउसो ! जो अम्हं निगगंथो वा २ जाव पव्वइए समाणे बहूणं समणाणं ४ सम्मं सहइ जाव अहियासेइ बहूणं अन्नउत्थियाणं बहूणं गिहत्थाणं नो सम्मं सहइ जाव नो अहियासेइ एस णं मए पुरिसे देसविराहए पन्नत्ते समणाउसो ! जया णं सामुहगा ईसिं पुरेवाया पच्छावाया मंदावाया महावाया वायंति तथा णं बहवे दावद्वा रुक्खा जुण्णा श्लोडा जाव मिलायमाणा २ चिट्ठंति । अप्पेगइया दावद्वा रुक्खा पत्तिया पुप्फिया जाव उवसोभेमाणा २ चिट्ठंति । एवामेव समणाउसो ! जो अम्हं निगगंथो वा २ जाव पव्वइए समाणे बहूणं अन्नउत्थियगिहत्थाणं सम्मं सहइ बहूणं समणाणं ४ नो सम्मं सहइ एस णं मए पुरिसे देसाराहए पन्नत्ते समणाउसो ! जया णं नो दीविच्चगा नो सामुहगा ईसिं पच्छावाया जाव महावाया वायंति तथा णं सव्वे दावद्वा रुक्खा जुण्णा श्लोडा । एवामेव समणाउसो ! जाव पव्वइए समाणे बहूणं समणाणं ४ बहूणं अन्नउत्थियगिहत्थाणं नो सम्मं सहइ एस णं मए पुरिसे सव्वविराहए पन्नत्ते समणाउसो । जया णं दीविच्चगा वि सामुहगा वि ईसिं जाव वायंति तथा णं सव्वे दावद्वा पत्तिया जाव चिट्ठंति । एवामेव समणाउसो ! जो अम्हं पव्वइए समाणे बहूणं समणाणं ४ बहूणं अन्नउत्थियगिहत्थाणं सम्मं सहइ एस णं मए

पुरिसे सव्वआराहए पन्नत्ते । एवं खलु गोयमा ! जीवा आराहगा वा विराहगा वा भवन्ति ।

एवं खलु जंबू ! समणेणं भगवया महावीरेणं जाव संपत्तेणं एक्कारसमस्स अयमट्ठे पन्नत्ते त्तिवेमि ॥११॥

॥ एक्कारसमं नायज्झयणं समत्तं ॥११॥

॥ बारसमं अज्झयणं ॥

(97) जइ णं भंते ! समणेणं जाव संपत्तेणं एक्कारसमस्स नायज्झयणस्स अयमट्ठे पन्नत्ते बारसमस्स णं के अट्ठे पन्नत्ते ? एवं खलु जंबू ! तेणं कालेणं २ चंपा नाम नयरी । पुण्णभदे चेइए । जियसत्तू नामं राया । धारिणी देवी । अदीणसत्तू नामं कुमारे जुवराया वि होत्था । सुबुद्धी नामं अमरुचे जाव रज्जधुरार्चितए यावि होत्था जाव समणोवासए । तीसे णं चंपाए नयरीए बहिया उत्तरपुरत्थिमेणं एगे फरिहोदए यावि होत्था मेयवसारुहिरमंसपूयपडलपोच्चडे मयगकलेवरसंछन्ने अमणुन्ने णं वण्णेणं जाव फासेणं से जहानामए अहिमडे इ वा गोमडे इ वा जाव मयकुहियविणट्ठकिमिणवावण्णदुरभिगंधे किमिजालाउंले संसत्ते असुइविगयबीभच्छदरिसणिज्जे । भवेयारुवे सिया ? नो इणंट्ठे समट्ठे । एत्तो अणिट्ठतराए चेव जाव गंधेणं पन्नत्ते ।

(98) तए णं से जियसत्तू राया अन्नया कयाइ ण्हाए कयवळिक्कम्मे जाव अप्पमहग्घाभरणालंकियसरीरे बहूहिं ईसर जाव सत्थवाह — पभिईहिं सार्व्णिं भोयणमंडवंसि भोयणवेलाए सुहासणवरगंए विउलं असणं ४ जाव विहरइ जिमियभुत्तुत्तरागए जाव सुइभूए तंसि विपुलंसि असणंसि ४ जाव जायविम्हए ते बहूवे ईसर जाव पभिईए एवं वयासी — अहो णं देवाणुप्पिया ! इमे मणुन्ने असणं ४ वण्णेणं उववेए जाव फासेणं

उववेए अस्सायणिज्जे विसायणिज्जे पीणणिज्जे दीवणिज्जे दप्पणिज्जे मय-
 णिज्जे बिहणिज्जे सत्विदियगायपल्हायणिज्जे । तए णं ते बहवे ईसर
 जाव पभियओ जियसत्तुं एवं वयासी - तहेव णं सामी ! जण्णं तुब्भे
 वयह - अहो णं इमे मणुन्ने असणे ४ वण्णेणं उववेए जाव पल्हायणिज्जे ।
 तए णं जियसत्तुं सुबुद्धिं अमच्चं एवं वयासी - अहो णं सुबुद्धी ! इमे
 मणुन्ने असणे ४ जाव पल्हायणिज्जे । तए णं सुबुद्धी जियसत्तुस्स रत्तो
 एयमट्ठं नो आढाइ जाव तुसिणीए संचिट्ठइ । तए णं जियसत्तुं सुबुद्धिं
 दोच्चंपि तच्चंपि एवं वयासी - अहो णं सुबुद्धी ! इमे मणुन्ने तं चेव जाव
 पल्हायणिज्जे । तए णं से सुबुद्धी अमच्चे दोच्चंपि तच्चंपि एवं वुत्ते समाणे
 जियसत्तुं रायं एवं वयासी - नो खलु सामी ! अम्हं एयांसि मणुन्नंसि
 असणंसि ४ केइ विम्हए । एवं खलु सामी ! सुँरभिसइ वि पोग्गला
 दुरभिसइत्ताए परिणमंति दुरभिसइ वि पोग्गला सुरभिसइत्ताए परिण-
 मंति । सुरूवा वि पोग्गला दुरूवत्ताए परिणमंति दुरूवा वि पोग्गला
 सुरूवत्ताए परिणमंति । सुरभिगंधा वि पोग्गला दुरभिगंधत्ताए परिणमंति
 दुरभिगंधा वि पोग्गला सुरभिगंधत्ताए परिणमंति । सुरसा वि पोग्गला
 दुरसत्ताए परिणमंति दुरसा वि पोग्गला सुरसत्ताए परिणमंति । सुह-
 फासा वि पोग्गला दुहपासत्ताए परिणमंति दुहफासा वि पोग्गला सुह-
 फासत्ताए परिणमंति । पैओगवीससा परिणया वि य णं सामी ! पोग्गला
 पन्नत्ता । तए णं जियसत्तुं सुबुद्धिस्स अमच्चस्स एवमाइक्खमाणस्स ४
 एयमट्ठं नो आढाइ नो परियार्णइ तुसिणीए संचिट्ठइ । तए णं से जिय-
 सत्तुं अन्नया कयाइ ण्हाए आसखंधवरगए महयाभडचडगरआसवाह-
 णियाए निज्जायमाणे तस्स फरिहोदयस्स अदूरसामेतेणं वीईवयइ । तए
 णं जियसत्तुं तस्स फरिहोदयस्स असुभेणं गंधेणं अभिभूए समाणे
 सएणं उत्तरिज्जएणं आसगं पिहेइ एगंतं अवक्कमइ २ बहवे ईसर
 जाव पभियओ एवं वयासी - अहो णं देवाणुप्पिया ! इमे फरिहोदए
 अमणुन्ने वण्णेणं ४ से जहानामए अहिमडे इ वा जाव अमणामतराए
 चेव । तए णं ते बहवे राईसर जाव पभियओ एवं वयासी - तहेव णं

तं सामी ! जं णं तुब्भे एवं वयह — अहो णं इमे फरिहोदए अमणुत्ते वण्णेणं ४ से जहानामए अहिमडे इ वा जाव अमणामतराए चेव । तए णं से जियसत्तू सुबुद्धिं अमच्चं एवं वयासी — अहो णं सुबुद्धी ! इमे फरिहोदए अमणुत्ते वण्णेणं ४ से जहानामए अहिमडे इ वा जाव अमणामतराए चेव । तए णं से सुबुद्धी अमच्चे जाव तुसिणीए संचि-
 ट्ठइ । तए णं से जियसत्तू राया सुबुद्धिं अमच्चं दोच्चंपि तच्चंपि एवं वयासी — अहो णं तं चेव । तए णं से सुबुद्धी अमच्चे जियसत्तुणा रत्ता दोच्चंपि तच्चंपि एवं वुत्ते समाणे एवं वयासी—
 नो खलु सामी ! अम्हं एयंसि फरिहोदगंसि केइ विम्हए । एवं खलु सामी ! सुरभिसद्दा वि पोग्गला दुब्भिसद्दत्ताए परिणमंति तं चेव जाव पओगवीससापरिण्या वि य णं सामी ! पोग्गला पन्नत्ता । तए णं जिय-
 सत्त सुबुद्धिं एवं वयासी— मा णं तुमं देवाणुप्पिया ! अप्पाणं च परं च तदुभयं च बहूहि य असब्भावुब्भावणाहिं मिच्छत्ताभिनिवेसेण य वुग्गा-
 हेमाणे वुप्पाएमाणे विहराहि । तए णं सुबुद्धिस्स इमेयारूवे अज्झत्थिए ४ समुप्पज्जित्था— अहो णं जियसत्तू संवे तच्चे त्हिए अवितहे सब्भूए जिणपन्नत्ते भावे नो उवलभइ । तं सेयं खलु मम जियसत्तुस्स रत्तो संताणं तच्चाणं तहियाणं अवितहाणं सब्भूयाणं जिणपन्नत्ताणं भावाणं अभिगमणट्ठयाए एयमट्ठं उवायणावेत्तए । एवं संपेहेइ २ पच्चइएहिं पुरि-
 सेहिं सद्धिं अंतरावणाओ नवए घडए य पडए य गेण्हइ २ संज्ञाकाल-
 समयांसि पविरलमणुस्संसि निसंतपडिनिसंतंसि जेणेव फरिहोदए तेणेव उवागच्छइ २ तं फरिहोदगं गेण्हावेइ २ नवएसु घडएसु गालावेइ २ नवएसु घडएसु पक्खिवावेइ २ सज्जस्खारं पक्खिवावेइ लंछियमुद्दि-
 कारावेइ २ सत्तरत्तं परिवसावेइ २ दोच्चंपि नवएसु घडएसु गालावेइ २ नवएसु घडएसु पक्खिवावेइ २ सज्जस्खारं पक्खिवावेइ २ लंछिय-
 मुद्दि कारावेइ २ सत्तरत्तं परिवसावेइ २ तच्चंपि नवएसु घडएसु जाव संबसावेइ । एवं खलु एएणं उवाएणं अंतस्स माल्लिवेमाणे अंतरा पक्खि-
 वावेमाणे अंतरा य वससावेमाणे सत्तसत्त य राइंदियाइं परिवसावेइ ।

तए णं से फरिहोदए सत्तमंसि सत्तयंसि परिणममाणंसि उदगरयणे जाए यावि होत्था अच्छे पत्थे जच्चे तणुए फालियवण्णाभे वण्णेणं उववेए ४ आसायणिज्जे जाव सत्विदियगायपल्हायणिज्जे । तए णं सुबुद्धी जेणेव से उदगरयणे तेणेव उवागच्छइ २ करयलंसि आसादेइ २ तं उदगरयणं वण्णेणं उववेयं ४ आसायणिज्जं जाव सत्विदियगायपल्हायणिज्जं जाणित्ता हट्ठतुठे बहूहिं उदगसंभारणिज्जेहिं दव्वेहिं संभारेइ २ जियसत्तुस्स रत्तो पाणियघरियं सहावेइ २ एवं वयासी—तुमं णं देवाणुप्पिया ! इमं उदगरयणं गेण्हाहि २ जियसत्तुस्स रत्तो भोयणवेलाए उवणेज्जासि । तए णं से पाणियघरिए सुबुद्धिस्स एयमट्ठं पडिसुणेइ २ तं उदगरयणं गेण्हइ २ जियसत्तुस्स रत्तो भोयणवेलाए उवट्ठवेइ । तए णं से जियसत्तू राया तं विपुलं असणं ४ आसाएमाणे जाव विहरइ जिमियभुत्तुत्तरागए बि य णं जाव परमसुइभूए तंसि उदगरयणंसि जायविम्हए ते बह्वे राईसर जाव एवं वयासी—अहो णं देवाणुप्पिया ! इमे उदगरयणे अच्छे जाव सत्विदियगायपल्हायणिज्जे । तए णं ते बह्वे राईसर जाव एवं वयासी—तहेव णं सामी ! जण्णं तुम्हे वय्ह जाव एवं चेव पल्हायणिज्जे । तए णं जियसत्तू राया पाणियघरियं सहावेइ २ एवं वयासी—एस णं तुम्हे देवाणुप्पिया ! उदगरयणे कओ आसाइए ? तए णं से पाणियघरिए जियसत्तुं एवं वयासी—एस णं सामी ! मए उदगरयणे सुबुद्धिस्स अंतियाओ आसाइए । तए णं जियसत्तू सुबुद्धिं अमच्चं सहावेइ २ एवं वयासी—अहो णं सुबुद्धी ! केणं कारणेणं अहं तव अणिट्ठे ५ जेणं तुमं मम कल्लाकल्लिं भोयणवेलाए इमं उदगरयणं न उवट्ठवेसि ? तं एस णं तुमे देवाणुप्पिया ! उदगरयणे कओ उवलद्धे ? तए णं सुबुद्धी जियसत्तुं एवं वयासी—एस णं सामी ! से फरिहोदए । तए णं से जियसत्तू सुबुद्धिं एवं वयासी—केणं कारणेणं सुबुद्धी ! एस से फरिहोदए ? तए णं सुबुद्धी जियसत्तुं एवं वयासी—एवं खलु सामी ! तुम्हे तयां मम एवमाइक्खमाणस्स ४ एयमट्ठं नो सद्दहह । तए णं मम इमेयारूवे अज्झत्थिए ४—अहो णं जियसत्तू संते जाव भावे नो सद्दहह नो पत्तियइ नो रोएइ । तं

संवे खलु मम जियसत्तुस्स रत्तो संताणं जाव सञ्भूयाणं जिणपञ्चत्ताणं
 भावाणं अभिगमणद्वयाए एयमट्ठं उवायणावेत्तए । एवं संपेहेमि २
 तं चेव जाव पाणियघरियं सहावेमि २ एवं वदामि — तुमं णं देवाणुप्पिया !
 उदगरयणं जियसत्तुस्स रत्तो भोयणावेलाए उवणेहि । तं एएणं कारणेणं
 सामी ! एस से फरिहोदए । तए णं जियसत्तू राया सुबुद्धिस्स एवमाइ-
 क्खयाणस्स ४ एयमट्ठं नो सदहइ ३ असदहमाणे अपत्तियमाणे अरोए-
 माणे अङ्गिभत्तरत्ताणिजे पुरिसे सहावेइ २ एवं वयासी — गच्छइ णं तुम्हे
 देवाणुप्पिया ! अंतरावणाओ नवए घडए पडए य गेण्हइ जाव उदगसंभार-
 णिज्जेहिं दव्वेहिं संभारेह । तेवि तहेव संभारेति २ जिमसत्तुस्स उवणेति ।
 तए णं से जियसत्तू राया तं उदगरयणं करयळंसि आखाएइ आसायणिज्जं
 जाव सत्विदियगायपल्हायणिज्जं जाणिता सुबुद्धिं अमच्चं सहावेइ २ एवं
 वयासी — सुबुद्धी ! एए णं तुम्हे संता तच्चा जाव सञ्भूया भावा कओ
 उवलद्धा ? तए णं सुबुद्धी जियसत्तुं एवं वयासी — एए णं सामी ! मए
 संता जाव भावा जिणवयणाओ उवलद्धा । तए णं जियसत्तू सुबुद्धिं एवं
 वयासी — तं इच्छामि णं देवाणुप्पिया ! तव अंतिए जिणवयणं निसा-
 भित्तए । तए णं सुबुद्धी जियसत्तुस्स विचित्तं केवलपन्नत्तं चाउज्झासं
 धम्मं परिकहेइ तमाइक्खइ जह्य — जीवा बज्झंति जाव पंचाणुव्वयाइं ।
 तए णं जियसत्तू सुबुद्धिस्स अंतिए धम्मं सोच्चा निसम्म हट्ठवुट्ठं सुबुद्धिं
 अमच्चं एवं वयासी — सदहामि णं देवाणुप्पिया ! निग्गंथं पावयणं ३ जाव
 से जहेयं तुम्हे वयह । तं इच्छामि णं तव अंतिए पंचाणुव्वइयं सत्त-
 सिक्खावइयं जाव उवसंपज्जित्ताणं विहरित्तए । अहासुहं देवाणुप्पिया !
 मा पडिबधं । तए णं से जियसत्तू सुबुद्धिस्स अंतिए पंचाणुव्वइयं जाव
 दुवालसविहं सावयधम्मं पडिवज्जइ । तए णं जियसत्तू समणोवासए
 जाए अहिगयजीवाजीवे जाव पडिलाभेमाणे विहरइ । तेणं कालेणं २
 थेरागमणं । जियसत्तू राया सुबुद्धी य निग्गच्छइ । सुबुद्धी धम्मं सोच्चा
 जं नवरं जियसत्तुं आपुच्छामि जाव पव्वयामि । अहासुहं देवाणुप्पिया !
 तए णं से सुबुद्धी जेणेव जियसत्तू तेणेव उवागच्छइ २ एवं वयासी —

एवं खलु सामी ! मए थेराणं अंतिए धम्मे निसंते । से वि य धम्मे इच्छिए पडिच्छिए ३ । तए णं अहं सामी ! संसारभउव्विग्गे भीए जाव इच्छामि णं तुब्भेहिं अब्भणुन्नाए जाव पव्वइत्तए । तए णं जियसत्तू सुबुद्धिं एवं वयासी - अच्छसु ताव देवाणुप्पिया ! कइवयाइं वासाइं उरालाइं जाव भुंजमाणा । तओ पच्छा एगयंओ थेराणं अंतिए मुंडे भवित्ता जाव पव्वइस्सामो । तए णं सुबुद्धी जियसत्तुस्स रओ एयमट्ठं पडिसुणेइ । तए णं तस्स जियसत्तुस्स रओ सुबुद्धिणा सद्धिं विपुलाइं माणुस्सगाइं जाव पण्णुव्वभवमाणस्स दुवालस वासाइं बीइक्कंताइं । तेणं कालेणं २ थेरागमणं । जियसत्तू धम्मं सोच्चा एवं जं नवरं देवाणुप्पिया ! सुबुद्धिं आमंतेमि जेट्ठपुत्तं रज्जे ठावेमि तए णं तुब्भं अंतिए जाव पव्वयामि । अहासुहं देवाणुप्पिया । तए णं जियसत्तू राया जेणेव सए गिहे तेणेव उवागच्छइ २ सुबुद्धिं सद्दावेइ २ एवं वयासी - एवं खलु मए थेराणं जाव पव्वयामि । तुमं णं किं करेसि ? तए णं सुबुद्धी जियसत्तुं एवं वयासी जाव के अन्ने आधारे वा जाव पव्वामि । तं जइ णं देवाणुप्पिया जाव पव्वहि । गच्छह णं देवाणुप्पिया ! जेट्ठपुत्तं च कुडुंबे ठावेहि २ सीयं दुरुहित्ताणं ममं अंतिए सीया जाव पाउव्वभवइ । तए णं जियसत्तू कोडुंबियपुरिसे सद्दावेइ २ एवं वयासी - गच्छह णं तुब्भे देवाणुप्पिया ! अदीणसत्तुस्स कुमारस्स रायाभिसेयं उवट्ठवेह जाव अभिसिंचंति जाव पव्वइए । तए णं जियसत्तू एक्कारस अंगाइं अहिज्जइ बहूणि वासाणि परियाओ मासियाए संलेहणाए जाव सिद्धे । तए णं सुबुद्धी एक्कारस अंगाइं अहिज्जित्ता बहूणि वासाणि जाव सिद्धे ।

एवं खलु जंबू । समणेणं भगवया महावीरेणं जाव संपत्तेणं बारसमस्स नायज्झयणस्स अयमट्ठे पन्नत्ते त्ति वेमि ॥

॥ बारसमं नायज्झयणं समत्तं ॥ १२ ॥

॥ तेरसमं अज्झयणं ॥

(99) जइ णं भंते ! समणेणं जाव संपत्तेणं बारसमस्स अयमट्ठे पन्नत्ते तेरसमस्स के अट्ठे पन्नत्ते ? एवं खलु जंबू ! तेणं कालेणं २ राय-
गिहे नयरे गुणसिलए चेइए समोसरणं परिसा निग्गया । तेणं कालेणं
२ सोहम्मे कप्पे दद्दुरैवडिंसए विमाणे सभाए सुहम्माए दद्दुरंसि सीहा-
सणंसि दद्दुरे देवे चउहिं सामाणियसाहस्सीहिं चउहिं अग्गमहिंसीहिं
संपरिसाहिं एवं जहा सूरियाभे जाव दिव्वाइं भोगभोगाइं भुंजमाणे विहरइ
इमं च णं केवलकप्पं जंबुदीवं दीवं विउलेणं ओहिणा आभोएमाणे २
जाव नट्टविहिं उवदंसित्ता पडिगए जहा सूरियाभे । भंते ! त्ति भगवं गोयमे
समणं ३ वंदइ नमंसइ २ एवं वयासी - अहो णं भंते ! दद्दुरे देवे
महिड्डिए ६ । दद्दुरस्स णं भंते ! देवस्स सा दिव्वा देविड्डी ३ कहिं गया ?
कहिं पविट्ठा ? गोयमा ! सरीरं गया सरीरं अणुपविट्ठा कूडागारदिट्ठंतो । दद्दु-
रेणं भंते ! देवेणं सा दिव्वा देविड्डी ३ किन्ना लद्धा जाव अभिसमन्नागया ?
एवं खलु गोयमा ! इहेव जंबुदीवे २ भारहे वासे रायगिहे गुणसिलए
चेइए सेणिए राया । तत्थ णं रायगिहे नंदे नामं मणियारसेट्ठी परिवसइ
अट्ठे दित्ते० । तेणं कालेणं २ अहं गोयमा ! समोसट्ठे परिसा निग्गया
सेणिए वि निग्गए । तए णं से नंदे मणियारसेट्ठी इमीसे कहाए लद्धट्ठे
समाणे ण्हाए पायचारेणं जाव पज्जुवासइ । नंदे धम्मं सोच्चा समणोवासए
जाए । तए णं अहं रायगिहाओ पडिनिक्खंते बहिया जणवयविहारं
विहरामि । तए णं से नंदमणियारसेट्ठी अन्नया कयाइ असाहुदंसणेण य
अपज्जुवासणाए य अणणुसासणाए य असुस्सूसणाए य सम्मत्तपज्जवेहिं
परिहायमाणेहिं २ मिच्छत्तपज्जवेहिं परिवड्डमाणेहिं २ मिच्छत्तं विप्पडि-
वन्ने जाए यावि होत्था । तए णं नंदे मणियारसेट्ठी अन्नया कयाइ गिम्ह-
कालसमयांसि जेट्टामूलंसि मासांसि अट्ठमभत्तं परिगेण्हइ २ पोसहसालाए
जाव विहरइ । तए णं नंदस्स अट्ठमभत्तंसि परिणममाणंसि तण्हाए
हुहाए य अभिभूयस्स समाणस्स इमेयारूवे अज्झत्थिए ४ - धन्ना णं
ते जाव ईसरपभियओ जेसिं णं रायगिहस्स बहिया बहूओ वावीओ

पोक्खरिणीओ जाव सरसरपंतियाओ जत्थ णं बहुजणो ण्हाइ य पियइ य पाणियं च संबहइ । तं सेयं खलु मम कल्लं सेणियं रायं आपुच्छित्ता रायगिहस्स बहिया उत्तरपुरत्थिमे दिसीभागे वेब्भारपुव्वयस्स अदूर-सामंते वत्थुपाढगरोइयंसि भूमिभागंसि नंदं पोक्खरिणि खणावेत्तए त्तिकट्ठु एवं संपेहेइ २ कल्लं जाव पोसहं पारेइ २ ण्हाए कयबलिकम्मे मित्तनाइ जाव संपरिवुडे महत्थं जाव पाहुडं रायारिहं गेण्हइ २ जेणेव सेणिए राया तेणेव उवागच्छइ जाव पाहुडं उवट्ठवेइ २ एवं वयासी — इच्छामि णं सामी ! तुब्भेहिं अब्भणुन्नाए समाणे रायगिहस्स बहिया जाव खणावेत्तए । अहासुहं देवाणुप्पिया । तए णं से नंदे सेणिएणं रत्ता अब्भणुन्नाए समाणे हट्ठुट्ठे रायगिहं नगरं मज्झमज्जेणं निग्गच्छइ २ वत्थुपाढयरोइयंसि भूमिभागंसि नंदं पोक्खरणि खणावेउं पयत्ते यावि होत्था । तए णं सा नंदा पोक्खरणी अणुपुव्वेणं खम्ममाणा २ पोक्ख-रणी जांया यावि होत्था चाउक्कोणा समतीरा अणुपुव्वं सुजायवप्प-सीयलजला संच्छन्नपत्तभिसमुणाला बहुउप्पलपउमकुमुदनलिणसुभग-सोगंधियपुंडरीयमहापुंडरीयसयपत्तसहस्सपत्तपुप्फफलकेसरोववेया परि-हत्थभमंतमत्तलपपयअणेगसउणगणमिहुणवियरियसहनइयमहुरसरनाइया पासाईया ४ । तए णं से नंदे मणियारसेट्ठी नंदाए पोक्खरिणीए चउदिसिं चत्तारि वणसंडे रोवावेइ । तए णं ते वणसंडा अणुपुव्वेणं सारक्खिज्ज-माणा संगोविज्जमाणा संबाड्ढिज्जमाणा य वणसंडा जाया किण्हा जाव निउरंबभूया पत्तिया पुप्फिया जाव उवसोभेमाणा २ चिट्ठंति ! तए णं नंदे पुरीत्थिमिल्ले वणसंडे एगं महं चित्तसभं करावेइ २ अणेगखंभसय-संनिविट्ठं पासाइयं ४ । तत्थ णं बहूणि किण्हाणि य जाव सुक्खिळाणि य कट्ठकम्माणि य पोत्थकम्माणि य चित्तलेप्पगंधिमवेढिमपूरिमसंधाइमीइ उवदंसिज्जमाणाइं २ चिट्ठंति । तत्थ णं बहूणि आसणाणि य सयणाणि य अत्थुयपच्चत्थुयाइं चिट्ठंति । तत्थ णं बहवे नडा य नट्टा य जाव दिन्न-भईभत्तवेयणा तालायरकम्मं करेमाणा बिहरंति । रायगिहविणिग्गओ तत्थ णं बहुजणो तेषु पुव्वं त्थेसु आसणसयणेसु संनिसण्णो य संतुयट्ठो

य सुणमाणो य पेच्छमाणो य साहेमाणो य सुहंसुहेणं विहरइ । तए
 णं नंदे दाहिणिल्ले वणसंडे एगं महं महाणससालं कारीवेइ अणेगखंभ
 जाव रूवं । तत्थ णं बहवे पुरिसा दिन्नभइभत्तवेयणा विउलं असणं ४
 उवक्खड्ढेति बहूणं समणमाहणअतिहिकिर्वणवणीमगाणं परिभाएमाणा २
 विहरंति । तए णं नंदे मणियारसेट्ठी पच्चत्थिमिल्ले वणसंडे एगं महं
 तिगिच्छियसालं करेइ अणेगखंभसय जाव पडिरूवं । तत्थ णं बहवे
 वेज्जा य वेज्जपुत्ता य जाणुया य जाणुयपुत्ता य कुसला य कुसलपुत्ता य
 दिन्नभइभत्तवेयणा बहूणं वाहियाण य गिलाणाण य रोगियाण य दुब्ब-
 लाण य तेइच्छकम्मं करेमाणा विहरंति । अन्ने य तत्थ बहवे पुरिसा
 दिन्नभइ० तेसिं बहूणं वाहियाण य रोगियागिलाणदुब्बलाण य ओसह-
 भेसज्जभत्तपाणेणं पडियारकम्मं करेमाणा विहरंति । तए णं नंदे उत्त-
 रिस्से वणसंडे एगं महं अलंकारियसभं करेइ अणेगखंभसय जाव पडि-
 रूवं । तत्थ णं बहवे अलंकारियमणुस्सा दिन्नभइभत्तपाणा बहूणं समणाण
 य माहणाण य सनाहाण य अणाहाण य गिलाणाण य रोगियाण
 य दुब्बलाण य अलंकारियकम्मं करेमाणा २ विहरंति । तए णं तीए
 नंदाए पोक्खरिणीए बहवे सणाहा य अणाहा य पंथिया य पहिया य
 करोडियाँ य तणहारा पत्तहारा कट्टहारा अप्पेगइया ण्हायंति अप्पेगइया
 पाणियं पियंति अप्पेगइया पाणियं संवहंति अप्पेगइया विसज्जियसेय-
 जल्लमलपरिस्समनिइखुप्पिवासा सुहंसुहेणं विहरंति । रायगिहनिग्गओ वि-
 एत्थ बहुजणो किं ते जल्लरमणविविहमज्जणकयलिलयाहरयकुसुमसत्थरय-
 अणेगसउणगणकयरिभियसंकुलेसु सुहंसुहेणं अभिरममाणो २ विहरइ ।
 तए णं नंदाए पोक्खरिणीए बहुजणो ण्हायमाणो य पीयमाणो य पाणियं
 च संबइमणो य अन्नमन्नं एवं वयासी — धन्ने णं देवाणुप्पिया ! नंदे
 मणियारसेट्ठी कयत्थे जाव जम्मजीवियफले जस्स णं इमेयारूवा नंदा
 पोक्खरिणी चाउक्कोषा जाव पडिरूवा जस्स णं पुरत्थिमिल्ले तं चेव सव्वं
 चउसु वि वणसंडेसु जाव रायगिहविप्पिमाओ अत्थ बहुजणो अस्सणेसु
 य सक्खणेसु य सन्निसण्णे य संसुयट्ठो य पेच्छमाणो य साहेमाणो य

सुहंसुहेणं विहरइ । तं धन्ने कयत्थे कयलक्खणे कयपुण्णे कया णं
लोया सुलद्धे माणुस्सए जम्मजीवियफले नंदस्स मणियारस्स । तए णं
रायगिहे सिंघाडग जाव बहुजणो अन्नमन्नस्स एवमाइक्खइ ४ — धन्ने णं
देवाणुप्पिया ! नंदे मणियारे सो चेव गमओ जाव सुहंसुहेणं विहरइ ।
तए णं से नंदे मणियारे बहुजणस्स अंतिए एयमट्ठं सोच्चा निसम्म
हट्ठुट्ठे धाराहयकयंबकं पिव समूसविथरोमकूवे परं सायासोक्खमणु-
भवेमाणे विहरइ ।

(100) तए णं तस्स नंदस्स मणियारसेट्ठिस्स अन्नया कयाइ सरीर-
गंसि सोलस रोयायंका पाउब्भूया तंजहा— सासे कैसे जरे दाहे कुच्छि-
सूले भगंदरे । अरिसाँ अजीरए दिट्ठीमुद्धसूले अकारए ॥१॥ अच्छि-
वेयणा कणवेयणा कंडू दंडदरे कोढे ॥ तए णं से नंदे मणियारसेट्ठी
सोलसहिं रोयायंकेहिं अभिभूए समाणे कोडुंबियपुरिसे सदावेइ २ एवं
वयासी— गच्छह णं तुब्भे देवाणुप्पिया ! रायगिहे नयरे सिंघाडग जाव
पहेसु महया २ सहेणं उग्घोसेमाणा २ एवं वयह— एवं खलु देवाणुप्पिया !
नंदस्स मणियारस्स सरीरगंसि सोलस रोयायंका पाउब्भूया तंजहा —
सासे जाव कोढे । तं जो णं इच्छइ देवाणुप्पिया ! विज्जो वा विज्ज-
पुत्तो वा जाणुओ वा २ कुसलो वा २ नंदस्स मणियारस्स तेसिं च णं
सोलसण्हं रोयायंकाणं एगमवि रोयायंकं उवसामित्तए तस्स णं नंदे
मणियारे विउलं अत्थसंपयाणं दलयइ त्तिकट्ठु दोच्चं पि तच्चं पि घोसणं
घोसेह २ एयमाणत्तियं पच्चप्पिणह तेवि तहेव पच्चप्पिणंति । तए णं राय-
गिहे इमेयारूवं घोसणं सोच्चा निसम्म बहवे वेज्जा य वेज्जपुत्ता य जाव
कुसलपुत्ता य सत्थकोसहत्थगया य सिलियाहत्थगया य गुलियाहत्थ-
गया य ओसहभेसज्जहत्थगया य सएहिं २ गिहेहिंतो निक्खमंति २
रायगिहं मज्झंमज्जेणं जेणेव नंदस्स मणियारसेट्ठिस्स गिहे तेणेव उवा-
गच्छंति २ नंदस्स मणियारस्स सरीरगं पासंति २ तेसिं रोयायंकाणं
नियाणं पुच्छंति २ नंदस्स मणियारस्स बहूहिं उव्वलणेहि य उव्वट्टणेहि
य सिणेहपाणेहि य वमणेहि य बिरेयणेहि य सेयणेहि य अवदहणेहि य

अवण्हावणेहि य अणुवासणाहि य वत्थिकम्मेहि य निरूहेहि य सिरा-
वेहेहि य तच्छणाहि य पच्छणाहि य सिरावत्थीहि य तप्पणाहि य पुंड-
वाएहि य छल्लीहि य वल्लीहि य मूलेहि य कंदेहि य पत्तेहि य पुप्फेहि
य फलेहि य बीएहि य सिलियाहि य गुलियाहि य ओसहेहि य भेस-
ज्जेहि य इच्छंति तेसिं सोलसण्हं रोयायंकाणं एगमवि रोयायंकं उवसामि-
त्तए नो चेव णं संचाएंति उवसामेत्तए । तए णं ते बहवे विज्जा य ६
जाहे नो संचाएंति तेसिं सोलसण्हं रोयायंकाणं एगमवि रोयायंकं उव-
सामित्तए ताहे संता तंता जाव पडिगया । तए णं नंदे मणियारे तेहिं
सोलसेहिं रोयायंकेहिं अभिभूए समाणे नंदाए पुक्खरिणीए मुच्छिए ४
तिरिक्खजोणिएहिं निबद्धाउए बद्धपएसिए अट्टुहट्टवसट्टे कालमासे कालं
किञ्चा नंदाए पोक्खरिणीए ददुरीए कुच्छिसि ददुरत्ताए उववन्ने । तए
णं नंदे ददुरे गब्भाओ विर्पमुक्के समाणे उमुक्कवालभावे विन्नायपरि-
णयमित्ते जोव्वणगमणुप्पत्ते नंदाए पोक्खरिणीए अभिरममाणे २ विह-
रइ । तए णं नंदाए पोक्खरिणीए बहुजणो ण्हायमाणो य पियइ यं
पाणियं च संवहमाणो अन्नमन्नं एवमाइक्खइ ४- धन्ने णं देवाणु-
प्पिया ! नंदे मणियारे जस्स णं इमेयारूवा नंदा पुक्खरिणी चाउक्कोणा
जाव पडिरूवा जस्स णं पुरत्थिमिल्ले वणसंडे चित्तसभा अणेगखंभ तहेव
चत्तारि सभाओ जाव जम्मजीवियफले । तए णं तस्स ददुरस्स तं
आभिक्खणं २ बहुजणस्स अंतिए एयमट्ठं सोच्चा निसम्म इमेयारूवे
अज्झत्थिए ४ समुप्पज्जित्था - से कहिं मन्ने मए इमेयारूवे सहे निसंत-
पुव्वे त्तिकट्ठु सुभेणं परिणामेणं जाव जाईसरणे समुप्पन्ने पुव्वजाइं
सम्मं समागच्छइ । तए णं तस्स ददुरस्स इमेयारूवे अज्झत्थिए ४-एवं
खलु अहं इहेव रायगिहे नयरे नंदे नामं मणियारे अट्टे० । तेणं कालेणं
२ समणे भगवं महावीरे इह समोसट्टे । तए णं मए समणस्स ३
अंतिए पंचाणुव्वइए सत्तसिक्खावइए जाव पडिवन्ने । तए णं अहं
अन्नया कयाइ असाहुदंसणेणं य जाव मिच्छत्तं विप्पडिवन्ने । तए णं
अहं अन्नया कयाइं गिम्हकालसमयंसि जाव उवसंपज्जित्ताणं विहरामि-

एवं जहेव चिंता आपुच्छणा नंदापुक्खरिणी वणसंडा सहाओ तं चेव सव्वं जाव नंदाए दहुरत्ताए उववन्ने । तं अहो णं अहं अहन्ने अपुण्णे अकयपुण्णे निग्गंथाओ पावयणाओ नट्ठे भट्ठे परिब्भट्ठे । तं सेयं खलु ममं सयमेव पुव्वपडिवन्नाइं पंचाणुव्वयाइं उवसंपज्जित्ताणं विहरित्तए । एवं सपेहेइ २ पुव्वपडिवन्नाइं पंचाणुव्वयाइं जाव आरुहइ २ इमेयारूवं अभिग्गहं अभिगिण्हइ – कप्पइ मे जावज्जीवं छट्ठंछट्ठेणं अणिक्खित्तेणं अप्पाणं भावेमाणस्स विहरित्तए । छट्ठस्स वि य णं पारणगंसि कप्पइ मे नंदाए पोक्खरिणीए परिपेरंतेसु फासुएणं ण्हाणोदएणं उम्मईणालोलियाहि य वित्तिं कप्पेमाणस्स विहरित्तए । इमेयारूवं अभिग्गहं अभिगेण्हइ जाव-ज्जीवाए छट्ठंछट्ठेणं जाव विहरइ । तेणं कालेणं २ अहं गोयमा ! गुण-सिलए समोसट्ठे परिसा निग्गया । तए णं नंदाए पोक्खरिणीए बहुजणो ण्हाइ ३ अन्नमन्नं जाव समणे ३ इहेव गुणसिलए चेइए समोसट्ठे । तं गच्छामो णं देवाणुप्पिया ! समणं ३ वंदामो जाव पज्जुवासामो । एयं णे इहभवे परभवे य हियाए जाव आणुगामियत्ताए भविस्सइ । तए णं तस्स दहुरस्स बहुजणस्स अंतिए एयमट्ठं सोच्चा निसम्म अयमेयारूवे अज्झत्थिए ४ समुप्पज्जित्था—एवं खलु समणे ३ समोसट्ठे । तं गच्छामि णं वंदामि । एवं सपेहेइ २ नंदाओ पुक्खरिणीओ साणियं २ उत्तरेइ जेणेव रायमग्गे तेणेव उवागच्छइ २ ताए उक्किट्ठाए ५ दहुरगईए वीईवयमाणे जेणेव ममं अंतिए तेणेव पहरेत्थ गमणाए । इमं च णं सेणिए राया भिभसारे ण्हाए कयकोउय जाव सव्वालंकारविभूसिए हत्थिखंधवरगए सकोरेंटमल्लदामेणं छत्तेणं धरिज्जमाणेणं सेयवरचामरेहि य उद्धव्वमाणेहिं हयगयरहं ० महया भड्चडगरचाउरंगिणीए सेणाए सद्धिं संपरिवुडे मम पायवंदए हव्वमागच्छइ । तए णं से दहुरे सेणियस्स रन्नो एगेणं आसकिसोरएणं वामपाएणं अकंते समाणे अंतनिग्वाइए कए यावि होत्था । तए णं से दहुरे अथामे अबले अवीरिए अपुरिसक्कारपरक्कमे अधारणिज्ज-मित्तिकट्ठु एगंतमवक्कमइ करयल जाव एवं बयासी—नमोत्थु णं अरहंताणं जाव संपत्ताणं । नमोत्थु णं मम धम्मायरियस्स जाव संपाविउकामस्स ।

पुर्व्विपि य णं मए समणस्स ३ अंतिए थूलए पाणाइवाए पच्चक्खाए जाव थूलए परिगहे पच्चक्खाए । तं इयाणिंपि तस्सेव अंतिए सव्वं पाणाइवायं पच्चक्खामि जाव सव्वं परिगहं पच्चक्खामि जावज्जीवं सव्वं असणं ४ पच्चक्खामि जावज्जीवं जंपि य इमं सरीरं इट्ठं कंतं जाव मा फुसंतु एयंपि य णं चरिमेहिं ऊसासेहिं वोसिरामि त्तिकट्ठु । तए णं से दहुरे कालमासे कालं किच्चा जाव सोहम्मे कप्पे दहुरवडिसए उव-वायसभाए दहुरदेवत्ताए उववन्ने । एवं खलु गोयमा ! दहुरेणं सा दिव्वा देविड्डी लद्धा ३ । दहुरस्स णं भंते ! देवस्स केवइयं कालं ठिई पन्नत्ता ? गोयमा ! चत्तारि पलिओवमाइं ठिई पन्नत्ता । दहुरे णं भंते ! देवे ताओ देवलोगाओ आउक्खएणं ठिइक्खएणं कहिं गच्छिहिइ कहिं उववज्जिहिइ ? गोयमा ! से णं दहुरे देवे महाविदेहे वासे सिज्झिहिइ बुज्झिहिइ मुच्चि-हिइ जाव अंतं करेहिइ ।

एवं खलु जंबू ! समणेणं भगवया महावीरेणं जाव संपत्तेणं तेरसमस्स नायज्झयणस्स अयमट्ठे पन्नत्ते त्ति बेमि ॥

॥ तेरसमं नायज्झयणं संमत्तं ॥ १३ ॥

॥ चोइसमं अज्झयणं ॥

(101) जइ णं भंते ! समणेणं जाव संपत्तेणं तेरसमस्स नायज्झयणस्स अयमट्ठे पन्नत्ते चोइसमस्स के अट्ठे पन्नत्ते ? एवं खलु जंबू ! तेणं कालेणं २ तेयलिपुरं नाम नैयरं । पमयवणे उज्जाणे । कणगरहे रायी । तस्स णं कणगरहस्स पउमावई देवी । तस्स णं कणगरहस्स रन्नो तेयलिपुत्ते नामं अमच्चे सामदंडभेयनिउणे । तत्थ णं तेयलिपुरे कलादे नामं मूसियारदारए होत्था अड्डे जाव अपरिभूए । तस्स णं भद्दा नामं भारिया । तस्स णं कलायस्स मूसियारदारगस्स धूया भद्दाए अत्तया पोट्टिल्लं नामं दारिया होत्था रूवेण य उक्किट्ठा जाव उक्किट्ठसरीरा । तए णं सा पोट्टिला दारिया अन्नया कयाइ प्हाया सव्वालंकारविभूसिया

चेडियाचक्रवालसंपरिवुडा उप्पि पासायवरगया आगासतलगंसि कणगतिंदू-
 सएणं कीलमाणी २ विहरइ । इमं च णं तेयलिपुत्ते अमच्चे ण्हाए आस-
 खंधवरगए महया भडचडगर० आसवाहणियाए निज्जायमाणे कलायस्स
 मूसियारदारगस्स गिहस्स अदूरसामंतेणं वीईवयइ । तए णं से तेयलिपुत्ते
 अमच्चे मूसियारदारगगिहस्स अदूरसामंतेणं वीईवयमाणे २ पोट्टिलं दारियं
 उप्पि आगासतलगंसि कणगतिंदूसएणं कीलमाणीं पासइ २ पोट्टिलाए दारि-
 याए रूवे य जाव अज्जोववन्ने कोडुंवियपुरिसे सद्दावेइ २ एवं वयासी-
 एस णं देवाणुप्पिया ! कस्स दारिया किंनामधेज्जा वा ? तए णं कोडुं-
 वियपुरिसा तेयलिपुत्तं एवं वयासी — एस णं सामी ! कलायस्स मूसियार-
 दारयस्स धूया भद्दाए अत्तया पोट्टिला नामं दारिया रूवेण य जाव उक्किट्ट-
 सरीरा । तए णं से तेयलिपुत्ते आसवाहणियाओ पडिनियत्ते समाणे
 अब्भितरठाणिज्जे पुरिसे सद्दावेइ २ एवं वयासी — गच्छह णं तुब्भे देवा-
 णुप्पिया ! कलायस्स २ धूर्यं भद्दाए अत्तयं पोट्टिलं दारियं मम भारि-
 यत्ताए वरेह । तए णं ते अब्भितरठाणिज्जा पुरिसा तेयलिणा एवं वुत्ता
 हट्ठा करयल० तहत्ति जेणेव कलायस्स २ गिहे तेणेव उवागया । तए णं से
 कलाए २ ते पुरिसे एज्जमाणे पासइ २ हट्ठतुट्ठे आसणाओ अब्भुट्ठेइ २
 सत्तट्ठपयाइं अणुगच्छइ २ आसणेणं उवणिमंतेइ २ आसत्थे वीसत्थे
 सुहासणवरगए एवं वयासी — संदिसंतु णं देवाणुप्पिया ! किमागमण-
 पओयणं । तए णं ते अब्भितरठाणिज्जा कलायं २ एवं वयासी—अम्हे णं
 देवाणुप्पिया ! तव धूर्यं भद्दाए अत्तयं पोट्टिलं दारियं तेयलिपुत्तस्स भारि-
 यत्ताए वरेमो । तं जइ णं जाणसि देवाणुप्पिया ! जुत्तं वा पत्तं वा सला-
 हणिज्जं वा सरिसो वा संजोगो ता दिज्जउ णं पोट्टिला दारिया तेयलिपुत्तस्स ।
 तो भण देवाणुप्पिया ! किं दलामो सुक्कं । तए णं कलाए २ ते अब्भितर-
 ठाणिज्जे पुरिसे एवं वयासी — एस चेव णं देवाणुप्पिया ! मम सुक्कं जन्नं
 तेयलिपुत्ते मम दारियानिमित्तेणं अणुगहं करेइ । ते ठाणिज्जे पुरिसे
 विपुलेणं असणेणं ४ पुप्फवत्थ जाव मल्लालंकारेणं सक्कारेइ सम्माणेइ
 पडिविसज्जेइ । तए णं ते पुरिसा कलायस्स २ गिहाओ पडिनियत्तंति २

जेणेव तेयलिपुत्ते अमच्चे तेणेव उवागच्छंति २ तेयलिपुत्तं एयमट्टं निवे-
 झंति । तए णं कलाए २ अन्नया कयाइं सोहणांसि तिहिकरणनक्खत्तमुहु-
 त्तंसि पोट्टिलं दारियं ण्हायं सव्वालंकारविभूसियं सीयं दुरुहेत्ता मित्तणाइ-
 संपरिवुडे सयाओ गिहाओ पडिनिक्खमइ २ सव्विड्डीए ४ तेयलिपुरं
 नयरं मज्झंमज्जेणं जेणेव तेयलिस्स गिहे तेणेव उवागच्छइ पोट्टिलं दारियं
 तेयलिपुत्तस्स सयमेव भारियत्ताए दलयइ । तए णं तेयलिपुत्ते पोट्टिलं
 दारियं भारियत्ताए उवणीयं पासइ २ पोट्टिलाए सद्धिं पट्टयं दुरुहइ २
 सेयापीएहिं कलसेहिं अप्पाणं मज्जावेइ २ अग्गिहोमं करेइ २ पाणिग्ग-
 हणं करेइ २ पोट्टिलाए भारियाए मित्तनाइ जाव परियणं विउलेणं असण-
 पाणखाइमसाइमेणं पुप्फवत्थ जाव पडिविसज्जेइ । तए णं से तेयलिपुत्ते
 पोट्टिलाए भारियाए अणुरत्ते अविरत्ते उरालाइं जाव विहरइ ।

(102) तए णं से कणगरहे रज्जे य रट्ठे य बले य बाहणे य कोसे य
 कोट्टागारे य अंतेउरे य मुच्छिइ ४ जाए २ पुत्ते वियंगेइ । अप्पेगइयाणं
 हत्थंगुलियाओ छिंदइ अप्पेगइयाणं हत्थंगुट्ठए छिंदइ । एवं पायंगुलियाओ
 पायंगुट्ठए वि कण्णसंकुलीयाओ वि नासापुडाइं फालेइ अंगोवंगीइं वियंगेइ ।
 तए णं तीसे पउमावईए देवीए अन्नया कयाइ पुव्वरत्तावरत्तकालसमयंसि
 अयमेयारूवे अज्झत्थिए ४ समुप्पज्जित्था — एवं खलु कणगरहे राया रज्जे
 य जाव पुत्ते वियंगेइ जाव अंगमंगाइं वियंगेइ । तं जइ णं अहं दारयं
 पर्यामि सेयं खलु मम तं दारगं कणगरहस्स रहस्सिययं चेव सारक्खमाणीए
 संगोवेमाणीए विहरित्तेए त्तिकट्ठु एवं संपेहेइ २ तेयलिपुत्तं अमच्चं सदावेइ
 २ एवं वयासी—एवं खलु देवाणुप्पिया ! कणगरहे राया रज्जे य जाव वियंगेइ ।
 तं जइ णं अहं देवाणुप्पिया ! दारगं पर्यामि तए णं तुमं कणगरहस्स
 रहस्सिययं चेव अणुपुव्वेणं सारक्खमाणे संगोवेमाणे संवड्ढेहि । तए
 णं से दारए उमुक्कवालभावे जाव जोव्वणगमणुप्पत्ते तव य मम य
 भिक्खाभायणे भविस्सइ । तए णं से तेयलिपुत्ते पउमावईए
 एयमट्टं पडिसुणेइ २ पडिगए । तए णं पउमावई देवी पोट्टिला य
 अमच्ची सममेव गव्वं गेण्हइ सममेव परिवर्हंति । तए णं सा

पउमावई नवण्हं मासाणं जाव पियदंसणं सुरूवं दारगं पयाया । जं
 रयणिं च णं पउमावई दारयं पयाया तं रयणिं च णं पोट्टिला वि अमञ्ची
 नवण्हं मासाणं विणिघायमावन्नं दारियं पयाया । तए णं सा पउमावई
 देवी अम्मधाइं सहावेइ २ एवं वयासी — गच्छह णं तुमं अम्मो ! तेयलि-
 पुत्तं रहस्सियं चेव सहावेहि । तए णं सा अम्मधाइं तहत्ति पडि-
 सुणेइ २ अंतेउरस्स अवदारेणं निग्गच्छइ २ जेणेव तेयलिस्स गिहे
 जेणेव तेयलिपुत्ते तेणेव उवागच्छइ २ करयल जाव एवं वयासी — एवं
 खलु देवाणुप्पिया ! पउमावई देवी सहावेइ । तए णं तेयलिपुत्ते अम्म-
 धाईए अंतिए एयमट्ठं सोच्चा हट्ठुट्ठे अम्मधाईए साद्धं उयाओ गिहाओ
 निग्गच्छइ २ अंतेउरस्स अवदारेणं रहस्सियं चेव अणुप्पविसइ २
 जेणेव पउमावई तेणेव उवागच्छइ करयल जाव एवं वयासी — संदिसंतु णं
 देवाणुप्पिया ! जं मए कायव्वं । तए णं पउमावई तेयलिपुत्तं एवं
 वयासी — एवं खलु कणगरहे राया जाव वियंगेइ । अहं च णं देवाणु-
 प्पिया ! दारगं पयाया । तं तुब्भे णं देवाणुप्पिया ! एयं दारगं गेण्हाहि
 जाव तव मम य भिक्खाभायणे भविरसइ त्तिकट्ठु तेयलिपुत्तस्स हत्थे
 दलयइ । तए णं तेयलिपुत्ते पउमावईए हत्थाओ दारगं गेण्हइ उत्तरि-
 ज्जेणं पिहेई २ अंतेउरस्स रहस्सियं अवदारेणं निग्गच्छइ २ जेणेव
 सए गिहे जेणेव पोट्टिला भारिया तेणेव उवागच्छइ २ पोट्टिलं एवं
 वयासी — एवं खलु देवाणुप्पिए ! कणगरहे राया रज्जे य जाव वियं-
 गेइ । अयं च णं दारए कणगरहस्स पुत्ते पउमावईए अत्तए । तन्नं
 तुमं देवाणुप्पिए ! इमं दारगं कणगरहस्स रहस्सियं चेव अणुपुण्वेणं
 सारक्खाहि य संगोवेहि य संवड्ढेहि य । तए णं एस दारए उमुक्क-
 बालभावे तव य मम य पउमावईए य आहारे भविस्सइ त्तिकट्ठु
 पोट्टिलाए पासे निक्खिबई २ पोट्टिलाए पासाओ तं विणिहायमान्नियं
 दारियं गेण्हइ २ उत्तरिज्जेणं पिहेई २ अंतेउरस्स अवदारेणं अणुप्प-
 विसइ २ जेणेव पउमावई देवी तेणेव उवागच्छइ २ पउमावईए देवीए
 पासे ठावेइ जाव पडिनिग्गए । तए णं तीसे पउमावईए अंगपडि-

यारियाओ पउमावइं देविं विणिहायमावन्नियं दारियं पयायं पासंति २ जेणेव कणगरहे राया तेणेव उवागच्छंति २ करयल जाव एवं वयासी — एवं खलु सामी ! पउमावईं देवी मएल्लियं दारियं पयाया । तए णं कणगरहे राया तीसे मएल्लियाए दारियाए महया नीहरणं करेइ बहूइं लोगियाइं मयकिच्चाइं करेइ २ कालेणं विगयसोए जाएँ । तए णं से तेयलिपुत्ते कलं कोडुंबियपुरिसे सहावेइ २ एवं वयासी — खिप्पामेव चारगसोहणं जाव ठिइपडियं जम्हा णं अम्हं एस दारए कणगरहस्स रज्जे जाए तं होउ णं दारए नामेणं कणगज्झए जाव अलंभोगसंमत्थे जाए ।

(103) तए णं सा पोट्टिला अन्नया कयाइ तेयलिपुत्तस्स अणिट्ठा ५ जाया यावि होत्था नेच्छइ णं तेयलिपुत्ते पोट्टिलाए नामगोयमवि सवणयाए किंपुण दंसणं वा परिभोगं वा । तए णं तीसे पोट्टिलाए अन्नया कयाइं पुव्वरत्तावरत्तकालसमयंसि इमेयारूवे अज्झत्थिए ४ जाव समुप्पज्जित्था — एवं खलु अहं तेयलिस्स पुव्वि इट्ठा ५ आसि इयाणि अणिट्ठा ५ जाया । नेच्छइ णं तेयलिपुत्ते मम नामं जाव परिभोगं वा ओहयमणसंकप्पा जाव झियायइ । तए णं तेयलिपुत्ते पोट्टिलं ओहयमणसंकप्पं जाव झियायमाणं पासइ २ एवं वयासी — मा णं तुमं देवाणुप्पिए ! ओहयमणसंकप्पा जाव झियाहि । तुमं णं मम महाणसंसि विपुलं असणं ४ उवक्खडावेहि २ बहूणं समणमाहण जाव वणीमगाणं देयमाणी य दवावेमाणी य विहराहि । तए णं सा पोट्टिला तेयलिपुत्तेणं अमच्चेणं एवं वुत्ता समाणी हट्ठा तेयलिपुत्तस्स एयमट्ठं पडिसुणेइ २ कल्लकल्लिं महाणसंसि विपुलं असणं ४ जाव दवावेमाणी विहरइ ।

(104) तेणं कालेणं २ सुव्वयाओ नामं अज्जाओ इरियासमियाओ जाव गुत्तवंभचारिणीओ बहुस्सुय्याओ बहुपरिवाराओ पुव्वानुपुव्वि चरमाणीओ जेणामेव तेयलिपुरे नयरे तेणेव उवागच्छंति २ अहापडिरूवं उग्गहं ओगिण्हंति २ संजमेणं तवसा अप्पाणं भावेमाणीओ विहरंति । तए णं तारिं सुव्वयाणं अज्जाणं एगे संघाडए पढमाए पोरिसीए सज्झायं करेइ जाव अढमाणीओ तेयलिस्स गिहं अणुपविट्ठाओ । तए णं सा

पोट्टिला ताओ अज्जाओ एज्जमाणीओ पासइ २ हट्ठतुट्ठा आसणाओ अब्भुट्ठेइ वंदइ नमंसइ २ विपुलेणं असणेणं ४ पडिलाभेइ २ एवं वयासी -- एवं खलु अहं अज्जाओ ! तेयलिपुत्तस्स पुण्वि इट्ठा ५ आसि इयाणिं अणिट्ठा ५ जाव दंसणं वा परिभोगं वा । तं तुब्भे णं अज्जाओ बहुनायाओ बहुसिक्खियाओ बहुपढियाओ बहूणि गामागर जाव आहिं-
 उह बहूणं राईसर जाव गिहाइं अणुपविसह । तं अत्थियाइं भे अज्जाओ ! केइ कहिंचि चुण्णजोए वा मंतजोगे वा कम्मणजोए वा हियंउड्ढावणे वा काउड्ढावणे वा आभिओगिए वा वसीकरणे वा कोउयकम्मे वा भूइ-
 कम्मे वा मूले वा कंदे वा छल्ली वल्ली सिलिया वा गुलिया वा ओसहे वा भेसज्जे वा उवलद्धपुव्वे जेण्णाहं तेयलिपुत्तस्स पुणरवि इट्ठा ५ भवेज्जामि ? तए णं ताओ अज्जाओ पोट्टिलाए एवं वुत्ताओ समाणीओ दोवि कण्णे अंगुलियं ठवेंति २ पोट्टिलं एवं वयासी -- अम्हे णं देवाणुप्पिए ! समणीओ निगगंथीओ जाव गुत्तबंभचारिणीओ । नो खलु कप्पइ अम्हं एयप्पगारं कण्णेहिं वि निसामित्तए किमंग पुण उव्वंसित्तए वा आयरित्तए वा । अम्हे णं तव देवाणुप्पिया ! विचित्तं केवलपन्नत्तं धम्मं पेरिकहि-
 ज्जामो । तए णं सा पोट्टिला ताओ अज्जाओ एवं वयासी -- इच्छामि णं अज्जाओ ! तुब्भं अंतिए केवलपन्नत्तं धम्मं निसामित्तए । तए णं ताओ अज्जाओ पोट्टिलाए विचित्तं धम्मं परिकहेति । तए णं सा पोट्टिला धम्मं सोच्चा निसम्म हट्ठा एवं वयासी -- सदहामि णं अज्जाओ ! निगगंथं पावयणं जाव से जहेयं तुब्भे वयह । इच्छामि णं अहं तुब्भं अंतिए पंचाणुव्वइयं जाव धम्मं पडिवज्जित्तए । अहासुहं देवाणुप्पिया । तए णं सा पोट्टिला तासिं अज्जाणं अंतिए पंचाणुव्वइयं जाव धम्मं पडिवज्जइ ताओ अज्जाओ वंदइ नमंसइ २ पडिविसज्जेइ । तए णं सा पोट्टिला समणोवासिया जाया जाव पडिलाभेमाणी विहरइ ।

(105) तए णं तीसे पोट्टिलाए अन्नया कयाइ पुव्वरत्तावरत्त-
 कालसमयंसि कुंडुंबजागरियं जागरमाणीए अयमेयारूवे अज्झत्थिए ४-
 एवं खलु अहं तेयलिपुत्तस्स पुण्वि इट्ठा ५ आसि इयाणिं अणिट्ठा ५ जाव

परिभोगं वा । तं सेयं खलु ममं सुव्वयाणं अज्जाणं अंतिए पव्वइत्तए । एवं सपेहेइ २ कल्लं जेणेव तेयलिपुत्ते तेणेव उवागच्छइ २ करयल जाव एवं वयासी - एवं खलु देवाणुप्पिया ! मए सुव्वयाणं अज्जाणं अंतिए धम्मं निसंते जाव अब्भणुन्नाया पव्वइत्तए ! तए णं तेयलिपुत्ते पोट्टिलं एवं वयासी - एवं खलु तुमं देवाणुप्पिए ! मुंडा पव्वइया समाणी कालमासे कालं किच्चा अणंतरेसु देवलोएसु देवत्ताए उववज्जिहिसि । तं जइ णं तुमं देवाणुप्पिए ! ममं ताओ देवलोगाओ आगम्म केवलपन्नते धम्मं बोहेहिं तो हं विसज्जेमि । अहं णं तुमं ममं न संबोहेसि तो ते न विसज्जेमि । तए णं सा पोट्टिला तेयलिपुत्तस्स एयमट्ठं पडिसुणेइ । तए णं तेयलिपुत्ते विउलं असणं ४ उवक्खडावेइ २ मित्तनाइ जाव आमंतेइ जाव सम्माणेइ २ पोट्टिलं ण्हायं जाव पुरिससहस्सवाहिणीयं सीयं दुरूहित्ता मित्तनाइ जाव संपरिवुडे सव्विड्डीए जाव रवेणं तेयलिपुरं मज्झमज्जेणं जेणेव सुव्वयाणं उवस्सए तेणेव उवागच्छइ २ सीयाओ पच्चोरुहइ २ पोट्टिलं पुरओकट्टु जेणेव सुव्वया अज्जा तेणेव उवागच्छइ २ वंदइ नमंसइ २ एवं वयासी - एवं खलु देवाणुप्पिया ! मम पोट्टिला भारिया इट्ठा ५ । एस णं संसारभउव्विग्गा जाव पव्वइत्तए । पडिच्छंतु णं देवाणुप्पिया ! सिस्सिणिभक्खं । अहासुहं मा पडिवंधं । तए णं सा पोट्टिला सुव्वयाहिं अज्जाहिं एवं उत्ता समाणी हट्ठा उत्तरपुरत्थिमं दिसीभागं अवक्कमइ २ सयमेव आभरणमल्लालंकारं ओमुयइ २ सयमेव पंचमुट्ठियं लोयं करेइ २ जेणेव सुव्वयाओ अज्जाओ तेणेव उवागच्छइ २ वंदइ नमंसइ २ एवं वयासी - आलित्ते णं भंते ! लोए एवं जहा देवाणंदा जाव एक्कारस अंगाइं बहूणि वासाणि सामण्णपरियागं पाउणइ २ मासियाए संलेहणाए अत्ताणं झोसेत्ता सट्ठिं भत्ताइं अणसणेणं छेएत्ता आलोइयपडिक्कंता समाहिपत्ता कालमासे कालं किच्चा अन्नयरेसु देवलोएसु देवत्ताए उववन्ना ।

(106) तए णं से कणमरहे राया अन्नया कयाइ कालधम्मणा संजुत्ते यावि होत्था । तए णं ते राईसर जाव नीहरणं करंति २

अन्नमन्नं एवं ब्रह्मासी - एवं खलु देवाणुप्पिया ! कणगरहे राया रत्ने
य जाव पुत्ते वियंगित्था । अम्हे णं देवाणुप्पिया ! रायाहीणा रायाहिट्ठिया
रायाहीणकज्जा । अयं च णं तेयली अमच्चे कणगरहस्स रत्नो सव्वट्ठाणेषु
सव्वभूमियासु लद्धपच्चए विन्नवियारे सव्वकल्लवड्ढावए यावि होत्था ।
तं सेयं खलु अम्हं तेयलिपुत्तं अमच्चं कुमारं जाइत्तए त्तिकट्ठु अन्नमन्नस्स
एयमट्ठं पडिसुणेंति २ जेणेव तेयलिपुत्ते अमच्चे तेणेव उवागच्छंति २
तेयलिपुत्तं एवं ब्रह्मासी - एवं खलु देवाणुप्पिया ! कणगरहे राया रत्ने य
रट्ठे य जाव वियंगेइ । अम्हे णं देवाणुप्पिया ! रायाहीणा जाव रायाहीण-
कज्जा । तुमं च णं देवाणुप्पिया ! कणगरहस्स रत्नो सव्वट्ठाणेषु जाव
रत्नधुराचिंतए होत्था । तं जइ णं देवाणुप्पिया ! अत्थि केइ कुमारे
रायलक्खणसंपन्ने अभिसेयारिहे तण्णं तुमं अम्हं दत्ताहि जण्णं अम्हे
महया २ रायाभिसेएणं अभिसिंचामो । तए णं तेयलिपुत्ते तेसिं ईसर
जाव एयमट्ठं पडिसुणेइ २ कणगज्झयं कुमारं पहायं जाव सस्सिरीवं करेइ २
तेसिं ईसर जाव उवणेइ २ एवं ब्रह्मासी - एस णं देवाणुप्पिया ! कणग-
रहस्स रत्नो पुत्ते पउवावईए देवीए अत्तए कणगज्झए नामं कुमारे
अभिसेयारिहे रायलक्खणसंपन्ने मए कणगरहस्स रत्नो रहस्सिययं
संवट्ठिए । एयं णं तुम्भे महया २ रायाभिसेएणं अभिसिंचह । सव्वं च
"तेसिं उट्ठाणपरिच्छवणियं पुरिकहेइ । तए णं ते ईसर जाव कणगज्झयं
कुमारं महया रायाभिसेएणं अभिसिंचंति । तए णं से कणगज्झयं कुमारे
राया जाए महयाहिमवंतं बण्णओ जाव रत्तं पसाहेमाणे विहरइ । तए णं
सा कलमावई देवी कणगज्झयं रीयं सहावेइ २ एवं ब्रह्मासी - एस णं
पुत्ता ! तव रत्ते जाव अन्तेउरे य तुमं च तेयलिपुत्तस्स अमच्चस्स
पभक्केणं । तं तुमं णं तेयलिपुत्तं अमच्चं आढाहि परिजाणहि सक्कारेहि
सम्माणेहि इत्तं" अबुद्धेहि ठियं फज्जुवाक्काहि वचंते पडिसंसाहेहि
अट्ठासणेणं उवणिमतेहि भोगं च से अणुवट्ठेहि । तए णं से कणगज्झयं
पउमावईए वहत्ति वयणं पडिसुणेइ जाव भोगं च से संवट्ठेइ ।

(107) तए णं से पोट्टिले देवे तेयलिपुत्तं अभिवक्खणं २ केवलि-

पन्नचे धम्मे संबोहेइ नो चेव णं से तेयलिपुत्ते संबुज्झइ । तए णं तस्स पोट्टिलवेवस्स इमेयारूवे अज्झत्थिए ४—एवं खलु कणगज्झए राया तेयलि-
 पुत्तं आढाइ जाव भोगं च संबहेइ । तए णं से तेयलिपुत्ते अभिक्खणं २
 संबोहिज्जमाणे वि धम्मे नो संबुज्झइ । तं सेयं खलु कणगज्झयं तेयलि-
 पुत्ताओ विप्परिणामित्तए त्तिकट्ठु एवं संपेहेइ २ कणगज्झयं तेयलिपुत्ताओ
 विप्परिणामेइ । तए णं तेयलिपुत्ते कलं ष्हाए जाव पायच्छित्ते आसखंध-
 वरगए बहुहिं पुरिसेहिं साद्धिं संपरिवुडे सयाओ गिहाओ निग्गच्छइ २
 जेणेव कणगज्झए राया तेणेव पहारेत्थ गमणाय । तए णं तेयलिपुत्तं अमच्चं
 जे जहा बहुवे राईसरतलवर जाव पभियओ पासंति ते तहेव आढायंति
 परियाणंति अब्भुट्ठेति २ अंजलिपरिगहं करेति इट्ठाहिं कंताहिं जाव वग्गूहिं
 आलवमाणा य संलवमाणा य पुरओ य पिट्ठओ य पासओ य मग्गओ य
 समणुगच्छंति । तए णं से तेयलिपुत्ते जेणेव कणगज्झए तेणेव उवागच्छइ ।
 तए णं से कणगज्झए तेयलिपुत्तं एज्जमाणं पासइ २ नो आढाइ नो
 परियाणाइ नो अब्भुट्ठेइ अणाढायमाणे ३ परम्मुहे संचिट्ठइ । तए णं
 से तेयलिपुत्ते कणगज्झयस्स रत्तो अंजलिं कोइ । तए णं से कणगज्झए
 राया अणाढायमाणे तुसिणीए परम्मुहे संचिट्ठइ । तए णं तेयलिपुत्ते
 कणगज्झयं रायं विप्परिणयं जाणित्ता भीए जाव संजायभए एच्चं वचासी—
 कट्ठे णं मम कणगज्झए राया । हीणे णं मम कणगज्झए राया । अव-
 ज्झाए णं कणगज्झए । तं न नज्जइ णं मम केणइ कुमारेण मारेहिइ
 त्तिकट्ठु भीए तत्थे जाव साभियं २ पच्चोसक्कइ २ तमेव आसखंधं दुरुहइ २
 तेयलिपुरं मज्झमज्जेणं जेणेव सए गिहे तेणेव पहारेत्थ गमणाय । तए
 णं तेयलिपुत्तं जे जहा ईसर जाव पासंति ते तहा नो आढायंति नो
 परियाणंति नो अब्भुट्ठेति नो अंजलिं ० इट्ठाइ जाव नो संलवंति नो पुरओ
 य पिट्ठओ य पासओ समणुगच्छंति । तए णं तेयलिपुत्ते जेणेव सए गिहे
 तेणेव उवागए । जा वि य से तत्थ बाहिरिया परिसा भवइ तंजहा—
 दासे इ वा पेसे इ वा भाइल्लए इ वा सा वि य णं नो आढाइ इ । जा वि य से
 अब्भिन्नरिया परिसा भवइ तंजहा—पिया इ वा माया इ वा जन्म सुण्हा इ

वासा वि य णं नो आढाइ ३ । तए णं से तेयलिपुत्ते जेणेव वासघरे जेणेव
 सयणिज्जे तेणेव उवागच्छइ २ सयणिज्जंसि निसीयइ २ एवं वयासी —
 एवं खलु अहं सयाओ गिहाओ निग्गच्छामि तं चेव जाव अम्भितरिया
 परिसा नो आढाइ नो परियाणाइ नो अब्भुट्टेइ । तं सेयं खलु मम
 अप्पाणं जीवियाओ बवरोवित्तए त्तिकट्टु एवं संपेहेइ २ तालउडं विसं
 आसगंसि पक्खिवइ । से नो संकमइ । तए णं से तेयलिपुत्ते अमब्भे
 नीलुप्पल जाव असिं खंधंसि ओहरइ । तत्थ वि य से धारा ओपेळा ।
 तए णं से तेयलिपुत्ते जेणेव असोगवणिया तेणेव उवागच्छइ २ पासगं
 गीवाए बंधइ २ रुक्खं दुरूहइ २ पासगं रुक्खे बंधइ २ अप्पाणं मुयइ ।
 तत्थ वि य से रज्जू छिन्ना । तए णं से तेयलिपुत्ते महइमहालियं सिलं
 गीवाए बंधइ २ अत्थाहमतारमपोरिसीयंसि उदगंसि अप्पाणं मुयइ ।
 तत्थ वि से थाहे जाए । तए णं से तेयलिपुत्ते सुक्कंसि तणकूडंसि अगणि-
 कायं पक्खिवइ २ अप्पाणं मुयइ । तत्थ वि य से अगणिकाए विज्झाए ।
 तए णं से तेयलिपुत्ते एवं वयासी — सद्धेयं खलु भो समणा वयंति ।
 सद्धेयं खलु भो माहणा वयंति । सद्धेयं खलु भो समणा माहणा वयंति ।
 अहं एगो असद्धेयं वयामि । एवं खलु अहं सह पुत्तेहिं अपुत्ते । को
 मेदं सदहिस्सइ ? सह मित्तेहिं अमित्ते । को मेदं सदहिस्सइ ? एवं
 अत्थेणं दारेणं दासेहिं पेसेहिं परिजणेणं । एवं खलु तेयलिपुत्तेणं अम-
 ब्भेणं कणगज्झएणं रत्ता अवज्झाएणं समाणेणं तालपुडगे विसे आसगंसि
 पक्खित्ते । से वि य नो कमइ । को मेयं सदहिस्सइ ? तेयलिपुत्ते नीलु-
 प्पल जाव खंधंसि ओहरिए । तत्थ वि य से धारा ओपेळा । को मेदं सद-
 हिस्सइ ? तेयलिपुत्ते पासगं गीवाए बंधित्ता जाव रज्जू छिन्ना । को मेयं
 सदहिस्सइ ? तेयलिपुत्ते महालियं जाव बंधित्ता अत्थाह जाव उदगंसि
 अप्पाणं मुक्के । तत्थ वि य णं थाहे जाए । को मेयं सदहिस्सइ ? तेयलिपुत्ते
 सुक्कंसि तणकूडे अग्गी विज्झाए । को मेयं सदहिस्सइ ? — ओहयमण-
 संकप्पे जाव झियायइ । तए णं से पोट्टिले देवे पोट्टिलारूवं विउन्वइ २
 तेयलिपुत्तस्स अदूरसामंते ठिष्ठा एवं वयासी — हं भो तेयलिपुत्ता !

पुरओ पवाए पिट्ठओ हत्थिभयं दुहओ अचक्खुफासे मज्झे सराणि
पतंति । गामे पलित्ते रंभे क्षियाइ रंभे पलित्ते गामे क्षियाइ । आउसो
तेयलिपुत्ता ! कओ वयामो ? तए णं से तेयलिपुत्ते पोट्टिलं एवं वयासी —
भीयस्स खलु भो ! पव्वज्जा सैरणं । उक्कट्टियस्स सदेसगमणं छुहियस्स
अन्नं तिसियस्स पाणं आउरस्स भेसज्जं माइयस्स रहस्सं अभिजुत्तस्स
पञ्चयकरणं अद्धाणपरिसंतस्स बाहणगमणं तरिउकामस्स पवहणकिच्चं परं
अभिओजिउकामस्स सहायकिच्चं । खंतस्स दंतस्स जिइंदियस्स एत्तो
एगमवि न भवइ । तए णं से पोट्टिले देवे तेयलिपुत्तं अमच्चं एवं वयासी —
सुट्ठु णं तुमं तेयलिपुत्ता ! एयमट्ठं आर्याणहि त्तिकट्ठु दोच्चंपि तच्चंपि
एवं वयई २ जामेव दिसिं पाउब्भूए तामेव दिसिं पडिगए ।

(108) तए णं तस्स तेयलिपुत्तस्स सुभेणं परिणामेणं जाईसरणे
समुप्पन्ने । तए णं तेयलिपुत्तस्स अयमेयारूवे अज्झत्थिए ४ समुप्पन्ने —
एवं खलु अहं इहेव जंबुदीवे २ महाविदेहे वासे पोक्खलावईविजए पौंड-
रिणिणीए रायहाणीए महापउमे नामं राया होत्था । तए णं हं थेराणं अंतिए
मुंडे भवित्ता जाव चोइसपुव्वाइं बहूणि वासाणि सामण्णपरियागं पाउणित्ता
मासियाए संलेहणाए महासुक्के कप्पे देवे । तए णं हं ताओ देवलोगाओ
आउक्खएणं भवक्खएणं ठिइक्खएणं अणंतरं चयं चइत्ता इहेव तेयलि-
पुरे तेयलिस्स अमच्चस्स भद्दाए भारियाए दारगत्ताए पञ्चायाए । तं सेयं
खलु मम पुव्वदिट्ठाइं महव्वयाइं सयमेव उवसंपज्जित्ताणं विहरित्तए ।
एवं संपेहेइ २ सयमेव महव्वयाइं आरुहेइ २ जेणेव पमयवणे उज्जाणे
तेणेव उवागच्छइ २ असोगवरपायवस्स अहे पुढविसिलापेट्टयांसि सुह-
निसण्णस्स अणुचितेमाणस्स पुव्वाहीयाइं सामाइयमाइयाइं चोइसपुव्वाइं
सयमेव अभिसमन्नागयाइं । तए णं तस्स तेयलिपुत्तस्स अणगारस्स
सुभेणं परिणामेणं जाव तयावरणिज्जाणं कम्माणं खओवसमेणं कम्मरय-
विकरणकरं अपुव्वकरणं पविट्ठस्स केवलवरनाणदंसणे समुप्पन्ने ।

(109) तए णं तेयलिपुरे नयरे अहासन्निहिण्हिं वाणमंतरेहिं
देवेहिं देवीहिं य देवदुंदुहीओ समाइयाओ दसद्धवण्णे कुसुमे निवाइए

दिठ्ठे गीयगंक्खविनाए कए यावि होत्था । तए णं से कणगज्झए राया इमीसे कहाए लद्धे समणे एवं वयासी - एवं खलु तेयलिपुत्ते मए अवज्झाए मुंडे भविता पक्वइए । तं गच्छामि णं तेयलिपुत्तं अणगारं वंदामि नमंसामि २ एयमट्ठं विणएणं भुज्जो २ खामेमि । एवं संपेहेइ २ ण्हए चाडरंगिणीए सेणाए जेणेव पमयवणे उज्जाणे जेणेव तेयलिपुत्ते अणगारे तेणेव उवागच्छइ २ तेयलिपुत्तं वंदइ नमंसइ २ एयमट्ठं च णं विणएणं भुज्जो २ खामेइ २ नच्चासन्ने जाव पञ्जुवासइ । तए णं से तेयलिपुत्ते अणगारे कणगज्झयस्स रत्तो तीसे य महइमहाळियाए परिसाए धम्मं परिकहेइ । तए णं से कणगज्झए राया तेयलिपुत्तस्स केवलिस्स अंतिए धम्मं सोळा निसम्म पंचाणुव्वइयं सत्तसिक्खावइयं सावगधम्मं पडिबज्जइ २ समणोवासए जाए जाव अभिगयजीवाजीवे । तए णं तेयलिपुत्ते केवली बहूणि वासाणि केवलिपरियागं पाउणिता जाव सिद्धे ।

एवं खलु जंबू ! समणेणं भगवया महावीरेणं जाव संपत्तेणं चोइसमस्स नायज्झयणस्स अयमट्ठे पन्नत्ते त्तिवेमि ।

॥ चोइसमं नायज्झयणं समत्तं ॥ १४ ॥

॥ पन्नरसमं अज्झयणं ॥

(110) जइ णं भंते ! चोइसमस्स नायज्झयणस्स अयमट्ठे पन्नत्ते पन्नरसमस्स णं के अट्ठे पन्नत्ते ? एवं खलु जंबू ! तेणं कालेणं २ चंपा नाम नयरी होत्था पुण्णमहे चेइए जियसत्तू राया । तत्थ णं चंपाए नयरीए धेणे नामं सत्थवाहे होत्था अड्डे जाव अपरिभूए । तीसे णं चंपाए नयरीए उत्तरपुरत्थिमे दिसीमाए अहिच्छत्ता नामं नयरी होत्था

रिद्धत्विमिच्चमिद्धा वण्णओ । तत्थ णं अहिच्छत्ताए नयरीए कणगकेऊ
नामं राखा होत्था वण्णओ । तए णं तस्स धणस्स सत्थवाहस्स
अन्नया क्याइ पुव्वरत्तावरत्तकालसमयांसि इमेयारूवे अज्झत्थिए
चित्तिए पत्थिए मणोगए संकप्पे समुप्पज्जित्था — सेवं खलु मम विपुलं
पणियभंडमायाए अहिच्छत्तं नयरिं वाणिज्जाए गमित्तए । एवं संपेहेइ २
गणिमं च ४ चउत्थिहं भंडं गेण्हइ सगडीसामंडं सज्जेइ २ सगडी-
सागडं भरेइ २ कोडुंबियपुरिसे सदावेइ २ एवं क्यासी — गच्छइ णं
तुम्मे देवाणुप्पिया ! चंपाए नयरीए सिंघाडग जाव पहेसु एवं वयहं —
एवं खलु देवाणुप्पिया ! धणे सत्थवाहे विपुलं पणियं आदाय इच्छइ
अहिच्छत्तं नयरिं वाणिज्जाए गमित्तए । तं जो णं देवाणुप्पिया ! चरए
वा चीरिए वा चम्मखंडिए वा भिच्छुंडे वा पंडरगे वा गोयमे वा
गोवत्तिए वा गिह्मिम्मचित्तए वा अविरुद्धविरुद्धवुड्डुसावगरत्तपडनिगंथ-
प्पभिइपासंडत्थे वा गिहत्थे वा धणेणं साद्धिं अहिच्छत्तं नयरिं गच्छइ
तस्स णं धणे अच्छत्तगस्स छत्तगं दलाइ अणुवाइणस्स ओवाहणाओ
दलयइ अकुंडियस्स कुंडियं दलयइ अपत्थवणस्स पत्थयणं दलयइ
अपक्खेवगस्स पक्खेवं दलयइ अंतरा वि य से पडियस्स वा भगगुग्गस्स
साहेज्जं दलयइ सुहंसुहेण य अहिच्छत्तं संपावेइ त्तिकट्टु दोक्षं पि तच्चं पि
घोसणं घोसेह २ मम एयमाणात्तियं पच्चप्पिणह । तए णं ते कोडुंबियपुरिसा
जाव एवं क्यासी — हंदि सुणंतु भगवंतो चंपानयरीवत्थव्वा बहवे
चरमा जाव पच्चप्पिणंति । तए णं तेसिं कोडुंबियपुरिसाणं अंतिए
एयमट्ठं सोळा चंपाए नयरीए बहवे चरगा व जाव गिहत्था य जेण्वेव
धणे सत्थवाहे तेणेव उवागच्छंति । तए णं धणे सत्थवाहे तेसिं चरगाण
य जाव गिहत्थाण य अच्छत्तगस्स छत्तं दलयइ जाव पत्थयणं दलाइ —
गच्छइ णं तुम्मे देवाणुप्पिया ! चंपाए नयरीए बहिया अग्गुज्जाणंसि ममं
पडिचालेमाणा विट्ठह । तए णं ते चरगा व० धणेणं सत्थवाहेणं एवं
वुत्ता समया जाव चिट्ठंति । तए णं धणे सत्थवाहे सोहणंसि तिहिकरण-
नक्खत्तंसि विट्ठलं असणं ४ उक्खत्तवावेइ २ मित्तमाइ अन्नंतेइ २ मोषणं

भोयावेइ २ आपुच्छइ २ सगडीसागडं जोयावेइ २ चंपाओ नयरीओ
 निगच्छइ नाइविप्पगिट्टेहिं अट्टाणेहिं वसमाणे २ सुहेहिं वसहिपायरसेहिं
 अंगं जणवयं मज्झमज्जेणं जेणेव देसंगं तेणेव उवागच्छइ २ सगडीसागडं
 मोयावेइ सत्थनिवेसं करेइ २ कोडुंबियपुरिसे सहावेइ २ एवं वयासी -
 तुब्भे णं देवाणुप्पिया ! मम सत्थनिवेसंसि महया २ सहेणं उग्घोसेमाणा २
 एवं वयह - एवं खलु देवाणुप्पिया ! इमीसे आगामियाए छिन्नावायाए
 दीहमद्धाए अडवीए बहुमज्झदेसभाए एत्थ णं बहवे नंदिफला नामं रुक्खा
 पन्नत्ता किण्हा जाव पत्तिया पुप्फिया फलिया हरिया रेरिज्जमाणा सिरिई
 अईव २ उवसोभेमाणा चिट्ठंति मणुन्ना वण्णेणं ४ जाव मणुन्ना फासेणं
 मणुन्ना छायाए । तं जो णं देवाणुप्पिया ! तेसिं नंदिफलाणं रुक्खाणं
 मूलाणि वा कंदतयपत्तपुप्फफलवीयाणि वा हरियाणि वा आहारेइ
 छायाए वा वीसमइ तस्स णं आवाए भइए भवइ तओ पच्छा परिणम-
 माणा २ अकाले चेव जीवियाओ ववरोवेइ । तं मा णं देवाणुप्पिया !
 केइ तेसिं नंदिफलाणं मूलाणि वा जाव छायाए वा वीसमउ मा णं से
 वि अकाले चेव जीवियाओ ववरोविज्जिस्सइ । तुब्भे णं देवाणुप्पिया !
 अन्नेसिं रुक्खाणं मूलाणि य जाव हरियाणि य आहारेइ छायासु
 वीसमइ त्ति घोसणं घोसेइ जाव पच्चप्पिणंति । तए णं धणे सत्थवाहे
 सगडीसागडं जोएइ २ जेणेव नंदिफला रुक्खा तेणेव उवागच्छइ २ तेसिं
 नंदिफलाणं अदूरसामंते सत्थनिवेसं करेइ २ दोच्चपि तच्चपि कोडुंबिय-
 पुरिसे सहावेइ २ एवं वयासी-तुब्भे णं देवाणुप्पिया ! मम सत्थनिवेसंसि
 महया २ सहेणं उग्घोसेमाणा २ एवं वयह - एए णं देवाणुप्पिया ! ते
 नंदिफला रुक्खा किण्हा जाव मणुन्ना छायाए । तं जो णं देवाणुप्पिया ।
 एएसिं नंदिफलाणं रुक्खाणं मूलाणि वा कंदपुप्फतयापत्तफलाणि जाव
 अकाले चेव जीवियाओ ववरोवेइ । तं मा णं तुब्भे जाव वीसमइ मा णं
 अकाले चेव जीवियाओ ववरोविस्संति अन्नेसिं रुक्खाणं मूलाणि य जाव
 वीसमइ त्तिकट्ठु घोसणं जाव पच्चप्पिणंति । तत्थ णं अत्थेगइया पुरिसा
 धणस्स सत्थवाहस्स एयमट्ठं सइहंति जाव रोयंति एयमट्ठं सइहमाणा

तेसिं नंदिफलाणं दूरंदूरेण परिहरमाणा २ अन्नोसिं रुक्खाणं मूलाणि य जाव वीसमंति । तेसिं णं आवाए नो भइए भवइ तओ पच्छा परिणममाणा २ सुभरूवत्ताए ५ भुज्जो २ परिणमंति । एवामेव समणाउसो ! जो अम्हं निगंगथो वा २ जाव पंचसु कामगुणेषु नो सज्जइ से णं इह-भवे चेव बहूणं समणाणं ४ अच्चणिज्जे परलोए नो आगच्छइ जाव वीई-वइस्सइ । तत्थ णं अप्पेगइया पुरिसा धणस्स एयमट्ठं नो सदहंति ३ धणस्स एयमट्ठं असदहमाणा ३ जेणेव ते नंदिफला तेणेव उवागच्छंति २ तेसिं नंदिफलाणं मूलाणि य जाव वीसमंति तेसिं णं आवाए भइए भवइ तओ पच्छा परिणममाणा जाव ववरोवेंति । एवामेव समणाउसो ! जो अम्हं निगंगथो वा २ पव्वइए पंचसु कामगुणेषु सज्जइ जाव अणुपरियट्ठिस्सइ जहा व ते पुरिसा । तए णं से धणे सगडीसागडं जोयावेइ २ जेणेव अहिच्छत्ता नयरी तेणेव उवागच्छइ २ अहिच्छत्ताए नयरीए बहिया अगुज्जाणे सत्थनिवेसं करेइ २ सगडीसागडं मोयावेइ । तए णं से धणे सत्थवाहे महत्थं ३ रायारिहं पाहुडं गेण्हइ २ बहुपुरिसेहिं साद्धिं संपरिवुडे अहिच्छत्तं नयरिं मज्झंमज्जेणं अणुप्पविसइ २ जेणेव कणगकेऊ राया तेणेव उवागच्छइ २ करयल जाव वद्धावेइ २ तं महत्थं ३ पाहुडं उवणेइ । तए णं से कणगकेऊ राया हट्ठतुट्ठे धणस्स सत्थवाहस्स तं महत्थं जाव पडिच्छइ २ धणं सत्थवाहं सक्कारेइ सम्माणेइ २ उस्सुकं वियरइ २ पडिविसज्जेइ २ भंडविणिमयं करेइ २ पडिभंडं गेण्हइ २ सुहंसुहेणं जेणेव चंपा नयरी तेणेव उवागच्छइ २ मित्तनाइअभिसमन्नागए विपुलाइं माणुस्सगाइं जाव विहरइ । तेणं कालेणं २ थेरागमणं धणे सत्थवाहे धम्मं सोच्चा जेट्ठपुत्तं कुडुंवे ठावेत्ता जाव पव्वइए सामाइयमाइयाइं एक्कारस अंगाइं बहूणि वासाणि जाव मासियाए जाव अन्नयरेसु देवलोएसु देवत्ताए उववन्ने महाविदेहे वासे सिज्झिहिइ जाव अंतं करेहिइ ।

एवं खलु जंबू ! समणेणं जाव संपत्तेणं पन्नरसमस्स नायज्झयणस्स अयमट्ठे पन्नत्ते त्तिवेमि ।

॥ पन्नरसमं नायज्झयणं समत्ते ॥ १५ ॥

॥ सोलसमं अज्झयणं ॥

(111) जइ णं भंते ! समणेणं ३ जाव संपत्तेणं पन्नरसमस्स नाय-
ज्झयणस्स अयमट्ठे पन्नत्ते सोलसमस्स णं भंते ! नायज्झयणस्स के
अट्ठे पन्नत्ते ? एवं खलु जंबू ! तेणं कालेणं २ चंपा नामं नयरी होत्था ।
तीसे णं चंपाए नयरीए वहिया उत्तरपुरत्थिमे दिसीभाए सुभूमिभागे नामं
उज्जाणे होत्था । तत्थ णं चंपाए नयरीए तओ माहणा भायरो परिवसंति
तंजहा — सोमे सोमदत्ते सोमभूई अड्ढा जाव अपरिभूया रिउव्वेयजउव्वेय-
सामवेयअथव्वणवेय जाव सुपरिनिट्ठिया । तेसिं माहणाणं तओ भारियाओ
होत्था तंजहा — नागसिरी भूयसिरी जक्खसिरी सुकुमाला जाव तेसिं णं
माहणाणं इट्ठाओ विउले माणुस्सए कामभोए भुंजमाणा विहरंति । तए
णं तेसिं माहणाणं अन्नया कयाइ एगयओ समुवागयाणं जाव इमेयारूवे
मिहोकहासमुल्लावे समुप्पज्जित्था — एवं खलु देवाणुप्पिया ! अम्हं इमे
विउले धणे जाव सावएज्जे अलाहि जाव आसत्तमाओ कुलवंसाओ पकामं
दाउं पकामं भोत्तुं पकामं परिभाएउं । तं सेयं खलु अम्हं देवाणुप्पिया !
अन्नमन्नस्स गिहेसु कल्लाकल्लिं विपुलं असणपाणखाइमसाइमं उवक्खडेउं
परिभुंजेमाणाणं विहरित्तए । अन्नमन्नस्स एयमट्ठं पडिसुणेंति कल्लाकल्लिं
अन्नमन्नस्स गिहेसु विपुलं असणं ४ उवक्खडावेंति २ परिभुंजेमाणा
विहरंति । तए णं तीसे नागसिरीए माहणीए अन्नया कयाइ भोयण-
वारंए जाए यावि होत्था । तए णं सा नागसिरी माहणी विपुलं असणं
४ उवक्खडावैइ २ एगं महं सालइयं तित्तलाउयं बहुसंभारसंजुत्तं नेहाव-
गाढं उवक्खडावैइ एगं बिंदुयं करयलंसि आसाएइ २ तं खारं कडुयं
अखज्जं विसभूयं जाणित्ता एवं वयासी — धिरत्थु णं मम नागसिरीए
अर्धन्नाए अपुण्णाए दूभगाए दूभगसत्ताए दूभगंनिबोलियाए जाए णं मए
सालइए बहुसंभारसंभिए नेहावगाढे उवक्खडिए सुबहुदव्वक्खए नेह-
क्खए य कए । तं जइ णं ममं जाउयाओ जाणिस्संति तो णं मम खिसि-
स्संति । तं जावताव ममं जाउयाओ न जाणंति ताव मम सेयं एयं
सालइयं तित्तलाउयं बहुसंभारनेहकयं एगंते गोवित्तए अन्नं सालइयं

महुरंलाउयं जाव नेहावगाढं उवक्खडित्तए । एवं संपेहेइ २ तं सालइयं जाव गोवेइ २ अन्नं सालइयं महुरंलाउयं उवक्खडेइ २ तेसिं माहणाणं ण्हायाणं जाव सुहासणवरगयाणं तं विपुलं असणं ४ परिवेसेइ । तए णं ते माहणा जिमियभुत्तुत्तरागया समाणा आयंता चोक्खा परम-सुइभूया सकम्मसंपउत्ता जाया यावि होत्था । तए णं ताओ माहणीओ ण्हायाओ जाव बिभूसियाओ तं विपुलं असणं ४ आहारेंति २ जेणेव सयाइं २ गिहाइं तेणेव उवागच्छंति २ सकम्मसंपउत्ताओ जायाओ ।

(112) तेणं कालेणं २ धम्मघोसा नामं थेरा जाव बहुपरिवारी जेणेव चंपा नयरी जेणेव सुभूमिभागे उज्जाणे तेणेव उवागच्छंति २ अहापडिरूवं जाव बिहरंति । परिसा निग्गया धम्मो कहिओ परिसा पडिगया । तए णं तेसिं धम्मघोसाणं थेराणं अंतेवासी धम्मरुई नामं अणगारे उराले जाव तेयलेस्से मासंमासेणं खममाणे बिहरइ । तए णं से धम्मरुई अणगारे मासखमणपारणगंसि पढमाए पोरिसीए सज्झायं करेइ २ बीयाए पोरिसीए एवं जहा गोयमसामी तहेव उग्गाहेइ २ तहेव धम्मघोसं थेरं आपुच्छइ जाव चंपाए नयरीए उच्चनीयमज्झिमकुलाइं जाव अडमाणे जेणेव नागसिरीए माहणीए गिहे तेणेव अणुपविट्ठे । तए णं सा नागसिरी माहणी धम्मरुई एज्जमाणं पासइ २ तस्स सालइयस्स तित्त-कडुयस्स बहुनेहावगाढस्स ँडणट्टयाए हट्टुट्टा उट्टाए उट्टेइ २ जेणेव भत्तघरे तेणेव उवागच्छइ २ तं सालइयं तित्तकडुयं च बहुनेहावगाढं धम्मरुइस्स अणगारस्स पडिगंहांसि सव्वमेव निस्सिरइ । तए णं से धम्म-रुई अणगारे अहापज्जत्तमित्तिकट्टु नागसिरीए माहणीए गिहाओ पडिनि-क्खमइ २ चंपाए नयरीए मज्झिमज्जेणं पडिनिक्खमइ २ जेणेव सुभूमि-भागे उज्जाणे तेणेव उवागच्छइ २ जेणेव धम्मघोसा थेरा तेणेव उवा-गच्छइ २ धम्मघोसस्स अदूरसामंते अन्नपाणं पडिलेहेइ २ अन्नपाणं करयलंसि पडिदंसेइ । तए णं धम्मघोसा थेरा तस्स सालइयस्स नेहा-वगाढस्स गंधेणं अभिभूया समाणा तंओ सालइयाओ नेहावगाढाओ एणं बिंदुयं गहाय करयलंसि आसादिति तित्तं खारं कडुयं अखज्जं

अभोज्जं विसभूयं जाणित्ता धम्मरुइं अणगारं एवं वयासी — जइ णं तुमं देवाणुप्पिया ! एयं सालइयं जाव नेहावगाढं आहारेसि तो णं तुमं अकाले चेव जीवियाओ ववरोविज्जसि । तं मा णं तुमं देवाणुप्पिया ! ईमं सालइयं जाव आहारेसि मा णं तुमं अकाले चेव जीवियाओ ववरोविज्जसि । तं गच्छह णं तुमं देवाणुप्पिया ! ईमं सालइयं एगंतमणावाए अचित्ते थंडिल्लं परिट्ठवेहि २ अन्नं फासुयं एसणिज्जं असणं ४ पडिगाहेत्ता आहारं आहारेहि । तए णं से धम्मरुइं अणगारे धम्मघोसेणं थेरेणं एवं वुत्ते समाणे धम्मघोसस्स थेरस्स अंतियाओ पडिनिक्खमइ २ सुभूमिभागाओ उज्जाणाओ अदूरसामंते थंडिल्लं पडिल्लेहेइ २ ताओ सालइयाओ एगं बिंदुगं गहाय २ थंडिल्लंसि निसिरइ । तए णं तस्स सालइयस्स तित्तकडुयस्स बहुनेहावगाढस्स गंधेणं बहूणि पिपीलिगासहस्साणि पाउब्भूया जा जहा य णं पिपीलिगा आहारेइ सा णं तहा अकाले चेव जीवियाओ ववरोविज्जइ । तए णं तस्स धम्मरुइस्स अणगारस्स इमेयारूवे अज्झत्थिए ४— जइ ताव इमस्स सालइयस्स जाव एगंमि बिंदुयंमि पक्खित्तंमि अणेगाइं पिपीलिगासहस्साइं ववरोविज्जंति तं जइ णं अहं एयं सालइयं थंडिल्लंसि सव्वं निसिरामि तो णं बहूणं पाणाणं ४ वहकरणं भविस्सइ । तं सेयं खलु मम एयं सालइयं जाव नेहावगाढं सयमेव आहारित्तए मम चेव एएणं सरीरणं निज्जाउ त्तिकट्ठु एवं संपेहेइ २ मुहपोत्तिं २ पडिल्लेहेइ २ ससीसोवरियं कायं पमज्जेइ २ तं सालइयं तित्तकडुयं बहुनेहावगाढं बिलमिव पन्नगभूएणं अप्पाणएणं सव्वं सरीरकोट्ठगंसि पक्खिवइ । तए णं तस्स धम्मरुइयस्स तं सालइयं जाव नेहावगाढं आहारियस्स समाणस्स मुहुत्तंतरेणं परिणममाणंसि सरीरगंसि वेयणा पाउब्भूया उज्जला जाव दुरहियासा । तए णं से धम्मरुइं अणगारे अथामे अबले अवीरिए अपुरिसक्कारपरक्कमे अधारणिज्जमित्ति-कट्ठु आयारभंडगं एगंते ठावेइ २ थंडिल्लं पडिल्लेहेइ २ दब्भसंथारगं संथारेइ २ दब्भसंथारगं दुरूहइ २ पुरत्थाभिमुहे संपलियंकनिसण्णे करयलपरिग्गाहियं एवं वयासी — नमोत्थु णं अरहंताणं जाव संपत्ताणं नमोत्थु

णं धम्मघोसाणं थेराणं मम धम्मायरियाणं मम धम्मोवएसगाणं पुर्वि पि
 णं मए धम्मघोसाणं थेराणं अंतिए सव्वे पाणाइवाए पच्चक्खाए जाव-
 ज्जीवाए जाव परिग्गहे इयाणि पि णं अहं तेसिं चेव भगवंताणं अंतिए
 सव्वं पाणाइवायं पच्चक्खामि जाव परिग्गहं पच्चक्खामि जावज्जीवाए जहा
 खंदओ जाव चरिमेहिं उस्सासेहिं वोसिरामि त्तिकट्ठु आलोइयपडिक्कंते
 समाहिपत्ते कालगए । तए णं ते धम्मघोसा थेरा धम्मरूईं अणगारं
 चिरगयं जाणित्ता समणे निग्गंथे सदावेंति २ एवं वयासी—एवं खलु
 देवाणुप्पिया ! धम्मरूइस्स अणगारस्स मासक्खमणपारणगांसि सालइयस्स
 जाव नेहावगाढस्स निसिरणट्ठयाए बहिया निग्गए चिरावेइ । तं गच्छह णं
 तुब्भे देवाणुप्पिया ! धम्मरूइस्स अणगारस्स सव्वओ समंता मग्गणगवेसणं
 करेह । तए णं ते समणा निग्गंथा जाव पडिसुणेंति २ धम्मघोसाणं थेराणं
 अंतियाओ पडिनिक्खमांति २ धम्मरूइस्स अणगारस्स सव्वओ समंता
 मग्गणगवेसणं करेमाणा जेणेव थंडिहं तेणेव उवागच्छंति २ धम्मरूइ-
 यस्स अणगारस्स सरीराणं निप्पाणं निश्चेट्ठं जीवविप्पज्जं पासंति २ हा
 हा ! अहो ! अकज्जमित्तिकट्ठु धम्मरूइस्स अणगारस्स परिनिव्वाणवत्तिथं
 काउस्सगं करेंति धम्मरूइस्स आयारभंडगं गेण्हंति २ जेणेव धम्मघोसा
 थेरा तेणेव उवागच्छंति २ गमणागमणं पडिक्कमंति २ एवं वयासी—
 एवं खलु अम्हे तुब्भं अंतियाओ पडिनिक्खमामो २ सुभूमिभागस्स
 उज्जाणस्स परिपेरंतेणं धम्मरूइस्स अणगारस्स सव्वं जाव करेमाणा जेणेव
 थंडिल्ले तेणेव उवागच्छामो जाव इहं हव्वमागया । तं कालगए णं
 भंते ! धम्मरूई अणगारे इमे से आयारभंडए । तए णं धम्मघोसा थेरा
 पुर्वगए उवओगं गच्छंति २ समणे निग्गंथे निग्गंथीओ य सदावेंति २
 एवं वयासी—एवं खलु अज्जो ! मम अंतेवासी धम्मरूई नामं अणगारे
 पगइभइए जाव विणीए मासंमासेणं अणिकिक्खत्तेणं तवोक्कमेणं जाव
 नागसिरीए माहणीए गिहं अणुपविसई । तए णं सा नागसिरी माहणी
 जाव निसिरइ । तए णं से धम्मरूई अणगारे अहापज्जत्तमित्तिकट्ठु जाव
 कालं अणवकंखमाणे विहरइ । से णं धम्मरूई अणगारे बहूणि वासाणि

सामण्णपरियागं पाउणित्ता आलोइयपडिकंते समाहिपत्ते कालमासे कालं किञ्चा उट्ठं सोहम्मो जाव सव्वट्ठसिद्धे महाविमाणे देवत्ताए उववभ्भे । तत्थ णं अत्थेगइयाणं जहन्नमणुक्कोसेणं तेत्तीसं सागरोवमाइं ठिई पन्नत्ता । तत्थ णं धम्मरुईस्स वि देवस्स तेत्तीसं सागरोवमाइं ठिई पन्नत्ता । से णं धम्मरुई देवे ताओ देवलोगाओ जाव महाविदेहे वासे सिज्झिहिइ ।

(113) तं धिरत्थु णं अज्जो ! नागसिरीए माहणीए अर्धन्नाए अपुण्णाए जाव निंबोलियाए जाए णं तहारूवे साहू साहुरूवे धम्मरुई अणगारे मासक्खमणपारणगंसि सालइएणं जाव गाढेणं अकाले चेव जीवियाओ ववरोविए । तए णं ते समणा निगंथा धम्मघोसाणं थेराणं अंतिए एयमट्ठं सोच्चा निसम्म चंपाए सिंघाडग जाव पहेसु बहुजणस्स एवमाइक्खंति ४- धिरत्थु णं देवाणुप्पिया ! नागसिराए जाव निंबोलियाए जाए णं तहारूवे साहू साहुरूवे सालइएणं जीवियाओ ववरोविए । तए णं तेसिं समणाणं अंतिए एयमट्ठं सोच्चा निसम्म बहुजणो अन्नमन्नस्स एवमाइक्खइ एवं भासइ-धिरत्थु णं नागसिरीए माहणीए जाव जीवियाओ ववरोविए । तए णं ते माहणा चंपाए नयरीए बहुजणस्स अंतिए एयमट्ठं सोच्चा निसम्म आसुरुत्ता जाव मिसिमिसेमाणा जेणेव नागसिरी माहणी तेणेव उवागच्छंति २ नागसिरिं माहणिं एवं वयासी-हं भो नागसिरी^१ ! अपत्थियपत्थिए ! दुरंतपंतलक्खणे ! हीणपुण्णचाउइसे ! धिरत्थु णं तव अधन्नाए अपुण्णाए निंबोलियाए जाए णं तुमे तहारूवे साहू साहुरूवे मासक्खमणपारणगंसि सालइएणं जाव ववरोविए उच्चावयाहिं अक्कोसणाहिं अक्कोसंति उच्चावयाहिं उद्धंसणाहिं उद्धंसंति उच्चावयाहिं निब्भच्छणाहिं निब्भच्छंति उच्चावयाहिं निच्छोडणाहिं निच्छोडंति तज्जेति तालेंति तज्जित्ता तालित्ता सयाओ गिहाओ निच्छुभंति । तए णं सा नागसिरी सयाओ गिहाओ निच्छूढा समाणी चंपाए नयरीए सिंघाडगतिय-चउक्कचच्चरचउम्महमहापहपहेसु बहुजणेणं हीलिज्जमाणी खिसिज्जमाणी निंदिज्जमाणी गरहिज्जमाणी तिज्जिज्जमाणी पँवहिज्जमाणी धिक्कारिज्जमाणी थुक्कारिज्जमाणी कत्थइ ठाणं वा निलयं वा अलभ-

माणी २ दंडीखंडनिवसणा खंडमल्लयखंडघडगहत्थममा फुट्टहडाहडसीसा मच्छियाचडगरेणं अन्निज्जमाणमग्गा गिहंगिहेणं देहंबलियाए वित्तिं कप्पेमाणा विहरइ । तए णं तीसे नागसिरीए माहणीए तब्भवंसि चेव सोलस रोयायंका पाउब्भूया तंजहा — सासे कासे जोणिसूले जाव कोढे । तए णं सा नागसिरी माहणी सोलसहिं रोगायंकेहिं अभिभूया समाणी अट्टुहट्टवसट्टा कालमासे कालं किच्चा छट्टीए पुढवीए उक्कोसं बावीस-सागरोवमट्टिइएसु नेरइएसु नेरइयत्ताए उववन्ना । सा णं तओ अणंतं उव्वट्ठित्ता मच्छेसु उववन्ना । तत्थ णं सत्थवज्झा दाहवक्कंतीए कालमासे कालं किच्चा अहेसत्तमाए पुढवीए उक्कोसंसागरोवमट्टिइएसु नरएसु नेर-इएसु उववन्ना । सा णं तओणंतं उव्वट्ठित्ता दोच्चंपि मच्छेसु उववज्जइ । तत्थ वि य णं सत्थवज्झा दाहवक्कंतीए दोच्चंपि अहे सत्तमाए पुढवीए उक्कोसंसागरोवमट्टिइएसु नेरइएसु उववज्जइ । सा णं तओहिंतो जाव उव्वट्ठित्ता तच्चंपि मच्छेसु उववन्ना । तत्थ वि य णं सत्थवज्झा जाव कालमासे कालं किच्चा दोच्चंपि छट्टीए पुढवीए उक्कोसेणं । तओणंतं उव्वट्ठित्ता उरएसु एवं जहा गोसाले तहा नेयव्वं जाव रयणप्पभाओ पुढवीओ उव्वट्ठित्ता समीसु उववन्ना । तओ उव्वट्ठित्ता जाइं इमाइं खहयरविहाणांइ जाव अदुत्तरं च णं खरबायरपुढविकाइयत्ताए तेसु अणेगसयसहस्सखुत्तो ।

(114) सा णं तओणंतं उव्वट्ठित्ता इहेव जंबुदीवे दीवे भारहे वासे चंपाए नयरीए सागरदत्तस्स सत्थवाहस्स भद्दाए भारियाए कुच्छिसि दारियत्ताए पच्चायाया । तए णं सा भद्दा सत्थवाही नवण्हं मासाणं दारियं पयाया सुक्कुमालकोमलियं गयतालुयसमाणं । तीसे णं दारियाए निव्वत्तवारसाहियाए अम्मापियरो इमं एयारूवं गोणं गुणनिप्फन्नं नाम-धेज्जं करेति — जम्हा णं अम्हं एसा दारिया सुक्कुमाला गयतालुयसमाणा तं होड णं अम्हं इमीसे दारियाए नामधेज्जं सुक्कुमालिया २ । तए णं तीसे दारियाए अम्मापियरो नामधेज्जं करेति सूमीलियत्ति । तए णं सा सूमीलिया दारिया पंचधाईपरिम्महिया तंजहा — खीरधाईए जाव गिरि-कंदरमल्लीणा इव चंपगलया निबायनिब्बाघायंसि जाव परिवड्डइ । तए

णं सा सूमालिया दारिया उम्मुक्कवालभावा जाव रूवेण य जोव्वणेण य लावण्णेण य उक्किट्ठा उक्किट्ठसरीरा जाया यावि होत्था ।

(115) तत्थ णं चंपाए नयरीए जिणदत्ते नामं सत्थवाहे अट्ठे । तस्स णं जिणदत्तस्स भद्दा भारिया सूमाला इट्ठा माणुस्सए कामभोगे पच्चणुव्वभवमाणा विहरइ । तस्स णं जिणदत्तस्स पुत्ते भद्दाए भारियाए अत्तए सागरए नामं दारए सुकुमाले जाव सुरूवे । तए णं से जिणदत्ते सत्थवाहे अन्नया कयाइ सयाओ गिहाओ पडिनिक्खमइ २ सागरदत्तस्स सत्थवाहस्स अदूरसामंतेणं वीईवयइ । इमं च णं सूमालिया दारिया ण्हाया चेडियासंघपरिवुडा उप्पि आगासतलगंसि कणगातिंदूसएणं कील-
माणी विहरइ । तए णं से जिणदत्ते सत्थवाहे सूमालियं दारियं पासइ २ सूमालियाए दारियाए रूवे य ३ जायविम्हए कोडुंबियपुरिसे सद्दावेइ २ एवं वयासी - एस णं देवाणुप्पिया ! कस्स दारिया किं वा नामधेज्जं से ? तए णं ते कोडुंबियपुरिसा जिणदत्तेणं सत्थवाहेणं एवं वुत्ता समाणा हट्ठतुट्ठा करयल जाव एवं वयासी - एस णं सागरदत्तस्स २ धूया भद्दाए अत्तया सूमालिया नामं दारिया सुकुमालपाणिपाया जाव उक्किट्ठा । तए णं जिणदत्ते सत्थवाहे तेसिं कोडुंबियाणं अंतिए एयमट्ठं सोच्चा जेणेव सए गिहे तेणेव उवागच्छइ २ ण्हाए भित्तनाइपरिवुडे चंपाए नयरीए मज्झमज्जेणं जेणेव सागरदत्तस्स गिहे तेणेव उवागए । तए णं से सागरदत्ते २ जिणदत्तं २ एज्जमाणं पासइ २ आसणाओ अब्भुट्ठेइ २ आसणेणं उवानिमंतेइ २ आसत्थं वीसत्थं सुहासणवरगयं एवं वयासी - भण देवाणुप्पिया ! किमागमणपओयणं । तए णं से जिणदत्ते सागरदत्तं एवं वयासी - एवं खलु अहं देवाणुप्पिया ! तव धूयं भद्दाए अत्तियं सूमालियं सागरस्स भारियत्ताए वरेमि । जइ णं जाणह देवाणुप्पिया ! जुत्तं वा पत्तं वा सलाहणिज्जं वा सरिसो वा संजोगो ता दिज्जउ णं सूमालिया सागरदारगस्स । तए णं देवाणुप्परिया ! किं दल्लयामो सुंकं च सूमालियाए ? तए णं से सागरदत्ते २ जिणदत्तं २ एवं वयासी - एवं खलु देवाणुप्पिया ! सूमालिया दारिया एगा एगजाया

इहा ५ जाव किमंग पुण पासण्याए । तं नो खलु अहं इच्छामि सूमा-
 लियाए दारियाए खणमवि विप्पओगं । तं जइ णं देवाणुप्पिया ! सागरए
 दारए मम घरजामाऊए भवइ तो णं अहं सागरदारगस्स सूमालियं दल-
 यामि । तए णं से जिणदत्ते २ सागरदत्तेणं २ एवं वुत्ते समाणे जेणेव
 सए गिहे तेणेव उवागच्छइ २ सागरदारगं सहावेइ २ एवं वयासी—
 एवं खलु पुत्ता ! सागरदत्ते २ ममं एवं वयासी—एवं खलु देवाणु-
 प्पिया ! सूमालिया दारिया इहा तं चेव । तं जइ णं सागरदारए मम
 घरजामाऊए भवइ ताव दलयामि । तए णं से सागरए दारए जिण-
 दत्तेणं २ एवं वुत्ते समाणे तुसिणीए । तए णं जिणदत्ते २ अन्नया
 कयाइ सोहणंसि तिहिकरणे विपुलं असणं ४ उवक्खडावेइ २ मित्तनाइ
 आमंतेइ जाव सम्मारेत्ता सम्माणेत्ता सागरं दारगं ण्हायं जाव सव्वा-
 लंकारविभूसियं करेइ २ पुरिससहस्सवाहिणीयं सीयं दुरूहावेइ २ मित्त-
 नाइ जाव संपरिवुडे सव्विड्डीए सयाओ गिहाओ निग्गच्छइ २ चंपं
 नयरिं मज्झमज्जेणं जेणेव सागरदत्तस्स गिहे तेणेव उवागच्छइ २
 सीयाओ पच्चोरुहइ २ सागरं दारगं सागरदत्तस्स २ उवणेइ । तए णं
 से सागरदत्ते २ विपुलं असणं ४ उवक्खडावेइ २ जाव सम्माणेत्ता
 सागरं दारगं सूमालियाए दारियाए सद्धिं पैट्ठयंसि दुरूहावेइ २ सेया-
 पीएहिं कलसेहिं मज्जावेइ २ अग्निहोमं करावेइ २ सागरं दारयं
 सूमालियाए दारियाए पाणिं गेण्हावेइ ।

(116) तए णं सागरए सूमालियाए दारियाए इमं एयारूवं पाणिफासं
 'संवेदेइ से जहानामए असिपत्ते इ वा जाव मुम्मुरे इ वा एत्तो अणिट्ठतराए
 चेव पाणिफासं संवेदेइ । तए णं से सागरए अकामए अवसवसे मुहुत्त-
 मेत्तं संचिट्ठइ । तए णं सागरदत्ते २ सागरस्स अम्मापियरो मित्तनाइ विपुलं
 असणं ४ पुप्फवत्थं जाव सम्माणेत्ता पडिविसज्जेइ । तए णं सागरए सूमा-
 लियाए सद्धिं जेणेव वासघरे तेणेव उवागच्छइ २ सूमालियाए दारियाए
 सद्धिं तल्लिमंसि निवज्जइ । तए णं से सागरए दारए सूमालियाए दारियाए
 इमं एयारूवं अंगफासं पडिसंवेदेइ से जहानामए असिपत्ते इ वा जाव

अमणामतराणं चेव अंगफासं पच्चणुब्भवमाणे विहरइ । तए णं से सागरए दारए सूमालियाए दारियाए अंगफासं असहमाणे अवसवसे मुहुत्तमेत्तं संचिट्ठइ । तए णं से सागरदारए सूमालियं सुहपसुत्तं जाणित्ता सूमालियाए दारियाए पासाओ उट्ठेइ २ जेणेव सए सयणिज्जे तेणेव उवागच्छइ २ सयणीयंसि निवज्जइ । तए णं सूमालिया दारिया तओ मुहुत्तंतरस्स पडिबुद्धा समाणी पइंवथा पइमणुरत्ता पइं पासे अपस्सैमाणी तैलिमाओ उट्ठेइ २ जेणेव से सयणिज्जे तेणेव उवागच्छइ २ सागरस्स पासे णुवज्जइ । तए णं से सागरदारए सूमालियाए दारियाए दोक्षपि इमं एयारूवं अंगफासं पडिसंवेदेइ जाव अकामए अवसवसे मुहुत्तमेत्तं संचिट्ठइ । तए णं सागरदारए सूमालियं दारियं सुहपसुत्तं जाणित्ता सयणिज्जाओ उट्ठेइ २ वासघरस्स दारं विहाडेइ २ मारामुक्के विव काए जामेव दिसिं पाउब्भूए तामेव दिसिं पडिगए ।

(117) तए णं सूमालिया दारिया तओ मुहुत्तंतरस्स पडिबुद्धा पतिंवथा जाव अपासमाणी सयणिज्जाओ उट्ठेइ सागरस्स दारगस्स सव्वओ समंता मग्गणगवेषणं करेमाणी २ वासघरस्स दारं विहाडियं पासइ २ एवं वयासी - गए णं से सागरए त्तिक्कट्टु ओहयमणसंकप्पा जाव झियायइ । तए णं सा भइा सत्थवाही कल्लं पाउप्पभायाए दासचेडिं सदावेइ २ एवं वयासी - गच्छह णं तुमं देवाणुप्पिए ! वहुवरस्स मुहधोवणियं उवणेहि । तए णं सा दासचेडी भइाए एवं वुत्ता समाणी एयमट्ठं तहत्ति पडिसुणेइ २ मुहधोवणियं गेणहइ २ जेणेव वासघरे तेणेव उवागच्छइ सूमालियं दारियं जाव झियायमाणि पासइ २ एवं वयासी - किन्नं तुम्मे देवाणुप्पिया ! ओहयमणसंकप्पा जाव झियाहि ? तए णं सा सूमालिया दारिया तं दासचेडियं एवं वयासी - एवं खलु देवाणुप्पिया ! सागरए दारए ममं सुहपसुत्तं जाणित्ता मम पासाओ उट्ठेइ २ वासघरदुच्चारं अवगुणेइ आच पडिगए । तए णं हं तओ मुहुत्तंतरस्स जाव विहाडियं पासामि २ गए णं से सागरए त्तिक्कट्टु ओहयमणसंकप्पा जाव झियायामि । तए णं सा दासचेडी

सूमालियाए दारियाए एयमट्ठं सोच्चा जेणेव सागरदत्ते २ तेणेव उवा-
गच्छइ २ सागरदत्तस्स एयमट्ठं निवेदेइ । तए णं से सागरदत्ते दास-
चेडीए अंतिए एयमट्ठं सोच्चा निसम्म आसुरुत्ते ४ जाव मिसिमिसेमाणे
जेणेष जिणदत्तस्स २ गिहे तेणेष उवागच्छइ २ जिणदत्तं २ एवं
वयासी - किन्नं देवाणुप्पिया ! एयं जुत्तं वा पत्तं वा कुलाणुरूवं वा
कुलसरिसं वा जण्णं सागरए दारए सूमालियं दारियं अंदिट्ठदोसवडियं
पइवयं विप्पजहाय इहमागए ? बहूहिं खिज्जाणियाहि य रुंदणियाहि य
उवालंभइ । तए णं जिणदत्ते सागरदत्तस्स २ एयमट्ठं सोच्चा जेणेव
सागरए तेणेव उवागच्छइ २ सागरं दारयं एवं वयासी - दुट्ठु णं
पुत्ता ! तुमे कयं सागरदत्तस्स गिहाओ इहं हव्वमागच्छंतेणं । तं
गच्छइ णं तुमं पुत्ता ! एवमवि गए सागरदत्तस्स गिहे । तए णं से
सागरए जिणदत्तं एवं वयासी - अविथाइं अहं ताओ ! गिरिपडणं वा
तरुपडणं वा मरुप्पवायं वा जलप्पवायं वा जलणप्पवेसं वा विस-
भक्खणं वा सत्थोवाडणं वा विह्माणसं वा गिद्धपट्ठं वा पठ्वज्जं वा विदेस-
गमणं वा अब्भुवगच्छेज्जा नो खलु अहं सागरदत्तस्स गिहं गच्छेज्जा ।
तए णं से सागरदत्ते २ कुब्भंतरियाए सागरस्स एयमट्ठं निसामेइ २
लज्जिए विळीए विडे जिणदत्तस्स २ गिहाओ पडिनिक्खमइ २ जेणेव
सए गिहे तेणेव उवागच्छइ २ सुकुमालियं दारियं सदावेइ २ अंके
निवेसेइ २ एवं वयासी - किन्नं तव पुत्ता ! सागरएणं दारएणं ? अहं
णं तुमं तस्स दाहामि जस्स णं तुमं इट्ठा मणांमा भविस्ससि त्ति सूमा-
लियं दारियं ताहिं इट्ठाहिं जाव वग्गूहिं समासासेइ २ पडिविसज्जेइ ।
तए णं से सागरदत्ते २ अन्नया उप्पि आगासतलगंसि सुहानिसण्णे राय-
मगं ओलोएमाणे २ चिट्ठइ । तए णं से सागरदत्ते एगं महं दमगपुरिसं
पासइ दंडिखंडनिवसणं खंडमल्लगखंडघडगहत्थगयं मच्छियासहस्सेहिं
जाव अन्नज्जमाणमगं । तए णं से सागरदत्ते सत्थवाहे कोडुंबियपुरिसे
सदावेइ २ एवं वयासी - तुम्हे णं देवाणुप्पिया ! एयं दमगपुरिसं
विपुलेणं असणेणं ४ पडिलाभेइ गिहं अणुप्पविसेइ २ खंडमल्लं खंड-

घडगं च से एगंते एडेह २ अलंकारियकम्मं करेह २ ण्हायं कयबलि-
 कम्मं जाव सव्वालंकारविभूसियं करेह २ मणुन्नं असणं ४ भोयावेह
 मम अंतियं उवणेह । तए णं ते कोडुंबियपुरिसा जाव पडिसुणेंति २
 जेणेव से दमगपुरिसे तेणेव उवागच्छंति २ तं दमगपुरिसं असणेणं ४
 उवंप्पलोभंति २ सयं गिहं अणुप्पवेसिंति २ तं खंडमल्लगं खंडघडगं च
 तस्स दमगपुरिसस्स एगंते एडेंति । तए णं से दमगपुरिसे तंसि खंड-
 मल्लगंसि खंडघडगंसि य एडिज्जमाणंसि महया २ सदेणं आरसइ ।
 तए णं से सागरदत्ते तस्स दमगपुरिसस्स तं महया २ आरसियसहं
 सोच्चा निसम्म कोडुंबियपुरिसे एवं वयासी — किन्नं देवाणुप्पिया ! एस
 दमगपुरिसे महया २ सदेणं आरसइ ? तए णं ते कोडुंबियपुरिसा एवं
 वयासी — एस णं सामी ! तंसि खंडमल्लगंसि खंडघडगंसि य एडिज्ज-
 माणंसि महया २ सदेणं आरसइ । तए णं से सागरदत्ते २ ते कोडुं-
 बियपुरिसे एवं वयासी — मा णं तुब्भे देवाणुप्पिया ! एयस्स दमगस्स
 तं खंडगं जाव एडेह पासे से ठवेह जहा णं पत्तियं भवइ । ते तहेव
 ठावेंति २ तस्स दमगस्स अलंकारियकम्मं करेंति २ सयपागसहस्स-
 पागेहिं तेहेहिं अट्ठिभगेति अट्ठिभगिए समणे सुरभिणा गंधवट्टएणं गायं
 उवट्टेंति २ उसिणोदगेणं गंधोदएणं ण्हाणेंति सीओदगेणं ण्हाणेंति
 पम्हलसुकुमालगंधकासाइए गायाइं ल्हेंति २ हंसलक्खणं पडगसाडगं
 परिहेंति २ सव्वालंकारविभूसियं करेंति २ विपुलं असणं ४ भोयावेंति २
 सागरदत्तस्स समीवे उवणेंति । तए णं से सागरदत्ते २ सूमालियं दारियं
 ण्हायं जाव सव्वालंकारविभूसियं करेत्ता तं दमगपुरिसं एवं वयासी —
 एस णं देवाणुप्पिया ! मम धूया इट्ठा । एयं णं अहं तव भारियत्ताए
 दलयामि भदियाए भइओ भवेज्जासि । तए णं से दमगपुरिसे सागर-
 दत्तस्स एयमट्ठं पडिसुणेइ २ सूमालियाए दारियाए सद्धिं वासघरं
 अणुपविसइ सूमालियाए दारियाए सद्धिं तल्लिमंसि निवज्जइ । तए णं से
 दमगपुरिसे सूमालियाए इमं एयारूवं अंगफासं पडिसंवेदेइ सेसं जहा
 सागरस्स जाव सयणिज्जाओ अब्भुट्टेइ २ वासघराओ निग्गच्छइ २ खंड-

मल्लं खंडघडगं च गहाय मारामुके विव काए जामेव दिसिं पाउब्भूए
तामेव दिसिं पडिगए । तए णं सा सूमालिया जाव गए णं से दमग-
पुरिसे त्तिकट्टु ओहयमणसंकप्पा जाव झियायइ ।

(118) तए णं सा भहा कलं पाउप्पभायाए दासचेडिं सदावेइ
जाव सागरदत्तस्स एयमट्ठं निवेदेइ । तए णं से सागरदत्ते तहेव संभंते
समाणे जेणेव वासघरे तेणेव उवागच्छइ २ सूमालियं दारियं अंके
निवेसेइ २ एवं वयासी—अहो णं तुमं पुत्ता ! पुरापोराणाणं कम्माणं जाव
पञ्चणुब्भवमाणी विहरासि । तं मा णं तुमं पुत्ता ! ओहयमणसंकप्पा जाव
झियाहि । तुमं णं पुत्ता ! मम महाणसंसि विपुलं असणं ४ जहा पोट्टिला
जाव परिभाएमाणी विहराहि । तए णं सा सूमालिया दारिया एयमट्ठं
पडिसुणेइ २ महाणसंसि विपुलं असणं ४ जाव दलमाणी विहरइ ।
तेणं कालेणं २ गोवालियाओ अज्जाओ बहुस्सुयाओ एवं जहेव तेयलिणाए
सुव्वयाओ तहेव समोसढाओ तहेव संघाडओ जाव अणुपविट्ठे तहेव जाव
सूमालिया पडिलाभेत्ता एवं वयासी—एवं खलु अज्जाओ ! अहं
सागरस्स अणिट्ठा जाव अमणामा । नेच्छइ णं सागरए दारए मम नामं वा
जाव परिभोगं वा । जस्स जस्स वि य णं देज्जामि तस्स तस्स वि य णं
अणिट्ठा जाव अमणामा भवामि । तुब्भे य णं अज्जाओ ! बहुनायाओ
एवं जहा पोट्टिला जाव उवलद्धे णं जेणं अहं सागरस्स दारगस्स इट्ठा कंता
जाव भवेज्जामि । अज्जाओ तहेव भणंति तहेव साविया जाया तहेव
चिंता तहेव सागरदत्तस्स आपुच्छइ जाव गोवालियाणं अंतियं पव्वइया ।
तए णं सा सूमालिया अज्जा जाया इरियासमिया जाव गुत्तबंभयारिणी
बहूहिं चउत्थछट्टट्ठम जाव विहरइ । तए णं सा सूमालिया अज्जा अन्नया
कयाइ जेणेव गोवालियाओ अज्जाओ तेणेव उवागच्छइ २ वंदइ नमंसइ
२ एवं वयासी—इच्छामि णं अज्जाओ ! तुब्भेहिं अब्भणुन्नाया समाणी
चंपाए बाहिं सुभूमिभागस्स उज्जाणस्स अदूरसामंते छट्ठंछट्ठेणं अणिविस्स-
तेणं तवोकम्मेणं सूराभिमुही आयावेमाणी विहरित्तए । तए णं ताओ
गोवालियाओ अज्जाओ सूमालियं एवं वयासी—अम्हे णं अज्जो !

समणीओ निग्गंथीओ इरियासमियाओ जाव गुत्तवंभचारिणीओ । नो खलु अम्हं कप्पइ बहिया गामस्स वा जाव सन्निवेसस्स वा छट्ठंछट्ठेणं जाव विहरित्तए । कप्पइ णं अम्हं अंतोउवस्सयस्स वइपरिक्खित्तस्स संघाडिबद्धियाए णं समतलपईयाए आयावेत्तए । तए णं सा सूमालिया गोवालियाए एयमट्ठं नो सइहइ नो पत्तियइ नो रोएइ एयमट्ठं असइह-
माणी ३ सुभूमिभागस्स उज्जाणस्स अदूरसामंते छट्ठंछट्ठेणं जाव विहरइ ।

(119) तत्थ णं चंपाए ललिया नाम गोटी परिवसइ नरवइदिन्न-
पयारा अम्मापिडिनिययनिप्पिवासा वेसविहारकयनिकेया नाणाविह-
अविणयप्पहाणा अड्ढा जाव अपरिभूया । तत्थ णं चंपाए देवदत्ता नामं
गणिया होत्था सूमाला जहा अंडनाए । तए णं तीसे ललियाए गोटीए
अन्नया कयाइ पंच गोट्टिल्लगपुरिसा देवदत्ताए गणियाए सद्धिं सुभूमि-
भागस्स उज्जाणस्स उज्जाणसिरिं पञ्चगुब्भवमाणा विहरंति । तत्थ णं एगे
गोट्टिल्लगपुरिसे देवदत्तं गणियं उच्छंगे धरेइ एगे पिट्ठओ आयवत्तं धरेइ
एगे पुप्फपूरगं रएइ एगे पाए रएइ एगे चामरुक्खेवं करेइ । तए णं सा
सूमालिया अज्जा देवदत्तं गणियं तेहिं पंचहिं गोट्टिल्लपुरिसेहिं सद्धिं
उरालाई माणुस्सगाई भोगभोगाई भुंजमाणीं पासइ २ इमेयारूवे संकप्पे
समुप्पज्जित्था — अहो णं इमा इत्थिया पुरापोराणाणं कम्माणं जाव
विहरइ । तं जइ णं केइ इमस्स सुचरियस्स तवनियमवंभचेरवासस्स
कल्लाणे फलवित्तिविसेसे अत्थि तो णं अहमवि आगमिस्सेणं भवग्गहणेणं
इमेयारूवाइ उरालाई जाव विहरिज्जामि त्तिकट्ठु नियाणं करेइ २
आयावणभूमीएँ पच्चोरुभई ।

(120) तए णं सा सूमालिया अज्जा सरीरवाउसा जाया यावि
होत्था अभिक्खणं २ हत्थे धोवेइ अभिक्खणं २ पाए धोवेइ सीसं
धोवेइ मुहं धोवेइ थणंतराई धोवेइ कक्खंतराई धोवेइ गुज्झंतराई धोवेइ
जत्थ २ णं ठाणं वा सेज्जं वा निसीहियं वा चेएइ तत्थ वि य णं पुठ्ठामेव
उदएणं अब्भुक्खेत्ता तओ पच्छा ठाणं वा ३ चेएइ । तए णं ताओ
गोवालियाओ अज्जाओ सूमालियं अज्जं एवं वयासी-एवं खलु अज्जे ! अम्हे

समणीओ निगंभीओ इरियासमियाओ जाव बंभचेरधारिणीओ । नो खलु कप्पइ अम्हं सररीबाउसियाए होत्तए । तुमं च णं अज्जे ! सररी-
बाउसिया अभिक्खणं २ हत्थे घोवेसि जाव चेएसि । तं तुमं णं देवाणु-
प्पिए ! एयस्स ठाणस्स आलोएहि जाव पडिवज्जाहि । तए णं सूमालिया
गोवालियाणं अज्जाणं एयमट्ठं नो आढाइ नो परियाणाइ अणाढायमाणी
अपरियाणमाणी विहरइ । तए णं ताओ अज्जाओ सूमालियं अज्जं
अभिक्खणं २ हीलेंसि जाव परिभवंसि अभिक्खणं २ एयमट्ठं निबारेंति ।
तए णं तीसे सूमालियाए समणीहिं निगंभीहिं हीलित्थमाणीए जाव
बारिज्जमाणीए इमेयारूवे अज्झत्थिए जाव समुप्पज्जित्था — जया णं अहं
अगारवासमज्जे वसामि तथा णं अहं अप्पवसा । जया णं अहं मुंडा
भविता पव्वइया तथा णं अहं परवसा । पुठ्वि च णं ममं समणीओ
आढायंति इयाणिं नो आढायंति । तं सेयं खलु मम कल्लं पाउप्पभायाए
गोवालियाणं अंतियाओ पडिनिक्खमित्ता पाडिएकं उवस्सयं उवसंप-
ज्जित्ताणं विहरित्तए त्तिक्कट्ठु एवं संपेहेइ २ कल्लं गोवालियाणं अंतियाओ
पडिनिक्खमइ २ पाडिएकं उवस्सयं उवसंपज्जित्ताणं विहरइ । तए णं सा
सूमालिया अज्जा अणोहट्ठिया अनिवारिया सच्छंदमई अभिक्खणं २
हत्थे घोवेइ जाव चेएइ तत्थ वि य णं पासत्था पासत्थविहारिणी ओसन्ना
ओसन्नविहारी कुसीला कुसीलविहारी संसत्ता संसत्ताविहारी बहूणि
वासाणि सामण्णपरियागं पाउणइ २ अट्ठमासियाए संलेहणाए तस्स ठाणस्स
अणालोइयपडिकंता कालमासे कालं किच्चा ईसाणे कप्पे अन्नयरंसि
विमाजंसि देवगणियत्ताए उववन्ना । तत्थेगइवाणं देवीणं नवपलिओवमाइं
ठिई पन्नत्ता । तत्थ णं सूमालियाए देवीए नवपलिओवमाइं ठिई पन्नत्ता ।

(121) तेणं कालेणं २ इहेव जंबुदीवे २ भारहे वासे पंचालेसु
जणवएसु कपिल्लपुरे नामं नवरे होत्था वण्णओ । तत्थ णं दुवए नामं
राया होत्था वण्णओ । तस्स णं चुळ्णी देवी घट्टैज्जणे कुमारे जुवराया ।
तए णं सा सूमालिया देवी ताओ देवलोगाओ आउक्खएणं जाव चइत्ता
इहेव जंबुदीवे २ भारहे वासे पंचालेसु जणवएसु कपिल्लपुरे नयरे

दुवयस्स रत्नो चुलणीए देवीए कुच्छिसि दारियत्ताए पच्चायाया । तए णं सा चुलणी देवी नवण्हं मासाणं जाव दारियं पयाया । तए णं तीसे दारियाए निव्वत्तवारसाहियाए इमं एयारूवं नामं — जम्हा णं एसा दारिया दुपयस्स रत्नो धूया चुलणीए देवीए अत्तया तं होऊं णं अम्हं इमीसे दारियाए नामधेज्जं दोवई । तए णं तीसे अम्मापियरो इमं एयारूवं गोणं गुणनिप्फन्नं नामधेज्जं करेति दोवई । तए णं सा दोवई दारिया पंचघाईपरिग्गहिं जाव गिरिकंदरमल्लीणा इव चंपगलया निवायनिव्वा-
घायंसि सुहंसुहेणं परिवड्डइ । तए णं सा दोवई देवी रायवरकन्ना उम्मुक्क-
बालभावा जाव उक्किट्टसरीरा जाया यावि होत्था । तए णं तं दोवई रायवरकन्नं अन्नया कयाइ अंतैउरियाओ ण्हायं जाव विभूसियं करेति २ दुवयस्स रत्नो पायवंदियं पेसेति । तए णं सा दोवई २ जेणेव दुवए राया तेणेव उवागच्छइ २ दुवयस्स रत्नो पायग्गहणं करेइ । तए णं से दुवए राया दोवई दारियं अंके निवेसेइ २ दोवईए २ रूवे य जोव्वणे य लव्वणे य जायविम्हए दोवई २ एवं वयासी — जस्स णं अहं तुमं पुत्ता ! रायस्स वा जुवरायस्स वा भारियत्ताए सयमेव दलइस्सामि तत्थ णं तुमं सुहिया वा दुहिया वा भवेज्जासि । तए णं मम जावज्जीवाए हिययदाहे भविस्सइ । तं णं अहं तव पुत्ता ! अज्जर्याए सयंवरं विर्यरामि । अज्जर्याए णं तुमं दिन्नं सयंवरा । जं णं तुमं सयमेव रायं वा जुवरायं वा वरेहिसि से णं तव भत्तारे भविस्सइ तिकट्टु ताहिं इट्ठाहिं जाव आसासेइ २ पडिविसज्जेइ ।

(122) तए णं से दुवए राया दूयं सहावेइ २ एवं वयासी — गच्छह णं तुमं देवाणुप्पिया ! बारवइं नयरिं । तत्थ णं तुमं कण्हं वासुदेवं समुद्विजयपामोक्खे दस दसारे बलदेवपामोक्खे पंच महा-
वीरे उग्गसेणपामोक्खे सोलस रायसहस्से पज्जुन्नपामोक्खाओ अद्धुट्ठाओ कुमारकोडीओ संबपामोक्खाओ सट्ठि दुहंतसाहस्सीओ वीरसेणपामो-
क्खाओ एकवीसं रायवीरपुरिससाहस्सीओ महींसेणपामोक्खाओ छप्पन्नं बलवगसाहस्सीओ अन्ने य बहवे राईसरतलवरमाडंबियकोडुंबियइब्भ-

सेट्ठिसेणावइसत्थवाहपभिइओ करयलपरिग्गहिं दसनहं सिरसावत्तं
 मत्थए अंजलिं कट्ठु जएणं विजएणं बद्धावेहि २ एवं वयाहि — एवं
 खलु देवाणुप्पिया ! कंपिलपुरे नयरे दुवयस्स रत्तो धूयाए चुलणीए
 अत्तयाए धट्ठज्जुणकुमारस्स भइणीए दोवईए २ सयंवरे भविस्सइ । तए
 णं तुब्भे दुवयं रायं अणुगिणहेमाणा अकालपरिहीणं चेव कंपिलपुरे नयरे
 समोसरह । तए णं से दूए करयल जाव कट्ठु दुवयस्स रत्तो एयमट्ठं पडि-
 सुणेइ २ जेणेव सए गिहे तेणेव उवागच्छइ २ कोडुंबियपुरिसे सदावेइ २
 एवं वयासी — खिप्पामेव भो देवाणुप्पिया ! चाउग्घटं आसरहं
 जुत्तामेव उवट्ठवेह जाव उवट्ठवेति । तए णं से दूए ण्हाए जाव सरीरे
 चाउग्घटं आसरहं दुरूहइ २ बहूहिं पुरिसेहिं सन्नद्ध जाव गहियाउह-
 पहरणेहिं सद्धिं संपरिवुडे कंपिलपुरं नयरं मज्झंमज्झेणं निग्गच्छइ पंचाल-
 जणवयस्स मज्झंमज्झेणं जेणेव देसप्पंते तेणेव उवागच्छइ २ सुरट्ठा-
 जणवयस्स मज्झंमज्झेणं जेणेव बारवई नयरी तेणेव उवागच्छइ २
 बारवइं नयरिं मज्झंमज्झेणं अणुप्पविसइ २ जेणेव कण्हस्स वासुदेवस्स
 बाहिरिया उवट्ठाणसाला तेणेव उवागच्छइ २ चाउग्घटं आसरहं ठावेइ
 २ रहाओ पच्चोरुहइ २ मणुस्सवग्गुरापारिक्खित्ते पायचारविहारेणं जेणेव
 कण्हे वासुदेवे तेणेव उवागच्छइ २ कण्हं वासुदेवं समुद्विजयपामोक्खे
 य दस दसारे जाव बलवगसाहस्सीओ करयल तं चेव जाव समोसरह ।
 तए णं से कण्हे वासुदेवे तस्स दूयस्स अंतिए एयमट्ठं सोच्चा निसम्म
 हट्ठतुडे जाव हियए तं दूयं सक्कारेइ सम्माणेइ २ पडिविसज्जेइ । तए
 णं से कण्हे वासुदेवे कोडुंबियपुरिसे सदावेइ २ एवं वयासी — गच्छह
 णं तुमं देवाणुप्पिया ! सभाए सुहम्माए सामुदाइयं भेरिं तालेहि । तए
 णं से कोडुंबियपुरिसे करयल जाव कण्हस्स वासुदेवस्स एयमट्ठं पडि-
 सुणेइ २ जेणेव सभाए सुहम्माए सामुदाइया भेरी तेणेव उवागच्छइ २
 सामुदाइयं भेरिं महया २ सहेणं तालेइ । तए णं ताए सामुदाइयाए
 भेरीए तालियाए समाणीए समुद्विजयपामोक्खा दस दसारा जाव महां-
 सेणपामोक्खाओ छप्पन्नं बलवगसाहस्सीओ ण्हाया जाव विभूसिया

जहाविभवइड्डिसकारसमुदएणं अप्पेगइया हयगया जाव अप्पेगइया पाय-
 चारविहारेणं जेणेव कण्हे वासुदेवे तेणेव उवागच्छन्ति २ करयल जाव
 कण्हं वासुदेवं जएणं विजएणं वद्धावेति । तए णं से कण्हे वासुदेवे
 कोडुंबियपुरिसे सहावेइ २ एवं वयासी - खिप्पामेव भो देवाणुप्पिया !
 अभिसेकं हत्थिरयणं पडिकप्पेह् हयगय जाव पच्चप्पिणंति । तए णं से
 कण्हे वासुदेवे जेणेव मज्झणघरे तेणेव उवागच्छइ २ समुत्तजालाकुला-
 भिरामे जाव अंजणगिरिकूडसन्निभं गयवइं नरवईं दुरूढे । तए णं से
 कण्हे वासुदेवे समुहविजयपामोक्खेहिं दसहिं दसारेहिं जाव अणंगसेणा-
 पामोक्खेहिं अणेगाहिं गणियासाहस्सीहिं सद्धिं संपरिवुडे सव्विड्डीए जाव
 रवेणं बारवइं नयरिं मज्झंमज्झेणं निगगच्छइ २ सुरट्ठाजणवयस्स मज्झं-
 मज्झेणं जेणेव देसप्पंते तेणेव उवागच्छइ २ पंचालजणवयस्स मज्झं-
 मज्झेणं जेणेव कंपिल्लपुरे नयरे तेणेव पहारेत्थ गमणाए । तए णं से दुवए
 राया दोषं पि दूयं सहावेइ २ एवं वयासी - गच्छइं 'णं तुमं देवाणु-
 प्पिया ! हत्थिणाउरं नयरं । तत्थ णं तुमं पंडुरायं सपुत्तयं जुहिट्ठिल्लं
 भीमसेणं अज्झुणं नडलं सहदेवं दुज्जोहणं भाइसयसमगं गंगेयं विदुरं
 दोणं जयहइं सज्जिं कीवं आसत्थामं करयल जाव कट्टु तहेव जाव
 समोसरह । तए णं से दूए एवं जहा वासुदेवे नवरं भेरी नत्थि जाव जेणेव
 कंपिल्लपुरे नयरे तेणेव पहारेत्थ गमणाए । एएणेव कमेणं तच्चं दूयं चंपं
 नयरिं । तत्थ णं तुमं कण्हं अंगरायं सैल्लं नंदिरायं करयल तहेव जाव समो-
 सरह । चउत्थं दूयं सुत्तिमइं नयरिं । तत्थ णं तुमं सिमुपालं दमघोसिसुयं
 पंचमाइसयसंपरिवुडं करयल तहेव जाव समोसरह । पंचमगं दूयं हत्थि-
 सीसं नयरिं । तत्थ णं तुमं दमदंतं रायं करयल जाव समोसरह । छट्ठं
 दूयं महुं नयरिं । तत्थ णं तुमं धरं रायं करयल जाव समोसरह । सत्तमं
 दूयं रायगिहं नयरं । तत्थ णं तुमं सहदेवं जरीसंधसुयं करयल जाव
 समोसरह । अट्ठमं दूयं कोडिणं नयरं । तत्थ णं तुमं रुप्पि मेसगसुयं करयल
 तहेव जाव समोसरह । नवमं दूयं विरीटं नयरिं । तत्थ णं तुमं कीयंगं
 भाउसयसमगं करयल जाव समोसरह । दसमं दूयं अवसेसेसु

गामागरनगरेसु अणेगाइं रायसहस्साइं जाव समोसरह । तए णं से वूप
तहेव निग्गच्छइ जेणेव गामागर तहेव जाव समोसरह । तए णं ताइं
अणेगाइं रायसहस्साइं तस्स वूपस्स अंतिए एयमहं सोळा भिसम्म हट्ठा तं
वूपं सक्कारेति सम्माणेति २ पड्डिविसर्जेति । तए णं ते वासुदेवपामोक्खा
बहवे रायसहस्सा पत्तेयं २ ण्हाया सन्नद्धहत्थिखंधवरगया महया
हयगयरहभडवन्नगरपहकर सएहिं २ नगरेहिंसो अभिनिग्गच्छंति २
जेणेव पंचाले जणवए तेणेव पहरेत्थ गमणाए ।

(123) तए णं से दुवए राया कोडुंबियपुरिसे सहावेइ २ एवं
वयासी — गच्छह णं तुमं देवाणुप्पिया ! कंपिलपुरे नयरे बहिवा गंगाए
महानईए अदूरसामंते एगं महं सयंवरमंडवं करेइ अणेगखंभसयसन्नि-
बिद्धं लीळट्टियसालिभंजियागं जाव पच्चप्पिणंति । तए णं से दुवए राया
दोखंपि कोडुंबियपुरिसे सहावेइ २ एवं वयासी — खिप्पाभेव भो देवाणु-
प्पिया ! वासुदेवपामोक्खाणं बहूणं रायसहस्साणं आवासे करेइ । ते वि
करेत्ता पच्चप्पिणंति । तए णं से दुवए राया वासुदेवपामोक्खाणं बहूणं
रायसहस्साणं आगमणं जाणेत्ता पत्तेयं २ हत्थिखंध जाव परिबुडे अर्घं
च पच्चं च गहाय सव्विहीए कंपिलपुराओ निग्गच्छइ २ जेणेव ते
वासुदेवपामोक्खा बहवे रायसहस्सा तेणेव उवागच्छइ २ ताइं वासुदेव-
पामोक्खाइं अग्घेण य पज्जेण य सक्कारेइ सम्माणेइ २ तोसिं वासुदेव-
पामोक्खाणं पत्तेयं २ आवासे वियरइ । तए णं ते वासुदेवपामोक्खा
जेणेव सया २ आवासा तेणेव उवागच्छंति २ हत्थिखंधेहिंसो पच्चोरुहंति
२ पत्तेयं २ खंधावारनिवेसं करेति २ सएसुं २ आवासेसुं अणुप्पवि-
संति २ सएसु आवासेसु य आसणेसु य सयणेसु य सन्निसण्णा य
संतुर्यट्ठा य बहूहिं गंधव्वेहि य नाडणहि य उवगिज्जमाणा य च्चनच्चिज्ज-
माणा य विहरंति । तए णं से दुवए राया कंपिलपुरं नयरं अणुप्प-
विसइ २ विपुलं असणं ४ उवक्खडावेइ २ कोडुंबियपुरिसे सहावेइ २
एवं वयासी — गच्छह णं तुम्हे देवाणुप्पिया ! विपुलं असणं ४ सुरं च
मज्झं च मंसं च सीधुं च पसन्नं च सुबहुप्पवत्थगंधमल्लालंकारं च

वासुदेवपामोक्खाणं रायसहस्साणं आवासेसु साहरह । ते वि साहरंति । तए णं ते वासुदेवपामोक्खा तं विपुलं असणपाणखाइमसाइमं जाव पसन्नं च आसाएमाणा ४ विहरंति जिमियभुत्तुत्तरागया वि य णं समाणा आयंता चोक्खा जाव सुहासणवरगया बहूहिं गंधव्वेहिं जाव विहरंति । तए णं से दुवए राया पुव्वावरण्हकालसमयंसि कोडुंबिय-पुरिसे सहावेइ २ एवं वयासी—गच्छह णं तुब्भे देवाणुप्पिया ! कंपिल्लपुरे सिंघाडग जाव पहेसु वासुदेवपामोक्खाण य रायसहस्साणं आवासेसु हत्थिखंधवरगया महया २ सहेणं जाव उग्घोसेमाणा २ एवं वयह—एवं खलु देवाणुप्पिया ! कल्लं पाउप्पभायाए दुवयस्स रत्तो धूयाए चुलणीए देवीए अत्तियाए धट्ठंज्जुणस्स भगिणीए दोवईए २ सयंवरे भविस्सइ । तं तुब्भे णं देवाणुप्पिया ! दुवयं रायाणं अणुगिण्हेमाणा ण्हाया जाव विभूसिया हत्थिखंधवरगया सकोरेंटं ० सेयवरचामरा ह्यगयरहं ० महया भडचडगरेणं जाव परिक्खित्ता जेणेव सयंवरांमंडवे तेणेव उवा-गच्छह २ पत्तेयं नामंकेसु आसणेसु निसीयह २ दोवइं २ पडिवालेमाणा २ चिट्ठह घोसणं घोसेह २ मम एयमाणत्तियं पच्चप्पिणह । तए णं ते कोडुंबिया तहेव जाव पच्चप्पिणंति । तए णं से दुवए राया कोडुंबिय-पुरिसे सहावेइ २ एवं वयासी—गच्छह णं तुब्भे देवाणुप्पिया ! संयवर-मंडवं आसियसंमज्जिओवलित्तं सुगंधवरगंधियं पंचवण्णपुप्फोवयारकळियं कालागरुपवरकुंदुरुक्ततुरुक्क जाव गंधवट्ठिभूयं मंचाइमंचकळियं करेह कारवेह करेत्ता कारवेत्ता वासुदेवपामोक्खाणं बहूणं रायसहस्साणं पत्तेयं २ नामंकाइं आसणाइं अत्थुयपच्चत्थुयाइं रएह २ एयमाणत्तियं पच्चप्पिणह जाव पच्चप्पिणंति । तए णं ते वासुदेवपामोक्खा बहवे रायसहस्सा कल्लं ण्हाया जाव विभूसिया हत्थिखंधवरगया सकोरेंटमल्लच्छत्तेणं धरिज्जि-माणेहिं सेयवरचामराहिं महया ह्यगय जाव परिवुडा सव्विड्डीए जाव रवेणं जेणेव सयंवरांमंडवे तेणेव उवागच्छंति २ अणुप्पविसंति २ पत्तेयं २ नामंकेसु निसीयंति दोवइं २ पडिवालेमाणा चिट्ठंति । तए णं से दुवए राया कल्लं ण्हाए जाव विभूसिए हत्थिखंधवरगए सकोरेंटं ०

हयगय० कंपिल्लपुरं मज्झमज्झेणं निगगच्छइ जेणेव सयंवरामंडवे जेणेव वासुदेवपामोक्खा बहवे रायसहस्सा तेणेव उवागच्छइ २ तेसिं वासुदेव-पामोक्खाणं करयल जाव वद्धावेत्ता कण्हस्स वासुदेवस्स सेयवरचामरं गहाय उववीयमाणे चिट्ठइ ।

(124) तए णं सा दोवई २ कल्लं जाव जेणेव मज्जणघरे तेणेव उवागच्छइ २ मज्जणघरं अणुपविसइ २ णहाया कयबलिकम्मा कयकोउय-मंगलपायच्छित्ता सुद्धप्पावेसाइं मंगल्लाइं बत्थाइं पवरपरिहिया मज्जण-घराओ पडिनिक्खमइ २ जेणेव जिणघरे तेणेव उवागच्छइ २ जिणघरं अणुपविसइ २ जिणपडिमाणं आलोए पणामं करेइ २ लोमहत्थयं परामुसइ एवं जहा सुरियाभो जिणपडिमाओ अब्बेइ तहेव भाणियवं जाव धूवं डहइ २ वामं जाणुं अंचेइ दाहिणं जाणुं धरणितलंसि निहंट्ठु तिक्खुत्तो मुद्धाणं धरणितलंसि नमेइ २ ईसिं पच्चुन्नमइ २ करयल जाव कट्ठु एवं वयासी - नमोत्थु णं अरहंताणं जाव संपत्ताणं वंदइ नमंसइ २ जिणघराओ पडिनिक्खमइ २ जेणेव अंतेउरे तेणेव उवागच्छइ ।

(125) तए णं तं दोवई २ अंतेउरियाओ सव्वाळंकारविभूसियं करेति । किं ते ? वरपायपत्तनेउरा जाव चेडियाचक्कवालमहंययरगविंद-परिक्खित्ता अंतेउराओ पडिनिक्खमइ २ जेणेव बाहिरिया उवट्ठाणसाला जेणेव चाउग्घटे आसरहे तेणेव उवागच्छइ २ किड्ढावियाए लेहियाए साद्धिं चाउग्घटं आसरहं दुरूहइ । तए णं से धट्ठज्जुणे कुमारे दोवईए कन्नाए सारत्थं करेइ । तए णं सा दोवई २ कंपिल्लपुरं मज्झमज्झेणं जेणेव सयंवरामंडवे तेणेव उवागच्छइ २ रहं ठावेइ रहाओ पच्चोरुमई २ किड्ढावियाए लेहियाए साद्धिं सयंवरमंडवं अणुपविसइ करयल जाव तोसिं वासुदेवपामोक्खाणं बहूणं रायवरसहस्साणं पणामं करेइ । तए णं सा दोवई २ एगं महं सिरिदामगंडं० किं ते ? पाडलमल्लियचंपय जाव सत्त-च्छयाईहिं गंधद्धाणिं मुयंतं परमसुहफासं दरिसणिज्जं गेणहइ । तए णं सा किड्ढाविया सुरूवा जाव वामहत्थेणं चिल्लगं दप्पणं गहेऊण सललियं दप्पणसंकंतबिंबसंदंसिए य से दाहिणेणं हत्थेणं दरिसए पवररायसीहे फुड-

विसयविसुद्धरिभियगंभीरमदुरभणिया सा तेसिं सव्वेसिं पत्थिवाणं अस्मा-
 पिडबंससत्तसामत्थगोत्तविक्कतिकंतिबहुविह्वागममाहप्परूबजोव्वणगुण-
 लावण्णकुलसीलजाणिया कित्तणं करेइ । पढमं ताव वणिहपुंगवाणं
 दसंदसारवरवीरपुरिसितिलोक्कवलवगाणं सत्तुसयसहस्समाणावमद्दगाणं
 भवसिद्धिपवरपुंडरीयाणं चिह्वाणं बलवीरियरूबजोव्वणगुणलावण्ण-
 कित्तिया कित्तणं करेइ । तओ पुणं उगसेणमाईणं जायवाणं भणइ —
 सोहगरूवकलिए बरोहि वरपुरिसगंधहत्थीणं । जो हु ते लोए होइ
 हिययदइओ ॥ तए णं सा दोवई रायवरकन्नगा बहूणं रायवरसहस्साणं
 मज्झमज्झेणं समइच्छमाणी २ पुठवकयनियाणेणं चोइज्जमाणी २ जेणेव
 पंच पंडवा तेणेव उवागच्छइ २ ते पंच पंडवे तेणं दसद्ववणेणं कुसुम-
 दामेणं आवेढियपरिवेढिए करेइ २ एवं बयासी — एए णं मए पंच
 पंडवा वरिया । तए णं ताइं वासुदेवपामोक्खाइं बहूणि रायसहस्साणि
 महया २ सइणं उगघोसेमाणाइं २ एवं वयंति — सुवरियं खलु भो !
 दोवईए रायवरकन्नाए त्तिकट्टु सयंवरमंडवाओ पडिनिक्खमंति २
 जेणेव सया २ अवासा तेणेव उवागच्छंति । तए णं धट्टज्जुणकुमारे पंच
 पंडवे दोवइं च रायवरकन्नगं चाउघंटं आसरहं दुरूहेइ २ कंपिल्लपुरं
 मज्झमज्झेणं जाव सयं भवणं अणुपविसइ । तए णं दुवए राया पंच-
 पंडवे दोवइं २ पट्टयं दुरूहेइ २ सेयापीयएहिं कलसेहिं मज्जावेइ २
 अग्गिहोमं करीवेइ पंचण्हं पंडवाणं दोवईए य पाणिग्गहणं करीवेइ । तए
 णं से दुवए राया दोवईए २ इमं एयारूवं पीइदाणं दलयइ तंजहा — अट्ट
 हिरण्णकोडीओ जाव पेसणकारीओ दासचेडीओ अन्नं च विपुलं धणकणग
 जाव दलयइ । तए णं से दुवए राया ताइं वासुदेवपामोक्खाइं विपुलेणं
 असणपाणखाइमसाइमेणं वत्थगंध जाव पडिविसज्जेइ ।

(126) तए णं से पंडू राया तेसिं वासुदेवपामोक्खाणं बहूणं राय-
 सहस्साणं करयल जाव एवं वयासी — एवं खलु देवाणुप्पिया ! हत्थिणावरे
 नयरे पंचण्हं पंडवाणं दोवईए य देवीए कल्लणकंरे भविस्सइ । तं तुब्भे
 णं देवाणुप्पिया ! ममं अणुगिण्हमाणा अकालपरिहीणं समोसरह । तए णं

ते वासुदेवपामोक्खा पत्तेयं २ जाव पहारेत्थ गमणाए । तए णं से पंडू राया कोडुंबियपुरिसे सहावेइ २ एवं वयासी - गच्छह णं तुब्भे देवाणु-
प्पिया ! हत्थिणाउरे पंचण्हं पंडवाणं पंच पासायबडिंसए कारेहि अम्भु-
ग्गयमूसिय वण्णओ जाव पडिरूवे । तए णं ते कोडुंबियपुरिसा पडि-
सुणोति जाव कारवेति । तए णं से पंडू राया पंचहिं पंडवेहिं दोवईए
देवीए साद्धिं ह्यगयसंपरिवुडे कं पिङ्गपुराओ पडिनिक्खमइ २ जेणेव
हत्थिणाउरे तेणेव उवागए । तए णं से पंडूराया तेसिं वासुदेवपामोक्खाणं
आगमणं जाणित्ता कोडुंबियपुरिसे सहावेइ २ एवं वयासी - गच्छह णं
तुब्भे देवाणुप्पिया ! हत्थिणाउरस्स नयरस्स बहिया वासुदेवपामोक्खाणं
बहूणं रायसहस्साणं आवासे कारेह अणेगथंभंसय तदेव जाव पच्चप्पिणंति ।
तए णं ते वासुदेवपामोक्खा बहवे रायसहस्सा जेणेव हत्थिणाउरे
तेणेव उवागच्छंति । तए णं पंडूराया ते वासुदेवपामोक्खे जाव आगए
जाणित्ता हट्ठुट्ठे ण्हाए कयबालिकम्मे जहा दुवए जाव जहारिहं आवासे
दलयइ । तए णं ते वासुदेवपामोक्खा बहवे रायसहस्सा जेणेव सयां २
आवासां तेणेव उवागच्छंति तदेव जाव विहरंति । तए णं से पंडूराया
हत्थिणाउरं नयरं अणुपविसइ २ कोडुंबियपुरिसे सहावेइ २ एवं वयासी -
तुब्भे णं देवाणुप्पिया ! विपुळं असणं ४ तदेव जाव सवणोति । तए णं ते
वासुदेवपामोक्खा बहवे रायसहस्सा ण्हाया कयबालिकम्मा कयकोडय-
मंगलपायच्छित्ता तं विपुळं असणं ४ तदेव जाव विहरंति । तए णं से
पंडूराया ते पंचपंडवे दोवइं च देविं पट्टयं दुरुहेइ २ सीयापीएहिं कलसेहिं
ण्हावेई २ कल्लाणकंरं करेइ २ ते वासुदेवपामोक्खे बहवे रायसहस्से
विपुलेणं असणेजं ४ पुप्फवत्येणं सक्कारेइ सम्माणेइ जाव पडिबिसजेइ ।
तए णं ताइं वासुदेवपामोक्खाइं बहूइं जाव पडिगयाइं ।

(127) तए णं ते पंच पंडवा दोवईए देवीए साद्धिं कल्लाकलिं
चारंचारणं उरालाइं भोगभोगाइं जाव विहरंति । तए णं से पंडू राया
अज्जया कयाइं पंचहिं पंडवेहिं कौंतीए देवीए दोवईए य साद्धिं अंतो-
अंतोउरपरियालसद्धिं संपरिवुडे सीहासणवरगए यावि विहरइ । इमं च णं

कच्छुल्लनारए दंसणेणं अइभइए विणीए अंतो य कलुसहियए मज्झत्थ-
 उवत्थिए य अलीणसोमपियदंसणे सुंरूवे अमइलसगलपरिहिए काल-
 मियचम्मउत्तरासंगरइयवच्छे दण्डकैमण्डलुहत्थे जडामउडदित्तसिए
 जन्नोवइयगणेत्तियमुंजमेहलावागलधरे हत्थकयकच्छभीए पियगंधवे
 धरणिगोयरप्पहाणे संवरणावरणओवयणुप्पयणिलेसणीसु य संकामणि-
 आभिओगपन्नत्तिगमणीथांभिणीसु य बहूसु विज्जाहरीसु विज्जासु विस्सुय-
 जसे इट्ठे रामस्स य केसवस्स य पज्जुन्नपईवसंबअनिरुद्धनिसढउम्मुय-
 सारणगयसुमुहदुम्मुहाईणं जायवाणं अद्धुट्ठाण य कुमारकोडीणं हियय-
 दइए संथवए कलहजुद्धकोलाहिलप्पिए भंडणाभिलासी बहूसु य समरसय-
 संपराएसु दंसणरए समंतओ कलहं सदक्खिणं अणुगवेसमाणे असमाहि-
 करे दसारवरवीरपुरिसतेलोक्कबलवगाणं आमंतेऊण तं भगवई पक्कमणिं
 गगणगमणदच्छं उप्पइओ गर्गणमभिलंघयंतो गामागरनगरखेडकब्बड-
 मडंबदोणमुहपट्टणसंबाहसहस्समंडियं थिमियमेईणीतलं वसुहं ओलोइते¹²
 रम्मं हत्थिणाउरं उवागए पंडुरायभवणांसि अइवेगेण सैमोवइए । तए
 णं से पंडू राया कच्छुल्लनारयं एज्जमाणं पासइ २ पंचहिं पंडवेहिं कुंतीए
 य देवीए सद्धिं आसणाओ अब्भुट्ठेइ २ कच्छुल्लनारयं सत्तट्ठपयाइं
 पच्चुग्गच्छइ २ तिक्खुत्तो आयाहिणपयाहिणं करेइ २ वंदइ नमंसइ २
 महरिहेणं आसणेणं उवनिमंतेइ । तए णं से कच्छुल्लनारए उदगपरि-
 फोसियाए दब्भोवरिपच्चुत्थुयाए भिसियाए निसीयइ २ पंडुरायं रज्जे
 य जाव अंतेउरे य कुसलोदंतं पुच्छइ । तए णं से पंडूराया कौंती य देवी
 पंच य पंडवा कच्छुल्लनारयं आढंति जाव पज्जुवासंति । तए णं सा
 दोवई देवी कच्छुल्लनारयं अस्संजयअविरयअप्पडिहयअपच्चक्खायपावकम्मं
 तिकट्ठु नो आढाइ नो परियाणइ नो अब्भुट्ठेइ नो पज्जुवासइ ।

(128) तए णं तस्स कच्छुल्लनारयस्स इमेयारूवे अज्झत्थिए
 चित्तिए पत्थिए मणोगए संकप्पे समुप्पज्जित्था—अहो णं दोवई देवी
 रूवेण य जाव लावण्णेण य पंचहिं पंडवेहिं अवत्थद्धा समाणी ममं नो
 आढाइ जाव नो पज्जुवासइ । तं सेयं खलु मम दोवईए देवीए विप्पियं

करेत्तए त्तिकट्टु एवं संपेहेइ २ पंडुरायं आपुच्छइ २ उप्पयाणिं विज्जं
 आवाहेइ २ ताए उक्किट्ठाए जाव विज्जाहरगईए लवणसमुदं मज्झमज्जेणं
 पुरत्थामिमुहे वीईवइउं पयत्ते यावि होत्था । तेणं कालेणं २ धायइसंडे
 दीवे पुरत्थिमद्वदाहिणडुभरहवासे अवरकंका नामं रायहाणी होत्था ।
 तत्थ णं अवरकंकाए रायहाणीए पउमनाभे नामं राया होत्था महया
 हिमवंत वण्णओ । तस्स णं पउमनाभस्स रत्तो सत्त देवीसयाई ओरोहे
 होत्था । तस्स णं पउमनाभस्स रत्तो सुनाभे नामं पुत्ते जुवरायावि होत्था ।
 तए णं से पउमनाभे राया अंतोअंतेउरंसि ओरोहसंपरिवुडे सीहासण-
 वरगए विहरइ । तए णं से कच्छुल्लनारए जेणेव अवरकंका रायहाणी
 जेणेव पउमनाभस्स भवणे तेणेव उवागच्छइ २ पउमनाभस्स रत्तो
 भवणंसि झत्ति वेगेण समोवइए । तए णं से पउमनाभे कच्छुल्लनारयं
 एज्जमाणं पासइ २ आसणाओ अब्भुट्टेइ २ अग्घेणं जाव आसणेणं
 उवनिमंतेइ । तए णं से कच्छुल्लनारए उदयपरिफोसियाए दब्भोवरि-
 पच्चत्थुयाए भिसियाए निसीयइ जाव कुसलोदंतं आपुच्छइ । तए णं से
 पउमनाभे राया नियगओरोहे जायविम्हए कच्छुल्लनारयं एवं वयासी-
 तुमं देवाणुप्पिया ! बहूणि गामाणि जाव गिहाई अणुपविससि । तं
 अत्थियाई ते कहिचि देवाणुप्पिया ! एरिसए ओरोहे दिट्ठुव्वे जारिसए
 णं मम ओरोहे ? तए णं से कच्छुल्लनारए पउमनाभेणं एवं वुत्ते समाणे
 ईसिं विहसियं करेइ २ एवं वयासी—सरिसे णं तुमं पउमनाभा !
 तस्स अगडददुरेस्स । के णं देवाणुप्पिया ! से अगडददुरे ? एवं जहा
 मल्लिणाए एवं खलु देवाणुप्पिया ! जंबुदीवे २ भारहे वासे हत्थिणाउरे
 नयरे दुपयस्स रत्तो धूया चुलणीए देवीए अत्तया पंडुस्स सुण्हा पंचण्हं
 पंडवाणं भारिया दोवई देवी रूवेण य जाव उक्किट्ठसरीरा । दोवईए
 णं देवीए छिन्नस्सवि पायंगुट्ठस्स अयं तव ओरोहे संयंपि कलं न
 अग्घइ त्तिकट्टु पउमनाभं आपुच्छइ जाव पडिगए । तए णं से
 पउमनाभे राया कच्छुल्लनारयस्स अंतिए एयमट्ठं सोच्चा निसम्म दोवईए
 देवीए रूवे य ३ मुच्छिण ४ जेणेव पोसहसाला तेणेव उवागच्छइ २

पोसहसालं जाव पुव्वसंगइयं देवं एवं वयासी - एवं खलु देवाणुप्पिया !
जंबुद्दीवे २ भारहे वासे हत्थिणाउरे जाव उक्किट्टसरीरा । तं इच्छामि
णं देवाणुप्पिया ! दोवइं देवीं इहमाणीयं । तए णं पुव्वसंगइए देवे
पउमनाभं एवं वयासी - नो खलु देवाणुप्पिया ! एवं भूयं वा
भवं वा भविस्सं वा जन्नं दोवई देवी पंचपंडवे मोत्तूणं अन्नेणं
पुरिसेणं सद्धिं उरालाइं जाव विहरिस्सइ । तहावि य णं अहं तव पियट्ठं-
याए दोवइं देविं इहं हव्वमाणेमि त्तिकट्ठु पउमनाभं आपुच्छइ २ ताए
उक्किट्ठाए जाव लवणसमुद्दं मज्झंमज्झेणं जेणेव हत्थिणाउरे नयरे तेणेव
पहारेत्थ गमणाए । तेणं कालेणं २ हत्थिणाउरे नयरे जुहिट्ठिल्ले राया
दोवईए देवीए सद्धिं उप्पि आगासतलगंसि सुहप्पसुत्ते यावि होत्था ।
तए णं से पुव्वसंगइए देवे जेणेव जुहिट्ठिल्ले राया जेणेव दोवई देवी
तेणेव उवागच्छइ २ दोवईए देवीए ओसोवणियं दलयइ २ दोवइं देविं
गिण्हइ २ ताए उक्किट्ठाए जाव जेणेव अवरकंका जेणेव पउमनाभस्स
भवणे तेणेव उवागच्छइ २ पउमनाभस्स भवणंसि असोगवणियाए
दोवइं देविं ठावेइ २ ओसोवणिं अवहरइ २ जेणेव पउमनाभे तेणेव
उवागच्छइ २ एवं वयासी - एस णं देवाणुप्पिया ! मए हत्थिणाउराओ
दोवई देवी इहं हव्वमाणीया तव असोगवणियाए चिट्ठइ । अओ परं
तुमं जाणसि त्तिकट्ठु जामेव दिसिं पाउब्भूए तामेव दिसिं पडिगए ।
तए णं सा दोवई देवी तओ मुहुत्तंतरस्स पडिबुद्धा समाणी तं भवणं
असोगवणियं च अपच्चभिजाणमाणी एवं वयासी - नो खलु अम्हं एसे
सए भवणे नो खलु एसा अम्हं सया असोगवणिया । तं न नज्जइ णं
अहं केणइ देवेण वा दाणवेण वा किंपुरिसेण वा किन्नरेण वा महो-
रगेण वा गंधव्वेण वा अन्नस्स रत्तो असोगवणियं साहरिय त्तिकट्ठु
ओहयमणसंकप्पा जाव झियायइ । तए णं से पउमनाभे राया ण्हाए
जाव सव्वालंकारविभूसिए अंतैउरपरियालसंपरिवुडे जेणेव असोगवणिया
जेणेव दोवई देवी तेणेव उवागच्छइ २ दोवइं देविं ओहय जाव झियाय-
माणिं पासइ २ एवं वयासी - किन्नं तुमं देवाणुप्पिए ! ओहय जाव

क्षियाहि ? एवं खलु तुमं देवाणुप्पिए ! मम पुव्वसंगइएणं देवेणं जंबु-
 शीवाओ २ भारद्वाओ वासाओ हत्थिणाउराओ नयराओ जुहिट्ठिल्लस्स
 रत्नो भवणाओ साहरिया । तं मा णं तुमं देवाणुप्पिया । ओहय जाव
 क्षियाहि । तुमं णं मए सद्धिं विपुलाइं भोगभोगाइं जाव विहराहि । तए
 णं सा दोवई पउमनाभं एवं वयासी — एवं खलु देवाणुप्पिया ! जंबुदीवे २
 भारदे वासे बारवईए नयरीए कण्हे नामं वासुदेवे मम पियभाउए परि-
 वसइ । तं जइ णं से छण्हं मासाणं मम कूवं नो हव्वमागच्छइ तए
 णं अहं देवाणुप्पिया ! जं तुमं वदसि तस्स आणाओवायवयणनिदेत्ते
 चिट्ठिस्सामि । तए णं से पउमनाभे दोवईए एयमट्ठं पडिसुणेइ २ दोवईं
 देविं कन्नंतेउरे ठवेइ । तए णं सा दोवई देवी छट्ठंछट्ठेणं अणिक्खित्तेणं
 आयंबिलपरिगहिएणं तवोकम्मेषं अप्पाणं भावेमाणी विहरइ ।

(129) तए णं से जुहिट्ठिल्ले राया तओ मुहुत्तंतरस्स पडिबुद्धे
 समाणे दोवइं देविं पासे अपासमाणे सयणिज्जाओ उट्ठेइ २ दोवईए
 देवीए सव्वओ समंता मग्गणगवेसणं करेइ २ दोवईए देवीए कत्थइ
 सुइं वा खुइं वा पवत्तिं वा अलभमाणे जेणेव पंडूराया तेणेव उवा-
 गच्छइ २ पंडूरायं एवं वयासी — एवं खलु ताओ ! मम आगासतल-
 गंसि सुहपसुत्तस्स पासाओ दोवई देवी न नज्जइ केणइ देवेण वा
 दाणवेण वा किंपुरिसेण वा किन्नरेण वा महोरगेण वा गंधव्वेण वा
 हिया वा निया वा अक्खित्ता वा । तं इच्छामि णं ताओ ! दोवईए
 देवीए सव्वओ समंता मग्गणगवेसणं करित्तए । तए णं से पंडूराया
 कोडुंबियपुरिसे सद्दावेइ २ एवं वयासी — गच्छइ णं तुम्भे देवाणुप्पिया !
 हत्थिणाउरे नयरे सिंघाडगतिगचउक्कचच्चरमहापहपहेसु महया २ सहेणं
 उग्घोसेमाणा २ एवं वयइ — एवं खलु देवाणुप्पिया ! जुहिट्ठिल्लस्स रत्नो
 आगासतलगंसि सुहपसुत्तस्स पासाओ दोवई देवी न नज्जइ केणइ
 देवेण वा दाणवेण वा किन्नरेण वा किंपुरिसेण वा महोरगेण वा गंध-
 व्वेण वा हिया वा निया वा अक्खित्ता वा । तं जो णं देवाणुप्पिया !
 दोवईए देवीए सुइं वा खुइं वा पवत्तिं वा परिकहेइ तस्स णं पंडूराया

विउलं अत्थसंपयाणं दलयइ त्तिक्कट्ठु घोसणं घोसावेह २ एयमाणत्तिं
 पच्चप्पिणह । तए णं ते कोडुंबियपुरिसा जाव पच्चप्पिणंति । तए णं से पंडूराया
 दोवईए देवीए कत्थइ सुइं वा जाव अलभमाणे कौंतीं देवीं सदावेइ २ एवं
 वयासी—गच्छह णं तुमं देवाणुप्पिया ! बारवइं नयरिं कण्हस्स वासुदेवस्स
 एयमट्ठं निवेदेहि । कण्हे णं परं वासुदेवे दोवईए मग्गणगवेसणं करेज्जा
 अन्नहा न नज्जइ दोवईए देवीए सुइं वा खुइं वा पवत्ति वा उवलभेज्जा ।
 तए णं सा कौंती देवी पंडुणा एवं वुत्ता समाणी जाव पडिसुणेइ २
 ण्हाया कयवलिकम्मा हत्थिखंधवरगया हत्थिणपुरं नयरं मज्झंमज्जेणं
 निग्गच्छइ २ कुरुजणवयं मज्झंमज्जेणं जेणेव सुरट्ठाजणवए जेणेव बारवई
 नयरी जेणेव अग्गुज्जाणे तेणेव उवागच्छइ २ हत्थिखंधाओ पच्चोरुहइ २
 कोडुंबियपुरिसे सदावेइ २ एवं वयासी—गच्छह णं तुम्भे देवाणुप्पिया !
 जेणेव बारवइं नयरिं अणुपविसह २ कण्हं वासुदेवं करयल० एवं वयह—
 एवं खलु सामी ! तुम्भं पिउच्छा कौंती देवी हत्थिणाउराओ नयराओ
 इहं हव्वमागया तुम्भं दंसणं कंखइ । तए णं ते कोडुंबियपुरिसा जाव
 कहेंति । तए णं कण्हे वासुदेवे कोडुंबियपुरिसाणं अंतिए एयमट्ठं सोच्चा
 निसम्म हट्ठतुट्ठे हत्थिखंधवरगए हयगय० बारवईए नयरीए मज्झंमज्जेणं
 जेणेव कौंती देवी तेणेव उवागच्छइ २ हत्थिखंधाओ पच्चोरुहइ २
 कौंतीए देवीए पायग्गहणं करेइ २ कौंतीए देवीए सट्ठिं हत्थिखंधं
 दुरुहइ २ बारवइं नयरीं मज्झंमज्जेणं जेणेव सए गिहे तेणेव उवागच्छइ २
 सयं गिहं अणुप्पविसइ । तए णं से कण्हे वासुदेवे कौंतिं देविं ण्हायं
 कयवलिकम्मं जिमियभुत्तुत्तरागयं जाव सुहासणवरगयं एवं वयासी—
 संदिसउ णं पिउच्छा ! किमागमणपओयणं । तए णं सा कौंती देवी
 कण्हं वासुदेवं एवं वयासी—एवं खलु पुत्ता ! हत्थिणाउरे नयरे जुहि-
 ट्ठिल्लस्स रओ आगासतलए सुहप्पसुत्तस्स पासाओ दोवई देवी न नज्जइ
 केणइ अवहिया जाव अवक्खित्ता वा । तं इच्छामि णं पुत्ता ! दोवईए
 देवीए मग्गणगवेसणं कैयं । तए णं से कण्हे वासुदेवे कौंतीपिउच्छि
 एवं वयासी—जं नवरं पिउच्छा दोवईए देवीए कत्थइ सुइं वा जाव

लभामि तो णं अहं पायालाओ वा भवणाओ वा अद्धभरहाओ
 वा समंतओ दोवई देविं साहत्थि उवणेमि त्तिकट्ठु कौंतीपिउच्छि
 सक्कोरेइ सम्माणेइ जाव पडिविसज्जेइ । तए णं सा कौंती देवी
 कण्हेणं वासुदेवेणं पडिविसज्जिया समाणी जामेव दिसिं पाउब्भूया
 तामेव दिसिं पडिगया । तए णं से कण्हे वासुदेवे कोडुंबियपुरिसे
 सदावेइ २ एवं वयासी—गच्छह णं तुब्भे देवाणुप्पिया ! बारवइं
 नयरिं एवं जहा पंडू तहा घोसणं घोसावेइ जाव पच्चप्पिणंति पंडुस्स जहा ।
 तए णं से कण्हे वासुदेवे अन्नया अंतोअंतेउरगए ओरोहे जाव विहरइ ।
 इमं च णं कच्छुल्लए नारए जाव समोवइए जाव निसीइत्ता कण्हं
 वासुदेवं कुसलोदंतं पुच्छइ । तए णं से कण्हे वासुदेवे कच्छुल्लं
 नारयं एवं वयासी—तुमं णं देवाणुप्पिया ! बहूणि गामागर जाव
 अणुपबिससि । तं अत्थियाइं ते कहिंचि दोवईए देवीए सुई वा जाव
 उवलद्धा ? तए णं से कच्छुल्लए कण्हं वासुदेवं एवं वयासी—एवं खलु
 देवाणुप्पिया ! अन्नया कयाइं धायईसंडे दीवे पुरत्थिमद्धं दाहिणडुभरह-
 वासं अवरकंकारायहाणिं गए । तत्थ णं मए पउमनाभस्स रत्तो भवणंसि
 दोवई देवी जारिसिया दिट्ठपुव्वा यावि होत्था । तए णं कण्हे
 वासुदेवे कच्छुल्लं एवं वयासी—तुब्भं चेव णं देवाणुप्पिया ! एयं पुव्व-
 कम्मं । तए णं से कच्छुल्लनारए कण्हेणं वासुदेवेणं एवं वुत्ते समाणे
 उप्पयणिं विज्जं आवाहेइ २ जामेव दिसिं पाउब्भूए तामेव दिसिं पडि-
 गए । तए णं से कण्हे वासुदेवे दूयं सदावेइ २ एवं वयासी—गच्छह
 णं तुमं देवाणुप्पिया ! हत्थिणाउरं पंडुस्स रत्तो एयमट्ठं निवेएहि—एवं
 खलु देवाणुप्पिया ! दोवई देवी धायईसंडवीवे पुरत्थिमद्धे अवरकंकाए
 रायहाणीए पउमनाभभवणंसि साहिंथा दोवईए देवीए पउत्ती उवलद्धा ।
 तं गच्छंतु पंच पंडवा चाउरंगिणीए सेणाए सद्धिं संपरिउड्डा पुरत्थिम-
 वेयालीए ममं पडिवालेमाणा चिट्ठंतु । तए णं से दूए जाव भणइ जाव
 पडिवालेमाणा चिट्ठइ तेवि जाव चिट्ठंति । तए णं से कण्हे वासुदेवे
 कोडुंबियपुरिसे सदावेइ २ एवं वयासी—गच्छह णं तुब्भे देवाणुप्पिया !

सन्नाहियं भेरिं तालेह तेवि तालेंति । तए णं तीए सन्नाहियाए भेरीए सहं सोच्चा समुहविजयपामोक्खा दस दसारा जाव छप्पन्नं बलवगसाहस्सीओ सन्नद्धबद्ध जाव गहियाउहपहरणा अप्पेगइया हयगया अप्पेगइया गयगया जाव मणुस्सवग्गुरापारिक्खित्ता जेणेव सभा सुहम्मा जेणेव कण्हे वासुदेवे तेणेव उवागच्छंति २ करयल जाव वद्धावेंति । तए णं से कण्हे वासुदेवे हत्थिखंधवरगए सकोरेंटमल्लदामेणं छत्तेणं धरिज्जमाणेणं सेयवर ० हयगय महया भडचडगरपहकरेणं बारवईए नयरीए मज्झंमज्झेणं निग्गच्छइ जेणेव पुरत्थिमवेयाली तेणेव उवागच्छइ २ पंचहिं पंडवेहिं सद्धिं एगयओ मिलाइ २ खंधावारनिवेसं करेइ २ पोसहसालं करेइ २ पोसहसालं अणु-प्पविसइ २ सुट्ठियं देवं मणसीकरेमाणे २ चिट्ठइ । तए णं कण्हस्स वासु-देवस्स अट्टमभत्तंसि परिणममाणंसि सुट्ठिओ जाव आगओ [एवं वयइ—] भण देवाणुप्पिया ! जं मए कायव्वं । तए णं से कण्हे वासुदेवे सुट्ठियं एवं वयासी — एवं खलु देवाणुप्पिया ! दोवई देवी जाव पउमनाभस्स भवणंसि साहिया । तण्णं तुमं देवाणुप्पिया ! मम पंचहिं पंडवेहिं सद्धिं अप्पछट्ठस्स छण्हं रहाणं लवणसमुदे मग्गं वियराहि जां णं' अहं अवरकंकारायहाणि दोवईए कूवं गच्छामि । तए णं से सुट्ठिए देवे कण्हं वासुदेवं एवं वयासी — किण्णं देवाणुप्पिया ! जहा चेव पउमनाभस्स रत्तो पुव्वसंगइएणं देवेणं दोवई जाव साहिया तहा चेव दोवइं देविं धायईसंडाओ दीवाओ भारहाओ जाव हत्थिणाउरं साहरामि उदाहु पउमनाभं रायं सपुरबल-वाहणं लवणसमुदे पक्खिवामि ? तए णं से कण्हे वासुदेवे सुट्ठियं देवं एवं वयासी — मा णं तुमं देवाणुप्पिया ! जाव साहराहि । तुमं णं देवाणुप्पिया ! मम लवणसमुदे पंचहिं पंडवेहिं सद्धिं अप्पछट्ठस्स छण्हं रहाणं मग्गं वियराहि । सयमेव णं अहं दोवईए कूवं गच्छामि । तए णं से सुट्ठिए देवे कण्हं वासुदेवं एवं वयासी — एवं होउ णं । पंचहिं पंडवेहिं सद्धिं अप्पछट्ठस्स छण्हं रहाणं लवणसमुदे मग्गं वियरइ । तए णं से कण्हे वासुदेवे चाउरंगिणिं सेणं पडिविसज्जेइ २ पंचहिं पंडवेहिं सद्धिं अप्पछट्ठे छाहिं रहेहिं लवणसमुदं मज्झंमज्झेणं

वीईवयइ २ जेणेव अवरकंका रायहाणी जेणेव अवरकंकाए रायहाणीए
अग्गुज्जाणे तेणेव उवागच्छइ २ रहं ठावेइ २ दारुयं सारहिं सदावेइ २
एवं वयासी - गच्छह णं तुमं देवाणुप्पिया ! अवरकंकारायहाणिं अणु-
प्पविसाहि २ पउमनाभस्स रत्तो वामेणं पाएणं पायपीढं अवक्कमित्ता
कुंतगेणं लेहं पणामेहि तिवलियं भिउडिं निडाले साहट्टु आसुरुत्ते रुढे
कुढे कुविए चंडिकिए एवं वयासी - हं भो पउमनाभा ! अपत्थिय-
पत्थिया दुरंतपंतलक्खणा हीणपुण्णचाउइसा सिरिहिरिधिईपरिवज्जिया !
अज्ज न भवसि ! किञ्चं तुमं न याणासि कण्हस्स वासुदेवस्स भगिणिं
दोवइं देविं इहं हव्वमाणेमाणं ? तं एयमवि गए पच्चप्पिणाहि णं तुमं
दोवइं देविं कण्हस्स वासुदेवस्स अहव णं जुद्धसज्जे निगगच्छाहि । एस
णं कण्हे वासुदेवे पंचहिं पंडवेहिं सद्धिं अप्पल्लुढे दोवईए देवीए कूवं
हव्वमागए । तए णं से दारूए सारही कण्हेणं वासुदेवेणं एवं वुत्ते समाणे
हट्टुढे पडिसुणेइ २ अवरकंका रायहाणिं अणुपविसइ २ जेणेव पउमनाभे
तेणेव उवागच्छइ २ करयल जाव वद्धावेत्ता एवं वयासी - एस णं
सामी ! मम विणयपडिवत्ती इमा अन्ना मम सानिस्स समुहाणत्ति
त्तिकट्टु आसुरुत्ते वामपाएणं पायपीढं अवक्कमइ २ कुंतगेणं लेहं
पणामेइ जाव कूवं हव्वमागए । तए णं से पउमनाभे दारुएणं सारहिणा
एवं वुत्ते समाणे आसुरुत्ते तिवलिं भिउडिं निडाले साहट्टु एवं
वयासी - न अप्पिणामि णं अहं देवाणुप्पिया ! कण्हस्स वासुदेवस्स
दोवइं । एस णं अहं सयमेव जुद्धसज्जे निगगच्छामि त्तिकट्टु दारुयं
सारहिं एवं वयासी - केवलं भो ! रायसत्थेसु दूए अवज्झे त्तिकट्टु
असक्कारियं असम्माणियं अवदारेणं निच्छुभावेइ । तए णं से दारुए
सारही पउमनाभेणं असक्कारियं जाव निच्छुढे समाणे जेणेव कण्हे वासुदेवे
तेणेव उवागच्छइ २ करयल जाव कण्हं एवं वयासी - एवं खलु अहं
सामी ! तुब्भं वयणेणं जाव निच्छुभावेइ । तए णं से पउमनाभे बलवाउयं
सदावेइ २ एवं वयासी - खिप्पामेव भो देवाणुप्पिया ! आभिसेक्कं
इत्थिरयणं पडिकप्पेइ । तयाणंतं च णं छेयायरियउवईसमइविकप्पणाहि

जाव उवणेति । तए णं से पउमनाहे सन्नद्ध० अभिसेयं दुरुहइ २ ह्यगय जेणेव कण्हे वासुदेवे तेणेव पहारेत्थ गमणाए । तए णं से कण्हे वासुदेवे पउमनाभं रायाणं एज्जमाणं पासइ २ ते पंच पंडवे एवं वयासी - हं भो वारगा ! किन्नं तुब्भे पउमनाभेणं सद्धिं जुज्झिहह उयाहु पिच्छहह ? तए णं ते पंचपंडवा कण्हं वासुदेवं एवं वयासी - अम्हे णं सामी ! जुज्झामो तुब्भे पेच्छह । तए णं पंचपंडवा सन्नद्ध जाव पहरणा रहे दुरुहंति २ जेणेव पउमनाभे राया तेणेव उवागच्छंति २ एवं वयासी - अम्हे वा पउमनाभे वा राय त्तिकट्टु पउमनाभेणं सद्धिं संपलग्गा यावि होत्था । तए णं से पउमनाभे राया ते पंचपंडवे खिप्पामेव ह्यमहियपवरविवडियचिंधय-पडागे जाव दिसोदिसिं पडिसेहेइ । तए णं ते पंचपंडवा पउमनाभेणं रत्ता ह्यमहियपवरविवडिय जाव पडिसेहिया समाणा अत्थामा जाव अधार-णिज्जमित्तिकट्टु जेणेव कण्हे वासुदेवे तेणेव उवागच्छंति । तए णं से कण्हे वासुदेवे ते पंचपंडवे एवं वयासी - कहणं तुब्भे देवाणुप्पिया ! पउमनाभेणं रत्ता सद्धिं संपलग्गा ? तए णं ते पंचपंडवा कण्हं वासुदेवं एवं वयासी - एवं खलु देवाणुप्पिया ! अम्हे तुब्भेहिं अब्भणुन्नाया समाणा सन्नद्धा० रहे दुरुहामो २ जेणेव पउमनाभे जाव पडिसेहेइ । तए णं से कण्हे वासुदेवे ते पंचपंडवे एवं वयासी - जइ णं तुब्भे देवाणुप्पिया ! एवं वयंता - अम्हे नो पउमनाभे रायत्तिकट्टु पउमनाभेणं सद्धिं संपलगंता तो णं तुब्भे नो पउमनाभे ह्यमहियपवर जाव पडिसेहत्था । तं पेच्छह णं तुब्भे देवाणुप्पिया ! अहं नो पउमनाभे रायत्तिकट्टु पउमनाभेणं रत्ता सद्धिं जुज्झामि रहं दुरुहइ २ जेणेव पउमनाभे राया तेणेव उवागच्छइ २ सेयं गोखीरहारधवलं तणंसोल्लिखसिंदुवार-कुंदेंदुसन्निगासं निययस्स बलस्स हरिसजणणं रिउसेन्नविणासकरं पंच-जैन्नं संखं परामुसइ २ मुहवायपूरियं करेइ । तए णं तस्स पउमनाभस्स तेणं संखस्सहेणं बलतिभाए हए जाव पडिसेहिए । तए णं से कण्हे वासुदेवे धणुं परामुसइ वेढो धणुं पूरेइ २ धणुसहं करेइ । तए णं तस्स पउमनाभस्स दोब्बे बलतिभाए तेणं धणुसहेणं ह्यमहिय जाव पडिसेहिए ।

तए णं से पउमनाभे राया तिभागबलावसेसे अत्थामे अबले अवीरिए अपुरिसक्कारपरक्कमे आधारणिज्जमित्तिकट्ठु सिग्वं तुरियं जेणेव अवरकंका तेणेव उवागच्छइ २ अवरकंकारायहाणि अणुपविसइ २ बाराइं पिहेइ २ रोहंसज्जे चिट्ठइ । तए णं से कण्हे वासुदेवे जेणेव अवरकंका तेणेव उवागच्छइ २ रहं ठावेइ २ रहाओ पच्चोरुहइ २ वेउव्वियसमुग्घाएणं समोहणइ एगं महं नरसीहरूवं विउव्वइ २ महया २ सदेणं पायदहरियं करेइ । तए णं कण्हेणं वासुदेवेणं महया २ सदेणं पायदहरणं कैएणं समाणेणं अवरकंका रायहाणी संभग्गपागार-गोउराट्ठालयचरियतोरणपल्हत्थियपवरभवणसिरिघरा सरसरस्स धराणि-यले सन्निवइया । तए णं से पउमनाभे राया अवरकंका रायहाणि संभग्गं जाव पासित्ता भीए दोवइं देविं सरणं उवेइ । तए णं सा दोवइं देवी पउमनाभं रायं एवं वयासी - किन्नं तुमं देवाणुप्पिया ! जाणसि कण्हस्स वासुदेवस्स उत्तमपुरिसस्स विप्पियं करेमाणे ? तं एवमवि गए गच्छह णं तुमं देवाणुप्पिया ! ण्हाए कयबालिकम्मे उल्लपडसाडए ओचूलगवत्थनियत्थे अंतेउरपरियालसंपरिवुडे अग्गाइं वराइं रयणाइं गहाय ममं पुरओकाउं कण्हं वासुदेवं करयल जाव पायवडिए सरणं उवेहि । पणिवइयवच्छला णं देवाणुप्पिया ! उत्तमपुरिसा । तए णं से पउमनाभे दोवइए देवीए एयमट्ठं पडिसुणेइ २ ण्हाए जाव सरणं उवेइ २ करयल जाव एवं वयासी - दिट्ठा णं देवाणुप्पियाणं इड्डी जाव परक्कमे । तं खामेमि णं देवाणुप्पिया ! जाव खमंतु "णं जाव नाहं भुज्जो २ एवंकरणयाए त्तिकट्ठु पंजलिउडे पायवडिए कण्हस्स वासुदेवस्स दोवइं देविं साहत्थि उवणेइ । तए णं से कण्हे वासुदेवे पउमनाभं एवं वयासी - हं भो पउमनाभा ! अपत्थियपत्थिया ४ किन्नं तुमं जाणसि मम भगिणिं दोवइं देविं इह हव्वमाणमाणे ? तं एवमवि गए नत्थि ते ममाहितो इयाणि भयमत्थि त्तिकट्ठु पउमनाभं पडिविसज्जेइ दोवइं देविं गेण्हइ २ रहं दुरुहेइ २ जेणेव पंच पंडव तेणेव उवागच्छइ २ पंचण्हं पंडवाणं दोवइं देविं साहत्थि उवणेइ । तए णं से कण्हे पंचहिं पंडवेहिं सद्धि

अप्पछट्ठे छहिं रहेहिं लवणसमुदं मज्झिमज्झेणं जेणेव जंबुदीवे २ जेणेव भारहे वासे तेणेव पहारेत्थ गमणाए ।

(130) तेणं कालेणं २ धायइसंडे दीवे पुरत्थिमद्धे भारहे वासे चंपा नामं नयरी होत्था । पुण्णभदे चेइए । तत्थ णं चंपाए नयरीए कविले नामं वासुदेवे राया होत्था वण्णओ । तेणं कालेणं २ मुणिसुव्वए अरहा चंपाए पुण्णभदे समोसडे । कविले वासुदेवे धम्मं सुणेइ । तए णं से कविले वासुदेवे मुणिसुव्वयस्स अरहओ अंतिए धम्मं सुणेमाणे कण्हस्स वासुदेवस्स संखसदं सुणेइ । तए णं तस्स कविलस्स वासुदेवस्स इमेयारूवे अज्झत्थिए ४ समुप्पज्जित्था — किं मण्णे धायइसंडे दीवे भारहे वासे दोव्हे वासुदेवे समुप्पन्ने जस्स णं अयं संखसदे ममं पिव मुहवायपूरिए वियंभइ ? कविले वासुदेवा भइं इ मुणिसुव्वए अरहा कविलं वासुदेवं एवं वयासी — स नूणं कविला वासुदेवा ! ममं अंतिए धम्मं निसामेमाणस्स संखसदं आकिणित्ता इमेयारूवे अज्झत्थिए — किं मन्ने जाव वियंभइ । से नूणं कविला वासुदेवा ! अट्ठे समट्ठे ? हंता ! अत्थि । तं नो खलु कविला ! एवं भूयं वा भव्वं वा भविस्सं वा जन्नं एगखेत्ते एगजुगे एगसमए णं दुवे अरहंता वा चक्कवट्ठी वा बलदेवा वा वासुदेवा वा उप्पज्जिसु वा उप्पज्जित्ति वा उप्पज्जिस्संति वा । एवं खलु वासुदेवा ! जंबुदीवाओ २ भारहाओ वासाओ हत्थिणाउराओ नयराओ पंडुस्स रत्तो सुण्हा पंचण्हं पंडवाणं भारिया दोवई देवी तव पउमनाभस्स रत्तो पुव्वसंगइएणं देवेणं अवरकंकं नयरिं साहरिया । तए णं से कण्हे वासुदेवे पंचहिं पंडवेहिं सद्धिं अप्पछट्ठे छहिं रहेहिं अवरकंकं रायहाणिं दोवई देवीए कूवं हव्वमागए । तए णं तस्स कण्हस्स वासुदेवस्स पउमनाभेणं रत्ता सद्धिं संगामं संगामेमाणस्स अयं संखसदे तव मुहवाया० इट्ठे इव वियंभइ । तए णं से कविले वासुदेवे मुणिसुव्वयं वंदइ नमंसइ २ एवं वयासी — गच्छामि णं अहं भंते ! कण्हं वासुदेवं उत्तमपुरिसं मम सरिसपुरिसं पासामि । तए णं मुणिसुव्वए अरहा कविलं वासुदेवं एवं वयासी — नो खलु देवाणुप्पिया ! एवं भूयं वा ३ जण्णं अरहंता वा अरहंतं पासंति

चक्कवट्ठी वा चक्कवट्ठिं पासंति बलदेवा वा बलदेवं पासंति वासुदेवा वा वासुदेवं पासंति । तहवि य णं तुमं कण्हस्स वासुदेवस्स लवणसमुदं मज्झमज्झेणं वीईवयमाणस्स सेयापीयाइं धयग्गाइं पासिहिसि । तए णं से कविले वासुदेवे मुणिसुव्वयं वंदइ नमंसइ २ हत्थिखंधं दुरूहइ २ सिग्घं तुरियं जेणेव वेलाकूले तेणेव उवागच्छइ २ कण्हस्स वासुदेवस्स लवणसमुदं मज्झमज्झेणं वीईवयमाणस्स सेयापीयाइं धयग्गाइं पासइ २ एवं वयइ—एस णं मम सरिसपुरिसे उत्तमपुरिसे कण्हे वासुदेवे लवणसमुदं मज्झमज्झेणं वीईवयइ त्तिकट्ठु पंचयन्नं संखं परामुसइ २ मुहवायपूरियं करेइ । तए णं से कण्हे वासुदेवे कविलस्स वासुदेवस्स संखसइं आयण्णेइ २ पंचयन्नं जाव पूरियं करेइ । तए णं दोवि वासुदेवा संखसइसमायारिं करेति । तए णं से कविले वासुदेवे जेणेव अवरकंका तेणेव उवागच्छइ २ अवरकंका रायहाणिं संभग्गतोरणं जाव पासइ २ पउमनाभं एवं वयासी—किन्नं देवाणुप्पिया ! एसा अवरकंका संभग्ग जाव सन्निवड्या ? तए णं से पउमनाभे कविलं वासुदेवं एवं वयासी—एवं खलु सामी ! जंबुदीवाओ २ भारहाओ वासाओ इहं हव्वमागम्म कण्हेणं वासुदेवेणं तुब्भे परिभूय अवरकंका जाव सन्निवडिया । तए णं से कविले वासुदेवे पउमनाभस्स अंतिए एयमट्ठं सोच्चा पउमनाभं एवं वयासी—हं भो पउमनाभा ! अपत्थियपत्थिया ५ ! किन्नं तुमं जाणसि मम सरिसपुरिसस्स कण्हस्स वासुदेवस्स विप्पियं करेमाणे ?—आसुरुत्ते जाव पउमनाभं निव्विसयं आणवेइ पउमनाभस्स पुत्तं अवरकंकाए रायहाणीए महया २ रायाभिसेएणं अभिसिंचइ जाव पडिगए ।

(131) तए णं से कण्हे वासुदेवे लवणसमुदं मज्झमज्झेणं वीईवयइ ते पंचपंडवे एवं वयासी—गच्छह णं तुब्भे देवाणुप्पिया ! गंगं महानइं उत्तरइ जाव ताव अहं सुट्ठियं लवणाहिवइं पासामि । तए णं ते पंचपंडवा कण्हेणं २ एवं वुत्ता समाणा जेणेव गंगा महानदी तेणेव उवागच्छंति २ एगट्ठियाए नावाए मग्गणगवेस्सणं करेति २ एगट्ठियाए नावाए गंगं महानइं उत्तरंति २ अन्नमन्नं एवं वयंति—पहू णं देवाणुप्पिया !

कण्हे वासुदेवे गंगं महानइं बाहाहिं उत्तरित्तए उदाहु नो पद्दु उत्तरित्तए
 त्तिकट्ठु एगट्टियाओ णूमेति २ कण्हं वासुदेवं पडिवालेमाणा २ चिट्ठंति ।
 तए णं से कण्हे वासुदेवे सुट्टियं लवणाहिवइं पासइ २ जेणेव गंगा
 महानईं तेणेव उवागच्छइ २ एगट्टियाए सव्वओ समंता मग्गणगवेसणं
 करेइ २ एगट्टियं अपासमाणे एगाए बाहाए रहं सतुरगं ससारहिं गेण्हइ
 एगाए बाहाए गंगं महानइं बासट्ठिं जोयणाइं अद्धजोयणं च वित्थिण्णं
 उत्तरिउं पयत्ते यावि होत्था । तए णं से कण्हे वासुदेवे गंगाए महा-
 नईए बहुमज्झदेसभाए संपत्ते समाणे संते तंते परितंते बद्धसेए जाए
 यावि होत्था । तए णं तस्स कण्हस्स वासुदेवस्स इमेयारूवे अज्झत्थिए-
 अहो णं पंच पंडवा महाबलवगा जेहिं गंगामहानईं बावट्ठिं जोयणाइं
 अद्धजोयणं च वित्थिण्णा बाहाहिं उत्तिण्णा । इच्छंतएहिं णं पंचहिं
 पंडवेहिं पउमनाभे हयमहिय जाव नो पडिसेहिए । तए णं गंगादेवी
 कण्हस्स वासुदेवस्स इमं एयारूवं अज्झत्थियं जाव जाणित्ता थाहं वियरइ ।
 तए णं से कण्हे वासुदेवे मुहुत्तंतरं समासासेइ २ गंगं महानदिं बावट्ठिं जाव
 उत्तरइ २ जेणेव पंचपंडवा तेणेव उवागच्छइ पंच पंडवे एवं वयासी-
 अहो णं तुब्भे देवाणुप्पिया ! महाबलवगा जेहिं णं तुब्भेहिं गंगामहानईं
 बावट्ठिं जाव उत्तिण्णा । इच्छंतएहिं णं तुब्भेहिं पउमनाहे जाव नो
 पडिसेहिए । तए णं ते पंच पंडवा कण्हेणं वासुदेवेणं एवं वुत्ता समाणा
 कण्हं वासुदेवं एवं वयासी-एवं खलु देवाणुप्पिया ! अम्हे तुब्भेहिं
 विसज्जिया समाणा जेणेव गंगा महानईं तेणेव उवागच्छामो २ एगट्टियाए
 मग्गणगवेसणं तं चेव जाव णूमेमो तुब्भे पडिवालेमाणा चिट्ठामो । तए
 णं से कण्हे वासुदेवे तेसिं पंचपंडवाणं अंतिए एयमट्ठं सोच्चा निसम्म
 आसुरुत्ते जाव तिवलियं एवं वयासी-अहो णं जया मए लवणसमुहं
 दुवे जोयणसयसहस्सवित्थिण्णं वीईवइत्ता पउमनाभं हयमहियं जाव
 पडिसेहित्ता अवरकंका संभग्गा दोवई साहत्थि उवणीया तया णं तुब्भेहिं
 मम माहपं न विन्नायं इयाणि जाणिस्सह त्तिकट्ठु लोहदंडं परामुसइ
 पंचण्हं पंडवाणं रहे सुसूरेइ २ निव्विसए आणवेइ २ तत्थ णं रहमइणे

नामं कोड्ढे निविट्ठे । तए णं से कण्हे वासुदेवे जेणेव सए खंधावारे तेणेव उवागच्छइ २ सएणं खंधावारेणं साद्धिं अभिसमन्नागए याधि होत्था । तए णं से कण्हे वासुदेवे जेणेव बारवई नयरी तेणेव उवागच्छइ २ अणुप्पविसइ ।

(132) तए णं ते पंचपंडवा जेणेव हत्थिणाउरे तेणेव उवागच्छंति २ जेणेव पंडू राया तेणेव उवागच्छंति २ करयल जाव एवं वयासी — एवं खलु ताओ ! अम्हे कण्हेणं निव्विसया आणत्ता । तए णं पंडूराया ते पंचपंडवे एवं वयासी — कहणं पुत्ता ! तुब्भे कण्हेणं वासुदेवेणं निव्विसया आणत्ता ? तए णं ते पंचपंडवा पंडुं रायं एवं वयासी — एवं खलु ताओ ! अम्हे अवरकंकाओ पडिनियत्ता लवणसमुदं दोन्नि जोयण-सयसहस्साइं वीईवइत्था । तए णं से कण्हे वासुदेवे अम्हे एवं वयइ — गच्छह णं तुब्भे देवाणुप्पिया ! गंगं महानइं उत्तरह जाव ताव अहं एवं तहेव जाव चिट्ठामो । तए णं से कण्हे वासुदेवे सुट्ठियं लवणाहिवइं दट्ठूण तं चेव सव्वं नवरं कण्हस्स चिंता न भुज्झइ जाव निव्विसए आणवेइ । तए णं से पंडूराया ते पंचपंडवे एवं वयासी — दुट्ठु णं तुमं पुत्ता ! कयं कण्हस्स वासुदेवस्स विप्पियं करेमाणेहिं । तए णं से पंडूराया कौंतिं देविं सहावेइ २ एवं वयासी — गच्छह णं तुमं देवाणुप्पिया ! बारवइं कण्हस्स वासुदेवस्स निवेएहि — एवं खलु देवाणुप्पिया ! तुमे पंचपंडवा निव्विसया आणत्ता । तुमं च णं देवाणुप्पिया ! दाहिणड्ढभरहस्स सामी । तं संदिसंतु णं देवाणुप्पिया ! ते पंचपंडवा कयरं देसं वा दिसिं वा गच्छंतु ? तए णं सा कौंती पंडुणा एवं वुत्ता समाणी हत्थिखंधं दुरूहइ जहा हेडा जाव संदिसंतु णं पिउच्छा ! किमागमणपओयणं । तए णं सा कौंती कण्हं वासुदेवं एवं वयासी — एवं खलु तुमे पुत्ता ! पंचपंडवा निव्विसया आणत्ता तुमं च णं दाहिणड्ढभरहस्स जाव दिसं वा गच्छंतु । तए णं से कण्हे वासुदेवे कौंतिं देविं एवं वयासी — अपूयवयणा णं पिउच्छा ! उत्तमपुरिसा वासुदेवा बलदेवा चक्खवट्ठी । तं गच्छंतु णं पंचपंडवा दाहिणिल्लवेयालिं तत्थ पंडुमहुरं निवेसंतु मम अदिट्ठसेवगा भवंतु त्तिकट्ठु कौंतिं देविं

सक्कारेइ सम्माणेइ जाव पडिविसज्जेइ । तए णं सा कोंती जाव पंडुस्स एयमट्ठं निवेएइ । तए णं पंडू राया पंच पंडवे सद्दावेइ २ एवं वयासी — गच्छह णं तुब्भे पुत्ता ! दाहिणिहं वेयालिं । तत्थ णं तुब्भे पंडुमहुरं निवेसेह । तए णं ते पंचपंडवा पंडुस्स रत्तो जाव तहत्ति पडिसुणेंति २ सबलवाहणा हयगया हत्थिणाउराओ पडिनिक्खमंति २ जेणेव दक्खिणिह्ले वेयाली तेणेव उवागच्छंति २ पंडुमहुरं नाम नगरं निवेसंति । तत्थावि णं ते विपुलभोगसमिइसमन्नागया यावि होत्था ।

(133) तए णं सा दोवई देवी अन्नया कयाइ आवन्नसत्ता जायावि होत्था । तए णं सा दोवई देवी नवण्हं मासाणं जाव सुरूवं दारगं पयाया सूमालं निव्वत्तबारसाहस्स इमं एयारूवं — जम्हा णं अम्हं एस दारए पंचण्हं पंडवाणं पुत्ते दोवईए देवीए अत्तए तं होऊ णं इमस्स दारगस्स नामधेज्जं पंडुसेणे त्ति । तए णं तस्स दारगस्स अम्मा-पियरो नामधेज्जं करेंति पंडुसेणत्ति । बावत्तरिं कलाओ जाव अलंभोग-समत्थे जाए जुवराया जाव विहरइ । थेरा समोसढा परिसा निग्गया । पंडवा निग्गया धम्मं सोच्चा एवं वयासी — जं नवरं देवाणुप्पिया ! दोवइं देविं आपुच्छामो पंडुसेणं च कुमारं रज्जे ठावेमो तओ पच्छा देवाणु-प्पियाणं अंतिए मुंडे भवित्ता जाव पव्वयामो । अहासुहं देवाणुप्पिया ! तए णं ते पंचपंडवा जेणेव सए गिहे तेणेव उवागच्छंति २ दोवइं देविं सद्दावेंति २ एवं वयासी — एवं खलु देवाणुप्पिए ! अम्हेहिं थेराणं अंतिए धम्मे निसंते जाव पव्वयामो । तुमं णं देवाणुप्पिए । किं करोसि ? तए णं सा दोवई ते पंचपंडवे एवं वयासी — जइ णं तुब्भे देवाणुप्पिया ! संसारभउव्विग्गा जाव पव्वयह मम के अन्ने आलंवे वा जाव भविस्सइ ? अहं पि य णं संसारभउव्विग्गा देवाणुप्पिएहिं सद्धिं पव्वइस्सामि । तए णं ते पंचपंडवा पंडुसेणस्स अभिसेओ जाव राया जाए जाव रज्जं पसाहेमाणे विहरइ । तए णं ते पंचपंडवा दोवई य देवी अन्नया कयाइ पंडुसेणं रायाणं आपुच्छंति । तए णं से पंडुसेणे राया कोडुंबियपुरिसे सद्दावेइ २ एवं वयासी — खिप्पामेव भो ! देवाणुप्पिया ! निक्खमणा-

भिसेयं जाव उवट्टवेह पुरिससहस्सवाहिणीओ सिबियाओ उवट्टवेह जाव पच्चोरुहंति जेणेव थेरा भगवंतो तेणेव उवागच्छंति जाव आलित्ते णं जाव समणा जाया चोइस्स पुव्वाइं अहिज्जंति २ बहूणि वासाणि छट्ठमदसमदुवालसेहिं मासद्धमासखमणेहिं अप्पाणं भावेमाणा विहरंति ।

(134) तए णं सा दोवई देवी सीयाओ पच्चोरुहइ जाव पठवइया सुव्वयाए अज्जाए सिस्सिणियत्ताए दलयइ एक्कारस अंगाइं अहिज्जइ बहूणि वासाणि छट्ठमदसमदुवालसेहिं जाव विहरइ ।

(135) तए णं थेरा भगवंतो अन्नया कयाइ पंडुमहुराओ नयरीओ सहसंबवणाओ उज्जाणाओ पडिनिक्खमंति २ बहिया जणवयविहारं विहरंति । तेणं कालेणं २ अरहा अरिट्ठनेमी जेणेव सुरट्ठाजणवए तेणेव उवागच्छइ २ सुरट्ठाजणवयंसि संजमेणं तवसा अप्पाणं भावेमाणे विहरइ । तए णं बहुजणो अन्नमन्नस्स एवमाइक्खइ ४ — एवं खलु देवाणुप्पिया ! अरहा अरिट्ठनेमी सुरट्ठाजणवए जाव विहरइ । तए णं ते जुहिट्ठिल्लपामोक्खा पंच अणगारा बहुजणस्स अंतिए एयमट्ठं सोच्चा अन्नमन्नं सदावेति २ एवं वयासी — एवं खलु देवाणुप्पिया ! अरहा अरिट्ठनेमी पुव्वाणुपुव्वि जाव विहरइ । तं सेयं खलु अन्हं थेरा आपुच्छित्ता अरहं अरिट्ठनेमिं वंदणं गमित्तए अन्नमन्नस्स एयमट्ठं पडिसुणेंति २ जेणेव थेरा भगवंतो तेणेव उवागच्छंति २ थेरे भगवंते वंदंति नमंसंति २ एवं वयासी — इच्छामो णं तुब्भेहिं अब्भणुन्नाया समाणा अरहं अरिट्ठनेमिं जाव गमित्तए । अहासुहं देवाणुप्पिया ! तए णं ते जुहिट्ठिल्लपामोक्खा पंच अणगारा थेरेहिं अब्भणुन्नाया समाणा थेरे भगवंते वंदंति नमंसंति २ थेराणं अंतियाओ पडिनिक्खमंति मासंमासेणं अणिक्खित्तेणं तवोक्कमेणं गामाणुगामं दूइज्जमाणा जाव जेणेव हत्थकप्पे तेणेव उवागच्छंति हत्थकप्पस्स बहिया सहसंबवणे उज्जाणे जाव विहरंति । तए णं ते जुहिट्ठिल्लवज्जा चत्तारि अणगारा मासक्खमणपारणए पढमाए पोरिसीए सज्झायं करेंति बीयाए एवं जहा गोयमसामी नवरं जुहिट्ठिल्लं आपुच्छंति जाव अडमाणा बहुजणसहं निसामेंति । एवं खलु देवाणुप्पिया ! अरहा

अरिट्ठनेमी उज्जंतसेलसिहरे मासिएणं भत्तेणं अपाणएणं पंचहिं छत्तीसेहिं अणगारसएहिं सद्धिं कालगए जाव पहीणे । तए णं ते जुहिट्टिल्लवज्जा चत्तारि अणगारा बहुजणस्स अंतिए सोच्चा हत्थकप्पाओ पडि-
निक्खमंति २ जेणेव सहसंबवणे उज्जाणे जेणेव जुहिट्टिल्ले अणगारे तेणेव उवागच्छंति २ भत्तपाणं पच्चक्खंति २ गमणागमणस्स पडिक्कमंति २ एसणमणेसणं आलोएंति २ भत्तपाणं पडिदंसंति २ एवं वयासी — एवं खलु देवानुप्पिया जाव कालगए । तं सेयं खलु अम्हं देवानुप्पिया ! इमं पुव्वंगहिंयं भत्तपाणं परिट्टवेत्ता सेत्तुं पव्वयं सणियं २ दुरुहत्तए संलेहणाइसणाइसियाणं कालं अणवेक्खमाणाणं विहरित्तए त्तिट्ठु अन्नमन्नस्स एयमट्ठं पडिसुणेंति २ तं पुव्वगहिंयं भत्तपाणं एगंते परि-
ट्टवेंति २ जेणेव सेत्तुं पव्वए तेणेव उवागच्छंति २ सेत्तुं पव्वयं सणियं २ दुरुहंति जाव कालं अणवेक्खमाणा विहरंति । तए णं ते जुहिट्टिल्लपामोक्खा पंच अणगारा सामाइयमाइयाइं चोइसपुव्वाइं अहिज्जंति बहूणि वासाणि दोमासियाए संलेहणाए अत्ताणं शोसेत्ता जस्सट्ठाए कीरइ नग्गभावे जाव तमट्ठमाराहेंति २ अणंते जाव केवलवरत्ताणदंसणे समुप्पन्ने जाव सिद्धा ।

(136) तए णं सा दोवई अज्जा सुव्वयाणं अज्जियाणं अंतिए सामाइयमाइयाइं एक्कारस अंगाइं अहिज्जइ २ बहूणि वासाणि मासियाए संलेहणाए आलोइयपडिक्कंता कालमासे कालं किच्चा बंभलोए उववन्ना । तत्थ णं अत्थेगइयाणं देवाणं दस सागरोवमाइं ठिई पन्नत्ता । तत्थ णं दुवयस्स वि देवस्स दससागरोवमाइं ठिई पन्नत्ता । से णं भंते ! दुवए देवे ताओ जाव महाविदेहे वासे जाव अंतं काहिइ ।

एवं खलु जंबू ! समणेणं भगवया महावीरेणं जाव संपत्तेणं सोलसमस्स नायज्झयणस्स अयमट्ठे पन्नत्ते त्तिबेमि ।

॥ सत्तरसमं अज्झयणं ॥

(137) जइ णं भंते ! समणेणं० सोलसमस्स नायज्झयणस्स अय-
मट्ठे पन्नत्ते सत्तरसमस्स नायज्झयणस्स के अट्ठे पन्नत्ते ? एवं खलु जंबू !
तेणं कालेणं २ हत्थिसीसे नामं नयरे होत्था वण्णओ । तत्थ णं कणगकेऊ
नामं राया होत्था वण्णओ । तत्थ णं हत्थिसीसे नयरे बहवे संजुत्ताना-
वावाणियगा परिवसंति अड्ढा जाव बहुजणस्स अपरिभूया यावि होत्था !
तए णं तेसिं संजुत्तानावावाणियगाणं अन्नया कयाइ एगयओ जहा अरह-
न्नए जाव लवणसमुदं अणेगाइं जोयणसयाइं ओगाढा यावि होत्था । तए
णं तेसिं जाव बहूणि उप्पायसयाइं जहा माकंदियदारगाणं जाव कालियवाए
य तत्थ संमुच्छिंए । तए णं सा नावा तेणं कालियवाएणं आर्घुणिज्ज-
माणी २ संचालिज्जमाणी २ संखोहिज्जमाणी २ तत्थेव परिभमइ । तए
णं से निज्जामए नट्टमईए नट्टसुईए नट्टसन्ने मूढदिसाभाए जाए यावि
होत्था न जाणइ कयरं दिसं वा विदिसं वा पोयवहणे अवहिए त्तिकट्ठु
ओहयमणसंकप्पे जाव झियायइ । तए णं ते बहवे कुच्छिधारा य कण्ण-
धारा य गब्भेह्लगा य संजुत्तानावावाणियगा य जेणेव से निज्जामए
तेणेव उवागच्छंति २ एवं वयासी—किन्नं तुमं देवाणुप्पिया ! ओहय
मणसंकप्पे झियायसि ? तए णं से निज्जामए ते बहवे कुच्छिधारा य ४
एवं वयासी—एवं खलु अहं देवाणुप्पिया ! नट्टमईए जाव अवहिए-
त्तिकट्ठु तओ ओहयमणसंकप्पे । तए णं ते कण्णधारा य ४ तस्स
निज्जामयस्संतिए एयमट्ठं सोच्चा निसम्म भीया ४ ण्हाया कयबलिकम्मा
करयल जाव बहूणं इंदान य खंधाण य जहा मल्लिनाए जाव उवायमाणा २
चिट्ठंति । तए णं से निज्जामए तओ मुहुत्तंतरस्स लट्ठमईए ३ अमूढ-
दिसाभाए जाए यावि होत्था । तए णं से निज्जामए ते बहवे कुच्छि-
धारा य ४ एवं वयासी—एवं खलु अहं देवाणुप्पिया ! लट्ठमईए जाव
अमूढदिसाभाए जाए । अम्हे णं देवाणुप्पिया ! कालियदीवंतेणं संछूढा ।
एस णं कालियदीवे आलोक्कइ । तए णं ते कुच्छिधारा य ४ तस्स
निज्जामगस्स अंतिए एयमट्ठं सोच्चा हट्ठतुट्ठा पयक्खिण्णानुकूलेणं वाएणं

जेणेव कालियदीवे तेणेव उवागच्छंति २ पोयवहणं लंवेति २ एगट्टियाहिं कालियदीवं उत्तरंति । तत्थ णं बहवे हिरण्णागरे य सुवण्णागरे य रयणागरे य वड्डरागरे य बहवे तत्थ आसे पासंति किं ते ? हरिरेणुसोणिसुत्तग आइण्णवेढो । तए णं ते आसाओ वाणियए पासंति तेसिं गंधं आघायंति भीया तत्था उव्विग्गा उव्विग्गमणा तओ अणेगाइं जोयणाइं उब्भमंति । ते' णं तत्थ पउरगोयरा पउरतणपाणिया निब्भया निरुव्विग्गा सुहंसुहेणं विहरंति । तए णं ते संजुत्तानावावाणियगा अन्नमन्नं एवं वयासी - किन्नं अम्हं देवाणुप्पिया ! आसेहिं ? इमे णं बहवे हिरण्णागरा य सुवण्णागरा य रयणागरा य वयरागरा य । तं सेयं खलु अम्हं हिरण्णस्स य सुवण्णस्स य रयणस्स य वयरस्स य पोयवहणं भरित्तए त्तिकट्ठु अन्नमन्नस्स एयमट्ठं पडिसुणेंति २ हिरण्णस्स य सुवण्णस्स य रयणस्स य वयरस्स य तणस्स य कट्ठस्स य अन्नस्स य पाणियस्स य पोयवहणं भरेंति २ दक्खिणाणुकूलेणं वाएणं जेणेव गंभीरपोयपट्टणे तेणेव उवागच्छंति २ पोयवहणं लंवेति २ सगडीसागडं सज्जेति २ तं हिरण्णं जाव बइरं च एगट्टियाहिं पोयवहणाओ संचारेंति २ सगडीसागडं संजोएति जेणेव हत्थिसीसे नयरे तेणेव उवागच्छंति २ हत्थिसीसयस्स नयरस्स बहिया अगुज्जाणे सत्थनिवेसं करेंति २ सगडीसागडं मोएति २ महत्थं जाव पाहुडं गेण्हंति २ हत्थिसीसं च नयरं अणुप्पविसंति २ जेणेव से कणगकेऊ तेणेव उवागच्छंति २ जाव उव्वणेंति । तए णं से कणगकेऊ तेसिं संजुत्तावाणियगाणं तं महत्थं जाव पडिच्छइ २ ते संजुत्तावाणियगा एवं वयासी - तुब्भे णं देवाणुप्पिया ! गामागर जाव आहिंडह लवणसमुहं च अभिक्खणं २ पोयवहणेणं ओगाहेह । तं अत्थियाइ त्थं केइ मे' कहिंचि' अच्छेरए दिट्ठपुंवे ? तए णं ते संजुत्तावाणियगा कणगकेऊ एवं वयासी - एवं खलु अम्हे देवाणुप्पिया ! इहेव हत्थिसीसे नयरे परिवसामो तं चेव जाव कालियंदीवंतेणं संछ्छंढा । तत्थ णं बहवे हिरण्णागरा य जाव बहवे तत्थ आसे । किं ते ? हरिरेणु जाव अणेगाइं जोयणाइं उब्भमंति । तए णं सामी ! अम्हेहिं कालियदीवे

ते आसा अच्छेरए दिट्ठपुब्बे । तए णं से कणगकेऊ तेसिं संजुत्ताणं
अंतिए पयमट्ठं सोच्चा ते संजुत्तए एवं वयासी - गच्छह णं तुब्भे
देवाणुप्पिया ! मम कोडुंबियपुरिसेहिं साद्धिं कालियदीवाओ ते आसे
आणेह । तए णं ते संजुत्तावाणियगा कणगकेऊ एवं वयासी - एवं सामि त्ति
आणाए विणएणं वयणं पडिसुणेंति । तए णं से कणगकेऊ कोडुंबियपुरिसे
सदावेइ २ एवं वयासी - गच्छह णं तुब्भे देवाणुप्पिया ! संजुत्तएहिं
नावावाणियएहिं साद्धिं कालियदीवाओ मम आसे आणेह । तेवि
पडिसुणेंति । तए णं ते कोडुंबिया सगडीसागडं सज्जेति २ तत्थ णं बहूणं
वीणाण य वल्लकीण य भामरीण य कच्छभीण य भंभाण य छब्भामरीण य
विचित्तवीणाण य अन्नेसिं च बहूणं सोयंदियपाउग्गाणं दव्वाणं सगडी-
सागडं भरेति २ बहूणं किण्हाण य जाव सुक्खिलाण य कट्ठकम्माण य ४
गंधिमाण य ४ जाव संधाइमाण य अन्नेसिं च बहूणं चक्खिंदियपाउग्गाणं
दव्वाणं सगडीसागडं भरेति २ बहूणं कोट्ठपुडाण य केयइपुडाण य जाव
अन्नेसिं च बहूणं घाणिंदियपाउग्गाणं दव्वाणं सगडीसागडं भरेति २ बहुस्स
खंडस्स य गुलस्स य सक्कराए य मच्छंडियाए य पुप्फुत्तरपउमुत्तर०
अन्नेसिं च जिब्भिंदियपाउग्गाणं दव्वाणं सगडीसागडं भरेति २ अन्नेसिं
च बहूणं कोयवाण य कंबलाण य पावाराण य नवतयाण य मलयाण य
मसूराण य सिलावट्टाण य जाव हंसगब्भाण य अन्नेसिं च फासिंदिय-
पाउग्गाणं दव्वाणं सगडीसागडं भरेति २ सगडीसागडं जोयंति २ जेणेव
गंभीरए पोयट्ठाणे तेणेव उवागच्छंति सगडीसागडं मोयंति २ पोयवहणं
सज्जेति २ तेसिं उक्किट्ठाणं सद्धफरिसरसरूवगंधाणं कट्ठस्स य तणस्स य
पाणियस्स य तंदुलाण य समियस्स य गोरसस्स य जाव अन्नेसिं च बहूणं
पोयवहणपाउग्गाणं पोयवहणं भरेति २ दक्खिणाणुकूलेणं वाएणं जेणेव
कालियदीवे तेणेव उवागच्छंति २ पोयवहणं लंबेंति २ ताइं उक्किट्ठाइं
सद्धफरिसरसरूवगंधाइं एगट्ठियाहिं कालियदीवं उत्तारेंति २ जहिं जहिं
च णं ते आसा आसयंति वा सयंति वा चिट्ठंति वा तुयंटंति वा तहिं तहिं
च णं ते कोडुंबियपुरिसा ताओ वीणाओ य जाव चित्तवीणाओ य

अन्नाणि बहूणि सोयंदियपाउग्गाणि य दव्वाणि समुदीरेमाणा ठवेंति तेसिं च परिपेरंतेणं पासे ठवेंति निच्चला निप्फंदा तुसिणीया चिट्ठंति । जत्थ जत्थ ते आसा आसयंति वा जाव तुयट्ठंति वा तत्थ तत्थ णं ते कोडुंबिया बहूणि किण्हाणि य कट्टकम्माणि य जाव संघाइमाणि य अन्नाणि य बहूणि चक्खिंदियपाउग्गाणि य दव्वाणि ठवेंति तेसिं परिपेरंतेणं पासए ठवेंति २ निच्चला निप्फंदा तुसिणीया चिट्ठंति । जत्थ जत्थ ते आसा आसयंति तत्थ तत्थ ते णं तेसिं बहूणं कोट्टपुड्डाणं य अन्नोसिं च घाणिंदियपाउग्गाणं दव्वाणं पुंजे य नियरे य करेंति २ तेसिं परिपेरंते तत्थ तत्थ चिट्ठंति । जत्थ जत्थ णं ते आसा आसयंति ४ तत्थ तत्थ गुलस्स जाव अन्नोसिं च बहूणं जिब्भिंदियपाउग्गाणं दव्वाणं पुंजे य नियरे य करेंति २ वियरए खणंति २ गुलपाणगस्स खंडपाणगस्स पौरपाणगस्स अन्नोसिं च बहूणं पाणगाणं वियरए भरेंति २ तेसिं परिपेरंतेणं पासए ठवेंति जाव चिट्ठंति । जहिं जहिं च णं ते आसा तहिं तहिं च ते बहवे कोयवया जाव सिलावट्ठया अन्नाणि य फासिंदियपाउग्गाइं अत्थुयपच्चत्थुयाइं ठवेंति २ तेसिं परिपेरंतेणं जाव चिट्ठंति । तए णं ते आसा जेणेव ते उक्किट्ठा सहफरिसरसरूवगंधा तेणेव उवागच्छंति । तत्थ णं अत्थेगइया आसा अपुव्वा णं इमे सहफरिसरसरूवगंधा तिकट्ठु तेसु उक्किट्ठेसु सहफरिसरसरूवगंधेसु अमुच्छिया ४ तेसिं उक्किट्ठाणं सह जाव गंधाणं दूरंदूरेणं अवक्कमंति २ ते णं तत्थ पउरगोय्यरा पउरतणपाणिया निब्भया निरुव्विग्गा सुहंसुहेणं विहरंति । एवामेव समणाउसो ! जो अम्हं निगंगथो वा निगंगथी वा सहफरिस जाव नो सज्जइ से णं इहलोए चेव बहूणं समणाणं ४ अच्चाणिज्जे जाव वीईवइस्सइ ।

(188) तत्थ णं अत्थेगइया आसा जेणेव उक्किट्ठा सहफरिसरसरूवगंधा तेणेव उवागच्छंति २ तेसु उक्किट्ठेसु सहेसु ५ मुच्छिया जाव अज्झोववन्ना आसेविउं पयत्ता यावि होत्था । तए णं ते आसा ते उक्किट्ठे सहे ५ आसेवमाणा तेहिं बहूहिं कूडेहि य पासेहि य गलएसु य पाएसु य बज्झंति । तए णं ते कोडुंबिया ते आसे गिण्हंति २ एगट्ठियाहिं

पोयवहणे संचारेंति २ तणस्स य कट्ठस्स य जाव भरेंति । तए णं ते संजुत्ता दक्खिणाणुकूलेणं वाएणं जेणेव गंभीरए पोयपट्टणे तेणेव उवा-
गच्छंति २ पोयवहणं लंबेंति २ ते आसे उत्तारेंति २ जेणेव हत्थिसीसे नयरे जेणेव कणगकेऊ राया तेणेव उवागच्छंति २ करयल जाव वद्धा-
बेंति ते आसे उवणेंति । तए णं से कणगकेऊ तेसिं संजुत्तावाणियगाणं उस्सुक्कं वियरइ २ सक्कारेइ संमाणेइ २ पडिविसज्जेइ । तए णं से कणग-
केऊ कोडुंबियपुरिसे सदावेइ २ सक्कारेइ संमाणेइ २ पडिविसज्जेइ । तए णं से कणगकेऊ राया आसमइए सदावेइ २ एवं वयासी - तुब्भे णं देवाणुप्पिया ! मम आसे विणएह । तए णं ते आसमइगा तहत्ति पडिसुणेंति २ ते आसे बहूहिं मुहबंधेहि य कणबंधेहि य नासाबंधेहि य बालबंधेहि य खुरबंधेहि य कडगबंधेहि य खल्लिणबंधेहि य अहिल्लण-
बंधेहि य पडियाणेहि य अंकणाहि यं वित्तप्पहारेहि य लयप्पहारेहि य कसप्पहारेहि य छिवप्पहारेहि य विणयंति कणगकेउस्स रओ उवणेंति । तए णं से कणगकेऊ ते आसमइए सक्कारेइ २ पडिविसज्जेइ । तए णं ते आसा बहूहिं मुहबंधेहि य जाव छिर्वापहारेहि य बहूणि सारीरमाणसाइं दुक्खाइं पावेंति । एवामेव समणाउसो ! जो अम्हं निगंथो वा निगंथी वा पव्वइए समाणे इट्ठेसु सहफरिसरसरूवगंधेसु सज्जइ रज्जइ गिज्झइ मुज्झइ अज्झोववज्जइ से णं इहलोए चेव बहूणं समणाणं बहूणं समणीणं जाव सावियाणं हीलणिज्जे जाव अणुपरियट्ठइ ।

(गाहा):- कलरिभियमहुरतंतीतलतालवंसकउंइभिरामेसु । सहेसु रज्जमाणा रमंति सोइंदियवसट्ठा ॥१॥ सोइंदियदुइंतत्तणस्स अह एत्तिओ हवइ दोसो । दीविगरुयमसइंतो वहबंधं तित्तिरो पत्तो ॥२॥ थणजहण-
वयणकरचरणनयणगव्वियविलासियगएसु । रूवेसु रज्जमाणा रमंति चक्खिंदियवसट्ठा ॥३॥ चक्खिंदियदुइंतत्तणस्स अह एत्तिओ हवइ दोसो । जं जलणंमि जलंते पडइ पयंगो अबुद्धीओ ॥४॥ अगरुवर-
पवरधूवणउंउयमल्लाणुलेवणविहीसु । गंधेसु रज्जमाणा रमंति घाणिंदिय-
वसट्ठा ॥५॥ घाणिंदियदुइंतत्तणस्स अह एत्तिओ हवइ दोसो । जं ओसहि-

गंधेणं बिलाओ निद्धावई उरगो ॥६॥ तित्तकडुयं कसायं अंबिरं महुरं
 बहुखज्जपेज्जलेज्जेसु । आसायंमि उ गिद्धा रमंति जिब्भिदियवसट्ठा ॥७॥
 जिब्भिदियदुहंतत्तणस्स अह एत्तिओ हवइ दोसो । जं गललग्गुक्खित्तो
 फुरइ थलविरेल्लिओ मच्छो ॥८॥ उउभयमाणसुहेहिं^४ य सविभवहियय-
 मणनिव्वुइकरेहिं^५ । फासेसु रज्जमाणा रमंति फासिंदियवसट्ठा ॥९॥
 फासिंदियदुहंतत्तणस्स अह एत्तिओ हवइ दोसो । जं खणइ मत्थयं
 कुंजरस्स लोहंकुसो तिक्खो ॥१०॥ कलरिभियमहुरतंतीतलतालबंस-
 कउहाभिरामेसु । सहेसु जे न गिद्धा वसट्ठमरणं न ते मरण ॥११॥
 थणजहणवयणकरचरणनयणगव्वियविलासियगईसु । रूवेसु जे न रत्ता
 वसट्ठमरणं न ते मरण ॥१२॥ अगरुवरपवरधूवणउउयमल्लाणुलेवण-
 विहीसु । गंधेसु जे न गिद्धा वसट्ठमरणं न ते मरण ॥१३॥ तित्तकडुयं
 कसायं महुरंबहुखज्जपेज्जलेज्जेसु । आसायंमि न गिद्धा वसट्ठमरणं न
 ते मरण ॥१४॥ उउभयमाणसुहेसु य सविभवहिययमणनिव्वुइकरेसु ।
 फासेसु जे न गिद्धा वसट्ठमरणं न ते मरण ॥१५॥ सहेसु य भइय-
 पावएसु सोयविसयं उवागएसु । तुट्ठेण व रुट्ठेण व समणेण सया न
 होयव्वं ॥१६॥ रूवेसु य भइयपावएसु चक्खुविसयं उवगएसु । तुट्ठेण
 व रुट्ठेण व समणेण सया न होयव्वं ॥१७॥ गंधेसु य भइयपावएसु
 घाणविसयमुवगएसु । तुट्ठेण व रुट्ठेण व समणेण सया न होयव्वं ॥१८॥
 रसेसु य भइयपावएसु जिब्भिविसयमुवगएसु । तुट्ठेण व रुट्ठेण
 व समणेण सया न होयव्वं ॥१९॥ फासेसु य भइयपावएसु काय-
 विसयमुवगएसु । तुट्ठेण व रुट्ठेण व समणेण सया न होयव्वं ॥२०॥
 एवं खलु जंबू ! समणेणं भगवया महावीरेणं जाव संपत्तेणं
 सत्तरसमस्स नायज्झयणस्स अयमट्ठे पन्नत्ते त्तिवेमि ।

॥ अट्टारसमं अज्झयणं ॥

(139) जइ णं भंते ! समणेणं० सत्तरसमस्स अयमट्ठे पन्नत्ते अट्टारसमस्स के अट्ठे पन्नत्ते ? एवं खलु जंबू ! तेणं कालेणं २ राय-
गिहे नामं नयरे होत्था वण्णओ । तत्थ णं धणे नामं सत्थवाहे होत्था
भद्दा भारिया । तस्स णं धणस्स सत्थवाहस्स पुत्ता भद्दाए अत्तया पंच
सत्थवाहदारगा होत्था तंजहा — धणे धणपाले धणदेवे धणगोवे धण-
रक्खिए । तस्स णं धणस्स सत्थवाहस्स धूया भद्दाए अत्तया पंचण्हं पुत्ताणं
अणुमग्गाजाइया सुंसुमा नामं दारिया होत्था सूमालपाणिपाया । तस्स णं
धणस्स सत्थवाहस्स चिलाए नामं दासचेडे होत्था अहीणपंचिदियसरीरे
मंसोवचिए बालकीलावणकुसले यावि होत्था । तए णं से दासचेडे सुंसुमाए
दारियाए बालग्गाहे जाए यावि होत्था सुंसुमं दारियं कडीए गिण्हइ २
बहूहिं दारएहि य दारियाहि य डिंभएहि य डिंभियाहि य कुमारएहि य
कुमारियाहि य सार्द्धं अभिरममाणे २ विहरइ । तए णं से चिलाए
दासचेडे तेसिं बहूणं दारयाण य ६ अप्पेगइयाणं खुल्लए अवहरइ एवं वट्टए
आंडोलियाओ तिंदूसए पोत्तुल्लए सौंडोल्लए । अप्पेगइयाणं आभरणमल्ला-
लंकारं अवहरइ अप्पेगइए आउसइ एवं अवहसइ निच्छोडेइ निब्भच्छेइ
तज्जेइ अप्पेगइए तालेइ । तए णं ते बहूवे दारगा य ६ रोयमाणा य ५
साणं साणं अम्मापिऊणं निवेदंति । तए णं तेसिं बहूणं दारगाण य ६
अम्मापियरो जेणेव धणे सत्थवाहे तेणेव उवागच्छंति २ धणं २ बहूहिं
खिज्जणिथाहि य रुंटणाहि य उपालंभणाहि य खिज्जमाणा य रुंटमाणा य
उवालंभमाणा य धणस्स २ एयमट्ठं निवेदंति । तए णं से धणे २ चिलायं
दासचेडं एयमट्ठं भुज्जो भुज्जो निवारेइ नो चेव णं चिलाए दासचेडे उव-
रमइ । तए णं से चिलाए दासचेडे तेसिं बहूणं दारगाण य ६ अप्पे-
गइयाणं खुल्लए अवहरइ जाव तालेइ । तए णं ते बहूवे दारगा य ६ रोय-
माणा य जाव अम्मापिऊणं निवेदंति । तए णं ते आसुरुत्ता ५ जेणेव
धणे २ (तेणेव उवागच्छंति) २ बहूहिं खिज्जणाहि जाव एयमट्ठं निवेदंति ।
तए णं से धणे २ बहूणं दारगाणं ६ अम्मापिऊणं अंसिए एयमट्ठं सोच्चा

आसुरुत्ते चिलायं दासचेडं उच्चावयाहिं आउसणाहिं आउसइ उद्धंसइ
निब्भिळइ निच्छोडेइ तज्जेइ उच्चावयाहिं तालणाहिं तालेइ साओ गिहाओ
निच्छुभइ ।

(140) तए णं से चिलाए दासचेडे साओ गिहाओ निच्छूढे
समाणे रायगिहे नयरे सिंघाडग जाव पहेसु देवकुलेसु य सभासु य
पवासु य जूयखलएसु य वेसाघरएसु य पाणघरएसु य सुहंसुहेणं
परिवड्डइ । तए णं से चिलाए दासचेडे अणोहट्टिए अणिवारिए
सच्छंदमई सइरप्पयारी मज्जप्पसंगी चोज्जप्पसंगी जूयप्पसंगी
वेसप्पसंगी परदारप्पसंगी जाए यावि होत्था । तए णं रायगिहस्स
नयरस्स अदूरसामंते दाहिणपुरत्थिमे दिसीभाए सीहगुहा नामं चोर-
पल्ली होत्था विसमगिरिकडगकोलंबंसन्निविट्ठा बंसीकलंकपागारपरि-
क्खित्ता छिन्नसेलविसमप्पवीयफरिहोवगूढा एगदुवारा अणेगखंडी
विदितजणनिग्गमप्पवेसा अब्भितरपाणिया सुदुल्लभजलपेरंता सुबहुस्सवि
कूवियवलस्स आगयस्स दुप्पहंसा यावि होत्था । तत्थ णं सीहगुहाए
चोरपल्लीए विजए नामं चोरसेणावई परिवसइ अहम्मिए जाव अहम्म-
केऊ समुट्टिए बहुनगरनिग्गयजसे सूरु २ दढप्पहारी साहसिए सद्देवी ।
से णं तत्थ सीहगुहाए चोरपल्लीए पंचणं चोरसयाणं आहेवच्चं जाव
विहरइ । तए णं से विजए तक्करे सेण्णवई बहूणं चोराण य पारदारियाण
य गंठिभेयगाण य संधिच्छेयगाण य खत्तखणगाण य रायावगारीण
य अणधारगाण य बालघायगाण य वीसंभघायगाण य जूयकाराण
य खंडरक्खाण य अत्तेसिं च बहूणं छिन्नभिन्नबाहिराहयाणं कुंडगे यावि
होत्था । तए णं से विजए चोरसेणावई रायगिहस्स दाहिणपुरत्थिमं
जणवयं बहूहिं गामघाएहि य नगरघाएहि य गोगहणेहि य बंदिग्गहणेहि
य पंथकुट्टणेहि य खत्तखणणेहि य उवीलेमाणे २ विद्धंसमाणे २
नित्थीणं निद्धणं करमाणे विहरइ । तए णं से चिलाए दासचेडए राय-
गिहे बहूहिं अत्थाभिसंकीहि य चोज्जाभिसंकीहि य दाराभिसंकीहि य
धणएहि य जूयकरेहि य परब्भवंमाणे २ रायगिहाओ नगराओ

निग्गच्छइ २ जेणेव सीहगुहा चोरपल्ली तेमेव उवागच्छइ २ विजयं
 चोरसेणावई उवसंपज्जित्ताणं विहरइ । तए णं से चिलाए दासचेडे
 विजयस्स चोरसेणावइस्स अग्गे असिलट्टिग्गाहे जाए यावि होत्था ।
 जाहे बि य णं से विजए चोरसेणावई गामघायं वा जाव पंथकोट्ठिं वा
 काउं वच्चइ ताहे वि य णं से चिलाए दासचेडे सुवहुं^{पि} कूवियवलं हय-
 महिय जाव पडिसेहेइ २ पुणरवि लद्धट्ठे कयकज्जे अणहसमग्गे सीह-
 गुहं चोरपाल्लिं हव्वमागच्छइ । तए णं से विजए चोरसेणावई चिलायं
 तक्करं बहुओ चोरविज्जाओ य चोरमंते य चोरमायाओ य चोरन्निगडीओ
 य सिक्खावेइ । तए णं से विजए चोरसेणावई अन्नया कयाइ काल-
 धम्मणा संजुत्ते यावि होत्था । तए णं ताइं पंचचोरसयाइं विजयस्स
 चोरसेणावइस्स महया २ इड्डीसक्करसमुदएणं नीहरणं करेति २ बहुइं
 लोइयाइं मयकिच्चाइं करेति २ जाव विगयसोया जाया यावि होत्था । तए
 णं ताइं पंचचोरसयाइं अन्नमन्नं सदावेति २ एवं वयासी - एवं खलु
 अम्हं देवाणुप्पिया ! विजए चोरसेणावई कालधम्मणा संजुत्ते । अयं च
 णं चिलाए तक्करे विजएणं चोरसेणावइणा बहुओ चोरविज्जाओ य जाव
 सिक्खाविए । तं सेयं खलु अम्हं देवाणुप्पिया ! चिलायं तक्करं सीहगुहाए
 चोरपल्लीए चोरसेणावइत्ताए अभिसिंचित्तए त्तिकट्ठु अन्नमन्नस्स एयमट्ठं
 पडिसुणेंति २ चिलायं सीहगुहाए चोरपल्लीए चोरसेणावइत्ताए अभि-
 सिंचंति । तए णं से चिलाए चोरसेणावई जाए अहम्मिए जाव विहरइ ।
 तए णं से चिलाए चोरसेणावई चोरनायगे जाव कुडंगे यावि होत्था ।
 से णं तत्थं सीहगुहाए चोरपल्लीए पंचण्हं चोरसयाण य एवं जहा विजओ
 तेहेव सव्वं जाव रायगिहस्स नयरस्स दप्पिणपुरत्थिमिहं जणवयं जाव
 नित्थायं निद्धणं करेमाणे विहरइ ।

(141) तए णं से चिलाए चोरसेणावई अन्नया कयाइ विपुलं
 असणं ४ उव्वक्खवावेइ २ ते पंच चोरसए आमंतेइ तओ पच्छा ण्हाए
 कयवल्लिकम्मे भोयपमं^ववंसि तेहिं पंचहिं चोरसएहिं सद्धिं विपुलं
 असणं ४ सुरं च जाव पसन्नं च आस्साम्मापे ४ विहरइ जिमियमुत्तुत्तराए

ते पंच चोरसए विपुलेण धूवपुप्फगंधमल्लालंकारेण सक्कारेइ सम्माणेइ २ एवं वयासी - एवं खलु देवाणुप्पिया ! रायगिहे नयरे धणे नामं सत्थवाहे अड्डे० । तस्स णं धूया भद्दाए अत्तया पंचण्हं पुत्ताणं अणुमग्गजाइया सुंसुमा नामं दारिया होत्था अहीणा जाव सुरूवा । तं गच्छामो णं देवाणुप्पिया ! धणस्स सत्थवाहस्स गिहं विलुंपामो । तुब्भं विपुले धण-
कणग जाव सिलप्पवाले ममं सुंसुमा दारिया । तए णं ते पंच चोरसया चिलायस्स पडिसुणेंति । तए णं से चिलाए चोरसेणावई तेहिं पंचहिं चोरसएहिं सद्धिं अल्लचम्मं दुरूहइ २ पच्चौरण्हकालसमयांसि पंचहिं चोरसएहिं सद्धिं सन्नद्ध जाव गहियाउहपहरणा माइयगोमुहिफलएहिं निक्किट्ठाहिं असिलट्ठीहिं अंसंगएहिं तोणेहिं सज्जीवेहिं धणूहिं समुक्खित्तेहिं सरेहिं समुल्लीलियाहिं दीर्हाहिं ओसारियाहिं उरुघंटियाहिं छिप्प-
तूरेहिं वज्जमाणेहिं महया २ उक्किट्ठसीहनाय जाव समुइरवभूयं पिव करेमाणां सीहगुहाओ चोरपल्लीओ पडिनिक्खमंति २ जेणेव रायगिहे नयरे तेणेव उवागच्छंति २ रायगिहस्स अदूरसामंते एगं महं गंहणं अणुप्पविसंति २ दिवसं खवेमाणा चिट्ठंति । तए णं से चिलाए चोर-
सेणावई अद्धरत्तकालसमयांसि निसंतपडिनिसंतंसि पंचहिं चोरसएहिं सद्धिं माइयगोमुहिएहिं फलएहिं जाव मूइयाहिं उरुघंटियाहिं जेणेव रायगिहे नयरे पुरत्थिमिल्ले दुवारे तेणेव उवागच्छइ उदगबत्थि परामुसइ आयंते चोक्खे परमसुइभूए तालुग्गधाडणिविज्जं आवाहेइ २ रायगिहस्स दुवारकवाडे उदएणं अच्छोडेइ २ कवाडं विहाडेइ २ रायगिहं अणु-
प्पविसइ २ महया २ सदेणं उग्घोसेमाणे २ एवं वयासी - एवं खलु अहं देवाणुप्पिया ! चिलाए नामं चोरसेणावई पंचहिं चोरसएहिं सद्धिं सीह-
गुहाओ चोरपल्लीओ इहं हव्वमागए धणस्स सत्थवाहस्स गिहं घाउकामे । तं ^{१३}जे णं नवियाए माउयाए दुद्धं पाउकामे से णं निगच्छउ त्तिकट्ठु जेणेव धणस्स सत्थवाहस्स गिहे तेणेव उवागच्छइ २ धणस्स गिहं विहाडेइ । तए णं से धणे चिलाएणं चोरसेणावइणा पंचहिं चोरसएहिं सद्धिं गिहं घाड्जमाणं पासइ २ भीए तत्थे ४ पंचहिं पुत्तेहिं सद्धिं एगंतं अवक्कमइ ।

तए णं से चिलाए चोरसेणावई धणस्स सत्थवाहस्स गिहं घाएइ २ सुबहुं धणकणगं जाव सावएज्जं सुंसुमं च दारियं गेण्हइ २ रायगिहाओ पडिनिक्खमइ २ जेणेव सीहगुहा तेणेव पहारेत्थ गमणाए ।

(142) तए णं से धणे सत्थवाहे जेणेव सए गिहे तेणेव उवा-
गच्छइ २ सुबहुं धणकणगं सुंसुमं च दारियं अवहारियं जाणित्ता महत्थं ३
पाहुडं गहाय जेणेव नगरगुत्तिया तेणेव उवागच्छइ २ तं महत्थं पाहुडं
उवणेइ २ एवं वयासी — एवं खलु देवाणुप्पिया ! चिलाए चोरसेणावई
सीहगुहाओ चोरपल्लीओ इहं हव्वमागम्म पंचहिं चोरसएहिं सद्धिं मम
गिहं घाएत्ता सुबहुं धणकणगं सुंसुमं च दारियं गहाय जाव पडिगए ।
तं इच्छामि णं देवाणुप्पिया ! सुंसुमाए दारियाए कूवं गमित्तए । तुब्भं णं
देवाणुप्पिया ! से विपुले धणकणगे ममं सुंसुमा दारिया । तए णं ते नगर-
गुत्तिया धणस्स एयमट्ठं पडिसुणेंति २ सन्नद्ध जाव गहियाउहपहरणा महया
२ उक्किट्ठ जाव समुहरवभूयं पिव करेमाणा रायगिहाओ निग्गच्छंति २
जेणेव चिलाए चोरे तेणेव उवागच्छंति २ चिलाएणं चोरसेणावइणा सद्धिं
संपलग्गा यावि होत्था । तए णं ते नगरगुत्तिया चिलायं चोरसेणावइं
हयमहिय जाव पडिसेहेंति । तए णं ते पंचचोरसया नगरगुत्तिएहिं
हयमहिय जाव पडिसेहिया समाणा तं विपुलं धणकणगं विच्छड्डुमाणा
य विप्पकिरमाणा य सव्वओ समंता विप्पलाइत्था । तए णं ते नगर-
गुत्तिया तं विपुलं धणकणगं गेण्हंति २ जेणेव रायगिहे तेणेव उवा-
गच्छंति । तए णं से चिलाए तं चोरसेन्नं तेहिं नगरगुत्तिएहिं हयमहिय०
पवरभीए जाव तत्थे सुंसुमं दारियं गहाय एगं महं आगामियं दीहमद्धं
अडविं अणुप्पविट्ठे । तए णं धणे सत्थवाहे सुंसुमं दारियं चिलाएणं अडवी-
मुहं अवहीरमाणं पासित्ताणं पंचहिं पुत्तेहिं सद्धिं अप्पछट्ठे सन्नद्धवद्ध०
चिलायस्स पयमग्गाविहिं अणुगच्छमाणे अभिगज्जंते हक्कारेमाणे पुक्कारे-
माणे अभितज्जेमाणे अभितासेमाणे पिट्ठओ अणुगच्छइ । तए णं से
चिलाए तं धणं सत्थवाहं पंचहिं पुत्तेहिं सद्धिं अप्पछट्ठं सन्नद्धवद्धं
समणुगच्छमाणं पासइ २ अत्थामे ४ जाहे नो संचाएइ सुंसुमं दारियं

निव्वहित्तए ताहे संते तंते परितंते नीलुप्पलगवलं असिं परासुसइ २
 सुंसुमाए दारियाए उत्तमंगं छिंदइ २ तं गहाय तं आगामियं अडविं
 अणुप्पविट्ठे । तए णं से चिलाए तीसे अगामियाए अडवीए तण्हाए
 छुहाए अभिभूए समाणे पम्हट्टदिसामाए सीहगुहं चोरपळिं असंपत्ते
 अंतरा चेव कालगए । एवामेव समणाउसो ! जाव पन्वइए समाणे इमस्स
 ओरालियसरीस्स वंतासवस्स जाव विद्धंसणधम्मस्स वण्णहेउं वा जाव
 आहारं आहारेइ से णं इहलोए चेव बहूणं समणाणं ४ हीलणिज्जे जाव
 अणुपरियट्ठिस्सइ जहा व से चिलाए तक्करे । तए णं से धणे सत्थवाहे पंचहिं
 पुत्तेहिं अप्पछट्ठे चिलायं तीसे अगामियाए सव्वओ समंता परिधाडे-
 माणे २ संते तंते परितंते नो संचाएइ चिलायं चोरसेणावइं साहत्थि
 गिण्हित्तए । से णं तओ षडिनियत्तइ २ जेणेव सा सुंसुमा बालिया
 चिलाएणं जीवियाओ ववरोविया तेणेव उवागच्छइ २ सुंसुमं दारियं
 चिलाएणं जीवियाओ ववरोवियं पासइ २ पैरसुनियत्तेव्व चंपगपायवे० ।
 तए णं से धणे सत्थवाहे अप्पछट्ठे आसत्थे कूवमाणे कंदमाणे विलवमाणे
 महया २ सद्धेणं कुहुकुहुस्सं परुत्ते सुचिरकालं बाहप्पमोक्खं करेइ । तए
 णं से धणे सत्थवाहे पंचहिं पुत्तेहिं अप्पछट्ठे चिलायं तीसे आगामियाए
 सव्वओ समंता परिधाडेमाणे तण्हाए छुहाए य परंभंते समाणे तीसे
 आगामियाए अडवीए सव्वओ समंता उदगस्स भग्गणगवेसणं करेइ २ संते
 तंते परितंते निव्वण्णे समाणे तीसे आगामियाए उदगं अणासाएमाणे
 जेणेव सुंसुमा जीवियाओ ववरोविया तेणेव उवागच्छइ २ जेट्ठं पुत्तं
 धणे सहावेइ २ एवं वयासी — एवं खलु पुत्ता ! सुंसुमाए दारियाए
 अट्ठाए चिलायं तक्करं सव्वओ समंता परिधाडेमाणा तण्हाए छुहाए य
 अभिभूया समाणा इमीसे आगामियाए अडवीए उदगस्स भग्गणगवेसणं
 करेमाणा नो वेव णं उदगं आसादेमो । तए णं उदगं अणासाएमाणा
 नो संचाएमो रायगिहं संपावित्तए । तण्णं तुब्भे ममं देवाणुप्पिया !
 जीवियाओ ववरोवेह मम मंसं च सोणियं च आहारेह तेणं आहारेणं
 अवर्थंद्वा समाणा तओ पच्छा इमं आगामियं अडविं नित्थरिहिह

रायगिहं च सत्थवाहेह मित्तनाइ० अभिसमाणाच्छिहह अत्थस्स य धम्मस्स य पुण्णस्स य आभागी भविस्सह । तए णं से जेट्ठे पुत्ते धणेणं सत्थवाहेणं एवं वुत्ते समाणे धणं २ एवं वयासी-तुब्भे णं ताओ ! अम्हं पिआ गुरुजणयदेवयभूया ठाँवका पइट्ठवका संरक्खगा संगोवगा । तं कहण्णं अम्हे ताओ । तुब्भे जीवियाओ ववरोवेमो तुब्भं णं मंसं च सोणियं च आहारेमो ? तं तुब्भे णं ताओ ! ममं जीवियाओ ववरोवेह मंसं च सोणियं च आहारेह आगामियं अडविं नित्थरहह तं चेव सव्वं भणइ जाव अत्थस्स जाव आभागी भविस्सह । तए णं धणं सत्थवाहं दोब्बे पुत्ते एवं वयासी - मा णं ताओ ! अम्हे जेट्ठं भायरं गुरुदेवयं जीवियाओ ववरोवेमो । तुब्भे णं ताओ ! ममं जीवियाओ ववरोवेह जाव आभागी भविस्सह एवं जाव पंचमे पुत्ते । तए णं से धणे सत्थवाहे पंचपुत्ताणं हिय-इच्छियं जाणित्ता ते पंचपुत्ते एवं वयासी - मा णं अम्हे पुत्ता ! एगमवि जीवियाओ ववरोवेमो । एस णं सुंसुमाए दारियाए सरीरे निप्पाणे जाव जीवविप्पजडे । तं सेयं खलु पुत्ता ! अम्हं सुंसुमाए दारियाए मंसं च सोणियं च आहारेत्तए । तए णं अम्हे तेणं आहारेणं अवर्थद्धा समाणा रायगिहं संपाउणिस्सामो । तए णं ते पंचपुत्ता धणेणं सत्थवाहेणं एवं वुत्ता समाणा एयमट्ठं पडिसुणेंति । तए णं धणे सत्थवाहे पंचहिं पुत्तेहिं सद्धिं अराणि करेइ २ सरगं करेइ २ सरएणं अराणि महेइ २ अग्गि पाडेइ २ अग्गि संधुक्खेइ २ दारुयाइं पक्खिवइ २ अग्गि पज्जालेइ २ सुंसुमाए दारियाए मंसं च सोणियं च आहारेइ । तेणं आहारेणं अवर्थद्धा समाणा रायगिहं नयरं संपत्ता मित्तनाइनियग० अभिसमन्नागया तस्स य विउलस्स धणकणनरयण जाव आभागी जाया । तए णं से धणे सत्थवाहे सुंसुमाए दारियाए बहूइं लोइयाइं मयकिच्चाइं जाव विगयसोए जाए यावि होत्था ।

(143) तेणं कालेणं २ समणे भगवं महावीरे गुणसिलए चेइए समोसडे । तए णं धणे सत्थवाहे सपुत्ते धम्मं सोच्चा पन्वइए एक्कारसंगवी मासियाए संलेहणाए सोहम्मे उववन्ने महाविदेहे वासे सिञ्जिहिइ ।

जहा वि य णं जंबू ! धणेणं सत्थवाहेणं नो वण्णहेउं वा नो रूवहेउं वा
 नो बलहेउं वा नो विसयहेउं वा सुंसुमाए दारियाए मंससोणिए
 आहारिए नन्नत्थ एगाए रायगिहं सपांवणट्टयाए एवामेव समणाउसो !
 जो अम्हं निगंथो वा निगंथी वा इमस्स ओरालियसरीरस्स वंतासवस्स
 पित्तासवस्स सुक्कासवस्स सोणियासवस्स जाव अवस्सविप्पजहियव्वस्स नो
 वण्णहेउं वा नो रूवहेउं वा नो बलहेउं वा नो विसयहेउं वा आहारं
 आहारेइ नन्नत्थ एगाए सिद्धिगमणसंपावणट्टयाए से णं इहभवे चेव बहूणं
 समणाणं बहूणं समणीणं बहूणं सावयाणं बहूणं सावियाणं अच्चणिज्जे जाव
 वीईवइस्सइ ।

एवं खलु जंबू ! समणेणं भगवया महावीरेणं जाव संपत्तेणं
 अट्टारसमस्स अयमट्ठे पन्नत्ते त्ति बेमि ।

॥ अट्टारसमं नायज्झयणं समत्ते ॥१८॥

॥ एगूणवीसइमं अज्झयणं ॥

(144) जइ णं भंते । समणेणं ० अट्टारसमस्स नायज्झयणस्स अयमट्ठे पन्नत्ते एगूणवीसइमस्स के अट्ठे पन्नत्ते ? एवं खलु जंबू ! तेणं कालेणं २ इहेव जंबुहीवे २ पुव्वविदेहे^१ सीयाए महानईए उत्तरिल्ले कूले नीलवंतस्स दाहिणेणं उत्तरिल्लस्स सीयामुहवणसंडस्स पच्चत्थिमेणं एगसेलगस्स वक्खार-पव्वयस्स पुरत्थिमेणं एत्थ णं पुक्खलावई नामं विजए पन्नत्ते । तत्थ णं पुंडरिगिणी नामं रायहाणी पन्नत्ता नवजोयणवित्थिण्णा दुवालसजोयणा-यामा जाव पच्चक्खं देवलोगभूया पासाईया दरसणीया अभिरूवा पडिरूवा । तीसे णं पुंडरिगिणीए नयरीए उत्तरपुरत्थिमे दिसीभाए नल्लिणवणे नामं उज्जाणे होत्था । तत्थ णं पुंडरिगिणीए रायहाणीए महापउमे नामं राया होत्था । तस्स णं पउमावई नामं देवी होत्था । तस्स णं महापउमस्स रत्तो पुत्ता पउमावईए देवीए अत्तया दुवे कुमारा होत्था तं जहा — पुंडरीए य कंडरीए य सुकुमालपाणिपाया ० । पुंडरीए जुवराया । तेणं कालेणं २ थेरागमणं महापउमे राया निग्गए धम्मं सोच्चा पुंडरीयं रज्जे ठवेत्ता पव्वइए पुंडरीए राया जाए कंडरीए जुवराया । महापउमे अणगारे चोइसपुव्वाइं अहिज्जइ । तए णं थेरा बहिया जणवयविहारं विहरंति । तए णं से महापउमे बहूणि वासाणि जाव सिद्धे ।

(145) तए णं थेरा अन्नया कयाइ पुणरवि पुंडरिगिणीए राय-हाणीए नल्लिणवणे उज्जाणे समोसढा । पुंडरीए राया निग्गए । कंडरीए महाजणसइं सोच्चा जहा महाबलो जाव पज्जुवासइ । थेरा धम्मं परिकहेति पुंडरीए समणोवासए जाए जाव पडिगए । तए णं कंडरीए उट्ठाए उट्ठेइ २ जाव से जहेयं तुब्भे वयह जं नवरं पुंडरीयं रायं आपुच्छामि तए णं जाव पव्वयामि । अहासुहं देवाणुप्पिया ! तए णं से कंडरीए जाव थेरे वंदइ नमंसइ २ थेराणं अंतियाओ पडिनिक्खमइ २ तमेव चाउगघंटं आसरहं दुरुहइ जाव पच्चोरुहइ जेणेव पुंडरीए राया तेणेव उवागच्छइ करयल जाव पुंडरीयं रायं एवं बयासी — एवं खलु मए थेराणं अंतिए धम्मो निसंते से धम्मो अभिरुइए । तए णं जाव पव्वइत्तए । तए ण से

पुंडरीए कंडरीयं एवं वयासी — मा णं तुमं भाउत्ता ! इयाणि मुंडे जाव पव्वयाहि । अहं णं तुमं महारायाभिसेएणं अभिसिंचामि । तए णं से कंडरीए पुंडरीयस्स रत्तो एयमट्ठं नो आढाइ जाव तुसिणीए संचिट्ठइ । तए णं पुंडरीए राया कंडरीयं दोच्चंपि तच्चंपि एवं वयासी जाव तुसिणीए संचिट्ठइ । तए णं पुंडरीए कंडरीयं कुमारं जाहे नो संचाएइ बहुहिं आघवणाहि य पन्नवणाहि य ४ ताहे अकामए चेव एयमट्ठं अणु-मन्नित्था जाव निक्खमणाभिसेएणं अभिसिंचइ जाव थेराणं सीसभिक्षं दलयइ पव्वइए अणगारे जाए एक्कारसंगवी । तए णं थेरा भगवंतो अन्नया कयाइ पुंडरिगिणीओ नयरीओ नल्लिणिवणाओ उज्जाणाओ पडिनिक्खमंति २ बहिया जणवयविहारं विहरंति ।

(146) तए णं तस्स कंडरीयस्स अणगारस्स तेहिं अंतेहि य पंतेहि य जहा सेलगस्स जाव दाहवक्कंतीए यावि विहरइ । तए णं थेरा अन्नया कयाइ जेणेव पोंडरिगिणी तेणेव उवागच्छंति २ नल्लिणीवणे समोसढा । पुंडरीए निग्गए धम्मं सुणेइ । तए णं पुंडरीए राया धम्मं सोच्चा जेणेव कंडरीए अणगारे तेणेव उवागच्छइ २ कंडरीयं वंदइ नमंसइ २ कंडरीयस्स अणगास्स सरीरगं सव्वाबाहं सैरोगं पासइ २ जेणेव थेरा भगवंतो तेणेव उवागच्छइ २ थेरे भगवंते वंदइ नमंसइ २ एवं वयासी— अहण्णं भंते ! कंडरीयस्स अणगारस्स अहापवत्तेहिं ओसहभेसज्जेहिं जाव तिगिच्छं आउंटामि । तं तुम्भे णं भंते ! मम जाणसालासु समोसरह । तए णं थेरा भगवंतो पुंडरीयस्स पडिसुणेंति जाव उवसंपज्जित्ताणं विहरंति । तए णं पुंडरीए जहा मंडुए सेलगस्स ज्ञाव बलियसरीरे जाए । तए णं थेरा भगवंतो पुंडरीयं रायं आपुच्छंति २ बहिया जणवयविहारं विहरंति । तए णं से कंडरीए ताओ रोथायंकाओ बिप्पमुक्के सम्माणे तंसि मणुन्नंसि असणपाणस्साइमसाइमंसि मुच्छिए गिद्धे गटिए अण्णोवबन्ने नो संचाएइ पुंडरीयं आपुच्छित्ता बहिया अब्भुज्जएणं जाव विहरित्तए तत्थेव ओसन्ने जाए । तए णं से पुंडरीए इमीसे कहाए लद्धे सम्माणे ण्हाए अंतोउर-परियालसंपरिवुडे जेणेव कंडरीए अणगारे तेणेव उवागच्छइ २

कंडरीयं तिक्खुत्तो आयाहिणपयाहिणं करेइ २ वंदइ नमंसइ २ एवं वयासी — धन्नेसि णं तुमं देवाणुप्पिया ! कयत्थे कयपुण्णे कयलक्खणे । सुलद्धे णं देवाणुप्पिया ! तव माणुस्सए जम्मजीवियफले जे णं तुमं रज्जं च जाव अंतेउरं च विल्लहेत्ता विगोवैइत्ता जाव पव्वइए । अहण्णं अहन्ने अपुण्णे अकयपुण्णे रज्जे य जाव अंतेउरे य माणुस्सएसु य कामभोगेसु मुच्छिए जाव अज्झोववन्ने नो संचाएमि जाव पव्वइत्तए । तं धन्नेसि णं तुमं देवाणुप्पिया जाव जीवियफले । तए णं से कंडरीए अणगारे पुंडरीयस्स एयमट्ठं नो आढाइ जाव संचिट्ठइ । तए णं से कंडरीए पोंडरीएणं दोच्चं पि तच्चं पि एवं वुत्ते समाणे अकामए अवसवसे लज्जाए गारवेण य पुंडरीयं आपुच्छइ २ थेरेहिं सद्धिं बहिया जणवयविहारं विहरइ । तए णं से कंडरीए थेरेहिं सद्धिं कंचि कालं उगंगुगेणं विहरित्ता तओ पच्छा समणत्तणपरितंते समणत्तणनिव्विणे समणत्तणनिब्भच्छिए समणगुणमुक्कजोगी थेराणं अंतियाओ सणियं २ पच्चोसक्कइ २ जेणेव पुंडरिगिणी नयरी जेणेव पुंडरीयस्स भवणे तेणेव उवागच्छइ २ असोगवणियाए असोगवरपायवस्स अहे पुढविसिलापट्टगंसि निसीयइ २ ओह्यमणसंकप्पे जाव झियायमाणे संचिट्ठइ । तए णं तस्स पोंडरीयस्स अंबंधाई जेणेव असोगवणिया तेणेव उवागच्छइ २ कंडरीयं अणगारं असोगवरपायवस्स अहे पुढविसिलापट्टगंसि ओह्यमणसंकप्पं जाव झियायमाणं पासइ २ जेणेव पुंडरीए राया तेणेव उवागच्छइ २ पुंडरीयं रायं एवं वयासी — एवं खलु देवाणुप्पिया ! तव पियभाउए कंडरीए अणगारे असोगवणियाए असोगवरपायवस्स अहे पुढविसिलापट्टे ओह्यमणसंकप्पे जाव झियायइ । तए णं से पुंडरीए अम्मधाईए एयमट्ठं सोच्चा निसम्म तहेव संभंते समाणे उट्ठाए उट्ठेइ २ अंतेउरपरियालसंपरिवुडे जेणेव असोगवणिया जाव कंडरीयं तिक्खुत्तो एवं वयासी — धन्नेसि णं तुमं देवाणुप्पिया जाव पव्वइए । अहं णं अधन्ने ३ जाव अपव्वइत्तए । तं धन्नेसि णं तुमं देवाणुप्पिया जाव जीवियफले । तए णं कंडरीए पुंडरीएणं एवं वुत्ते समाणे तुसिणीए संचिट्ठइ दोच्चं पि तच्चं पि जाव

चिट्ठइ । तए णं पुंडरीए कंडरीयं एवं वयासी - अट्ठो भंते ! भोगेहिं ? हंता ! अट्ठो । तए णं से पुंडरीए राया कोडुंबियपुरिसे सदावेइ २ एवं वयासी - खिप्पामेव भो देवाणुप्पिया ! कंडरीयस्स महत्थं जाव रायाभिसेयं उवट्ठवेह जाव रायाभिसेएणं अभिसिंचइ ।

(147) तए णं से पुंडरीए सयमेव पंचमुट्ठियं लोयं करेइ सयमेव चाउज्जामं धम्मं पडिवज्जइ २ कंडरीयस्स संतियं आयारभंडगं गेण्हइ २ इमं एयारूवं अभिगगहं अभिगिण्हइ - कप्पइ मे थेरे वंदित्ता नमंसित्ता थेराणं अंतिए चाउज्जामं धम्मं उवसंपज्जित्ताणं तओ पच्छा आहारं आहारित्तिए त्तिकट्ठु इमं एयारूवं अभिगगहं अभिगिण्हित्ताणं पुंडरिगिणीओ पडिनिक्खमइ २ पुन्वाणुपुर्वि चरमाणे गामाणुगामं दूइज्जमाणे जेणेव थेरा भगवंतो तेणेव पहारेत्थ गमणाए ।

(148) तए णं तस्स कंडरीयस्स रत्तो तं पणीयं पाणभोयणं आहारियस्स समाणस्स अइजागरएण य अइभोयणप्पसंगेण य से आहारे नो सम्मं परिणए । तए णं तस्स कंडरीयस्स रत्तो तंसि आहारंसि अपरिणममाणंसि पुठ रत्तावरत्तकालसमयंसि सरीरगंसि वेयणा पाउब्भूया उज्जला विउला पगाढा जाव दुरहियासा पित्तज्जरपरिगयसरीरे दाहवक्कंतीए यावि बिहरइ । तए णं से कंडरीए राया रज्जे य रट्ठे य अंतैउरे य जाव अज्झोववन्ने अट्ठदुहट्ठवसट्ठे अकामए अवसवसे कालमासे कालं किञ्चा अहे सुत्तमाए पुढवीए उक्कोसकालट्ठिइयंसि नरयंसि नेरइयत्ताए उववन्ने । एवामेव समाणाउसो ! जाव पव्वइए समाणे पुणरवि माणुस्सए कामभोए आसाएइ जाव अणुपरियट्ठिस्सइ जहा व से कंडरीए राया ।

(149) तए णं से पुंडरीए अणगारे जेणेव थेरा भगवंतो तेणेव उवागच्छइ २ थेरे भगवंते वंदइ नमंसइ २ थेराणं अंतिए दोच्चपि चाउज्जामं धम्मं पडिवज्जइ छट्ठक्खमणपारणगंसि पढमाए पोरीसीए सज्झायं करेइ २ जाव अडमाणे सीयलुक्खं पाणभोयणं पडिगाहेइ २ अहापज्जत्तमित्तिकट्ठु पडिनियत्तेइ जेणेव थेरा भगवंतो तेणेव उवागच्छइ २ भत्तपाणं पडिदंसेइ २ थेरेहिं भगवंतेहिं अब्भणुन्नाए समाणे

अमुच्छिण्णं ४ बिलमिव पन्नगभूणं अप्पाणेणं तं फासुएसणिज्जं असणं ४
 सरीरकोट्टगंसि पक्खिवइ । तए णं तस्स पुंडरीयस्स अणगारस्स तं
 कालाइकंतं अरसं विरसं सीयलुक्खं पाणभोयणं आहारियस्स समाणस्स
 पुव्वरत्तावरत्तकालसमयंसि धम्मजागरियं जागरमाणस्स से आहारे नो
 सम्मं परिणमइ । तए णं तस्स पुंडरीयस्स अणगारस्स सरीरगंसि वेयणा
 पाउव्भूया उज्जला जाव दुरहियासा पित्तज्जरपरिगयसरीरे दाहवकंतीए
 विहरइ । तए णं से पुंडरीए अणगारे अत्थामे अबले अवीरिए
 अपुरिसक्कारपरक्कमे करयल जाव एवं वयासी - नमोत्थु णं अरहंताणं
 भगवंताणं जाव संपत्ताणं । नमोत्थु णं थेराणं भगवंताणं मम धम्मायरियाणं
 धम्मोवएसयाणं । पुठ्ठिंवि पि य णं मए थेराणं अंतिए सव्वे पाणाइवाए
 पक्खक्खाए जाव मिच्छादंसणसल्ले पक्खक्खाए जाव आलोइयपडिक्कंते
 कालमासे कालं किञ्चा सव्वद्वसिद्धे उववन्ने । तओ अणंतंरं उव्वट्ठिता
 महाविदेहे वासे सिज्झिहिइ जाव सव्वदुक्खाणमंतं काहिइ । एवामेव
 समणाउसो ! जाव पव्वइए समाणे माणुस्सएहिं कामभोगेहिं नो सज्जइ
 नो रज्जइ जाव नो विट्ठपडिघायमावज्जइ से णं इहभवे चेव बहूणं
 समणाणं बहूणं समणीणं बहूणं सावगाणं बहूणं सावियाणं अच्चणिज्जे
 वंदणिज्जे पूयणिज्जे सक्कारणिज्जे सम्माणणिज्जे कल्लाणं मंगलं देवयं चेइयं
 पज्जुवासणिज्जे त्तिकट्ठु परलोए वि य णं नो आगच्छइ बहूणि दंडणाणि
 य मुंडणाणि य तज्जणाणि य तालणाणि य जाव चाउरंतं संसारकंतारं
 जाव बीईवइस्सइ जहा व से पुंडरीए अणगारे । एवं खलु जंबू ! समणेणं
 आइगरेणं तित्थगरेणं सयंसंबुद्धेणं जाव सिद्धिगइनामधेज्जं ठाणं संपत्तेणं
 एगूणवीसइमस्स नायज्झयणस्स अयमट्ठे पन्नत्ते । एवं खलु जंबू !
 समणेणं भगवया महावीरेणं जाव सिद्धिगइनामधेज्जं ठाणं संपत्तेणं छट्ठस्स
 अंगस्स पढमस्स सुयक्खंधस्स अयमट्ठे पन्नत्ते त्ति बेमि !

(150) तस्स णं सुयक्खंधस्स एगूणवीसं अज्झयणाणि एगासरगाणि
 एगूणवीसाए दिवसेसु समप्पंति ।

॥ एगूणवीसइमं अज्झयणं समत्तं ॥

॥ नायाधम्मकहाणं पढमो सुयक्खंधो समत्तो ॥

॥ दोबे सुयक्खंधे ॥

॥ पढमं अज्झयण ॥

(151) तेणं कालेणं तेणं समएणं रायगिहे नामं नयरे होत्था वण्णओ । तस्स णं रायगिहस्स नयरस्स बहिया उत्तरपुरत्थिमे दिसीभाए तत्थ णं गुणसिलए नामं चेइए होत्था वण्णओ । तेणं कालेणं २ समणस्स भगवओ महावीरस्स अंतेवासी अज्जसुहम्ममा नामं थेरा भगवंतो जाइसंपन्ना कुलसंपन्ना जाव चोइसपुव्वी चउनाणोवगया पंचहिं अणगारसएहिं सद्धिं संपरिवुडा पुठ्ठाणुपुठ्ठि चरमाणा गामाणुगामं दूइज्जमाणा सुहंसुहेणं विहरमाणा जेणेव रायगिहे नयरे जेणेव गुणसिलए चेइए जाव संजमेणं तवसा अप्पाणं भावेमाणा विहरंति । परिसा निग्गया धम्मो कहिओ परिसा जामेव दिसिं पाउब्भूया तामेव दिसिं पडिगया । तेणं कालेणं २ अज्जसुहम्मस्स अंतेवासी अज्जजंबू नामं अणगारे जाव पज्जुवासमाणे एवं वयासी — जइ णं भंते ! समणेणं जाव संपत्तेणं छट्ठस्स अंगस्स पढमस्स सुयक्खंधस्स नायाणं अयमट्ठे पन्नत्ते दोब्बस्स णं भंते ! सुयक्खंधस्स धम्मकहाणं समणेणं० के अट्ठे पन्नत्ते ? एवं खलु जंबू ! समणेणं० धम्म-कहाणं दस वग्गा पन्नत्ता तंजहा :—चमरस्स अग्गमहिंसीणं पढमे वग्गे । बलिस्स वइरोयणिंदस्स वइरोयणरत्तो अग्गमहिंसीणं बीए वग्गे । असुरिंद-वज्जियाणं दाहिणिह्माणं इंदाणं अग्गमहिंसीणं तईए वग्गे । उत्तरिह्माणं असुरिंदवज्जियाणं भवणवासिइंदाणं अग्गमहिंसीणं चउत्थे वग्गे । दाहिणि-ह्माणं वाणमंतराणं इंदाणं अग्गमहिंसीणं पंचमे वग्गे । उत्तरिह्माणं वाण-मंतराणं इंदाणं अग्गमहिंसीणं छट्ठे वग्गे । चंदस्स अग्गमहिंसीणं सत्तमे वग्गे । सूरस्स अग्गमहिंसीणं अट्ठमे वग्गे । सक्कस्स अग्गमहिंसीणं नवमे वग्गे । ईसाणस्स य अग्गमहिंसीणं दसमे वग्गे । जइ णं भंते ! समणेणं० धम्मकहाणं दस वग्गा पन्नत्ता पढमस्स णं भंते ! वग्गस्स समणेणं० के अट्ठे पन्नत्ते ? एवं खलु जंबू ! समणेणं० पढमस्स वग्गस्स पंच अज्झयणा पन्नत्ता तंजहा — काली राई रयणी विज्जू मेहा । जइ णं भंते ! समणेणं० पढमस्स वग्गस्स पंच अज्झयणा पन्नत्ता पढमस्स णं

संते ! अञ्जणस्स समणेणं० के अट्टे पन्नत्ते ? एवं खलु जंबू ! तेणं कालेणं २ रायगिहे नयरे गुणसिलए चेइए सेणिए राया चेळ्ळणा देवी सामी समोसठे परिसा निग्गया जाव परिसा पज्जुवासइ । तेणं कालेणं २ काली देवी चमरचंचाए रायहाणीए कालवडेंसगभवणे कालंसि सीहा-सणंसि चउहिं समाणियसाहस्सीहिं चउहिं मयहरियाहिं सपरिवाराहिं तिहिं परिसाहिं सत्ताहिं अणिएहिं सत्ताहिं अणियाहिवईहिं सोलसाहिं आयरक्खदेवसाहस्सीहिं अन्नेहि य बहूहिं कालवडिंसयभवणवासीहिं असुरकुमारेहिं देवेहि देवीहिं य साद्धिं संपरिवुडा महयाहय जाव विहरइ इमं च णं केवलकप्पं जंबुदीवं २ विउलेणं ओहिणा आभोएमाणी २ पासइ एत्थ समणं भगवं महावीरं जंबुदीवे दीवे भारहे वासे रायगिहे नयरे गुणसिलए चेइए अहापडिरूवं उग्गहं ओगिण्हत्ता संजमेणं तवसा अप्पाणं भावेमाणं पासइ २ हट्टतुट्टचित्तमाणंदिया पीइमणा जाव हियया सीहासणाओ अब्भुट्टेइ २ पायपीढाओ पञ्चोरुहइ २ पाउया ओमुयइ २ तित्थगराभिमुही सत्तट्ठ पयाइं अणुगच्छइ २ वामं जाणुं अंचेइ २ दाहिणं जाणुं धराणियलंसि निहट्ठु तिक्खुत्तो मुद्धाणं धराणियलंसि निवेसेई ईसिं पच्चुन्नमइ २ कडगतुडियथंभियाओ भुयाओ साहरइ २ करयल जाव कट्ठु एवं वयासी — नमोत्थु णं अरहंताणं जाव संपत्ताणं । नमोत्थु णं समणस्स भगवओ महावीरस्स जाव संपाविउकामस्स । वंदामि णं भगवंतं तत्थगयं इहगया पासउ मे समणे ३ तत्थगए इहगयं तिकट्ठु वंदइ नमंसइ २ सीहासणवरंसि पुरत्थाभिमुहा निसण्णा । तए णं तीसे कालीए देवीए इमेयारूवे जाव समुप्पज्जित्था तंजहा — सेयं खलु मे समणं ३ वंदित्ता जाव पज्जुवासित्तए तिकट्ठु एवं संपेहेइ २ आभिओगिया देवा सदावेइ २ एवं वयासी — एवं खलु देवाणुप्पिया ! समणे ३ एवं जहा सरियाभो तहेव आणत्तियं देइ जाव दिव्वं सुरवराभिगमणजोग्गं करेह २ जाव पञ्चप्पिणह । तेवि तहेव करेत्ता जाव पञ्चप्पिणंति नवरं जोयणसहस्सवित्थिण्णं जाणं सेसं तहेव । तहेव नामगोयं साहेइ तहेव नट्टविहिं उवदंसेइ जाव पडिगया । भंते त्ति भगवं गोव्वमे समणं ३ वंदइ नमंसइ २ एवं वयासी — कालीए

णं भंते ! देवीए सा दिव्वा देविट्ठी ३ कहिं गया ? कूडागारसालादिट्ठंतो ।
 अहो णं भंते ! काली देवी महिड्डिया ३ । कालीए णं भंते ! देवीए सा
 दिव्वा देविट्ठी ३ किन्ना लद्धा किन्ना पत्ता किन्ना अभिसमन्नागया ?
 एवं जहा सूरियाभस्स जाव एवं खलु गोयसा ! तेणं कालेणं २ इहेव जंबु-
 हीवे २ भारहे वासे आमलकप्पा नामं नयरी होत्था वण्णओ । अंब-
 सालवणे चेइए । जियसत्तू राया । तत्थ णं आमलकप्पाए नयरीए काले
 नामं गाहावई होत्था अट्ठे जाव अपरिभूए । तस्स णं कालस्स गाहावइस्स
 कालसिरी नामं भारिया होत्था सुकुमाल जाव सुरूवा । तस्स णं कालस्स
 गाहावइस्स धूया कालसिरीए भारियाए अत्तया काली नामं दारिया होत्था
 वड्ढा वड्ढुकुमारी जुण्णा जुण्णकुमारी पडियपुयत्थणी निव्विण्णवरा वर-
 परिवज्जिया वि होत्था । तेणं कालेणं २ पासे अरहा पुरिसादाणीए आइगरे
 जहा वद्धमाणसामी नवरं नवहत्थुस्सेहे सोलसहिं समणसाहस्सीहिं अट्ठ-
 तीसाए अज्जियासाहस्सीहिं सट्ठिं संपरिवुडे जाव अंबसालवणे समोसढे ।
 परिसा निग्गया जाव पज्जुवासइ । तए णं सा काली दारिया इमीसे
 कहाए लद्धट्ठा समाणा हट्ठ जाव हियया जेणेव अम्मापियरो तेणेव उवा-
 गच्छइ २ करयल जाव एवं वयासी — एवं खलु अम्मयाओ ! पासे
 अरहा पुरिसादाणीए आइगरे जाव विहरइ । तं इच्छामि णं अम्मयाओ !
 तुब्भेहिं अब्भणुन्नाया समाणी पासस्स णं अरहओ पुरिसादाणीयस्स
 पायवंदियां गमित्तए । अहासुहं देवाणुप्पिया ! मा पडिबंधं करेहि । तए
 णं सा काली दारिया अम्मापिईहिं अब्भणुन्नाया समाणी हट्ठ जाव हियया
 ण्हाया कयवलिकम्मा कयकोउयमंगलपायच्छित्ता सुद्धप्पावेसाइं मंगलाइं
 वत्थाइं पवरपरिहिया अप्पमहग्घाभरणालंकियसरीरा चेडियाचक्कवालपरि-
 किण्णां साओ गिहाओ पडिनिक्खमइ २ जेणेव बाहिरिया उवट्ठाणसाला
 जेणेव धम्मिए जाणप्पवरे तेणेव उवागच्छइ २ धम्मियं जाणपवरं
 दुरुट्ठा । तए णं सा काली दारिया धम्मियं जाणप्पवरं एवं जहा दोवई
 तहा पज्जुवासइ । तए णं पासे अरहा पुरिसादाणीए कालीए दारियाए
 तीसे य महइमहालियाए परिसाए धम्मं कहेइ । तए णं सा काली दारिया

पासस्स अरहओ पुरिसादाणीयस्स अंतिए धम्मं सोच्चा निसम्म हट्ठ जाव हियया पासं अरहं पुरिसादाणीयं तिक्खुत्तो वंदइ नमंसइ २ एवं वयासी—
 सइहामि णं भंते ! निग्गंथं पावयणं जाव से जहेयं तुब्भे वयह जं नवरं देवाणुप्पिया ! अम्मापियरो आपुच्छामि तए णं अहं देवाणुप्पियाणं अंतिए जाव पव्वयामि । अहासुहं देवाणुप्पिए । तए णं सा काली दारिया पासेणं अरहया पुरिसादाणीएणं एवं तुत्ता समाणी हट्ठ जाव हियया पासं अरहं वंदइ नमंसइ २ तमेव धम्मियं जाणप्पवरं दुरुहइ २ पासस्स अरहओ पुरिसादाणीयस्स अंतियाओ अंबसालवणाओ चेइयाओ पडि-
 निक्खमइ २ जेणेव आमलकप्पा नयरी तेणेव उवागच्छइ २ आमलकप्पं नयरिं मज्झमज्झेणं जेणेव बाहिरिया उवट्ठाणसाला तेणेव उवागच्छइ २ धम्मियं जाणप्पवरं ठवेइ २ धम्मियाओ जाणप्पवराओ पच्चोरुहइ २ जेणेव अम्मापियरो तेणेव उवागच्छइ २ करयलपरिग्गाहियं जाव एवं वयासी — एवं खलु अम्मयाओ ! मए पासस्स अरहओ अंतिए धम्मे निसंते । से वि य धम्मे इच्छिए पडिच्छिए अभिरुइए । तए णं अहं अम्म-
 याओ ! संसारभज्जविग्गा भीया जम्मणंमरणणं इच्छामि णं तुब्भेहिं अब्भणुन्नाया समाणी पासस्स अरहओ अंतिए मुंडा भवित्ता आगाराओ अणगारियं पव्वइत्तए । अहासुहं देवाणुप्पिए ! मा पडिबंधं करेहि । तए णं से काले गाहावई विउलं असणं ४ उवक्खडावेइ २ मित्तनाइनियगसयणसंबंधिपरियणं आमंतेइ २ तओ पच्छा ण्हाए जाव विपुलेणं पुप्फवत्थगंधमल्लालंकारेणं सक्कारेइ सम्माणेइ २ तस्सेव मित्त-
 नाइनियगसयणसंबंधिपरियणस्स पुरओ कालियं दारियं सेयापीएहिं कलसेहिं ण्हावेइ २ सव्वालंकारविभूसियं करेइ २ पुरिससइस्सवाहिणिं सीयं दुरुहेइ २ मित्तनाइनियगसयणसंबंधिपरियणेणं साद्धिं संपरिवुडे सन्विट्ठीए जाव रवेणं आमलकप्पं नयरिं मज्झमज्झेणं निग्गच्छइ २ जेणेव अंबसालवणे चेइए तेणेव उवागच्छइ २ छैत्ताइए तित्थगराईए पासइ २ सीयं ठावेइ २ कालियं दारियं सीयाओ पच्चोरुहइ । तए णं तं कालियं रियं अम्मापियरो पुरओ कावं जेणेव पासे अरहा पुरिसादाणीए

तेणेव उवागच्छंति २ वंदंति नमंसंति २ एवं वयासी - एवं खलु देवाणुप्पिया ! काली दारिया अम्हं धूया इट्ठा कंता जाव किमंग पुण पासण्याए ? एस णं देवाणुप्पिया ! संसारभउन्निवग्गा इच्छइ देवाणुप्पियाणं अंतिए मुंडा भवित्ता जाव पव्वइत्तए । तं एयं णं देवाणुप्पियाणं सिस्सिणिभिक्ष्वं दलयामो । पडिच्छंतु णं देवाणुप्पिया ! सिस्सिणिभिक्ष्वं । अहासुहं देवाणुप्पिया ! मा पडिबंधं । तए णं सा काली कुमारी पासं अरहं वंदइ नमंसइ २ उत्तरपुरत्थिमं दिसीभागं अवक्कमइ २ सयमेव आभरणमल्लालंकारं ओमुयइ २ सयमेव लोयं करेइ २ जेणेव पासे अरहा पुरिसादाणीए तेणेव उवागच्छइ २ पासं अरहं तिक्खुत्तो वंदइ नमंसइ २ एवं वयासी - आलित्ते णं भंते ! लोए एवं जहा देवाणंदा जाव सयमेव पव्वावेडं । तए णं पासे अरहा पुरिसादाणीए कालियं सयमेव पुप्फचूलाए अज्जाए सिस्सिणियत्ताए दलयइ । तए णं सा पुप्फचूला अज्जा कालिं कुमारीं सयमेव पव्वावेइ जाव उवसंपज्जित्ताणं विहरइ । तए णं सा काली अज्जा जाया इरियासमिया जाव गुत्तबंभयारिणी । तए णं काली अज्जा पुप्फचूलाए अज्जाए अंतिए सामाइयमाइयाइं एक्कारस अंगाइं अहिज्जइ बहूहिं चउत्थ जाव विहरइ । तए णं सा काली अज्जा अन्नया कयाइ सरीरबाउसिया जायावि होत्था । अभिक्खणं २ हत्थे धोवेइ पाए धोवेइ ससिं धोवेइ मुहं धोवेइ थणंतराणि धोवेइ कक्खंतराणि धोवेइ गुज्झंतराणि धोवेइ जत्थ जत्थ वि य णं ठाणं वा सेज्जं वा निसीहियं वा चेएइ तं पुव्वामेव अब्भुक्खित्ता तओ पच्छा आसयइ वा सयइ वा । तए णं सा पुप्फचूला अज्जा कालियं अज्जं एवं वयासी - नो खलु कप्पइ देवाणुप्पिए ! समणीणं निग्गंथीणं सरीरबाउसियाणं होत्तए । तुमं च णं देवाणुप्पिए ! सरीरबाउसिया जाया अभिक्खणं २ हत्थे धोवसि जाव आसयाहि वा सयाहि वा । तं तुमं देवाणुप्पिए ! एयस्स ठाणस्स आलोएहि जाव पायच्छित्तं पडिवज्जाहि । तए णं सा काली अज्जा पुप्फचूलाए अज्जाए एयमट्ठं नो आढाइ जाव तुसिणीया संचिट्ठइ । तए णं ताओ पुप्फचूलाओ अज्जाओ कालिं अज्जं

अभिकखणं २ हीलेंति निंदंति खिंसेंति गरहंति अवमन्नंति अभिकखणं २
 एयमट्ठं निवारेंति । तए णं तीसे कालीए अज्जाए समणीहिं निगंथीहिं
 अभिकखणं २ हीलिज्जमाणीए जाव वारिज्जमाणीए इमेयारूवे अज्झत्थिए
 जाव समुप्पज्जित्था । जया णं अहं अगारवासमज्जे वसित्था तया णं अहं
 सयंवसा । जप्पभिइं च णं अहं मुंडा भवित्ता अगाराओ अणगारियं
 पव्वइया तप्पभिइं च णं अहं परवसा जाया । तं सेयं खलु मम कलं
 पाउप्पभायाए रयणीए जाव जलंते पाडिक्कयं उवस्सयं उवसंपज्जित्ताणं
 बिहरित्तए त्तिकट्टु एवं संपेहेइ २ कलं जाव जलंते पाडिक्कं उवस्सयं
 गेण्हइ तत्थ णं अणिवारिया अणोहट्ठिया सच्छंदमई अभिकखणं २ हत्थे
 भोवेइ जाव आसयइ वा सयइ वा । तए णं सा काली अज्जा पासत्था
 पासत्थविहारी ओसन्ना ओसन्नविहारी कुसीला कुसीलविहारी अहाछंदा
 अहाछंदविहारी संसत्ता संसत्तविहारी बहूणि वासाणि सामण्यपरियागं
 पाउणइ २ अद्धमासियाए संलेहणाए अप्पाणं झूसेइ २ तीसं भत्ताइं
 अणसणाए छेएइ २ तस्स ठाणस्स अणालोइयअपडिक्कंता कालमासे
 कालं किच्चा चमरचंचाए रायहाणीए कालवडंसिए भवणे उववायसभाए
 देवसयणिज्जंसि देवदूसंतरिया अंगुलस्स असंखेज्जभागमेत्ताए ओगाह-
 णाए कालीदेवित्ताए उववन्ना । तए णं सा काली देवी अहुणोववन्ना
 समाणी पंचविहाए पज्जत्तीए जहा सूरियाओ जाव भासामणपज्जत्तीए ।
 तए णं सा काली देवी चउण्हं सामाणियसाहस्सीणं जाव अन्नेसिं च
 बहूणं कालवडेंसगभवणवासीणं असुरकुमारानं देवाण य देवीण य आहेवच्चं
 जाव विहरइ । एवं खलु गोयमा ! कालीए देवीए सा दिव्वा देविट्ठी ३
 लद्धा पत्ता अभिसमन्नागया । कालीए णं भंते ! देवीए केवइयं कालं
 ठिई पन्नत्ता ? गोयमा ! अट्ठाइज्जाइं पलिओवमाइं ठिई पन्नत्ता । काली
 णं भंते ! देवी ताओ देवलोगाओ अणंतरं उवाट्ठित्ता कहिं गच्छिहिइ कहिं
 उववज्जिहिइ ? गोयमा ! महाविदेहे वासे सिज्जिहिइ जाव अंतं काहिइ ।
 एवं खलु जंबू ! समणेणं जाव संपत्तेणं पढमस्स वग्गस्स पढमज्झयणस्स
 अयमट्ठे पन्नत्ते त्तिबेमि ।

(152) (i) जइ णं भंते ! समणेणं० धम्मकहाणं पढमस्स वग्गस्स पढमज्झयणस्स अयमट्ठे पन्नत्ते विइयस्स णं भंते ! अज्झयणस्स समणेणं जाव संपत्तेणं के अट्ठे पन्नत्ते ? एवं खलु जंबू ! तेणं कालेणं २ रायगिहे नयरे गुणसिलए चेइए सामी समोसढे परिसा निग्गया जाव पज्जुवासइ । तेणं कालेणं २ राई देवी चमरचंचाए रायहाणीए एवं जहा काली तहेव आगया नट्टविहिं उवदंसित्ता पडिगया । भंतोत्ति भगवं गोयमे पुव्वभवपुच्छा । एवं खलु गोयमा ! तेणं कालेणं २ आमलकप्पा नयरी अंबसालवणे चेइए जियसत्तू राया राई गाहावई राइसिरी भारिया राई दारिया पासस्स समोसरणं राई दारिया जहेव काली तहेव निक्खंता तहेव सरीरबाउसिया तं चेव सव्वं जाव अंतं काहिइ । एवं खलु जंबू ! विइयज्झयणस्स निक्खेवओ ॥ जइ णं भंते तइयज्झयणस्स उक्खेवओ । एवं खलु जंबू ! रायगिहे नयरे गुणसिलए चेइए एवं जहेव राई तहेव रयणी वि नवरं आमलकप्पा नयरी रयणे गाहावई रयणसिरी भारिया रयणी दारिया सेसं तहेव जाव अंतं काहिइ । एवं विज्जू वि आमलकप्पा नयरी विज्जू गाहावई विज्जुसिरी भारिया विज्जू दारिया सेसं तहेव । एवं मेहा वि आमलकप्पाए नयरीए मेहे गाहावई मेहसिरी भारिया मेहा दारिया सेसं तहेव । एवं खलु जंबू समणेणं जाव संपत्तेणं धम्मकहाणं पढमस्स वग्गस्स अयमट्ठे पन्नत्ते ।

(153) (ii) जइ णं भंते ! समणेणं० दोच्चस्स वग्गस्स उक्खेवओ । एवं खलु जंबू ! समणेणं० दोच्चस्स वग्गस्स पंच अज्झयणा पन्नत्ता तंजहा — सुंभा निसुंभा रंभा निरंभा मयणा । जइ णं भंते ! समणेणं० धम्मकहाणं दोच्चस्स वग्गस्स पंच अज्झयणा पन्नत्ता दोच्चस्स णं भंते ! वग्गस्स पढमज्झयणस्स के अट्ठे पन्नत्ते ? एवं खलु जंबू ! तेणं कालेणं २ रायगिहे नयरे गुणसिलए चेइए सामी समोसढे परिसा निग्गया जाव पज्जुवासइ । तेणं कालेणं २ सुंभा देवी बलिचंचाए रायहाणीए सुंभवडेंसए भवणे सुंभांसि सीहासणंसि कालीगमएणं जाव नट्टविहिं उवदंसेत्ता जाव पडिगया । पुव्वभवपुच्छा । सावत्थी नयरी कोट्टए चेइए जियसत्तू

राया सुंभे गाहावई सुंभसिरी भारिया सुंभा दारिया सेसं जहा कालीए नवरं अद्दुहाइं पलिओवमाइं ठिई । एवं खलु जंबू ! निक्खेवओ अज्झयणस्स । एवं सेसावि चत्तारि अज्झयणा सावत्थीए नवरं । माया पिया सरिसनामया । एवं खलु जंबू ! निक्खेवओ बिइयवग्गस्स ।

(154) (iii) उक्खेवो तइयवग्गस्स । एवं खलु जंबू ! समणेणं० तइयवग्गस्स चउपन्नं अज्झयणा पन्नत्ता तंजहा — पढमे अज्झयणे जाव चउपन्नत्तिमे अज्झयणे । जइ णं भंते ! समणेणं० धम्मकहाणं तइयवग्गस्स चउप्पन्नं अज्झयणा पन्नत्ता पढमस्स णं भंते ! अज्झयणस्स समणेणं के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे नयरे गुणासिए चेइए सामी समोसढे परिसा निग्गया जाव पज्जुवासइ । तेणं कालेणं २ अलं देवी धरणाए रायहाणीए अँलावडेंसए भवणे अलंसि सीहासणांसि एवं कालीगमएणं जाव नट्टविहिं उवदंसेत्ता पडिगया । पुव्वभवपुच्छा । वाणारसीए नयरीए काममहावणे चेइए अँले गाहावई अलसिरी भारिया ईला दारिया सेसं जहा कालीए नवरं धरणअगमहिसित्ताए उववाओ साइरेगं अद्दुपलिओवमं ठिई सेसं तहेव । एवं खलु निक्खेवओ पढमज्झयणस्स । एवं कमसोतरां सोयामणी इंदा घणया विज्जुया वि । सव्वाओ एयाओ धरणस्स अगमहिसीओ । एए छ अज्झयणा वेणुदेवस्स वि अँविसेसिया भाणियव्वा । एवं जाव घोसस्स वि एए चेव छ अज्झयणा । एवमेते दाहिणिज्जाणं इंदाणं चउप्पन्नं अज्झयणा भवन्ति सव्वाओ वि वाणारसीए काममहावणे चेइए । तइयवग्गस्स निक्खेवगो ।

(155) (iv) चउत्थस्स उक्खेवगो । एवं खलु जंबू ! समणेणं० धम्मकहाणं चउत्थवग्गस्स चउप्पन्नं अज्झयणा पन्नत्ता तंजहा — पढमे अज्झयणे जाव चउप्पन्नइमे अज्झयणे । पढमस्स अज्झयणस्स उक्खेवगो । एवं खलु जंबू ! तेणं कालेणं २ रायगिहे समोसरणं जाव परिसा पज्जुवासइ । तेणं कालेणं २ रूया देवी रूयाणंदा रायहाणी रूयगवडेंसए भवणे रूयगंसि सीहासणांसि जहा कालीए तहा नवरं पुव्वभवे चंपाए पुण्णभहे चेइए रूयगगाहावई रूयगसिरी भारिया रूया दारिया सेसं तहेव

नवरं भूयाणंदा अग्गमहिस्सित्ताए उववाओ देसूणं पलिओवमं ठिई ।
 निक्खेवओ । एवं खलु सुरूया वि रूयंसा वि रूयगावई वि रूयकंता वि
 रूयप्पभा वि । एयाओ चेव उत्तरिल्लाणं इंदाणं भाणियव्वाओ जाव
 महाघोसस्स । निक्खेवओ चउत्थवग्गस्स ।

(156) (v) पंचमवग्गस्स उक्खेवओ । एवं खलु जंबू ! जाव वत्तीसं
 अज्झयणा पन्नत्ता तंजहा — कमला कमलप्पभा चेव उप्पला य सुदंसणा ।
 रूववई बहुरूवा सुरूवा सुभगा वि^१ य ॥१॥ पुण्णा बंहुपुत्तिया चेव
 उत्तमां भारिया वि य । पउमा वसुमई चेव कणगा कणगप्पभा ॥२॥
 वडेंसा केऊमई चेव वइरसेणा रइप्पिया । रोहिणी नवमिया चेव हिरी
 पुप्फवई वि य ॥३॥ भुयगा भुयगवई चेव महाकच्छा पैराइया । सुघोसा
 विमला चेव सुस्सरा य सरस्सई ॥४॥ उक्खेवओ पदमज्झयणस्स । एवं खलु
 जंबू ! तेणं कालेणं २ रायगिहे समोसरणं जाव परिसा पज्जुवासइ ।
 तेणं कालेणं २ कमला देवी कमलाए रायहाणीए कमलवडेंसए भवणे
 कमलंसि सीहासणंसि सेसं जहा कालीए तहेव नवरं पुव्वभवे नागपुरे
 नयरे सहसंबवणे उज्जाणे कमलस्स गाहावइस्स कमलासिरीए भारियाए
 कमला दारिया पासस्स अंतिए निक्खंतंता कालस्स पिसायकुमारिंदस्स
 अग्गमहिस्सी अद्धपलिओवमं ठिई । एवं सेसा वि अज्झयणा दाहिणिग्गणं
 वाणमंतरींदाणं भणियव्वाओ नागपुरे सहसंबवणे उज्जाणे मायापियरो धूया सरिस-
 नामया ठिई अद्धपलिओवमं । पंचमो वग्गो समत्तो ।

(157) (vi) छट्ठो वि वग्गो पंचमवग्गसरिसो नवरं महाकार्थीइणं
 उत्तरिल्लाणं इंदाणं अग्गमहिस्सीओ । पुव्वभवे सागेए नयरे उत्तरकुरुउज्जाणे
 मायापियरो धूया सरिसनामया । सेसं तं चेव । छट्ठो वग्गो समत्तो ।

(158) (vii) सत्तमस्स वग्गस्स उक्खेवओ । एवं खलु जंबू ! जाव
 चत्तारि अज्झयणा पन्नत्ता तंजहा — सूरप्पभा आयवा अच्चिमाली पभं-
 करा । पदमज्झयणस्स उक्खेवओ । एवं खलु जंबू ! तेणं कालेणं तेणं समएणं
 रायगिहे समोसरणं जाव परिसा पज्जुवासइ । तेणं कालेणं २ सूरप्पभा
 देवी सूरंसि विमाणंसि सूरप्पभंसि सीहासणंसि सेसं जहा कालीए तहा

नवरं पुण्वभवो अरक्खुरीए नयरीए सूरप्पभस्स गाहावइस्स सूरसिरीए भारियाए सूरप्पभा दारिया सूरस्स अग्गमहिंसी ठिई अद्धपलिओवमं पंचहिं वाससएहिं अब्भहियं सेसं जहा कालीए । एवं सेसाओ वि सव्वाओ अरक्खुरीए नयरीए । सत्तमो वग्गो समत्तो ।

(159) (viii) अट्टमस्स उक्खेवओ । एवं खलु जंबू ! जाव चत्तारि अज्झयणा पन्नत्ता तंजहा — चंदप्पभा दोसिनाभा अच्चिमाली पभंकरा । पढमज्झयणस्स उक्खेवओ । एवं खलु जंबू ! तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं कालेणं २ चंदप्पभा देवी चंदप्पभंसि विमाणंसि चंदप्पभंसि सीहासणंसि सेसं जहा कालीए नवरं पुण्वभवो महुुराए नयरीए भंडिबडेंसए उज्जाणे चंदप्पभे गाहावई चंदसिरी भारिया चंदप्पभा दारिया चंदस्स अग्गमहिंसी ठिई अद्धपलिओवमं पन्नासवाससहस्सेहिं अब्भहियं । सेसं जहा कालीए । एवं सेसाओ वि महुुराए नयरीए मायापियरो धूया सरिसनाम्मा । अट्टमो वग्गो समत्तो ।

(160) (ix) नवमस्स उक्खेवओ । एवं खलु जंबू ! जाव अट्ट अज्झयणा पन्नत्ता तंजहा — पउमा सिवा सई अंजू रोहिणी नैमिया इ य । अयला अच्छरा ॥ पढमज्झयणस्स उक्खेवओ । एवं खलु जंबू ! तेणं कालेणं २ रायगिहे समोसरणं जाव परिसा पज्जुवासइ । तेणं कालेणं २ पउमावई देवी सोहम्मो कप्पे पउमवडेंसए विमाणे सभाए सुहम्माए पउमंसि सीहासणंसि जहां कालीए एवं अट्ट वि अज्झयणा कालीगमएणं नायव्वा नवरं सावत्थीए दोजणीओ हत्थिणाउरे दोजणीओ कंपिल्लपुरे दोजणीओ साएए दोजणीओ पउमे पियरो विजया मायराओ सव्वाओ वि पासस्स अंतियं पण्वइयाओ सक्कस्स अग्गमहिंसीओ ठिई सत्त पलिओवमाइं महाविदेहे वासे अंतं काहिति । नवमो वग्गो समत्तो ।

(161) (x) दसमस्स उक्खेवओ । एवं खलु जंबू ! जाव अट्ट अज्झयणा पन्नत्ता तंजहा — कण्हा य कण्हराई रामा तह रामरक्खिया वसू या । वसुगुत्ता वसुमित्ता वसुंधरा चेव ईसम्मे ॥१॥ पढमज्झयणस्स उक्खेवओ । एवं खलु जंबू ! तेणं कालेणं तेणं समएणं रायगिहे समोसरणं जाव

परिसा पज्जुवासइ । तेणं कालेणं २ कण्हा देवी ईसाणे कप्पे कण्हवडेंसए
 विमाणे सभाए सुहम्माए कण्हंसि सीहासणंसि सेसं जहा कालीए एवं
 अट्ठ वि अज्झयणा कालीगमएणं नायव्वा नवरं पुण्वभवो वाणारसीए नयरीए
 दोजणीओ रायगिहे नयरे दोजणीओ सावत्थीनयरीए दोजणीओ कोसंबीए
 नयरीए दोजणीओ रामे पिया धम्मा माया सव्वाओ वि पासस्स
 अरहओ अंतिए पण्वइयाओ पुप्फचूलाए अज्जाए सिस्सिणियत्ताए
 ईसाणस्स अग्गमहिंसीओ ठिई नवपलिओवमाइं महाविदेहे वासे
 सिज्झिहिंति बुज्झिहिंति मुच्चिहिंति सव्वदुक्खाणं अंतं काहिंति । एवं
 खलु जंबू ! निक्खेवगो दसमवग्गस्स । दसमो वग्गो समत्तो ।

(162) एवं खलु जंबू ! समणेणं भगवया महावीरेणं आइगरेणं
 तित्थगरेणं सयंसंबुद्धेणं पुरिसोत्तमेणं पुरिससीहेणं जाव संपत्तेणं
 धम्मकहाणं अयमट्ठे पन्नत्ते । धम्मकहा सुयक्खंधो सम्मत्तो । दसहिं
 वग्गेहिं नायाधम्मकहाओ सम्मत्ताओ ॥

॥ बीओ सुयक्खंधो समत्तो ॥

॥ नायाधम्मकहाओ समत्ताओ ॥

VARIANT READINGS

[A. B. C. E. are the MSS. collated, P. stands for the Āgamodaya Samiti Edition, Com.—commentary.]

[Page 1] 1. C. चेईए. 2. C. बलसंपन्ने रूवसंपन्ने विणयनाणसंपन्ने दंसण... संपन्ने. 3. C. °लोभे. 4. C. °बंभच्चेरवय° and omits नय. 5. C. B. °चरित्त only. 6. B. नगरी. 7. C. °चेईए°. [Page 2] 1. C. आय°. 2. C. omits पुरिसुत्तमेण...लोयुत्तमेण. 3 & 4. C. omits. 5. C. जिणएण. 6. C. B. A. °खं°. 7-8. C. omits. 9. A. B. माइ°. 10. C. मंडुए. 11. C. संस°. B. सुसु°. 12. C. omits. [Page 3] 1. C. इ. 2. C. has throughout °गेहे. 3. B. A. नग°. 4. C. सुय° A. सुसा°. 5. C. कम्म°. B. कम्मइया°. 6. C. चुवि; B. चव्वि°. 7. C. B. कुटं. 8. C. वियन्न°. 9. C. °कं. 10. C. °भत्त°. 11. C. °छहाऊ°; A. °धाऊधवल°. 12. B. A. °सत्थ°. 13. C. पुम°. 14. P. वंदन°; Com. notes the V. L. चंदन°. [Page 4] 1. C. B. A. °गंध°. 2. A. changes °किरण° to °रयण°. 3. C. °ट्टी°. 4. C. °य°. 5. C. उव°. 6. C. °मं. 7. C. °कारं. 8. C. B. °सिया. 9. C. °यंब°. 10. C. समूससिय°; A. B. समूसविय°. 11. A. B. °रुम°. 12. C. omits °गंभीर°; A. B. omit °रिमिय°. 13. C. °ट्टी°. 14. A. B. सि°. 15. C. के सि धम्मं जाव; B. केसिमं जाव. 16. A. B. Generally read सिमिण for सुमिण. [Page 5] 1. B. अनुपवि°. 2. B. E. मिउ°; C. E. omit °रिमिय°. 3. C. E. उराला. 4. C. तुम्भे. 5. A. B. E. omit. 6. A. B. E. देवी. 7. B. E. °कारगा. 8. C. देवाणुप्पिए. 9. C. splits the Opd. and has different sentences. 10. C. राय°. 11. C. °वडें°. 12. C. A. omit. E. °तिलग. 13. A. B. विन्नय°. 14. E. °विउल°. 15. E. देवाणुप्पिया after each word. 16. C. वद°. 17. C. इमिहेति त्ति. [Page 6] 1. C. कोटंबिय°; E. कोडं°. 2. C. °गुरु°. 3. C. E. °गंध°. 4. C. E. एव°; B. एवम्मा°. 5. C. °पंडरे; B. E. अहपंडरे. 6. P. गुंजद्धराग°. 7. P. °जासुयण°; Com. reads °जासुमिण°. 8. B. °गरे. 9. E. दिणकरपरंपरोयार°; B. दिणकरपरंपरायारपरुद्धमि; C. दिणकरकरपरसरोवयार°. 10. C. खचि°; E. खइए°. 11. C. °णुपगासविक°. 12. E. °यर; C. °कर. 13. B. °जुज्झ°. 14. C. °माई°; B. °मादि°. 15. E. मइ°; B. मद°. 16. C. वय°; E. omits. 17. C. अम्भिगे°. 18. C. अम्भि°. 19. C. पि°. 20. C. E. अम्भि°. 21. E. °निम्मलगुणेहिं for निम्माएहिं. 22. C. चुवि°. 23. C. B. अवट्ट°. [Page 7] 1. E. °जालाकुलाभि°; B. समुत्त°.

2. E. omits. 3. C. generally reads सुकमाल. 4. E.B. °कासाइलू°. 5. E. पिण°. 6. C. मुड; cf. चुविह supra. 7. C.E. omit विमल. 8. C. °सेत°; B.A.सित°. 9.B.°रेट°. 10. E.reads उमओ before this. 11. C. E.°कोडं°. 12. C.°पाल°; 13.E.विविह for विव and joins it to the next word. 14. E.नरिन्दे after this. 15. B.E.°भागे. 16. E.°मणिकणगरयण°. 17. C.B. omit मउअ. [Page 8] 1. E.सुत्तत्थधारए पारए. 2.E.सुमिणलक्खण°. 3. E.सुविणलक्खण°. 4. E.सुविणलक्खण°; C.सुमिणलक्खण°. 5. E.सएहिंतो. 6.E. मिल°. 7. E.सुविण°. 8. E. सुमिणलक्खण°. 9. E.संलवेंति B.संलवेंति [Page 9] 1.C.omits. 2. B.A.°उसह°. 3. E.°भुवन°. 4. C.सिंहि°. 5. C.E.चत्तारि. 6. C.एगं. 7. E. सामी after this. 8. C.पयाहि; E.पयाहिसि. 9. E. °मेत्ते. 10. C. वियक्कंते. 11. B.C. °विपुल°. 12. C. वदह. [Page 10] 1. C.वइ°. 2. E.तई°. 3. C.दोहद°. 4. B.E.डोहले. 5. E.मेहे. 6. E.omits. 7.E.°ज्जाए; B.°ज्जा°. 8. E.°न्नाए. 9.C.°पुम°. 10.C.°केसूय°; B.°केंसूय°. 11.C. °हिंगलोय° B.°हिंगुलुय°. 12. E.°गुलिय°. 13. C.°सुय°. 14. B.°सामग°; E. °साम°. 15. E.°गण°. 16. E.°संस°; C.°सिक्कि°. 17. E. omits one उवरि. 18. E.°वियमेइणि°. 19. C. वेळि°; E. वेळिय. 20. E.°पच्चय°. 21. E. °कूडग°. 22.E.°निम्मकडुय°. 23.E.°कुडयकडय°. 24. C.E.°रय°. [Page 11] 1. E.B. ओणय°. 2. Com.°भामिय°. 3. E.°तारगणपइसु; B.°तारगण°. 4. C.°बंध°. 5. E. ओइन्नवलाइग°. 6. C.पाव°. 7. E. किन्नो for कित्ते. 8. E. °तिउयओविय°; Com. °उचिय°. 9. C.B.°खडुय°. 10. E. °गु°; E. B. omit पवर. 11. E.B.°वइर°. 12. E.सद्धि after this. 13. C.°चुमुह°. 14.C. आसिय°. [Page 12] 1. E. reads अवलंविचं after this. [Page 13] 1.C. तो. 2. C. चुविहाए; E. चउव्विहाए. 3. C.E. बुद्धीए. [Page 14] 1. E. मणामाहिं instead. 2. E. उरालाहिं कळाणाहि. [Page 15] 1. C. पडिला-भिए instead. 2. MSS. generally write उमुक्क°. 3. C. उप्पज्जेसु; E. समुप्पज्जेसु. 4. E. reads जत्थ णं after this. [Page 16] 1. C.B. °सोहे; E. °सोकखे. 2. C.B.°गमणुगुणजणिय°; E.°गमणुठाण°. 3. B. °हासे. 4. E.°गब्भ° for °मज्झ°. 5. C. उडु°. 6. C.°सम्मत्त°; E.°संसन्न°. 7. C. E.B. गंध°. 8. E. विगुवित्त°; B. विगुव्वित्त°. 9. E.°वंतो. 10. B. °लोगं. 11. E.णयरं instead. 12. B. reads 'य तस्स' after this. 13. E.B. संणि°. 14. E.दियं इच्छियं. [Page 17] 1. MSS. write दोहल as well as डोहल. 2. C. always °माऊयाए. 3. B. °सि°. 4. C. गज्जइ; E. गच्छइ. 5. C. पावत्त°. 6. C.°ऊ. 7. C.°माऊयाए. 8. C.B. धारिणीए देवीए. 8. C.कोटं°; E. कोटं°; B. कोटुं°. I have retained कोटुंविच throughout. 9. C. एव°.

- [Page 18] 1. E. सेयवरचामरं. 2. C. ०द्विया. 3. C नगरं. 4. C. चेहीसु य जूएसु य etc; E. चोण्हीसु; B. चेण्हीसु. 5. C. B. E. वियं. 6. E. ०भोए. [Page 19] 1. C. generally सुकमाल. [Page 20] 1. C. एव. 2. C. after this adds उकिट्टं अमेज्जं अदेज्जं. 3. E. B. अव्वायं. 4. E. B. सुइ. 5. E. गळभगयस्स. [Page 21] 1. E. छावाणि; B. वावाणि. 2. C. ०द्वडि. 3. B. ०अक्कणि. 4. C. हत्थि. 5. E. गहिज्जं. 6. C. परिगिज्जं; E. ०गिज्जं; B. परंगिज्जं. 7. C. बालावणयं. [Page 22] 1. C. वत्थं. 2. E. कट्ठं. 3. C. ०रूवे. 4. C. रूव. 5. E. B. omit वत्थ. 6. B. ०विहं. 7. C. ०पवरं for ०वरं. [Page 23] 1. E. B. आणियल्लि. 2. C. ०उववयाणं. 3. C. ०भोए. 4. C. E. उवलोए. [Page 24] 1. C. ०सइडे. 2. C. वुः E. वुं. [Page 25] 1. E. ०लम्बवणओ ओलम्भ; 2. E. चयगमइ; 3. E. फरसु. 4. B. ०महिमव्वं [Page 26] 1. E. सफु; 2. C. omits; 3. E. कामभोए for भवे; 4. C. अनित्तिए; 5. C. केस; 6. C. सरिसवयाओ; 7. E. आणिल्लि. [Page 27] 1. C. E. have the whole Sentence के णं जाणइ के पुब्बि etc; 2. C. B. omit सार; 3. E. B. जाव after this; 4. E. omits तं; 5. C. संबुद्धे. [Page 28] 1. C. एव; 2. C. B. omit 'च'; 3. E. असिधारासंचरणवयं; 4. C. B. E. ०वु; 5. C. E. वीरं [Page 29] 1. C. E. कुमारे; 2. E. B. ०वेउं [Page 30] 1. C. E. तुब्भे; 2. C. E. चउपपलं; 3. E. सेयपीयएहिं; 4. C. रयणमउडं; 5. C. B. ददुर [Page 31] 1. C. सालिं; 2. C. अम्मं; 3. C. ओघां; 4. B. दुवे उ; 5. B. पासे; E. पासिं; 6. E. ओहीरं. [Page 32] 1. B. ०किइ; 2. C. सरिस-वयाणं; 3. C. ०णीयं; 4. C. वुत्ता समाणा; 5. B. supplies the whole passage indicated by जाव, but again reads as in the text; 6. C. ०धणियबलि. यबद्धं; 7. C. भगवओ. [Page 33] 1. B. जम्मणज्जरमरणणं; 2. E. एवमग्गे; B. एमेव मग्गे; 3. C. Very often writes अम्हा; 4. Com. अप्पसारे; 5. B. ०गुरु; 6. E. B. खं; [Page 34] 1. C. आयारं; 2. E. ममे after this; B. also मम above the line; 3. E. अणगारं instead; 4. E. एवमेव; 5. E. अणगारे; 6. E. पडिच्छइ; 7. E. From now on substitutes अणगार for कुमार after मेह; 8. C. बारं; E. पायं; 9. C. सीसेहिं; 10. C. पिट्ठेहिं. [Page 35] 1. E. adds after this:—'संधाराओ आययंति', and omits राओ; 2. C. आगारवासं; 3. C. ०रूवयं; E. ०संतियं; 4. B. तं रयणि; 5. C. B. E. ०मज्झा; 6. E. पव्वइए; C. B. omit; 7. C. निव्वइयं; 8. E. B. संखउलं; P. संखद-लउज्जलं; 9. C. समए; 10. C. ०गत्तवरे. [Page 36] 1. C. पागट्ठी (०ट्ठी?); 2. C. पडुवहए; 3. C. जूहाहिवई; 4. C. परिवट्ठिए; Com. ०वट्ठिए; 5. C. ०रूई; 6. C. ०डे; 7. E. कुं. 8. C. ०यरेसु य; 9. C. पावसं; 10. C. omits मय; 11. E. and Com. ०किमिवं; Com. ०किमिणं; 12. C. ०वाइयं; 13. C. ०पायपडियं; B. ०पायडियं; 14. C. वसंतेसु; 15. B. गिम्हउण्ह; Com. गिम्हउण्हउण्ह; 16. B. संवट्ठइएसु; 17. C. E. B. सीयरं. [Page 37] 1. E. B. ०ल्लं; 2. C. E. विणिट्ठरहे; 3. E. पाए; 4. E. लेडं; B. ०लंडं. 5. E. झुंझिए; B. Com. जुंजिए. They are Synonymous. 6. C. ०सू; 7. C. ०पल्लिडे; 8. C. omits the words च णं महं; 9. C. B. ०त्थेणं; 10. C. पाविए; 11. E. थिरं; 12. B. सु; 13. C.

उट्ठु^०; E. B. उट्ठु^०; 14. B. adds तिउणा after this; Com. and P. तिउला; 15. B. होत्था; 16. E. वीसं; 17. C. omits; 18. C. गयवरजुवा^० 19. C. omits गय; 20. E. तुमे महागम्भ^० etc. omits मेहा. [Page 38] 1. C. रत्तुण्लसूमा^०; E. उप्पलरत्त^०; 2. C. B. 'मण^०'; 3. C. 'पालियातं'; B. 'पालियत्तयं'; 4. C. 'कणेरुहत्थी'; E. गणियायारं^०; 5. B. Com. 'संताणं'; 6. C. 'काइंसि. [Page 39] 1. B. खुवे; 2. P. and Com. विवहणं; Dict. notes विहवण= विनाश; 3. B. 'उद्धतं'; 4. C. 'कइ^०'; B. 'पसुघालो'; P. 'पंसु' Com. notes this; 5. B. 'कुसुमकयचामरं'; Com. notes the V. L. 'उउयकुसुम,' his reading drops उउय; 6. B. 'समयं'; E. उउयसमयं^०; 7. E. B. Com. 'सिहरं'; Com. reads सिरिहर and notes the V. L.; C. 'भीमेतरं'; 8. Com. reads आयवालमहंतं and notes आयवालोय as V. L. [Page 40] 1. C. पादपघंसं^०; 2. B. दसोदिसिं; 3. C. adds चिल्ला after this, retaining चिल्ला also; 4. E. B. 'भयविहुया'; 5. E. B. अणुखित्ते; 6. C. generally रायंदियं^०; 7. E. 'वलित्तियं'; 8. C. झंझिए; E. झुंझिए; Cp. supra page 37; 9. P. Com. add अचंक्रमणो वा; 10. B. 'कडे'; P. Com. ठाणुखंडे; 11. E. B. रयंतं probably wrong for रयत; Com. रययां^०; P. रयतं. [Page 41] 1. E. 'दातं' (for 'पत्तं') bad writing for 'दंतं' which is the Com.'s reading; 2. P. 'जाइसंभरणे; Com. notes 'पुव्वभवे, and reads as in the text; 3. C. आणंदसंपुत्तमेहे; E. आणंदसंपुत्तं^०; 4. E. समसवियं^०; 5. C. B. 'मायाउत्तियं'; 6. E. 'क्खह'; 7. C. B. 'उत्तियं'; 8. E. B. पडिच्छइ. [Page 42] 1. C. एगारस; 2. E. सोहेइ; 3. C. दोच्चाए; 4. C. तच्चाए; 5. C. 'कइए; E. 'कडए. [Page 43] 1. C. एगां^०; 2. E. B. पंचदसमे; 3. C. उदयगणेणं; 4. C. कडिकडिं^०; 5. C. B. तिलंडासगडिया; E. तिलदडां^०; 6. E. भासभस्सरसिं. [Page 44] 1. E. B. आरुं^०; 2. C. कडाहीएहिं; B. कडावोहिं; 3. E. मासीसंलेहणाझसियस्स; 4. P. अहं; 5. C. कडाइएहिं. [Page 45] 1. C. Omits कट्टु; 2. E. B. एवं; 3. E. पाओव- गमणकालं; 4. C. वासाइं; 5. E. B. अणु. [Page 46] 1. C. एयस्स; 2. E. 'न्वयाइं; 3. C. 'पाणयअच्चाए; E. 'पाणच्चाए; 4. C. omits महा; 5. C. अप्पोपं. [Page 47] 1. B. वित्तयं^०; C. बियस्स; 2. C. Throughout 'गेहे as in chapter I; 3. B. तस्स; 4. E. पडिं^०; 5. C. B. E. जिणुं^०; 6. E. किण्हां^०; 7. P. धण्णे throughout; 8. C. सुकं. [Page 48] 1. C. 'खुइं^०; 2. C. आरासियं and omits 'रत्तं'; 3. C. E. 'फरसं^०; 4. C. 'पयत्तं for 'पइण्णं'; 5. C. पभित्तए; B. पभइए; 6. E. सव्वोगाही; Com. सव्वगाही; 7. C. उवट्टिए; E. उव्वहिए; 8. E. अभिं^०; 9. B. जूवं^०; 10. E. 'सरपंतियासु य सरसरपंतियासु य. [Page 49] 1. E. पसुयामि; P. पयायामि; 2. E. 'सूले; B. 'सूलकव्वखं^०; 3. C. B. अइसरं^०; 4. E. B. निवेसियाणं; C. निवेसेइ; 2 वेसियाणं; 5. E. C. धन्ने णं; The Mss. sometimes spell it thus, but usually it is 'धण,' and so for the sake of uniformity, I have retained single 'ण' throughout; 6. P. पुप्फवत्थं^०; 7. C. सद्धं; 8. C. Invariably writes

°गे° for °गि°; for गिह also, it writes गेह; 9. C. महा°; 10. E. जाणु°; 11. C. पयामि; 12. C. उवायं; 13. E. B. उववा°; C. उवायत्तए; 14. C. बहूय (Usually C. writes बहूय for बहूई); 15. C. उवायं; 16. P. °गंधवत्थ°. [Page 50] 1. C. °साडगा; E. पडगसाडिया; 2. B. तत्थेव; 3. P. reads ताई after this; 4. E. omits °वत्थ°; 5. E. B. omit; 6. C. महा°; 7. B. °गच्छइ; 8. C. जक्खा instead; 9. B. उववा°; 10. P. पुप्फवत्थ°; 11. E. B. परि° [Page 51] 1. C. उवणेति; E. विणयेति; 2. C. ते; 3. E. नागर-महिलाए; 4. C. generally रायंदि°; 5. E. उवायं; 6. C. होऊ. [Page 52] 1. C. °कारेणं; E. °कारे संसु°; 2. E. °द्वा°; 3. E. जीविय°; 4. C. तहेव; 5. C. E. सुयं; 6. C. पवित्ति; 7. C. निवाए; E. omits; P. हते; The com., however, reads 'नीए'; हते is obviously wrong. None of the five Mss. read हते; 8. E. अवखित्ते. [Page 53] 1. C. चंपगलया य; but it is obviously wrong; 2. C. generally writes महुत्त°; Diet. notes this Spelling also, but I have retained मुहुत्त° throughout; 3. C. °यं; 4. P. Com. °बद्धवस्मियकवया; 5. E. जीविय°; 6. C. °मगणम्म°; 7. E. निवाए°. [Page 54] 1. C. उक्खिरिएमाणा—but the Diet. does not note this word; E. पक्खिवमाणे; B. पकेर°; 2. B. राया°; E. अमच्चे; 3. P. एत्थट्ठे instead; Com. नन्नत्थ; 4. E. विणिवा°; 5. B. °नियगसयण°; 6. C. °दा°; 7. C. बहू. य; 8. C. लहूयंसि; 9. D. संपलम्मे; 10. E. चारगसाला; 11. E. चारगसालं; 12. E. °डावेह°; 13. B. भायणाइ; 14. B. गच्छहं—probably a formation from गच्छह + णं; 15. C. °पिंडं; 16. C. °ल्लि°; 17. B. भायणाइ; E. omits this and the next word; 18. E. एत्तो. [Page 55] 1. C. °कर°; 2. C. पड°; 3. C. एयं instead; E. omits; 4. C. °पिंडं; E. °पिंडगं; 5. E. B. °म्ममाण°; 6. C. °ट्ठवावेहि; 7. C. म°; 8. A. धिणे विजएण [Page 56] 1. E. B. °पिंडयं; C. °पिंडं; 2. C. कारा°; 3. C. अहायमट्ठियं; 4. E. B. सरीरकुसलं पुच्छंति; 5. C. पुरिसा; 6. C. भवति; 7. E. B. भइगा; C. भायया; 8. C. भाणेजा; 9. E. बाप्फमोचणं. [Page 57] 1. C. रज्ज°; 2. C. मोयावेति; 3. B. संचाडियए; E. घोडियए; 4. B. E. परम्ममाणे; 5. C. उववट्ठिता; 6. P. reads after this—दीहमद्धं; 7. C. बुज्झंति instead; 8. P. 'धम्मघोसा नामं' before this: But none of the five Mss. give it; 9. E. अम्म°. [Page 58] 1. C. सरीरचित्ता; 2. E. B. omit 'बल'; 3. E. बृहणयाए; P. वहणयाए; 4. C. °प्पयाणाणि; P. °प्पाड°; 5. C. अणायं. [Page 59] 1. Com. सव्वोउए and notes सव्वोउयं; 2. P. वर° for वण°; 3. C. परियाणए; 4. C. पिट्ठुंडी°; E. पिट्ठुंडी-पंडरे; 5. E. B. किच्चाइ; 6. C. पव्वया; 7. Com. notes संहिच्च; 8. C. चुसट्ठि°. This is a peculiarity of MS. 'C' to form such samdhis; 9. C. omits चउसट्ठि. [Page 60] 1. E. B. पुव्वावरहं°; 2. B. पाउम्मए; 3. E. B. °क्खडेह; 4. C. °कलया°; (कलय = अर्जुनवृक्ष); 5. E. C. से; 6. E. मे after this. [Page 61] 1. C. जाणु; 2. E. ष्हायाए; 3. B. पच्चावरहं°; 4. C. हत्थअंगुलीए; 5. E. B. देह°; 6. E. B. पक्ख°. [Page 62] 1. B. गच्छहं

Cp. Supra; 2. B. सत्थाह°; 3. C. उववत्तेति; E. उच्छत्तेति; 4. C. उववट्ठिज्ज°; E. उववट्ठिज्ज°; 5. E. एव; 6. C. परा°. [Page 63] 1. C. उववट्ठे°; 2. C. नड्डलंग°; B. नड्डलंग°; E. णंदुल्लंग°; 3. C. E. B. से; 4. E. अवयारियपइन्न°; 5. C. °चंदपखीयाकइय°. [Page 65] 1. E. पडि°; 2. E. °सयवत्त°; 3. C. वरमादय°; 4. C. reads खुद्दा after this; 5. E. दिवा; 6. E. पच्छन्ना; 7. C. °दहाओ; 8. C. B. उवि°. [Page 66] 1. E. वि विलुंपंति after this; 2. E. उवट्ठेति; C. उवत्तेति; 3. E. नियंग°; or probably wrong for नियंग°?; 4. E. जविणं; 5. E. निखुड्डे; C. नखडवेति; B. निखुड्डेति. [Page 67] 1. C. °नाय°; 2. E. B. से instead; 3. C. B. from से to °परियट्ठइ—dropped and जाव instead. [Page 68] 1. E. B. °पाडी°; 2. C. अनेकतडग°; 3. C. °पुरे for पउरे; Cp. चुविह for चउविह etc.; 4. B. सव्वोउय°; 5. E. णीपा°; 6. B. सत्थाह°; 7. B. सायरपरिपेर°; 8. C. °वयणी° throughout. [Page 69] 1. C. very often °कुसम° for °कुसुम°; 2. C. E. वयासी instead; 3. C. °तहावार°; 4. E. °संकुलसइं; 5. C. E. °माणा. [Page 70] 1. C. °किण्ह°; 2. P. after this: नवरं निक्खमणाभिसेयं पासामो । तए णं से थावच्चापुत्ते तुसिणीए संचिट्ठइ । 3. C. पडिहारादेसेणं; 4. E. गंधहत्थि°. [Page 71] 1. E. जीवियं निस्सए instead; 2. E. °पडि°; 3. C. उपाइत्तए; E. उप्पाइए; 4. E. अन्नत्थ; 5. E. कम्माणं खओवसमेणं; 6. E. जम्मणजरा°. [Page 72] 1. C. B. दुख्खा; 2. C. समाणा; 3. C. °वुडा; 4. C. सीया°; 5. E. B. अरिहा; 6. C. सत्थवाही instead; 7. C. पुमावईए; 8. C. देवीए. [Page 73] 1. C. B. °सट्ठे; 2. C. °धिला; 3. C. सूर throughout; 4. E. जजु°; B. जजुर°; 5. E. °जम°; 6. P. °छत्तछल्ल (करोडियछण्णाल) यंकुस°; 7. C. पत्तेहि. [Page 74] 1. E. B. परिक्खायए instead; 2. B. णीइ; 3. P. °कम्मगंठीओ; 4. C. °पय°; 5. C. B. °य°; 6. C. तए णं (Probably for तवए णं ?). [Page 75] 1. C. °लिंपंतस्स य; 2. C. सोए; 3. P. बीयस्स; 4. C. सभंड°; 5. C. पज्जुवासेइ. [Page 76] 1. C. °प्पि°; 2. MSS. often write as सिद्धि; 3. C. जे; 4. C. °सधा; generally other MSS. not consistent; [Page 77] 1. E. B. हिरण्णमासा. [Page 78] 1. C. सव्वं before this; 2. E. दलयइ; 3. E. B. शुवन्ने instead. (Page 79) 1. E. B. किमन्ने; 2. E. °हारे; 3. C. E. समणा°; 4. C. पुमा°; 5. C. तरसे य (for तारिसेहि°); 6. C. बलेहि instead. [Page 80] 1. C. Always writes फासू°; 2. C. °दंसेति; 3. E. B. गल्ल (Probably wrong for मल्ल read in P.); 4. C. writes पासत्थविहारी instead of 2; E. पमत्तविहारी etc.; 5. C. omits उउ. [Page 81] 1. E. °खेलमत्तओसह° etc. 2. C. °वडियस्सयं; 3. C. °रए; 4. C. पीएति; 5. C. पडिक्कमेयं खामेभि णं. [Page 82] 1. C. B. ते सेलमपामोक्खा पंच etc. 2. E. has separate sentences for each; 3. E. अंतेवासी after this; [Page 83] 1. E. B. गुरु°; 2. E. विंटेइ; 3. E. B. अंतरा instead; 4. E. B. गुरुयभारियाए after this; 5. E. B. गुरुयभारियाए instead; 6. E. °गइ° (for °तल°); C. always °पयट्ठणा; 7. B. अह; 8. C. तेसिं; 9. C. पढमं लुग्गांसि;

10. C. धरणीतलआयवत्ताओ; 11. C. सलिलपय°. [Page 84] 1. B. धण्णे throughout; 2. E. B. विदेसत्थंसी. [Page 85] 1. E. °निसण्णे for °वरगए; 2. C. E. °मिता; 3. C. पल्लगाओ; 4. C. चुत्थं. [Page 86] 1. C. उक्कय°; E. B. °निक्खए; 2. C. हरियफेरंडा; E. हरियफेरंडा; 3. E. पुणरवि instead; 4. B. सु°; P. सूयाणं; 5. E. °भूयाणं (for पूयाणं); 6. C. °दिसिसि; E. °देसं संठवेति; 7. E. वप्पंति; B. वुप्पंति; 8. E. B. उक्खणियहए; 9. E. लवण (?) तलकरयलमलिए; 10. E. पुणरवि; 11. C. कडवा; E. कुडुवा; B. मुरजा instead; Com. मुरला; 12. E. B. पल्लंति; P. पक्खिवंति; [Page 87] 1. C. omits; B. reads after this—तव हत्थांसि दलयामि again; 2. B. °एहि. [Page 88] 1. B. and Com. समुच्छियं; 2. E. B. °ज्झियं; 3. B. फालि°; 4. E. सुहं after this. [Page 89] 1. E. B. दलाति; 2. B. वट्ठा°; C. ठावियं. [Page 90] 1. E. B. °क्खा; 2. C. महबल throughout; MS. E. gives the whole description about the arrival of the monk; throughout the chapter MS. E. supplies the वर्णकs which are merely referred to or omitted in other MSS.; 4. E. B. ठावेमि; 5. E. संहिच्चा (The passage is reproduced in Ch. III where it is समेच्च). [Page 91] 1. E. तओ अम्हाणं; 2. E. छप्पियबालवयंसे सह before this; 3. E. भंते instead; 4. E. B. तए णं; 5. C. B. वीसाएणं; E. वीसाहिं; 6. E. B. °च्चि°; 7. E. B. पमा°; 8. P. जीवो for सो उ; Com. notes 'एसो'; 9. C. B. उ and E. उवसंते after this. [Page 92] 1. E. B. °सुत्ता; 2. E. B. विगइ°; 3. E. थेरा भगवंतो; 4. E. B. °त्तए. [Page 93] 1. E. विद्युद्ध°; 2. E. पंचालराया; C. °रायाहिवई; 3. P. °ट्टाणट्टिएसु; 4. C. सबसउणेषु (probably for सव्व°); 5. C. सुगालंसि; 6. B. P. (and Com.). °हेमंताणं चउत्थे मासे अट्टमे पक्खे फग्गुणसुद्धे तस्स णं फग्गुणसुद्धस्स चउत्थि पक्खेणं; Com. notes the reading in the text; 7. E. महाविमा°; 8. E. °वु°; Com. notes this V. L.; 9. C. °द्धु°; 10. C. दो°. [Page 94] 1. B. अहो°. [Page 95] 1. C. °गा°; 2. P. °सु°; 3. E. B. °ग°; 4. C. °डंड; E. चउहिं बुद्धी उववेओ for सामदंड°; 5. C. °चक्काय°; 6. C. B. °द्धु°; 7. C. तुलएह; E. B. ओलएह. [Page 96] 1. E. B. निगच्छइ; 2. E. °फलग° for °पडलग°; 3. E. °कडुच्छय°; 4. E. adds this sentence from तए णं at the bottom and reads °गंडं वत्थं भरियमेहवन्नं सुप्पणमंडगं सुइरं कारलं etc. [Page 97] 1. C. अतियं; 2. MSS. read here महिलं, but not regularly and consistently; 3. C. पहा°; 4. C. संजुत्ता°; 5. E. तत्थ; 6. B. °कहाहिं संलावे; 7. C. पारेज्जं (°च्छे being dropped). [Page 98] 1. E. °विव्ह; 2. E. पयस्सय after this; 3. P. तारिसेहिं instead; 4. C. °नंदयंता; 5. E. °संयुणंता; C. अभियुण°; 6. C. विप्फयाहिं; E. omits; 7. E. सम्मा°; 8. C. अभिनिक्खत्तोसि; 9. E. °वाइसुत्तंतरेसु जयंतेसु; 10. E. वक्कं समुदाह; 11. C. B. °सामवि; 12. C. °नाणा (for °नावा°); 13. E. वाव°; B. °रि°; Com. °वरि°; 14. °ण्ण°; 15. E. B. °णेहिं; 16. B. विपमु°; 17. E. B. °पक्खा; 18. C. संणुब्भ°; E. संछु°; B. °छु°; 19. C. E. B.

°म°. [Page 99] 1. B. °लंग; 2. C. आम्; E. B. आउ; 3. E. °चिपटु°
 (for °चिमिट°); Com. °चिपिट°. 4. E. °भसुय; 5. C. °दंत; 6. C. °वगंत; 7.
 E. °मायच्छमाण; 8. B. °कालंग; 9. E. B. °चंचल; 10. Com. अवच्छिय; 11.
 E. °लाल; 12. Com. notes आम्सिय; 13. C. °चम्मेट्टे; B. °चम्मउट्ट; 14.
 Com. notes this; 15. E. °चिमिट्ट; Com. °चिवड; 16. E. घाडम्भड; B. घाडम्भड;
 P. Com. घाडुम्भ; 17. C. °चंचलीय; 18. C. °लोयणगं; 19. E. °निलाड; 20. E. °चिद्धं; C. °बिबं instead; 21. B. °क्कर; 22. C. °धूधूवत; E. °धुरधुवत; 23. E. °तुंमल; B. °कुंमल; Dict. does not note these
 words; 24. C. °सुक्ख for °नह; 25. P. °णिवसण; 26. C. B. °वितत; 27. C. आणिट्ट. [Page 100] 1. C. E. उवातिणमाणा; B. उवातिम; 2. B. °क्खाए तिकट्टु; 3. B. °ताल; 4. C. विहास; 5. B. °व्व; 6. Com. P. जेण.
 [Page 101] 1. B. °तालाइ; 2. B. ताहे; 3. E. °चेव after this; 4. E. B. °स्थिमे
 दिसीमाए; 5. E. °प्पियाण; 6. C. दिट्ठी; 7. B. खमेसु; C. खामेसु; 8. E. मरि°. [Page 102] 1. P. पोयपट्टणे; 2. C. B. °जु; C. many times °जु but not
 always; 3. E. चंपा नयरी पोयपट्टणे; B. चंपाए पोयपट्टणे. [Page 103] 1. E.
 दिट्ठपुत्ते; 2. C. °सा; 3. P. चउक्कसि instead; 4. E. B. ओलयति; 5. E. °खे
 दुल्ले; 6. B. सीया; 7. E. B. °वंदिउ. [Page 104] 1. B. Locative for
 Instrumental; 2. E. एरिसिए; 3. C. एत्थ; 4. E. इमीसे; 5. C. से; 6. E.
 एयमाण. [Page 105] 1. E. °सि; 2. B. सयाइ; 3. E. निग्गच्छंति. [Page
 106] 1. C. पमोद; E. पडम° 2. MSS. use plural; 3. E. °णुभूय; 4. E.
 निव्व; 5. E. B. °गरदारए; 6. E. B. एय; 7. MSS. have plural; 8. E.
 °रूवे; B. °रूवरूवे. [Page 107] 1. B. विअडे; 2. E. विलिए; 3. B. विअडे;
 4. E. भइ; 5. E. B. चित्तसमं; 6. E. °णुरूय रूवे; 7. E. जोव्वणनिव्वत्तिए; 8.
 E. °गार; 9. C. छोदा; 10. C. B. °ण. [Page 108] 1. B. °पडि; 2. B.
 °गार; 3. C. छोदा; 4. B. रूवे after this; 5. C. °यरे; E. °भावमंडोवयारे;
 6. E. °दिस; 7. E. °इयावसहीओ; 8. C. कन्नाअंते; 9. B. °फा. [Page 109]
 1. B. तुम्भं; 2. C. E. अम्हे; B. अह; 3. E. पण्णवेमि; 4. C. E. धोव; 5. C.
 इणमट्टे; 6. E. तुम्भं पि; 7. MSS. धोव; 8. C. कन्नाअंते; 9. C. अंतोअंते; 10. E.
 usually °उडे. [Page 110] 1. B. अडहि; 2. C. °सा; 3. E. मह; 4. C.
 किं; B. के; 5. E. संवुट्टे; B. वुट्टे; 6. C. तडागं; 7. E. °पस्स; 8. E. B. तुमे; 9. E.
 usually उवरोहे. [Page 111] 1. E. अंतिए after this; 2. E. °द्वा; 3. B. अहं
 after this; 4. C. सव्व; 5. C. °चेव instead. [Page 112] 1. E. निग्गच्छइ; 2. E.
 देसमगं; B. देसमंते; 3. E. B. °निवडिय; 4. B. मिथिलं; 5. C. E. °सेजे (or रोहासजे?)
 B. रोहोसजे; 6. E. णयिं instead; 7. E. ओरुद्धं; B. ओरद्धं; 8. E. विरहाणि य after
 this; 9. E. °णम. [Page 113] 1. E. B. °स्सियं; 2. B. °पवे; 3. C. B. रोहासजे
 or रोहोसजे? Cp. Supra; 4. E. तं before this; 5. E. Instru.
 for Loc.; B. also except in लावणे; 6. E. देह; 7. E. °वइ; 8. E.
 एवं खलु instead. [Page 114] 1. B. दुरुव; 2. C. E. °ज्ज; 3. B. तुम्हे
 before this; 4. E. इमाओ; 5. E. अणगारा after this; 6. C. निव°;

7. B. चोत्थं; 8. E. B. तए; 9. E. बत्तीसं; 10. B. सयाई; 11. E. पयाया; 12. B. थ instead; 13. E. तुमं; 14. B. °म्हं; C. °म्मं; 15. C. च; B. Omits; 16. E. विहाडावेह; 17. E. छपि य रायाणो बालवयंसा; 18. E. पव्वाह. [Page 115] 1. C. अम्हे; 2. E. जम्मणजरमरणानं; 3. P. °याणं; 4. E. पव्वाह; 5. E. माणसे; 6. B. जियं; 7. C. °यतित्तए; 8. C. असीयं; E. असियं; 9. C. दलयइत्तए. [Page 116] 1. E. Loc. for Accu.; 2. E. B. कारो; Com. notes कायकोडियाणं; 3. E. B. °विहारं. [Page 117] 1. E. generally °दानं; 2. E. च after this; 3. C. E. °हि. [Page 118] 1. E. B. Singular; 2. E. दाहिणिं; 3. E. देविदे देवराया after this; 4. B. साहट्टु; 5. E. °पुव्विए संपट्टिया; 6. E. तयाणंतरं. [Page 119] 1. E. पक्खिवह; B. पक्खिवसति; 2. E. °निणाए; 3. E. माणुसगाओ गिहत्थधम्माओ and omits उत्तरिए; 4. P. रायं; 5. E. अरहस्स; 6. E. पच्चावं; 7. E. राजानो; 8. C. सव्वं. [Page 120] 1. E. केवलं उपपज्जइत्ता; 2. E. किंसुकं; B. भिसगं; 3. E. B. omit अट्ट; 4. E. अज्जियासंपया होत्था; 5. C. omits the Cpd.; E. some confusion; 6. C. चुरासी य; 7. E. °स्साई; 8. E. B. omit the Cpd.; 9. E. B. छस्सया; 10. B. पणवीसं; 11. C. °कड; E. °कर; 12. C. जुगंते कडं; 13. B. दुवासं; Com. also; 14. C. पाओगमणुवं; 15. C. B. केवलं; 16. E. पक्खेण after this; 17. E. बुद्धे अंतगडे परिनिव्वुडे after this. [Page 121] 1. E. मार्गदी; B. मायंदा; 2. C. °पालए; 3. C. B. °ल्लसं पि; 4. E. Generally वयासि; 5. C. भो; 6. E. ते; C. भो; 7. E. B. मार्गदियं Throughout; 8. E. अणुजाणिता. [Page 122] 1. B. अयाले; 2. C. समुच्छिए; E. °च्छिए; 3. B. अतिअट्टिं; E. अणियट्टिं; 4. E. °जणिं; 5. E. भंजं; 6. E. घुणां; 7. B. गलियगबंघणा लंबणा; 8. C. सोयं; 9. MSS. and P. °घोरं; 10. P. °छोमं; Dict. does not note छोमण: But all MSS. write छोमण; 11. C. °भट्टं; 12. E. °धावियं; 13. E. °गारं; B. °कारं; 14. E. B. करकरस्स; 15. E. °परणियभंडं; P. °पडियं भंडं etc.; 16. C. B. निवज्जा; E. णिवेज्जा. [Page 123] 1. B. फलगमखंडं; 2. B. संवू; 3. E. B. आससंति; 4. E. B. नालिएरां; 5. E. गत्ताई; 6. E. B. सत्तट्टं; 7. B. °तालं; 8. E. हो. [Page 124] 1. E. गंडरत्तं; 2. E. माउयाई; 3. E. पाडेमि; 4. B. एतेहिं; E. तेएहिं; 5. E. पूइयं; B. पुइयं; 6. E. पाडे; 7. C. B. उविं; Com. उप्पिच्छौ; 8. B. उद्; 9. E. °दानेण; 10. C. ददुर्; 11. C. B. °उम्भर(?); but उम् & उम्भ are very similar; 12. E. °विंदं; 13. C. उविग्गा generally; 14. B. उद्. [Page 125] 1. B. °वेल्लो; 2. E. B. °मयरं; 3. C. तएणं; 4. C. °फुडां; 5. E. संमुहं; B. ससुहि; Com. समुहिं; 6. E. वयासि; 7. C. महुत्तं; 8. C. B. सयं; 9. C. रयं; 10. C. धियं. [Page 126] 1. B. °विए; 2. C. कस्साघायणे; Dict. does not give आघायण; 3. E. आवई; B. °वर्ति; 4. C. B. ते; many times, MSS. write ते for से; (i. e. Plural for Sing.). Cp. also the Verbal forms: C. very often writes Plural for Sing.). 5. C. B. E. °उवुं; 6. P. ओहिणा after this. [Page 127] 1. C. °लहुगंसि; 2. E. वयासि; 3.

E. जक्ख° instead; 4. P. भे; 5. E. B. भे; 6. P. चेइयं: But the MSS. write व and च alike; चेइयं makes no sense; 7. E. जक्ख° instead. [Page 128] 1. C. E. सिद्धि; This word is often thus wrongly spelt by MSS.; 2. B. पडि°; 3. B. पुट्ठातो; 4. E. विद्युणामि; 5. E. °णाह; 6. C. B. वत्तंति; 7. E. तच्चंप्पि after this; 8. B. पट्टंसि; 9. E. पट्टिं; 10. C. सत्तअट्ट°; 11. E. B. °तल°; 12. C. उवागए; 13. C. सुयं. [Page 129] 1. C. B. °खडगं; 2. C. सत्तअट्ट; 3. E. B. अप्प°; 4. E. प्पाडेमि; B. पडेमि; 5. C. अणाडेमाणा; E. °णाढामाणा; 6. E. लोमेहि य before this; 7. E. जमिणं; 8. E. °दावदेवया; 9. P. उ after this; 10. E. वह°; 11. & 12. B. सललियं; C. सलिलियं; Com. सलीलयं. [Page 130] 1. C. निव्वुय°; 2. B. सव्व°; 3. E. B. सकलुसा; 4. C. णिकळक्क; E. णिच्चक्क; 5. E. विण्णण (?); Com. छिण्ण—and explains as स्त्यान vñhich is from शिण्ण; 6. C. °किय; E. णिक्खिव; 7. E. °हन्; 8. B. तुमे; 9. E. omits; 10. E. °रिस°; 11. E. °विविह°; 12. E. B. °सयाउल°; 13. E. B. एक्का°; 14. B. °विउल° (for विमल); 15. E. °लागारं; 16. B. सरिसनयणवयणं; 17. C. सद्धामि; 18. C. पि°; 19. C. जाए (for जा ते); E. जाओ; 20. C. B. °राहिं; 21. E. B. omit °अणु°; 22. E. °लायण°; 23. C. Some confusion in this and the next Cpd.; 24. C. गलहत्थण्णोल्लियमई; E. °गलणोल्लि°; B. °गलत्थणो°; 25. E. B. °सेट्ठे; Com. °सत्थं; 26. E. B. °प°; 27. E. °प्प°; 28. E. आसुस्तं. [Page 131] 1. B. सरिस°; E. पुरिस°; 2. B. पहि°; 3. C. °त्थि°; 4. C. °लिए; P. °लओ; 5. B. निरवेक्खो; 6. B. निरवेक्खेण; 7. B. °महुर° (for मउय); 8. C. सिद्धि; 9. C. वट्ठय; 10. E. B. °त्तारं; 11. E. °समुच्छलणं; 12. B. °गेण्हणं; 13. E. omits; C. °विमूथं; B. भोगभोगाई भूजमाणा. [Page 132] 1. E. अप्पाहरणं; 2. E. °विळ; 3. E. writes the Sentence in full. [Page 133] 1. E. though-out writes different sentences: नामं नयरे होत्था । तस्स णं etc.; 2. E. हीयंति; 3. B. पणि°; 4. E. दियाए. [Page 134] 1. E. B. कह; 2. E. °पत्ता मुत्तपुप्फफला; 3. C. °क्खाओ; 4. C. देसआरा°; 5. C. B. स°. [Page 135] 1. E. writes full sentences; 2. C. महासमणो°; 3. C. °जालाकुले; 4. B. इणमट्ठे; 5. E. निसन्ने (for वरगए). [Page 136] 1. E. विस्सा°; 2. E. मद्दणिजे; 3. C. वयणिजे; 4. E. B. throughout सुब्भि and दुब्भि for सुरभि and दुरभि; 5. E. पाओग°; 6. E. B. °णा°; 7. E. °वाहि°. [Page 137] 1. E. उवाइणा°; 2. E. कार°; B. करा°; 3. B. संवासेति; E. संवासावेइ; 4. B. ग°; E. गं°; 5. E. संवसा°. [Page 138] 1. E. पाणिज्ज°; 2. C. °भत्तु°; 3. C. E. तुब्भे; 4. E. तुब्भे तइया. [Page 139] 1. E. वयासि; 2. C. जाणिया; 3. C. तुब्भे; E. तुमं; 4. E. Reads तं before this; 5. C. वु°; E. वु°; 6. B. °च्छंति. [Page 140] 1. C. Always writes °उविग्गे (single व); 2. C. B. एगओ; E. पच्छागए (for पच्छा एगयओ); 3. C. तुब्भे. [Page 141] 1. E. reads after this:—तस्स णं रायगिहे स्सेणिए णामं राया होत्था । तेणं कालेणं २ समणे भगवं etc.; 2. C. Throughout ददुर°; 3. E. °सपरिवाराहिं; B. सरिसाहिं; 4. C. °क्खमंते; 5. C. B.

अनयाइ. [Page 142] 1. E. B. °रोवि°; E. °पाड्य°; 2. C. E. °रिणि; B. °रणि; 3. C. E. B. जाए; 4. C. °कोणा (Single क throughout); 5. E. °वत् (for पत्); 6. B. °मत्थ°; E. °मत्थ or (च्छ?); P. °मच्छ°; 7. B. °सदुन°; P. °सदुन्न°; 8. C. पुरि°; 9. B. कार°; 10. C. E. B. °तिम; 11. C. E. °माणा; 12. C. E. °भय°; B. omits; 13. C. °न°. [Page 143] 1. E. सुयमणो; C. सुणमणो; 2. E. कार°; 3. E. °किविण°; 4. E. B. एत्थ; 5. There is some confusion here. E. करोडिया य वायतणहारा; C. B. करोडिकारवा; P. करोडिया कारिया° तणहारा° etc; 6. C. B. °मल्ल°; 7. C. B. °कुसम°; 8. B. साहमणो; E. सोवमाणे; In line 1 on this page, MSS. write सोहेमाणे; Com. साहे°. [Page 144] 1. E. B. °कलंबक°; 2. E. समूससिय°; 3. E. B. खासे; 4. C. अरसा; 5. E. कंइ य उदरे कोट्टे; B. कंइ उदरे कोट्टे; 6. E. उव्वे°; B. उव्वेवणेहि; C. उव्वलणाहि; 7. C. अवद्वावणेहि; B. °द्वावणाहि. [Page 145] 1. E. °णेहि; 2. C. निरूवेहि; B. निरूवेहि; 3. E. सज्जेपुड°; 4. C. गो°; 5. E. reads after this : आइज्जेहि य; B. वेल्लीहि य; 6. MSS. मणियारे after this; 7. E. B. विणिमुक्के; 8. C. पीयपाणियं; E. पियपाणियं; 9. C. एस; E. सो; [Page 146] 1. E. सालाओ; 2. P. °दुणो°; 3. B. पा°; 4. E. सिरसावत्तं मत्थए अंजलि कट्टु for जाव. [Page 147] 1. E. जावज्जीवाए after this; 2. E. °पुरे; B. °लीपुरे; 3. E. णयरे होत्था; B. णयरे होत्था; 4. E. writes complete sentences; 5. C. कलायरस्स; 6. B. अत्तिया; 7. C. usually पोडिला and sometimes पोडिल्ला. [Page 148] 1. C. always कलायरस्स; E. कालायस्स; B. कलादस्स; 2. C. E. B. generally omit दारग; 3. C. E. B. °माणि; 4. E. B. रूवेण; 5. C. °वाहि°; 6. C. Always writes कलायरस्स, B. sometimes; E. कलायस्स or °दस्स°; but all MSS. also write कलाए. Thus there is no uniformity regarding the spelling of this word; 7. C. सत्तअट्ठ°; 8. C. omits; E. B. वा instead; 9. E. सुंके; 9. E. सुंके. [Page 149] 1. C. हत्थअंगु°; E. °लियाए; 2. C. हत्थअंगु°; 3. C. पायअंगु°; 4. B. °सकुलीओ; 5. E. अंगमंगाई; B. अंगमंगायं; 6. E. B. पयायामि; E. reads तं after this; 7. C. E. B. °सि°; 8. C. अन्नसुहदायणे; 9. P. सयमेव; 10. E. °वडुंति. [Page 150] 1. B. °हाय°; 2. C. तुब्भं; 3. E. अंबो; P. तेयलिगिहे after this; 4. E. B. °स्सियं; 5. E. B. °द्वा°; 6. C. पेहेइ; 7. E. B. तं णं; 8. C. निक्खवेति; 9. C. E. °लाओ; 10. C. E. पेहेहि. [Page 151] 1. E. मय°; B. मल्लियं; 2. C. लोगहियाई; E. लोगियाई; 3. C. B. जाया; 4. E. °भोयस्स वि; 5. E. दरिसणं; 6. E. नाव; 7. E. °रासि; 8. C. °कल्लं; 9. C. B. बहूसुया°. [Page 152] 1. C. हियवुडावणे; 2. C. E. भूय°; 3. C. गोलिया; 4. C. जाणाहि instead; 5. E. हत्थे before this; 6. E. छाएति instead; 7. E. B. °यारं; 8. B. उवदे°; 9. P. पडि° (for परि°); 10. C. कुटंब°. [Page 153] 1. C. तुब्भं; B. तुमे; 2. E. अन्नयरेसु; B. अणुत्तरेसु; 3. E. बोधे°; 4. C. अनतरेसु for अनंतरेसु; E. अणुत्तरेसु; 5. B. संपत्ते. [Page 154] 1. C. वियंगे होत्था; E. विगित्था; 2. P. °वद्वावए; 3. E. तए णं; 4. E. जा णं; B. जो णं; 5. C. °रेह;

6. Com. से; 7. P. पसासेमाणे; 8. E. कुमारं; 9. C. तं; B. omits; E. इयं. [Page 155] 1. B. से वड्ढति; 2. E. B. मम after this; 3. C. °ज्झयं; 4. C. °ज्झयं रायं; B. °ज्झयं; E. °ज्झयं णं; 5. E. पडुओ. [Page 156] 1. E. सए before this; 2. C. ओइल्ला; E. (at the bottom in Com.)—ओइल्ला; 3. E. °लियाए सिलाए गीवं; 4. E. ज्झामिए; 5. E. omits this sentence: and after this some words are not distinctly legible as the folios have stuck together; 6. E. omits; C. पोसेहिं; 7. E. तेयलिपुत्तेणं before this; E. B. तालउडगे; 8. E. B. अप्पा; and E. सुक्खे; 9. C. °पुत्तं. [Page 157] 1. E. वरसंति; B. वरिसंति; 2. E. अरन्ने; 3. E. B. omit; 4. E. तरिउं; 5. E. B. पवहणं; 6. B. °णा°; 7. E. वयासी; 8. E. सुभेणं अज्झवसाणेणं after this; 9. MSS. omit °पुत्तं; 10. E. पंचमह°; 11. E. °वट्ट°. [Page 158] 1. B. घण्णे throughout. [Page 159] 1. MSS. वयासी; 2. Com. पंडुरगे; 3. Com. गिहिधम्मो वा धम्मचित्ते वा; 4. C. अहिच्छ°. [Page 160] 1. B. नाइविगिट्ठेहिं; 2. E. पयाणेहिं instead; 3. E. B. देसगंते; 4. C. ससिरीया instead; 5. E. केवि; 6. E. After this °ठिच्चा तत्थ (for सत्थ). [Page 161] 1. E. नो रज्जेइ after this. [Page 162] 1. C. E. °भूए; 2. E. C. °वाराए; 3. E. B. °क्खडेइ; 4. E. °क्खडेइ; 5. P. अभोज्जं after this; 6. E. B. अह°; 7. E. B. °लिबो°; 8. E. B. omit ताव; 9. E. B. तित्ता°. [Page 163] 1. E. B. °रा°; 2. E. सुहंसुहेणं विहरमाणा after this; 3. E. उवगा°; 4. C. °रूयं; 5. P. निसिरणट्ठयाए; 6. C. B. °गहगे; 7. E. °सि°; B. °स्स°; 8. E. ताओ; 9. E. B. तित्तगं. [Page 164] 1. C. °रूयं; 2. E. यं; 3. E. °वायं अचित्तं थंडिलंसि एगंते; 4. C. °सू°; 5. C. मम तं; E. ममं तं. [Page 165] 1. B. °वदेस°; 2. E. B. अंतियं; 3. C. B. °इयं; 4. E. पुब्बा°; 5. C. सा नागसिरी माहणी जाव निसिरइत्ति after this; 6. E. °विट्ठे. [Page 166] 1. B. अह°; 2. E. विगयसिरी after this; 3. P. जाए instead; 4. C. °याइं; 5. C. °णाइं; 6. B. वहिज्जमाणी before this; 7. C. E. वु°; [Page 167] 1. C. B. देह°; E. देहिंवल्लियाए; 2. E. B. नरएसु; 3. E. उक्कोसं तेत्तीससागरो°; 4. C. उववट्ठेत्ता; 5. E. नरएसु; B. नरए; 6. C. B. omit; 7. B. पयाया; 8. C. सुक°; 9. C. अम्हा°; 10. and 11. E. सुकुम्मा°; [Page 168] 1. C. generally उमुक्क; 2. C. °क्कि°; 3. P. गिहस्स instead; 4. E. रूवेण; 5. E. °वेज्जा; 6. E. omits; C. B. सि instead; 7. C. भण after this; 8. B. मम after this. [Page 169] 1. C. °ऊए; 2. E. B. जाव instead; 3. E. B. पट्टयं; 4. C. E. B. सी°; 5. E. B. omit अग्गि; 6. B. पडिसं; 7. C. तिलगं; B. तल्लिगं. [Page 170] 1. C. always महत्त°; 2. B. सयणिज्जंसि; 3. E. अपास°; 4. C. तलगाओ; B. तल्लिगा°; 5. E. अणु°; B. °ज्जे°; 6. C. °गणइ; B. अवंगणइ; P. °गुण्डइ. [Page 171] 1. E. B. °दोसं only; 2. C. तुळ्ळे; B. तुळ्ळे; 3. C. तए णं before this; B. तेणं; 4. C. सरप्प°; 5. E. °प्पवेसं; B. जलप्पवेसं वा in addition to °प्पवायं वा; 6. B. वे°; 7. C. कुंड°; B. कुंडंतरिए; E. °तरिए; 8. C. वल्लिए;

E. विलए; B. विलजिए; 9. E. मणोरमा; 10. C. E. दंड°; 11. E. °पवे°. [Page 172] 1. C. E. क°; 2. C. उवलेहेति; 3. B. अबम°; 4. E. गंधुव°; B. गंधु°; 5. E. °लए; B. °लाए; 6. C. तलगंसि; B. तिलगंसि. [Page 174] 1. B. वसि°; 2. B. °वतियाए; 3. C. E. रोवेइ; B. रोयइ; 4. E. B. °वियारा; 5. E. °मीओ; 6. E. °रुइ; 7. E. °बाउसिया; B. °पाउसा; 8. E. उदयतिएण. [Page 175] 1. C. अणा°; 2. C. दुपए; B. दूवए; 3. B. धदुज्जे. [Page 176] 1. E. B. होउ; 2. B. °हीया; 3. MSS. Sometimes °प° and sometimes °व°; I have henceforth retained °व° throughout; 4. '2' after दोवई stands for the word 'रायवरकन्ना'; 5. E. B. Instr. for Loc.; 6. E. B. °डाहे; 7. Some confusion here; C. अज्जोया (or पा?) ए; E. अज्जोया (or पा?) एण; B. अज्जोया (or पा?) एण; 8. E. B. वरयामि; 9. E. B. °द्ध°; 10. E. मह°. [Page 177] 1. E. °दाणियं; 2. E. °दाणि°; 3. E. मह°. [Page 178] 1. B. खिप्पामेव भो instead; 2. E. किंव; 3. C. अज्जुनं; 4. E. सेल्लं; 5. E. °घोष°; 6. E. °सिधु°; 7. E. B. भेसग°; 8. E. B. विराडं; 9. E. कियंगं; B. कीयगं. [Page 179] 1. B. आगमं; 2. E. Singular; 3. E. संवुट्टा. [Page 180] 1. C. °भत्त°; 2. E. B. पचावर°; 3. B. धदुज्ज°; 4. B. नामकएसु; 5. C. विहरह; 6. C. °किए°; 7. C. कल्लं. [Page 181] 1. E. णिसेइ; 2. C. निसेइ; E. omits; 3. E. °मयह°; 4. C. B. किडा°; 5. E. °रुइ; 6. C. °द्धुणि°; 7. C. B. दर°. [Page 182] 1. C. °समत्थ°; 2. E. °विकंत°; 3. E. B. omit दस; 4. E. °पुरिसाणं तेलेक्क° etc.; 5. E. B. पुणो; 6. E. omits; B. लेति and °omits होइ; 7. E. वयइ; 8. B. धदुज्जण° always; 9. MSS. °हइ; 10. E. करेइ; B. कारवेइ; 11. E. °कारी; B. °कारे. [Page 183] 1. E. B. °खेभ°; 2. E. B. सए आवासे; 3. E. से°; 4. E. ण्हाणेइ; 5. B. °कारं. [Page 184] 1. E. B. °त्थोवत्थिए; 2. C. B. स°; 3. C. E. डंडकमंडल°; 4. B. कच्छवीए; 5. E. B. °सेल°; 6. B. °अभि°; 7. B. °भ°; 8. C. °कोऊहल°; 9. P. and Com. एक्कमणिं-obviously wrong for पक्कमणिं; 10. E. गगण मँहि°; 11. Com. थिमियमेइणीयं णिम्भरजनपदं; 12. E. ओलोइयरम्मं; B. ओलोयंते; 13. E. समावयइ; 14. E. B. °पच्च°. [Page 185] 1. There is hesitation among MSS. re. अयर° or अवर°; 2. B. सतिमं (omits पि). [Page 186] 1. E. तं instead; B. एयं; 2. C. ति वा; 3. E. पियत्ताए; 4. E. °ट्टिले°; 5. C. उवसो°; 6. C. महु°; 7. E. इमे; 8. E. सओ पासाओ. [Page 187] 1. C. जुहु°; 2. C. महु°; 3. B. कयं; 4. C. बहिया; 5. E. उक्खित्ता. [Page 188] 1. C. एव°; 2. E. जाव instead; 3. E. उक्खित्ता; 4. C. करेइ; E. करंति. [Page 189] 1. B. °उरवरगए; 2. C. एवं; 3. E. B. omit. [Page 190] 1. B. ताडेह; 2. C. B. सद्धं; 3. Not in MSS.; 4. P. साहरिया; 5. C. सए; 6. E. °समुद्धमज्जे; 7. E. जेण; B. जो णं; 8. C. सद्धं. [Page 191] 1. E. B. अक्क°; 2. E. °नाहा; B. °णाहा; 3. B. °धी° for विइ; 4. E. आणमाणे; 5. C. दारए; 6. E.

आक^०; B. अणु^०; 7. B. अवदा^०; 8. E. B. निच्छ^०; 9. E. B. अमि^०;
 10. C. B. उवदेस^०; 11. E. विकप्पणाविकप्पेहि. [Page 192] 1. B. जुज्झह;
 E. जुज्झहिह; 2. B. पिच्छेह; E. पेच्छहिह; 3. E. द्ययपडागा; B. पडागा;
 4. C. पुम^०; 5. E. तणु^०; 6. C. यन्न^०; B. वन्न^०; P. वण्ण. [Page 193]
 1. C. B. रोहासजे Cp. Supra; 2. C. करेण^०; 3. E. न याणसि; 4. E. उत्तम-
 पुरिसाणं after this; 5. E. मं for णं; 6. C. माणेमाणं; E. B. हव्वमाणे only;
 7. E. भयमत्थ. [Page 194] 1. C. B. किमन्ने; 2. There seem to be
 some confusion here; E. सदाइ; B. सदाइ सुणेइ (instead of
 भदा); P. also; 3. MSS. किमन्ने. [Page 195] 1. B. एयं; 2. E. B.
 वेलाउले; 3. E. पंचजन्नं; 4. C. आगयस्स; 5. E. न जाणसि. [Page 196]
 1. E. द्विया णावं; 2. E. सुयंति instead; 3. E. भागं; 4. C. महु^०; 5. E.
 उस्सेमो (?); 6. C. सुससुरेइ; E. सुमसुरेइ; P. च्चेइ instead. [Page 197]
 1. E. कोट्टे; B. कोट्टि; 2. C. वीदवयइत्ता; E. B. वइत्ता; 3. E. चुच्चाइ; P.
 notes जुज्झइ; 4. E. अन्मइवयणा; B. अपूर्ह^०. [Page 199] 1. C. B. ट्ट^०;
 2. B. सुरट्ठा instead; 3. E. वंदए; 4. C. हत्थि^०. [Page 200] 1. P.
 एयमट्ठं after this; 2. B. पचुविकखंति; 3. B. गतियं; 4. MSS. सेत्तुजं; 5. B.
 अणवकंखं; 6. MSS. जे; 7. E. Throughout-जुहिट्टिल; 8. C. दुवइस्स;
 B. दुवतीस्स. [Page 201] 1. E. B. संजत्ता^०; 2. E. संज^०; 3. E. B. उपाइय^०;
 4. E. समुत्थिए; 5. E. आबु (or पु?)नियं; 6. C. सूरइ; 7. E. गम्भेजगए;
 C. B. गम्भेजगा; 8. C. मं; 9. E. संवूढा; B. वू^०; 10. C. कइ. [Page 202]
 1. E. याए; 2. C. तए; 3. E. न्नगारा; above also; 4. B. पोयवहणपट्ठे;
 5. E. एगमग्गट्टियाहिं; 6. E. इव instead; 7. B. भो; 8. E. कहिं; 9. E.
 पुव्वदिट्ठे; 10. E. B. संवूढा; 11. E. णगारा throughout. [Page 203]
 1. E. सोइंदियं; 2. B. Supplies the passage; 3. B. पोयवहणट्ठणे; 4. E.
 उ(तु?)ट्ठंति. [Page 204] 1. E. B. सोइं; 2. E. तुइंति; 3. C. निकरे; 4. C. B.
 पोरे; E. पोराणगस्स; 5. C. B. फासिंदिय only; E. फासिंदियाइ; 6. C. B.
 गोउरा. [Page 205] 1. E. चार्त्ति; 2. C. पोयवहणे; 3. E. संज^०; 4. C. B.
 अविलाणेहि; 5. P. वेल्पहारेहि य after this; 6. P. वित्तं (Probably wrong
 for वित्तं); 7. E. B. छिवप्पं; 8. E. B. ट्टिस्सइ; 9. E. ककुहाहिरामे; C. कवुहा.
 [Page 206] 1. P. कसायं वमहुं; B. omits अंविरे; 2. MSS.
 जे; 3. C. विरिद्धिरे; 4. Com. सुहेसु; 5. Com. करेसु. [Page 207]
 1. C. संसमा; B. सुसमा; E. संसमा; I have retained संसमा
 throughout; 2. C. आडेलियाओ; E. आलोडिइयाओ; C. पोतुल्लए; E. पोतलए;
 4. E. साडुलए; C. लंगोटा instead; 5. E. खिज्जणाहि; 6. E. B.
 उवलंभाणियाहि; 7. MSS. omit. [Page 208] 1. E. निव्वं; B. निव्वंच्छेइ;
 2. E. चिट्ठइ instead; 3. C. अणां; E. हट्ठिं; 4. E. चोरं; 5. E. कोडंबं
 6. E. प्पवेसफरिसो वं; 7. B. कूवियजणस्स; 8. B. तक्करसेणां; P. चोरसेणां;
 9. C. कुडंगेयाणं वि; B. कुंडगे; 10. E. निष्णाणं; 11. E. व्भामाणे; B. व्भमाणे.
 [Page 209] 1. E. णाहिवइ 2. B. पि हु; 3. C. B. तस्स; 4. C. सद्धं.

- [Page 210] 1. C. E. असणेणं ४; 2. C. संसमा; E. सुंसमा; 3. C. पुवाव°; 4. E. णिक°; B. णिक°; 5. E. अंसा°; 6. Com. °ल्लासियाहिं; 7. C. दावा°; E. B. दावा°; 8. C. छिप्पंतरे; E. B. छिप्पत्तरेहि; 9. C. पच्चावरुहकालसमयंसि after this; 10. C. गेहं; E. गहवनं णं; 11. C. मुइ°; 12. C. तालउग्घा°; E. तालालु°; B. तालुग्घाणि°; 13. B. जो. [Page 211] 1. E. B. °ह°; 2. C. °तयासे°. [Page 212] 1. E. अगा°; 2. E. पम्हु°; 3. E. °वियल्लिया; B. °विएयल्लिया; 4. E. फर°; 5. E. पंचहिं पुत्तेहिं; 6. C. कुहस्स 2; 7. C. परभमंते; P. notes the V. L. परद्धंते; 8. C. तए णं; 9. B. अवद्धा; P. अवहिद्धा (?). [Page 213] 1. E. °हिह; 2. C. E. दुव°; B. ठा°; 3. B. E. गित्थरेह; 4. E. अवत्थडा; B. अवद्धा; 5. E. B. °धुक्के°. [Page 215] 1. E. वासे after this; 2. E. बहिया after this; 3. C. कुंड°—but not consistent; 4. E. gives the whole sentence 'धम्मघोसा नामं etc. [Page 216] 1. B. महया २; 2. C. °री°; 3. E. सकंपं; 4. E. B. तेइच्छं; 5. C. रोगातंकाओ; 6. संमु°. [Page 217] 1. E. °इत्ता; 2. E. B. विग्गो°; 3. E. °वट°; 4. E. B. अम्म°. [Page 218] 1. C. °देइ; B. आसाइए. [Page 219] 1. B. विणिघाय°; 2. E. B. एक्का°; P. एक्क°; (E. एकासराणि). [Page 220] 1. C. B. cmits. [Page 221] 1. E. समणे भगवं महावीरे instead; 2. E. °वडिसए विमाणे; 3. E. जत्थ; B. गत्थ; 4. C. E. निसेइ; B. निमेइ; 5. C. आभोगियं. [Page 222] 1. C. °पुत्थणी; B. पडिपुच्छ (त्थ ?) णी; E. पडियत्थणी; 2. C. B. नवुस्सेहे; 3. E. °दियं; 4. E. °परिक्खित्ता. [Page 223] 1. C. °सुहेणं; 2. C. जरमर°; 3. C. छत्ताए; E. छताहिइए; 4. B. °राईसए. [Page 224] 1. E. कालिसिस्सिणि; 2. E. सिस्सिणि; 3. C. चेइए; B. वे (or चे ?) तेइ; 4. E. अज्जियं; 5. E. B. °पाउ°; 6. C. E. B. °पाउ°. [Page 225] 1. E. अन्नमन्नं instead; 2. C. B. वसित्ता; 3. B. पडिकं; C. पाडियकं; 4. C. छेदेइ; 5. E. अवतरिया only; 6. E. °ज्झभाग°; B. °ज्जाएभाग° 7. E. उव्व°. [Page 226] 1. B. निहं; 2. E. विमाणे instead. [Page 227] 1. E. धूया after this; B. नूय; 2. E. °तिमे; B. °इमे; 3. E. इला; 4. E. इला°; 5. C. अयले; 6. C. अइला Probably confusion of the two spellings; B. अला; 7. E. °सोतरया; P. कमासतेरा ?; 8. C. °देवस्स विसेसा. [Page 228] 1. C. विऊ य पुत्ता (त्ता ?) 2. E. बहुपुण्णथा; 3. B. उत्तरमायारया वि य; 4. C. तारया; E. भरिया वि य; 5. C. फडाइया; B. फलाइया; B. कच्छकच्छावईफडाइय; 6. E. °कालिदाणं; 7. C. अइखुराए; B. अरक्खए; 8. C. अइखुराए; B. °क्ख°. [Page 229] 1. E. भंडी°; B. भंडी; C. omits भंडी; 2. C. सुई; B. सूती; 3. C. B. नवमिया.

By the Same Author

- (1) Samarāicchakāhā (Ch. VI)
- (2) Paūmachariya (Chs. I-IV)
- (3) Antagaḍadasāo; Aputtarovavāiyadasāo and
Bambhadatta
- (4) Rāyapaseṇaijja (Second part)
- (5) Dasaveāliya Sutta (Chs. I-VI)
- (6) Aḡaḡadatta
- (7) Nāyāḡhammakahāo (Chs. IX & XVI)

All these texts are edited with an Introduction, Notes
and English Translation.

For copies apply to :—

Prof. N. V. Vaidya, M.A.

Fergusson College,

Poona 4